



8.58


4/10/17/17


Ex bibl. Ezech. Spanhemii.

P.o. lat. 1673 L


Cox N 1671 258

Reserve









1870

*Ex dono Auctoris Principis et
Episcopi Paderbornensis.*

18064 un

P O E M A T A
FERDINANDI
LIBERI BARONIS
D F
FURSTENBERG.

14/188/157

Bayerische
Staatsbibliothek
München

POEMATA

FERDINANDI LIB. BARONIS DE FURSTENBERG.

Accedunt

Adoptivorum Carminum Libri II.
Editio altera priori mutata.

AMSTELODAMI

Apud Danielem Elzevirium.
MDCCLXXI.






REVERENDISSIMO ET
ILLUSTRISSIMO VIRO,
W I L H E L M O
LIBERO BARONI
DE FURSTENBERG,
PRÆPOSITO MONASTERIENSI,
CHOREPISCOPO TREVIRENSI,
CANONICO SALISBURGENSI
ET PADERBORNENSI,
PRÆPOSITO COLLEGIORUM IN
BUSDORFF ET MESCHEDE,
PRIORI S. Mariæ DE CAMPEIO
IN ALPIBUS TRIDENTINIS,
CONSILIARIO INTIMO MONASTERIENSI,
AVUNCULO SUO

S. P. D.

CHRISTIANUS THEODORUS
de Plettenberg ex Lenhausen, Canonicus Hildeshemensis.

 *Iquis eâ ætate, quâ Populus Roma-
nus, toto propemodum orbe terra-
rum, omnia armis domita in suam
potestatem redegerat, & paribus
Imperio suo florebat ingeniis, Poëticam nobili-*

tati indecoram esse non dubitasset affirmare, is
profectò furoris & insaniam compertus, in Anti-
cyram insulam relegatus fuisset. Jam verò in
Germaniâ nostrâ, quæ adhuc Romanorum Im-
peratori paret, & Romani Imperii nomen re-
tinet, eoque vocabulo ab aliis regnis provinciis-
que distinguitur, tantopere perniciosus ille error
increbuit, ut contrà disputare & falsissimam
istam opinionem omni studio & contentione re-
fellere, cùm omnibus popularibus nostris, tum
nobilibus maximè juvenibus, unâ mecum in
ætatis flexu, ac veluti bivio quodam constitu-
tis, aut lubricum juventæ nondum egressis, non
utile tantùm, sed etiam necessarium esse videa-
tur. Ita enim ratiocinantur passim homines no-
biles, qui alios ea volunt ignorare, quæ ipsi vel
hebetudine mentis, vel inertia, aut voluptatum
cupidine non didicerunt, ut eos, qui carminibus
pangendis inesse sibi ingenium atque doctrinam
ostendunt, ludo potius ac ferula, quàm reipubli-
cæ bene gerendæ natos esse affirmant, & in soli-
tudines atque cænobia sese abdere jubeant; eos
verò qui ad eximiam atque natalibus suis dignam
clari-

claritudinem pervenire, atque vel ipsi populos imperio regere, vel dominantibus assistere cupiunt, longè aliâ ad gloriam viâ grassari, aliis artibus ac studiis omnem operam atque industriam impendere; carmina verò, ut ludicra & inania ac prope puerilia, vel nescire prorsus, vel certè contemnere oportere contendant. Qui quidem sermones tantam hoc ævo apud nobiles juvenes fidem invenerunt, ut etiam sacerdotiis ornati, & aris templisque destinati, pugilatum potius, aut regimen equorum exercere, aut venando peragrarè saltus, aut conviviiis & compotationibus bonum otium conterere, quàm dulces ante omnia Musas, & amœnissima bonarum artium studia sectari, sibi suisque familiis honorificum esse arbitrentur. Hi autem primùm omnium docendi sunt, Poëticam non esse rem sordidam & abjectam, sed excelsam prorsus atque divinam, & ab ipso mundi exordio generis humani consensu laudatam. Quia enim non perinde ac aliæ pleræque disciplinæ & artes, à quibuslibet ingeniis improbo tandem labore & assiduâ exercitatione paratur; sed paucis iisdemque præ-

stantissimis mentibus singulari quodam divini
Numinis afflatu contingit, vetustissimis Poëta-
rum tantus honos est habitus, ut Diis geniti,
eorumque interpretes atque convivæ crediti
sint, neque Deos ipsos aliter loqui suavitate car-
minum obstupefacti homines existimaverint.
Insequentibus autem ætatibus, & multò ele-
gantissimi Poëtæ sunt exorti, & summi Philo-
sophi ac sapientes, Plato & Aristoteles, Solon
& Thales, aliique doctrinæ famam sibi absque
Poësi quærendam non esse judicaverunt, & ma-
ximi Reges, atque clarissimi Imperatores egre-
gios Vates, eorumque Poëmata veris pretiis
æstimaverunt. Quorum sine dubio princeps
Alexander Magnus tanti Poëticam fecit, ut
Thebis expugnatis atque incensis, Pindari adi-
bus atque familiæ pepercerit, & Homeri Iliadi,
unà cum gladio illo invicto ac domitore orbis
terrarum, suo pulvinari suppositæ semper in-
dormire, eamque in pretiosissimo Darii scrinio
collocatam circumferre voluerit, eoque maxime
felicem prædicaverit Achillem, quod talem tan-
tumque virtutis suæ præconem nactus fuisset.

Nec

*Nec solum Græci liberalibus disciplinis exculti,
sed etiam barbari Septentrionis populi maxi-
mum Poëtis honorem habuerunt. Cujus sanè
illustre exemplum Dania olim præbuit, quando
neminem Poëtâ digniorem regno judicavit. Id
quod Saxo Grammaticus l. 6. Hist. Danicæ his
verbis testatur. Defuncto Frothone, in-
quit, Dani Fridlevum qui apud Rusciam
educabatur, falsò extinctum rati, cum
jam Regnum Regis inopia claudicare,
nec in Regia gente continuari posse vide-
retur, hunc sceptro dignissimum arbitra-
ti sunt, qui illustrandi Frothonis gratia,
recenti ejus tumulo plenum laudis car-
men affigeret, famamque extincti Regis
specioso posteris titulo commendaret:
Tunc quidam Hiarnus Danicæ admo-
dum Poësis peritus, ut claritatem viri in-
signi dictorum monumento prosequere-
tur, præmii magnitudine concitatus, mo-
re suo barbarum condidit metrum, &c.
Quo carmine edito auctorem Dani dia-
demate remunerati sunt. Ita ab iis epita-*
* 5 *phium*

phium Regno repensum , Imperiique pondus paucarum literarum contextui donatum est. Romana verò Respub. uti cæteras gentes rerum præclarè gestarum gloria, & Imperii magnitudine superavit, ita & literarum atque imprimis Poëseos amore longè antecelluit: nobilissimi enim ac potentissimi quique Romanorum Musas mirificè coluerunt; inter quos Scipio Africanus Ennium Poëtam sibi familiarissimum, atque in omnibus expeditionibus assiduum comitem adscrivit, eumque & vivum & mortuum magno honore honestavit. Inde certatim Senatores, Consules, Imperatores, Dictatores & Principes, L. Sylla, Hortensius, Cicero, Sulpitius, Varro, Torquatus, Messala, Brutus, & alii cum eloquentiæ laude, & amplissimis honoribus atque triumphis Apollinarem lauream conjunxere. Maximè verò in hoc genere admirabilis fuit C. Julius Cæsar, qui etsi modis omnibus incitatâ militum celeritate tam brevi tempore vicerit orbem terrarum, ut vix tabellarius quisquam velocius eum percurrere potuisset videretur, nihilominus in tanta festina-

stinatione ac mole curarum versus facere, & itinera sua atque res gestas in carmen conferre non omisit. Mox felicissimus omnium ac potentissimus Imperator Augustus, & ipse luculenta carmina factitavit, & summorum Poëtarum ingenia, quibus ea potissimum ætas effloruit, insigni benevolentia ac humanitate complexus est, & Populus Romanus ad exemplum Principis sui compositus, ¹ auditis in theatro versibus Virgilii, surrexit universus, & præsentem forte spectantemque Virgilium sic, quasi Augustum est veneratus. Exin Tiberius, etsi tristi arrogantia atque superbia, & immani crudelitate intestabilis, Musis tamen se facilem ac benignum præbuit, & Lyricum carmen ac Græca Poëmata reliquit. Germanicus autem Cæsar, quò nihil majus meliusque fata Romanis ostendisse mihi videntur, ut omnes ante se duces bellicâ gloriâ æquavit, comitate & continentia, cæterisque virtutibus vicit, ita & Poëtica laude superavit. Sed & Claudius Imperator hac arte non caruit, & Ne-

¹ Quintilianus in dialogo de oratoribus.

ro carmina libenter ac sine labore composuit, quod adeò non improbavit Seneca, ut majori quàm antea studio Poësin complexus, tragædiis scribendis facundiam exercuerit: neque id ei fuit impedimento, quò minus ² Imperio Populi Romani unus omnium dignissimus esse crederetur. At Domitianus, quamvis crudelissimus tyrannus, Poëseos tamen pulcritudine ita captus, atque mollitus est, ut & ipse Poëmata scripserit, ac recitaverit, & erga Statium atque Martialem beneficum se & liberalem ostenderit. Titus autem Imperator, & Nerva, generis humani delitiæ, omnes, quibus excelluere, virtutes carminum suavitate condierunt; & Hadrianus, Ælius Verus, Alexander Severus, Balbinus, Gordianus, Albinus, Macrinus, Gallienus, Numerianus, Julianus, Gratianus, Theodosius, Imperatoriam virtutem esse Poësin suo exemplo docuere. Proximos autem Imperatoribus honores iis quoque tempestatibus eximii Poëtæ sunt adepti, cujus rei testes sunt Silius Italicus, Plinius junior, Ausonius, Boëtius

Con-

Consules, Lucanus Augur, aliique amplissimæ
dignationis insignibus ornati; in quibus fuere
Claudianus atque Sidonius Apollinaris, quo-
rum illi Arcadius & Honorius, huic Leo &
Majorianus A.A.ob præclara Poëmata statuas
in foro Trajani, flagitante Senatu, erigi colloca-
rique jusserunt: Apollinaris autem tantæ apud
Majorianum fuit auctoritatis, ut eo consiliante
cum Theodorico Gothorum Rege pax facta, &
ipse mensæ Augustæ admotus, atque Comitibus ti-
tulo sit honestatus; qui postea Arvernensium
Episcopus creatus, hoc munere præclare gesto cæ-
lo receptus est, & Sanctorum catalogo adscri-
ptus in Romano Martyrologio reperitur. Post-
hæc everso à barbaris Imperio Romano, concidit
quoque Poëtica facultas; attamen reliquiæ ejus
& rudera tanti à D. Carolo Magno, ejusque
vestigia secutis Imperatoribus sunt æstimata, ut
quivis facile possit intelligere, quanto Vigentis
atque florentis Poëseos amore fuissent arsure, qui
mortuæ pridem ac sepultæ umbram & simula-
crum tali benevolentia sunt complexi. Jam ve-
rò cum ante ducentos circiter annos illustrium
viro-

Virorum operâ, velut è cælo delapsa, redierit in orbem terrarum, & à summis Pontificibus, Imperatoribus, Regibus atque Principibus non solum per Italiam, tanti boni originem, aliasque præcipuas Europæ provincias, sed etiam Germaniam, ipsomet Augustissimo Cæsare Maximiliano I. Poëtices cultore, & Mauritio Hassiæ Lantgravio egregio Poëta gloriantem, ac VVestphaliâ nostrâ, à viris genere ac virtute præclaris Rudolpho Langio, Canonico Monasteriensis Ecclesiæ,

(³ Primus Melpomenen qui rura in VVestphala duxit,

imò qui primus Germanorum, post restitutas literas, eruditum carmen scribere cæpit) & Hermannò Buschio, atque Alexandro Hegio, id temporis illustratam, honorificentissime sit excepta, quid, obsecro, causæ est, cur hac tempestate nobiles Germani, quanquam ita geniti, atque ab ipsa natura formati, ut altissima quæque ac præstantissima cupiant, humilia verò atque plebeia aspernentur, nobilissimam illam artem indignis modis

modis despiciant, atque traducant? Verum enim verò si cum Gothis potius & Vandalis, Hunnis ac Longobardis eam proterere atque conculcare, quàm cum Imperatoribus ac Regibus, aliisque summis viris complecti animis obstinaverint; nunquid & omnipotentis DEI oracula despicient, quibus ea, quæ in laudem Poëseos diximus, perspicuè comprobantur? Si Linum & Amphionem, Orpheum atque Arionem, tractasque carminibus sylvas, & saxa, ferasque, & animalia maris cicurata derident, quanquam hisce fabulis homines barbari, ac ferarum & piscium more vagantes, dulcedine carminum ad civilem societatem traducti significantur; nunquid verissimis maximisque miraculis illustrem Vatem, Deo Opt. Max. familiarissimum, Sacerdotum, Ducum, & Prophetarum facile Principem, Moysen⁴ ignorare se aut ludibrio habere profitebuntur? Si omnibus rempublicam capeffentibus, aut gubernantibus Poësin indecoram, ac noxiam esse contendunt, num Davidem⁵ quoque maximum Regem

⁴ Josephus lib. 11. de antiquitat. Judæorum.

⁵ Idem Josephus lib. 7. & S. Hieronymus præfat. in Chron. Eusebii.

Regem & Vatem detrectare audebunt, cuius
versibus in hodiernum usque diem, & in omne
tempus Deum Opt. Max. gaudere, nobisque
propitiari credimus atque confidimus? Si versus
facere & insanire contigua esse atque finitima
jaciunt, an Salomonem quoque deliramenta lo-
cutum esse predicabunt, omnesque sacrosanctos
Prophetas explodent, qui divino Spiritu instin-
cti fudere carmina, & celestia quæ videbant
arcana cecinere? Longè alia mens fuit sanctis-
simis atque disertissimis viris, Cypriano, Pau-
lino, Hilario, Ambrosio, Fulgentio, & Gregorio
Nazianzeno, qui Christianam disciplinam non
solutâ tantum oratione, sed etiam versibus mi-
rabiliter illustrarunt, ac vcluti Patres & Præ-
ceptores ab Ecclesia Catholica ubique coluntur.
Nec inferius majestate sua ratus est idem stu-
dium summus Pontifex S. Damasus, eumque
secuti multis post ætatibus rerum gestarum glo-
ria clarissimi Principes, Pius Secundus, Leo De-
cimus, & hoc ævo Urbanus Octavus, cui po-
tissimum à nobis immortales gratiæ debentur,
quod ab eo in hæc regiones cum imperio missus
est

est Fabius Chisius, Episcopus Neritonensis, flos
Italicae nobilitatis, & bonarum artium decus
& columen, qui suâ cohortatione atque exemplo
nos docuit, artem Poeticam non esse vulgarem
ac tenuem, & imi tantum subsellii viris conve-
nientem, sed hominibus veteris prosapia ac mul-
tarum imaginum maximè decorant, cumque fa-
miliam Furstenbergicam hac opinione pridem
imbutam, & communis inscitiae ac erroris ex-
pertem, atque duobus præcipuè laudatissimis
viris, & Poetica cultoribus, Theodoro Episcopo
& Principè Paderbornensi, ejusque germano
fratre Casparo Furstenbergiô, Westphaliae &
Angariae summo cum imperio olim Praefecto,
avo tuo, celebrem atque illustrem comperisset,
eximia eam charitate diligere cepit, Teque in-
primis, Vir Illustrissime, & fratrem tuum Fer-
dinandum, quos & ingenii bonitate & dome-
sticis incitatos exemplis, maximos in omni po-
litioni literaturâ videbat facere progressus, in
sinu ac deliciis habuit, suasque Musas juveni-
les à vobis potissimum typis evulgari permisit.
Cardinalis factus, quanquam immensis occupa-
tioni-

tionibus prope obrueretur, nihilo tamen minus, quod aliquando dixit Antiphanes apud Athenaeum, Musas inter & literas versatus assidue, quoties agebatur sapientiae negotium, frequens cum eodem Ferdinando suavissime de Musis sermocinari solitus est, ac biduo ante, quam Pontifex Maximus crearetur, venustissimo carmine hexametro comitia Vaticana descripsit, ac Ferdinandum suum eo munere impertivit. Rerum potitus eundem confestim secretum Cubicularium creavit, & inter intimos amicorum tenuit, ac serme quotidie, complures à prandio horas, tam de republicâ, quam de liberalibus disciplinis cum eo colloqui, atque in hunc modum intervalla negotiorum elegantissime dispungere consuevit. Quemadmodum autem huic Pontifici verè Maximo purpuram imprimis, dein Summum Pontificatum invidia nequicquam praepedire connixa est, & instar aranea ex amœnissimi ejus ingenii floribus venenum exsugens, rei Poëticae scientiam ei vitio vertit, ita & Ferdinandum simili modo allavit, ac illud Martialis ei obiectare visa est.

Lin-

Linguâ doctus utrâque, cujus unum est
Sed magnum vitium, quod est Poëta.

*Veruntamen hisce obtreffationibus nihil aliud
quàm sibi dedecus, illi gloriam peperit. Nam
ALEXANDER Pont. Opt. Max. paucis post
annis eum Episcopum & Principem Paderbor-
nensem rite electum, totâ Urbe, ac republicâ li-
terariâ, bonisque omnibus applaudentibus con-
firmavit, & ubi ductu atque auspicio suo rem
optimè gerere, & sicuti Poëseos amore cultuque,
certis numeris ac legibus, & exacta atque con-
cinna Verborum ordinationi insueverat, ita &
in administratione reipublicæ, nihil agere con-
fuse, ac perturbatè, sed omnia apud eum dispo-
sita, moderata, tranquilla, priscam gravitatem
ac majestatem ordinis ac dignitatis Pontificiæ
retinere comperit, ampliori dignum ratus impè-
rio, Monasteriensis insule cum Paderbornensi
conjungendæ potestatem ei & copiam fecit. At-
que utinam prælum illud insigne, quò copius o-
mnibus in aciem eductis, valida factio cum Fer-
dinando confligit, ac malè pugnavit, hoc est, co-
mitia Monasteriensia, totumque de futura in*

locum ejus Episcopi successione certamen, & alumni sui gloriosissimam victoriam atque triumphum vidisset, quæ paulò antè rebus humanis exemptus è cælo prospexit! Veruntamen quod ea CLEMENTE IX. imperitante sunt gesta, ad laudem quoque Poëseos ac gloriam pertinet, cujus hic Pontifex fuit eximius cultor, teste viro eloquentissimo Augustino Favorito, qui die funeris eum pro concione laudavit; ita ut Urbanus VIII. cum ab immensâ curarum mole aliquam remissionem animi quæreret, nullâ in re magis quàm in familiari Clementis consuetudine eam inveniret, delectatus præsertim mirâ illius ad sacram Poësin dexteritate, in quâ se Gregorii Theologi, aliorumque veterum Patrum exemplo aliquando exercebat, tantâ cum Romani theatri atque universæ Italiæ approbatione, ut in eâ facultate sæculi sui facilè princeps esset & haberetur. Hic itaque sanctissimus atque doctissimus Pontifex CLEMENS IX. in tuenda atque ornanda familia Furstenbergica decessorem suum

suum egregiè imitatus, in celeberrimo illo, quod dixi, de re Monasteriensi certamine victorem pronuntiavit Principem Ferdinandum, illamque provinciam longè amplissimam ei decrevit, ita ut aliquando à confluentibus Visurgis & Dimolæ usque ad Oceanum sit imperaturus. Te autem, Vir Illustrissime, ab ALEXANDRO VII. fratri tuo Episcopo & Principi creato suffectum, & amplissimis sacerdotiis ornatum, atque ad Casarem, & omnes Catholicos Electores & Principes, augustissimum Ratisbonæ concilium habentes, ablegatum, post illius excessum, idem CLEMENS IX. è Germania in Palatium ac secretum cubiculum suum revocavit. Quod & hic Pontifex CLEMENS X. se præstiturum fuisse testatus est, nisi tu post fata CLEMENTIS IX. præpropere ab urbe discessu, Germanicum tibi jam cælum Italico magis placere ostendisses. Quò sæpius mihi libet mirari, ac detestari etiam incredibilem quorundam hominum perversitatem, qui nobiles viros ludo & aleâ, luxuque & comestationibus, aliorumque vitiorum similitudine

benevolentiam Principum adeptos collaudant,
Vos autem sanctissimis atque innocentissimis
moribus, & optimarum artium studiis in re-
gia totius orbis Christiani gratiam, & dignita-
tem, honorem consecutos cavillantur. Quid
enim per Deum immortalem nobilitati totique
nationi Germanicæ magis honorificum ac utile
potest esse, quàm nobilissimos atque doctissimos
gentis nostræ viros, à Summis Pontificibus ho-
norari, amari atque in intimam familiaritatem
admitti? eorum opera ac patrocinio sacerdotia,
atque omnis generis beneficia, optimis atque di-
gnissimis contingere; ab his consilia Reipublicæ
salutaria suggeri; Germanos in urbe commo-
rantes ad Pontificem, & eminentissimos reipu-
blicæ Christianæ Proceres, aliosque ornatissimos
atque optimos viros deduci, atque in hunc mo-
dum arceri à vitiis, & ad virtutem ac gloriam
inflammari? Quæ quidem omnia Vos cumula-
tissimè præstitisse Urbs Roma, ac forte paucis
invidentibus exceptis, universa Germania te-
statur. Quapropter omnes vestros propinquos,
amicos, clientes, meque in primis, qui & Vos &

avum

avum vestrum, meumque proavum Casparum
Furstenbergium imitari, ac Jurisprudentiam
cum humanioribus literis conjungere decrevi,
summa ope niti decet, ut Furstenbergica virtu-
tis ac gloria comes invidia, saepe jam fracta ac
debilitata, magis magisque contabescat. Quod
equidem pro mea virili non aliter efficere posse
mihi sum visus, quàm si omnia Poëmata, quæ
Princeps Ferdinandus vel ipsemet fecit, vel ab
aliis sibi dicata habuit in suis, & quodammodo
adoptavit, postremò quæ ab avo ejus paulò an-
te memorato Casparo Furstenbergio scripta, &
huic, & Episcopo ac Principi Theodoro, ac
Furstenbergica familia ab egregiis viris oblata
sunt, studiosè sublegerem atque emitterem, ut
eximia eorum elegantia ac nitore oculos in-
vidia perstringerem, ac everberarem. Hoc autem
opus ea, quam dixi, ratione tripartitum, &
priori quidem Ferdinandi Poëmatum editione
longè auctius, Tibi, Vir Illustrissime, dedican-
dum esse censui, quem profectò non minùs ger-
mani fratris, quàm Philomathis Musæ dili-
gunt, & in tuos amplexus venire gestiunt. Sus-
cipe

cipe igitur eo, quo fratrem inclytum complecteris, amorē mōnumentum hoc ærē perennius virtutis ejus atque doctrinæ, ac testificationem pietatis & observantiæ ergā tē meæ, quam non alia tibi ratione melius mihi videor posse declarare, quàm hoc munere, quò fratrem Principem, quem populi ei subjeçti dolent esse mortalem, ingenii sui fetibus immortalem Tibi sisto. Vale.
Paderbornæ Kal. Maii. cId. IdC. LXXI.



D A P H N I S,

S I V E

FREDERICUS FURSTENBERGIUS,

P A R E N S,

Bilstenii & Waldenburgi Dynasta; Advocatus hereditarius in Graffschafft; Schnellenbergæ, Watterlappia, Furstenbergæ, & Herdringæ Toparcha; Satrapa Fredeburgensis; Westphalia & Angaria Archisatrapa, & Serenissimo Ferdinando Electori Coloniensi ab intimis Consiliis, anno M. DC. XLVI. v. Idus Augusti Bonna defunctus.



Misii virides umbrat quæ plurima ripas
Fronde salix glaucâ, Lycidas hinc, Tityrus
illinc,

Alter oves, alter pascebat fortè capellas.

Tityrus, ut semper, pellebat tædia cantu.

Carmina dum Veledæ memorat, dum prælia Vari

Varus ut his olim nomen memorabile terris

Fecerit: ut sparsi legionum sanguine campi:

Aurem illi vellit Lycidas: Neque talia tempus

Carmina poscit, ait: Daphnis tibi, Tityre, Daphnis

Lugendus: Daphnin, si nescis, fata tulere.

Tityrus ingemuit casu percussus acerbo:

Fistula lapsa manu est: fugit sensusque colorque.

Ut mens, ut rediit puero vox: Occidis, inquit,

Carum, Daphni, caput; spes, Daphni, decusque tuorum!

A

Ab

Ab dulci patria procul, amplexuque tuorum
Occidis! Hoc fuerat, quòd summæ culmine villæ
Tristia signa daret ferali carmine bubo;
Flebilibus quòd sponte modis mea nuper arundo
(Hanc mihi tu, dederat Corydon tibi, Daphni,) sonaret,
Nunc fileat, ramoque infelix pendeat illo.
Vos etiam sine me (quamvis mihi vos quoque Daphnis
Tradidit, atque abiens, Hæc, inquit, Tityre, pascè)
Ite tamen sine me, quoquò lubet, ite capellæ.
Amnis, & umbrosæ salices, & rura valete:
Usque ego per silvas errans desertaque solus
Tristè querar. Gemit erepta sibi matre juvencus,
Nec minus amisso mater dolet orba juvenco:
Mella queruntur apes cellis subducta, peremtos
Fœta canis catulos, demtos avis arbore pullos;
Daphnin ego, tristi sublatum funere Daphnin.
Supremas saltem voces morientis ab ore
Excipere, affari extremum, & spectare jacentem,
Atque oculos nostrâ licuisset condere dextrâ!
Vulneribus nonnulla meis solatia saltem
Hæc ferret pietas: solus de Daphnide luctus
Nunc superest. Pecudes illo quis pascat adempto,
Avertatque luem, curamque impendat & artem?
Daphnide non melior quisquam depellere venis
Implicitam pestem, & membris agere atra venena.
Daphnis & insidias stabulis prædasque cavebat.
Ah gelidas quoties hiemes perpeffus & imbres,
Pervigil exegit brumali fidere noctem,
Incustoditum fera ne vastaret ovile,
Ne lac subtraherent pecori, ne vellera fures!
Ah quoties humeris per devia sustulit ipse
Rupe parcens nudâ quos nixa reliquerat hœdos!

Angarides Nymphæ testes, quas sæpe laborum
Miratas dixisse ferunt: Mortalia non sunt
Quæ tolerat: saxo certè riget ille vel ære,
Quem neque ventorum rabies, pluvixque, nivesque,
Non cælum inclemens, non ulla injuria frangit.
Nymphæ, non saxo Daphnis neque constitit ære.
Occidit heu! & nos pariter, terrasque reliquit.
Nequidquam roseum spargis jubar, auræ Titan:
Gratius extinctum nobis in Daphnide lumen.
Daphnidis adventu tellus ridebat & æther,
Frondebant silvæ, spirabant floribus arva,
Ipsi lætitiâ montes plausuque fremebant:
Daphnidis interitu tellus lugebit & æther,
Squalebunt silvæ, stabunt sine floribus arva,
Intonsi montes gemitus ad sidera tollent.
Ergo nil proavûm series, regnataque latè
Rura juvant, centumque greges, armenta que centum,
Nil labor, & studium pulchræ virtutis, & artes?
Ergo cinis, formæque carens & triste cadaver
Nunc jacet illè omnes nuper pulcèrrimus inter
Pastores! nec sidereâ fulgentia luce
Lumina, nec vultum, quem finxerat ipsa venustas,
Cernere erit posthac? At non, quæ sustulit illum
Mors, etiam famam tollet. Sint tempora Musis
Non inimica meis, volitabis Daphni per ora.
Ipse ego virtutesque tuas, tuaque inclyta facta,
Inviçtamque fidem, & sanctæ pietatis amorem
Ferre Syracosio tentabo ad sidera versu.
In partem veniet Phœbo dilectus Amyntas,
Et mecum teneris passim tua nomina fagis
Inscribet: crescent illæ, tua nomina crescent.
Quin etiam niveo tumulum de marmore Damon

Exstruet, & tali signabit carmine marmor:
 HIC SITUS EST DAPHNIS. QUOD ERAT MORTALE,
 SEPULCRO
 INTULIT ATRA. DIÉS: VIVET PER SÆCU-
 LA NOMEN.
 Ad tumulum venient, instaurabuntque quotannis
 Pastores tibi cum donis funebria iusta.
 Vina dabunt alii, purum lac adferet Ægon,
 Et, Tibi, suspirans, puro magè candida lacte
 Pectora, dicet, erant, & fraudis nescia, Daphni.
 Ipse apium, ipse hederas, & nostris lilia spargam
 Humida de lacrymis, reque ad tua sacra vocabo.
 Talia jactantem supremo lumine vesper
 Occupat, & primo conspexit Lucifer ortu.

ALEXANDRUM VII.
 PONT. OPT. MAX.

Anno M. DC. LV. VII. Id. Aprilis renunciatum.

Hunc cecinisse diem, venturi præcius ævi
 Dicitur Aonias inter Apollo Deas.
 Hunc fore, neglectas quò gloria tolleret artes,
 Et faceret doctis vatibus ingenium.
 Verba fides sequitur: rerum molitur habenas.
 Orbis ALEXANDER natus ad imperium.
 Ac velut exactæ post tristia frigora brumæ,
 Cùm ver jucundum floridus annus agit,
 Ridet humus, ridet Zephyris spirantibus æther
 Puras, & argutæ dulcè queruntur aves:

Exul-

Exultare novo sic Principe vidimus Urbem,
 Et quot regna vagus circuit Oceanus.
 Vidimus excitas Parnassi monte sorores
 Aurea defuere tendere fila lyrae.
 Vidimus Ausonios, genus immortale, poetas
 Præcingi sacra, quam meruere, tomæ
 Lætitiâ & Pacem (miseris vix cognita terris idibus
 Numina, quas luctus semper & horror habet)
 Ter Vaticani circum delubra volantes
 Audimus reditus signa dedisse sui.
 Audimus lætas voces plaususque carentium
 Vocibus & plausu Roma secuta suo est.
 O mihi si populi sensus æquare canendo
 Fas foret, & causâ digna dieque loqui
 O mihi si Phœbus vacuis dictaret in hortis
 Grandia Romani carmina Callimachi!
 Non ego, MAGNE PATER, celebrarem facta tuorum,
 Non fultam titulis divitiisque domum;
 Non maris Hetrusci portus & litora, quondam
 Hercule, nunc proavis inclyta regna tuis;
 Non belli claros studiis heros, & altis
 Adscriptos Superûm sedibus indigetes;
 Nec quæ porticibus miramur mixta superbis
 Atria, pressa Ducum Pontificumque pede;
 Nec quas majorum pietas cælestibus aras
 Struxit Apelleis conspicuas tabulis.
 Sed te, qui titulos tantum præcedis avitos,
 Quantum nocturnas Cynthia plena faces;
 Et tua non humili memorarem nomina cantu
 Extremas ultra solis itura vias,
 Quâ levat Eoo rutilantem gurgite currum,
 Et quâ poscentes otia solvit equos.

At non intacti mores, & quas rudis ætas
 Virtutes teneris duxit ab uberibus,
 Et data Picriis juvenilia tempora sacris,
 Carminis, ut quondam, res foret una mei.
 Major equis pulsanda patet nunc area nostris,
 Quà Padus objectis æstuat aggeribus,
 Quà centum populos, centum Ferrara ¹ sospes
 Debet consiliis oppida salva tuis:
 Seu circum fremerent irati Cæsaris arma,
 Nec non adversos Mantua passa Deos:
 Seu propiora movens Venetus discrimina miles
 Verteret Hadriacas ad nova bella rates:
 Seu latè grassata lues, & turpis egestas
 Inferrent miseris urbibus excidium:
 Seu Pater Eridanus campis undaret apertis,
 Deucalionæ damna minatus aquæ.
 Ille idem assiduus Cygni plangoribus, idem
 Certavit mæstis Heliadum lacrymis,
 Cum patriæ fines & rectas legibus urbes
 Linquentem ripis vidit abire suis,
 Et Libycos tentare ² sinus, ubi classibus audax
 Insula Threïcias depopulatur opes,
 Europæque suæ custos delecta juvenus
 Tutatur mediî credita claustra maris.
 Non secus Italiæ Cimbri natura minanti
 Alpinas visa est opposuisse nives.
 Non secus occiduis inhiantem finibus Afrum
 Herculis objectis meta coërcet aquis.
 O quoties Melitæ fortes hortatus alumnos
 Jussisti properâ vellere signa manu!

O qua-

¹ Alexander VII, Ferrariæ Prolegatus Pontificius difficillimis temporibus belli, pestilentiz, æstioris annonæ, & exundationis fluminum.

² Melitæ Inquisitor.

O quoties Solymen, Asiæque reposcere regna,
 Sceptraque Bistonæ frangere barbariæ!
 Testis Neptunus, Tethys mihi testis, & omnis
 Tritonum soboles, Nereïdumque chorus.
 Illis cura fuit partos cantare triumphos,
 Et tua cognatis facta referre Deis.
 Me decet Arctoo spumantem sanguine Rhenum
 Dicere, nec patriæ bella filere meæ.
 Infelix tellus, Romanâ clade tumentis
 Arminii quondam signa secuta ducis!
 Hei mihi, nunc ducibus nihilo melioribus usa
 Scinderis in partes, & nova sacra colis.
 At magno commissa luis. Quæ flumina belli
 Nescia? quævè tuo terra cruore caret?
 Forsitan & Divos nondum sibi sentiet æquos,
 Et mala cùm tulerit plurima, plura feret.
 I celer, instantem capiti defende ruinam:
 I celer, & longæ vince pericla viæ.
 Non te Sicanii tardent fera murmura ponti,
 Non formidata navibus insidiæ;
 Non rigor Alpinus, non frigore saxa perenni
 Horrida, non duro flumina vincta gelu.
 Hic Ubios, ³ dominâ deductos Urbe colonos,
 Et flavos vifes impiger Usipios.
 Tum dextram tendes populis, quos Luppia nostris
 Cædibus infectâ decolor ambit aquâ,
 Et quos bellipotens olim ditio premibat
 Accola vicini Bructerus ⁴ Amisii:
 Nunc ubi conventu mundi coïere vocato
 Discordes studiis consiliisque Patres,

A 4

Discor-

³ Nuntius Pontificius Coloniam, & inde Monasterium pacis concilian-
 dz gratiâ missus. ⁴ Bructeri Germania populi ad Anisum fluvium. Tacit-
 us lib. 1. Ann. & alibi.

Discordes, i, junge animos : Europa, Deusque
 Imponunt humeris publica vota tuis.
 Auspiciis pax fréta bonis frondentis oliva
 Prætendit capiti initia fœta tuo.
 Vifa quieturis demum promittere terris
 Aurea compositis sæcula dissidiis.
 Hic etiam Veledam, quæ nec Oumæa sacerdos,
 Nec divina fuit clarior Herophile,
 Te veniente, ferunt iterum de turre locutam
 Fatidico tales ore dedisse sonos.
 Lætus ades, rerum spes & tutela mearum,
 Sospite quo nobis vita salusque redit.
 Lætus ades, cœtus nec dedigneris amicos,
 Et mea securo visere regna pede.
 Non iterum clades animo verlamus, & iras,
 Armaque Quintilios vincere docta tuos.
 Qualis ad Assyrias immani funere Carras
 Romanus Partho fufus ab hoste jaceret.
 Nulla salus bello, pacem deposeimus omnes.
 Pax veniat populis sæpe vocata meis.
 Sed, nisi me Phœbi ludunt oracula, quondam
 Quæ cecinit nostro confcius ore Deus,
 Pax erit : at sacris tam detestanda Latinis,
 Quàm malè mercatâ pax coïtura fide.
 Non ideò curasque tuas vigilesque labores
 Excipient meritis fata sinistra tuis.

5 Statius lib. 1. Silv. in Soter, pro Rutilio Gallico :

Non vacat Arcton acies, Rheumque rebellens,

Captivæque preces Veleda, &c. A

Ea virgo nationis Bructera latâ imperitabat, quam coram adire alloquique negatum,
 Arcebantur aspectu, quo venerationis plus inesset. Ipsa editâ in turre : dilectus è pro-
 pinquis consulta responsaque, ut internuntius numinis, parabat. Tacitus Hist. lib. 4.

6 Clades Variana panè exitiabilis, tribus legionibus, cum duce, legatisque, & au-
 xiliis omnibus, cassi. Sueton. in Octav. cap. 23. Quâ nulla post Crassi in Parthis
 Amisum, in externis gentibus, gravius Romanis fuit. Patere, Hist. lib. 2.

Pur-

Purpura virtutis pretium tibi cedit, & inde
 Quo nihil hæc majus, quod tibi donet, habet.
 Scilicet & terris, cæloque, Ereboque verendum
 Te folio accipiet maxima Roma suo.
 Tum pia laturus sacratis oscula plantis.
 Orbis adoratos procidet ante pedes.
 Tum Septem imperio quæ nunc CHRISTINA triones
 Frenat, & Arctos ducit in arma manus,
 Adveniet supplex, & Vaticana tenentem.
 Regna colet prono devenerata genu.
 Tum consanguinei longo post tempore Reges
 Arbitrio ponent impia bella tuo.
 Et pacti stabilem jurato fœdere pacem
 Damnabunt pugnas, & grave Martis opus.
 Arvaque læta Ceres, & pleno Copia cornu
 Dona ferens, niveis oppida viset equis.
 Mox ubi jam fessas recrearint debita gentes
 Otia, signa dabunt ad sacra bella tubæ.
 Bella recrudescant Naupacti, & barbara Thracum
 Gaza per Ionias sparsa natabit aquas.
 Quas ego nunc acies video! quos æquora remos
 Verrere! quàm lætis vela rumere Notis!
 Quantus adest sudor populis! quot in arma volentes
 Creta viros totâ concitat Italiâ!
 Ut Solyme poscit reduces in prælia Gallos!
 Ut tremit Austriacas pallidus Ister opes!
 An te etiam? auspiciis tollentem signa secundis,
 MAGNE PATER, toto cernimus ire mari?

A 5

Im-

7 Philomathis Musæ juveniles poemate 83.
 Huc ego, seu sit opus Neptuni fluctibus, altrâ
 Puppæ sedens; seu terrestri certare duello,
 Vectus equo veniam.

Impiaque Odrysiæ contundere cornua Lunæ,
 Victoremque sequi, quæ præit arma, Deum?
 Sit satis armatas in prælia mittere classes:
 Bella gerant alii: tu prece bella juva.
 Consiliis opibusque juva, Zephyrosque faventes
 Sollicita, & faciles ad pia cœpta Deos.
 Sic per te victo Reges Oriente superbi
 Thræiciis statuent parta tropæa jugis.
 Et Vaticanas Victoria figet ad aras
 Dereptas Scythicis postibus exuvias.
 Tunc aliquis vates, procerum de stirpe meorum,
 Cantabit famæ tot monumenta tuæ.
 Bellaque signabit titulis: HÆC THRACE SUBACTO
 VICTOR ALEXANDER RETTULIT ARMA DEO.
 Sic cecinit: partem, vates ne vana putetur,
 Lapsa dedit, partem serior hora dabit.

A D I M P. C Æ S.

FERDINANDUM III. AUG.

*Cum ejus auspiciis, & munificentia Athanasius
 Kircherus OEdipum Hieroglyphicum ederet.*

Non genus Austriadum demissum à sanguine Divum,
 Non clausum mundi finibus imperium,
 Non victos dicam populos, urbesque receptas,
 Nec Boreæ fractas sæpe furentis opes.
 Hæc memorent, quorum sublimi Musa cothurno
 Surgit, & herois concinit arma modis.
 Me mea Musa vetat tantarum pondera rerum
 Tangere: me, quæ sint viribus æqua, juvant.

Me

Me studia & placidæ sibi poscunt Cæsaris artes :
 Materies numeris convenit ista meis.
 Vates ille pios, & vatum dona piorum
 Excipit, & vatum carmine digna gerit.
 Quâ sceptrum gestat, quâ jus & regna tuetur,
 Hac etiam Musas protegit ille manu.
 Nec minor ¹ Augusto, cuius successit habenis,
 Fundat Apollineis publica templa sacris.
 Ardua Cecropiæ quis nescit fana Minervæ
 Condita, & Aonio tecta sacrata Deo ?
 Miratur moles ² Viadrus, miratur & Ister,
 In numerum pulsus & sibi plaudit aquis.
 At quæ Cæsareo fulgentia limina sumtu
 Praga videt, certant Delphice Phœbe tuis.
 Qualis & armatas, post impia bella Gigantum,
 Exuit infesto Juppiter igne manus :
 Qualis &, Herculeis cùm jam cervicibus axem
 Credidit, excusso pondere cessat Atlas :
 Terrarum dominas sic fessus Cæsar habenas
 Laxat, & imperii grande reponit onus.
 Tum vires, Natura, tuas, ac semina rerum
 Scrutatur docto sedulus ingenio.
 Quis tremor attonitas vertat cum civibus urbes :
 Impellat refluas quis maris æstus aquas :
 Quæ vis divitias imâ tellure repostas,
 Donaque gemmiferi procreet Oceani :
 Quàm procul Arctoo concretus frigore Pontus
 Deprensus Nili distet originibus :

Quàm

¹ Augustus templum Apollinis in Palatio exstruxit, additâ porticu cum bibliotheca Latina Græcâque. Suet. in Octav. cap. 29.

² Viadrus Germaniæ fluvius, vulgò Odera.

Quàm procul Hesperiiis divisum Gadibus Indum
 Hauriat ³ Eoi, quæ rubet, unda freti :
 Unde ea vis ventis : unde ardens Ætna favillas
 Semper, & exesi viscera montis alat :
 Unde Amphitrites salsus liquor : unde teporem
 Ducat Baianæ vena salubris aquæ.
 Has ubi naturæ partes accessit, in altum
 Fertur ad ætheriæ lucida signa domus.
 Hic illi geminam virgo Marathonia Libram,
 Et sua vicinus subjicit astra Leo.
 Armatusque auro gladium prætendit Orion
 Debita Cæsareæ præmia militiæ.
 Hic Solis vestigat iter, causasque latentes,
 Pallida cur fuscis Luna laboret equis :
 Cur sitiant Afri : cur Septem regna trionem
 Urat Hyperboreo frigore jugis hyemis :
 Cur fugiant umbræ, Cancro torrente, Syene :
 Cur variet major meta minorve diem.
 Sed quota doctrinæ pars est laudumque tuarum,
 Auftriade, magni sidera nosse poli
 Et circumfuso porrectas æquore terras,
 Quà Sol Eoos lustrat & Hesperios :
 Se tibi Niliacis etiam sapientia chartis
 Eruta, & arcanas explicat historias.
 Nec te sacra latent adytis seclufa verendis,
 Nec lapides, sculptæ marmoribusque feræ.
 Scilicet Ægyptus doctrinam credere saxis
 Orsa, peregrinas finxerat effigies,

Ut

³ Latius olim Rubrum mare patuit, & paullo aliter, quàm ut vulgo hodie, appellatum. Nam in Taciti & aliorum veterum verbis, in hoc nomen venit mare Indicum, vastum illud & magnum, quod ab extremo sinu Arabico, sive ab Africa eâ, in Auream Ptolemei Chersonesum se protendit. Itaque Pomponius Mela duas sinus in mari Rubro agnoscit, Arabicum & Persicum. Lipl. de magn. Rom. lib. 1. cap. 3.

Ut solis arcana Deum mens cognita mystis
 Falleret abstrusis vulgus imaginibus,
 Seraque posteritas sensim labentibus annis
 Non caperet prisca moris & artis opus.
 O vanas hominum curas ! O cæca futuri
 Pectora ! Mars ultor nil finit esse diu.
 Barbarus Armenii laceravit potor Araxis
 Omnia, Niliacos depopulatus agros
 Tot moles, regum tumulos, tot stantia venit
 Culmina, regali suspicienda situ.
 Et potuit fugiens, armis cessantibus, ætas
 Servatas etiam vertere reliquias.
 At non æternos olim subducet honores
 Longa dies meritis, inclita Roma, tuis.
 Tu Pelusiæcum spirantia rudera fastum
 Colligis, & medio tollis ad astra foro.
 Nec tua venturis, Cæsar, delebitur annis
 Fama, nec ingenium nox premet atra tuum.
 Te duce, quis credat ? post tot jam sæcula scimus
 Arcani quidquid Memphis & Isis habet
 Quid velit Inachia facies ignota Juvence,
 Quid Canis, & sacri mystica forma Boyis,
 Et quæ præterea famosus monstra Canopus
 Prodidit, antiquis conspicienda potis.
 Teque aded titulosque tuos leget accola Nili,
 Et referet laudes ad sua fustia tuas.
 Jam Solyme, jam discet Arabs, jam clara loquentur
 Marmora Cæsareâ munera sparsa manu.
 Fallor ? an Austriacis addent quoque fata tropæis
 Sacra Parætoniis signa revulsa tholis ?

An,

4 Cambyſes Persarum Rex, Egyptum ſeditiſſimè vaſtaſcit.

An, FERNANDE, tuum jam nunc Victoria nomen
 Læta parat faxis scribere Pyramidum ?
 Gloria Pellæis certè vocat æmula palmis
 Europæ resides ad pia bella manus.

A D

FRANCISCUM VAN DER VECKEN,
 E Societate Jesu, SS. Theologiæ Doctorem,
 & Professore Colonix Ubiorum,
 Anno M. DC. LIV.

*De Musis suis, & admirandis Urbis operibus, ac lau-
 dibus Fabii Chisii S. R. E. Cardinalis.*

D Um, Francisce, tuo Rhenus sermone tenetur,
 In mediisq; tibi plaudere gestit aquis;
 Teque canit, curasque tuas, & numine plenum
 Pectus, & ingenii pulcra reperta tui,
 Dulcis amicitix cultu fructuque carentem
 Me procul à Rheno flumine Tybris habet.
 Me tenet Iliacis felicius orta favillis
 Roma, Phrygum profugis hospita terra Deis.
 O quam te memorem terrarum maxima Princeps !
 Non majestatem vox capit ulla tuam.
 Regibus est certo finitum limite regnum:
 Sub regno latus est solis utrumque tuo.
 Et terris dare jura parum est : nunc claudere cælum
 Fas tibi, nunc demptâ fas aperire ferâ.
 Se tibi delegit propriam Sapientia sedem :
 Quod Stoa, quod Memphis non docuere, doces.

Quæ

Quæ quondam gemino residebant vertice Musæ,
 Tu septemgeminis das habitare jugis.
 O terræ decus, ô nostris domus hospita Musis!
 Utiliter dextro sis mihi tacta pede.
 Quàm mihi dulce tuâ meditatam carmen in umbra
 Dicere, & hîc Phœbo mens mihi mota calet?
 Hîc, qui me vatem faciat, lenissimus afflat
 Spiritus: hæ valles, hæc juga numen habent.
 Forsitan hîc segetes, cantataque bella Maroni:
 Triverat hîc calamos Tityrus ante suos.
 Forsitan his lusit Naso leve carmen in hortis:
 Materies illic Cynthia vatis erat.
 Hîc sevit vites, hîc legit poma Tibullus,
 Et lucente foco, quod satis esset, erat.
 Hîc multo Flaccus sale defricuisse Quirites
 Creditur, aut Lyricis detinuisse modis.
 Hîc foccos, illîc grandes induta cothurnos
 Prodiit, & plausum culta Thalia tulit.
 Illustres salvete animæ, salvete parentes
 Eloquii, Suadæ Pieridumque decus.
 Vos ego, vos, famâ noti super æthera vates;
 Siquid id est, merito semper honore colam.
 Vos sequor, &, quoniam spes unica laudis in illo est,
 Vestrorum relego conscia signa pedum.
 Vos celebres mecum cœtus venerantur, amantque,
 Ductus ab Aoniis quos rigat *Humor* aquis.
 Hos inter (neque enim his primùm novus advena jungor
 Cœtibus) ut libuit, voce lyræ cano.
 Inde ubi Calliope lasso dedit otia plectro,
 Et sacer æstivo languet ab igne calor,
 Me juvat antiquas Urbis spectare ruinas,
 Quâ septemgeminis eminet alta jugis.

Hîc

Hic ego versarum stupefactus imagine rerum
Reliquias Magnæ Matris & ossa lego.
Hei mihi ! quæ fuerat populis æterna Latinis
Credita , nunc molis pondere victa jacet.
Qui sumptus operum , quanti perire labores ?
Pestis in exitium non satis una fuit.
Longa dies , & Mars gentis pater , insuper ipse
Mulciber has olim fregit & ussit opes.
Defensam vigili prospectans ansere rupem :
Majestas , dixi , pristina rupis ubi es ?
Pulsabat cælum moles : Hyperionis ignem
Æquabant radiis aurea tecta suis.
Juppiter hîc stabât multo spectabilis auro ,
Et trifida ex auro lamina fulmen erat.
Quæ nunc hostiles paverunt omnia flammæ :
Vix reliqua est magni parva favilla rogi.
Me quoque Cæsarei tangit fortuna theatri,
Dignaque non ullo forma perire die.
Heu confusa loci facies ! lacera omnia : nusquam
Forma prior : cûlmen cespes & herba tegit.
At cum stabat opus , quid erat speciosius illo ?
Scena voluptatis , nec minus artis erat.
Millia quot nunquam campis eduxit apertis,
His pariter vidit Roma federe locis.
Quid , quod odoratis redolebant pulpita nimbis ,
Et soles contra lutea byssus erat.
Nec semper similem referebat arena paratum :
Nunc silvæ species , nunc erat illa maris.
Nec semper lex & ratio certaminis una :
Diversum pro re munus arena dabat.
Spectabat populus (populum Mars ille juvabat)
Sæpe homines pugnâ , sæpe coire feras.

Fama loci superest, & qualiacunque videmus
 Disjectæ molis fragmina nomen habent.
 Et querimur, si nos morti debemur & umbris,
 Cum rapiant ipsos hæc quoque fata Deos?
 At labor Agrippæ, templum commune Deorum,
 Splendoris retinet signa vetusta sui.
 Corpus adhuc, quamvis spoliatum cultibus, exstat:
 Nuda satis per se forma decoris habet.
 Materiam superat quidquid manus addidit illi:
 Credibile est omnes hîc habitasse Deos.
 Instar habet cæli: cælum quoque Maxima Mater
 Nunc facit: hîc aris præsidet ipsa suis.
 Cetera quid memorem veterum monumenta laborum,
 Quæis ætas pretium fecit, & artis amor?
 Seu Trajane tuam, sive Antonine columnam,
 Parta solo vobis præmia, parta mari:
 Aut quas Pyramidas misit trans æquora Memphis,
 Aut ævo tritas, Appia saxa, vias:
 Aut quos Roma suis posuit victoribus arcus,
 Sive Tito, meritis sive Severe tuis.
 Flaviades medio conspexerat aëre signum:
 Signum, quod bello vinceret, omen erat.
 Vicit, & undantem vidit pons Milvius amnem
 Stragibus obstructo tardius ire vado.
 Arcu etiam posito celebravit Roma triumphum,
 Sed quid non vitiat, comminuitve dies?
 Qui fulsit spoliis, spoliū quoque temporis idem est,
 Et leve quid, de quo fama loquatur, habet.
 Hæc audita tibi pridem, Franciscæ: sed aures,
 Ut puto, nunc subeunt gratius illa tuas.
 Olim oculos subitura tuos, quando Arbiter orbis
 Præsentem rebus te volet esse suis.

Tunc ego te viso, flammâ propiore calefcens,
Invadam vultum sæpe, premamque tuum.
Apprensumque manu stringam, totamque per urbem
Lætabor notâ ducere posse viâ.
Me juvat interea, dum nos sperata morantur
Gaudia, carminibus visa referre meis.
Scilicet invitant ævi monumenta recentis,
Aspectuque rapit me nova Roma suo.
Quæ, Divi! medias ingressa palatia nubes
Stant Vaticano suspicienda jugo!
Quæ, Jovis Elei nil concedentia fano
Templa! tholus cælum, quâ decet arte, refert.
Quæ sola! qui fornix! quæ firmant tecta columnæ!
Quàm variæ! nil par, quâ patet orbis, habet.
Dein ubi me molli sensim juga Cælia clivo
Accipiunt, Tuscis trita, Vibene, tuis:
Ut me Pontificum sedes augusta priorum,
Ut Laterana tenet, Flaviadæque domus!
Divinus templo decor est: laquearia fulgent
Aurea: marmoribus strata superbit humus,
Reliquias Solymûm monstrant ex ære columnæ,
Cum fuit urbs vitio digna perire suo.
Hic, ubi Cæsarei superant monumenta lavacri,
Quo spirant violæ, spirat odore lapis?
Hic, ubi quinta sacrum designat Olympias annum,
Sancta ter impulso cardine porta patet.
Porta patet cæli pariter: jus namque per orbem
Servat idem Divum Romulidumque domus,
Frontem alibi ferro Cæsar redimitus & ære
Prodeat: hic auro fulva corona datur.
Si lubet Esquiliis spatiando visere colles,
Hic memor æstivæ me tenet ara nivis.

Felix, quæ posito descripta est area templo !

Conveniens Divæ moribus illa fuit.

Nil nive candidius : nec, cui pulcherrima surgunt

Limina, non purâ purior ipsa nive est.

Hîc me suppliciter pacem veniamque precantem

Audiat : hæc votis æqua sit ara meis.

Hîc ¹ (ita sim felix !) videat me Roma ferentem

Prima sacerdotem dona, Deumque Deo.

Inde Quirinalem cum me via duxit ad arcem,

Ante aditum quos hic Roma locavit equos !

Armenii donum regis, dignumque Nerone,

Phidiacâ sculptum Praxitelisque manu.

Ignescunt, quamvis rigido de marmore, nares :

Hinnitum clarè tollere pænè putes.

Et, nisi sentirent Macetæ domitoris habenas,

Pænè putes cursu vincere velle Notos.

Admorsis spumam credas albere lupatis,

Plausaque diffusas spargere colla jubas.

Tales, quos olim medios ruiturus in hostes

Ad bijuges currus Mars sibi junxit, erant.

Tales, quos ² Zephyro genitos Harpyia Podarge

Non leve Pelidæ munus habere dedit.

Hîc mihi scribendi veniat si carminis ardor,

Nil morer alipedem Bellerophontis equum.

Monte Caballino faciet me Roma Poëtam ,

Quosque bibam fontes ungula pulsa dabit,

Non hîc Phæacum silvas umbrasque requiro ,

Non nemora, aut hortos, Theßfalis ora, tuos.

B 2

Hîc

¹ Hanc postmodum ædem delegimus, in quâ Deo primum litaremus.
Anno 1659, nocte Christi nascentis.

² Homerus de Xantho & Balio equis Achillis Iliad. π.

Τὸς ἵππους Ζεφύρου ἀνέμους Ἥρπυια Ποδοργῆν.

Homerum sequitur Virgilius, neque, si Aristoteli, Varroni, Plinio credimus, fabulosè.

Hic Tempe mihi sunt, & quos fert India flores,
Quosque sibi segetes Medus Arabsque legunt.
Cum soles ardent, terræque ardore dchiscunt,
Hic mihi dat frigus silva nemusque facit.
Si formam geniumque loci, si dicere pergā
Singula, dicendi quæ mihi finis erit ?
Tollitur æthereas frondens obeliscus in auras :
Ramorum simulat tonsilis umbra feras.
Armiger ipse Jovis terras depressus in imas
Emicat, & viridi fulmine terret aves.
Æsoniden mediis Argo (quis credat ?) in hortis
Auratoque gravem vellere vectat ovem.
Prora viret, puppisque : virent pendentia malo
Vela : virent remi : transtra forique virent.
Qui fuit Hesperidum vigil ad pomaria custos,
Has etiam custos excubat ante fores.
At nullum, quidquid linguâ vibrante minetur,
Sauciat : innocuo corpore verrit humum.
Terga notant maculæ : sed enim maculosus adumbrat
Terga frutex : cristam muscus & herba facit.
Quid tibi nunc amnes referam, fontesque, lacusque,
Naiadum gelidas, humida regna, domos ?
Ingenium sacris irritent vina Poëtis ;
Ingenium nobis hic quoque lympa facit.
Ut puro calices hilarent convivia Baccho,
Optima res puræ vena perennis aquæ.
Quid tibi sit Tepulâ, quid Agrippæ gratius undâ,
Aut quæ Pelignos Marcia findit agros ?
At neque jam Tepulâ, nec Agrippæ ducimur undâ,
Nec quæ Pelignos Marcia findit agros.
Nunc alias iniere vias, populoque Quiritum
Pontificum solæ pænè bibuntur aquæ.

Tu me (tanta tuæ laus est virtusque scatebræ)
 Vel visu recreas, candida Virgo, tuo.
 Tu dulcis frigenſque ſitim ſolaris & æſtum,
 Et melius medicis hauſtibus ora levas.
 Tantum, Virgo, tuæ (namque id candore mereris)
 Virginibus pateant, & ſitiantur aquæ.
 Et me felicem (neque enim tibi nomen inane eſt).
 Quæ meritò Felix diceris unda, facis.
 Ubertas tecum ſecundaque divite cornu
 Copia, quæ placido voveris amne, venit.
 Quin etiam talos à vertice ſanus ad imos,
 Qui tua delibat mînera, sæpe redit.
 Tu quoque Romuleam Burgheſia lympha per urbem
 Labere, quæ ducto fornice facta via eſt.
 Labere, quæ præſtans variâ teſtudine & arcu
 Excipiet latices porticus alta tuos.
 Ecce ſuâ tibi ſe ſubmittit Ianus ab arce,
 Et Numa te tumulum gaudet obire ſuum.
 Ut Vaticanas intraveris advena ſedes,
 Hîc domus hoſpitiis apta futura tuiſ.
 Candidus, & Pariò ſtruſtus de marmore crater
 Te manet, unde tuas ejâculeris aquas.
 Jam ſi Pamphiliæ memorem molimina gentis,
 Quas huc, quas miſit Nilus & Iſis opes!
 Ardua ſtat moles, & ſaxo ſulta cavato
 Pyramis audaci ſurgit in aſtra viâ,
 Arcanis inſcripta notis, quas diſcere præſens
 Gavifa eſt ætas, diſcere ſera volet.
 Hîc, Bernine, tui cæli labor inclytus, imâ
 Parte ſedent, tantum ſuſpiciuntque decus;
 Et Tiberi Ganges, nec non Argenteus amnis,
 Et famulas ſubdunt Nilus & Iſter aquas.

Candida rorantem commendant marmora vultum ;

Candida submissum sustinet urna latus.

Ælia Romanæ quid propugnacula pacis

Exequar , & gyro mœnia tuta suo ?

Vallorumque minas, tormenta que fusa metallo,

Impulsu nil non frangere nata suo ?

Hîc fragor audiri, qualis cùm Juppiter atras

Increpitat nubes, & sua tela jacit.

Hîc Mavors, quamvis non omni tempore cuiquam

Lethifer, excusso plurimus igne furit.

Præcipuè cùm lux illi sacrata recurrit,

Cui debet folium maxima Roma suum :

Cui pater omnipotens uni dedit atria Divûm

Pandere, & appositâ claudere posse serâ.

Venerat illa dies, & jam venientibus umbris

Cesserat , ac dubiæ tempora lucis erant.

Tum verò cælum jactis ignescere telis,

Et scintillantes vidimus ire globos,

Et pluvio latè conspergi tecta Quiritum

Sulfure, & horridicos æra cîere sonos.

Mox tenebras nigro propiores crescere fumo,

Et fumum volucres dissecuisse faces.

Quin etiam innocuo percussam fulmine Tibrim

Audiimus mediis exsiliisse vadis.

Ille diu strepitu flammisque exterritus hæsit,

Expertæ memorans tempora sævitæ :

Ut Nero flammâtâ Vulcanum sparserit urbe,

Et nova Troja novo luxerit usta rogo :

Ut conjuratos fociis amentibus ignes

Prætulerit patriæ fax Catilina suæ :

Ut fuerit Geticis urbs, quanta est, merfa favillis,

Hauferit & Latias Vandalus accer opes.

Hanc

Hanc tibi lætitiæ scenam, Romane, quotannis
 Exhibet illa tuo lux operata Patri.
 Talia lustrantem plus me tamen afficit ingens
Chisus, Hetruscæ gentis & orbis amor.
 Cui Vaticanæ delata est purpura regni,
 Utque reor, trinus tempora cinget apex :
 Ut novus Alcides fesso succedat Atlanti,
 Et molem immensi fulciat imperii.
 Ille mihi facilem cantanti commodat aurem ;
 Plenaque felici fert mea vela Noto.
 Et facit ingenium nobis, & jungit amicos,
 Et tribuit gratam sæpe benignus opem.
 Hic, Albi, Messala tibi, si prisca tulissent
 Sæcula, Mæcenæ hic tibi, Flacce, foret.
 Neutro laude minor, nostro nisi carmine, laudes
 Qui canimus parvis & benefacta modis.
 Non tamen exiles ideo vetat ille Camœnas
 Præsidio tutas delituisse suo ;
 Quin amat, & vultu non dedignatur amico,
 Has aliquid nugas dum putat esse meas.
 Et molles aditus toties concedit & horas,
 Rara illi quamvis ocia Roma facit.
 Quid loquor ? ipse suas, *juvenilia* carmina, Musas
 A me non blando sustinet ore legi.
 Triste supercilium, frontemque, animumque severum
 Exigit, usque adeò non placet ipse sibi.
 Quod Phœbus, quod Roma probat, quod sera probabunt
 Sæcula, quis credat ? non probat auctor opus :
 O benè, quod tandem cæcis crepta latebris
 Crediderit curæ pignora cara meæ.
 Cumque sui pridem fetûs abolêrit amorem,
 Me finat huic vitam, quam fugit ipse, dare.

Per me discetur, per me liber ibit in ora,
 Per me deliciæ posteritatis erit.
 Quid memores fastos, lentæque volumina pacis,
 Et de Parrhasiâ persequar arte librum?
 Nec non Cæsareis certantia vultibus æra,
 Et procerum vivis æmula signa notis?
 Quid titulos, & opes, & prisca nomina gentis,
 Et decora, & magnæ splendida facta domûs?
 Quæ facilis nostris obtutibus ille recludit
 Omnia, vix aliis pervia luminibus.
 Dî mihi, Dî tantum servant Heroa clienti,
 Dulce decus Musæ præsidiumque meæ.
Chisfa sic faveant mihi *sidera*, *Chisfa quercus*
 Me tegat, & *senis* stet mea *Cyrrha* jugis.

A D

P H I L O M A T H E N.

*Nequicquam Musarum juvenilium
 auctorem tegi.*

Qualis, ubi Pharios exurit Sirius agros,
 Frugibus optatâ Nilus inundat aquâ,
 Et super arentes fuso natat æquore glebas,
 Et riguan lætis messibus ornat humum;
 At longè positis idem cunabula terris
 Et caput ignotis celat originibus:
 Talis Mœonio quæ certent carmina vati
 Fundis; &, ut magno Pindarus ore, ruîs:
 Et Latium sermone beas, & divite venâ
 Fecundas, Vatum Maxime, Castaliâ.

At

At cur Perrhæbi bene cognitus incola Pindi,
 Cor Charitum, nostri spesque decusque chori,
 Cur latitas, & lene sacræ caput oculis undæ,
 Quo veniunt Clario pocula digna Deo ?
 Cur tegis ambiguâ JUVENILIS imagine MUSÆ
 Ingenii cultum divitiasque tui ?
 Cur dubitas proprio dignari nomine fetum ?
 Cur dubitas famæ pandere vela tuæ ?
 Nequicquam, VIR MAGNE, lates : te nostra loquuntur
 Tempora, te Vatem sæcla futura canent.
 Admirata tuos Siren Acheloïa cantus
 Audiit, auditis cedere fassa suos.
 Cùm Phaëthontæ canerent tua carmina Nymphæ,
 Suspenso Cycnus plaussit ab Eridano.
 Constitit aurata captus testudine Tybris,
 Et jussit fluctus lentius ire suos.
 Sæpe tuos avidis Rhénus pater auribus hausit,
 Sæpe Mosella tuos, & piger Alpha modos.
 Nequicquam, VIR MAGNE, lates : te fama latentem
 Prodit, & Eois monstrat & Hesperiiis.
 Nec finit indictum pietas, animusque periclis
 Altior, & pacis, quem profiteris, amor.
 Sichemios colles, & collibus addita testor
 Tempa coronato suspicienda tholo.
 Vos Ubii testes, testis Mimigarda laborum,
 Et septem geminis Roma superba jugis.
 Eripe nunc ergo tenebris caput, eripe nocti,
 Et larvam fictis detrahe nominibus.
 Si minùs occultum Scyros celavit Achillem,
 Agnitus Æolidæ si fuit ille dolo :
 Si, qui regna tenet latè Parnassia, Phœbum
 Ora latere vetant, & coma digna Deo :

Si, licet obscurâ celetur nocte, pyropus
 Nativo rutilum provocat igne diem :
 An poterit diffusa tuæ lux aurea Musæ ;
 An poterunt gentis signa latere tuæ ?
 Sidera scintillant, sublimi vertice Quercus
 Eminet, & senis Mons subit alstra jugis.
 Sed pudor, & castæ divina modestia frontis
 Nobilior Tyriis purpura muricibus,
 Vatis Apollinei titulos, nomenque recusât,
 Phœbeaque vetat tempora fronde tegi.
 Nec te grande sophos, nec famæ cura moratur ;
 Nec fuco roseas gloria picta genas.
 Virtuti satis est cælo se teste probari,
 Et sese famæ notiitiæque negat.
 Ut neget, invitam curru sectatur eburno,
 Et circumfuso lumine vestit Honor.
 Sic radiant puro servata corallia vitro,
 Sic lucent calathis lilia virgineis.
 Sic adamas fundo merfus pellucet in imo ;
 Sic micat auriferi dives arena Tagi.

E P U L U M

AUGUSTINI CHISII,

In porticu supra Tiberi impensili, LEONIX.

PONT. MAX. & compluribus Car-
dinalibus datum.

L Audarunt alii convivia ditis Elifæ,
 Et Luculleas, Alcinoique dapes,

Et

Et quas Romano cœnas Cleopatra marito
 Instruxit Phariis perdita deliciis :
 At mea sollemnes epulas , & Regibus æquas ,
 AUGUSTINE , tuas Musa loquatur opes.
 Stât super impendens Tiberinæ porticus undæ
 CHISTIA , divitiis nobilis Attaliciis ;
 Hospite nobilior , vultu dignata LEONIS ,
 Quò posuit curas urbis , & orbis onus.
 Hæc quoque purpureos aurato limine Patres
 Accepit , totidem ceu Jovis aula Deos.
 Quæ mensis tum dona Ceres , quæ dona Lyæus
 Intulit , & largo Copia læta sinu !
 Vix tulit ipsa suum genialis mensa paratum.
 Et pretii quota pars ipse Lyæus erat ?
 Fulgebant auro , fulgebant pocula signis ,
 Fulgebant rutilis aspera chrysolithis.
 Pascebant oculos perfecta toreumata cælo ,
 Aut Myos , aut dignus Mentoris arte labor.
 Ipsa penus populo poterat satis una videri :
 Hic poterat genio quisque litare suo.
 Sic , ubi prostratos celebrarunt vina Gigantes ,
 Semideis licuit poscere vina Jovem.
 Res nova : cælatas ceperunt retia lances ,
 Et Polycleteâ vasa superba manu.
 Miratur Tiberis projectas flumine gazas ,
 Et quas nec Ganges , nec vehit Hermus opes.
 Innocuam pisces escam mirantur in undis ,
 Mirantur nullo retia tensa dolo.
 Retia nulla suis , nec quæ Nero texuit auro ,
 Præmia captarunt divitiora plagis.
 Scilicet argenti quidquid Tiberinus & auri
 Ceperat , hæc domino restituere suo.

I nunc,

I nunc, & Crassum memora Romana vetustas,
 In Parthos auri quem facer egit amor.
 Serviit ille opibus: laudato CHISIUS usu
 Effusæ dominum se probat esse rei.

A D

AUGUSTINUM FAVORITUM.

De morte Natalis Rondinini, ALEXAN-
DRO VII. Pont. Opt. Max. ab
Epistolis ad Principes.

N On ita Lampetie casu Phaëthontis acerbo
 Flevit, & ambusto Cygnus in amne Padi;
 Non ita Pelides, mediâ cùm vidit arenâ
 Actoriden sparsis cæde jacere comis;
 Tros Anchisiades non sic Pallante peremto,
 Nec Theseus cari funere Pirithoi;
 Ut mihi mœsta pio tabescunt lumina fletu,
 Imaque perpetuos pectora dant gemitus:
 Dum desiderio mentem perfixus inani,
 NATALIS mutos conqueror ad cineres.
 Crudeles Divos, crudeliaque astra vocanti
 Nulla venit misero nocte dieve quies.
 Nec magis, heu, lacrymis saturatur luctus amaris,
 Quàm matutino røre perustus ager.
 Si fugit interdum, vagus ut Mæander, in orbem
 Mox redit, & sese decipit ipse dolor:
 Notaque dilecti passim NATALIS imago
 Occurrit madidis obvia luminibus,

Dulce

Dulce loqui fido, velut antè solebat, amico,
 Brachiaque & caras tendere visa manus.
 Sive etenim ripam Tiberini propter amoris nam
 Cernere velivolas, quas vehit unda, rates,
 Et septem geminis latè spectare jacentes
 Collibus antiquæ me juvat Urbis opes,
 Pyramidasque novo ductas ad sidera sumtu,
 Et Vaticano templa superba tholo:
 Sive suburbanas Latii peragrarè ruinas
 Mite jubet sancti Principis imperium,
 Albanumque lacum, dilecta que rura Minervæ
 Posthabitis Romæ visere deliciis,
 Montis ubi quondam per viscera ductus aperti
 Fatalis Veii irrigat arva liquor:
 Semper amarities, semper dolor hæret eunti,
 Et cruciat miris anxia corda modis.
 Nec vetus Alba gravem potis est mihi demere curam,
 Umbra nec æstivis Tuscula frigoribus;
 Nec nemus Egeriæ, Scythicæ nec regna Dianæ,
 Nec lacus occulti conscius Hippolyti.
 Tène malâ, juvenum castissime, fraude novercæ
 Distractum rapidis membra cruenta rotis,
 Tène Coronides mediis è faucibus Orci
 Ereptum Triviæ restituisse Deæ,
 Et lætos oculos, roseumque potentibus herbis
 Os valuit, nitidas & reparare comas?
 At miserum, ut primæ NATALIS flore juventæ
 Occidit indigno flebilis interitu,
 Non pietas, non sancta fides, non Pallas, & omnis
 Aonidum tanto cultus amore chorus,
 Ipse nec ætheriæ revocare ad luminis auras
 Sustinuit medicæ Cynthius auctor opis?

I nunc,

Pone lyram Augustine : licet te vate superbus

Cessurum Calabro se neget esse Ligur.

Phœbeos arcus , tutandis arma Camœnis

Poscimus : hæc nostri temporis arma cape.

Ecce novum tumidoque gravem Pythona veneno

Horret Apollineis dedita turba sacris.

Ipsum etiam qui Pindi aditum, Phœbique recessus

Occupat , inque sacrum nos vetat ire nemus.

Quid moror , & ficto dubium te carmine duco ?

Ah nimis ex vero nostra querela venit.

Livor edax Python , Python inscitia rerum :

Hæc vates dictis mordet , & ille suis.

Non capit ingenio , quæ dente lacescit iniquo

Carmina , nobilibus ceu minus apta viris.

O quoties dixi : Quid carmen & otia vatum

Arguis , & solo stirpis honore tumes ?

O quoties : Si fama tibi , si gloria curæ est ,

Cur non & vatis te quoque cura subit ?

Seu placet antiquâ deductus origine sanguis ,

Antiqui seriem sanguinis ille canet.

Seu caperis positis fumosa per atria ceris ,

Ornabit ceris atria lata tuis.

Addet & his proavûm titulos , & carmine dicet ,

Quot tulerint palmas , quasque , quibusque modis.

Addet & his vocem : picturas ille loquentes

Finget , & his animos ingeniumque dabit.

Quid ? quod habent sua cum superis commercia vates ,

Quique illos agitat spiritus , inde venit ?

Quid ? quod honoratos memorant ex ordine reges

Auratam digitis increpuisse lyram ?

Creditur Amramides (nihil est illustrius illo)

Isacidis carmen præcuisse suis.

Carmen erat populus, cui Memphæos arma timentî
Ipse Deus facilem straverat antè viam.

Iverat & montes inter secturus aquarum :

Tanta fides pelagi diffilientis erat.

Obruerat regem fluctu gravis unda refuso :

Tanta fides pelagi mox coëuntis erat.

Ibat Erythræas Mareotica gaza per undas,

Et fracti currus, & juga vulla rotis.

Qui miseros regni casus luctusque referret,

Hauस्ताque toti pelago millia, nullus erat.

Omnia quæ populus, populum præcunte poetâ,

Audiit, & paribus rettulit inde modis.

At nunc quæ subito strepuit lyra ! me mihi totum

Surripit, & superis inserit ipsa choris.

Jesside, salve regum, salve optime vatum,

Sive lyram doctâ, seu geris arma manu.

Militiæne prius mirer, cantusne scientem ?

Par utroque tibi nomine constat honor.

Queis ego te regem componere regibus ausim ?

Nil potuit regno sanctius esse tuo.

Queis ego te vatem componere vatibus ausim ?

Nil potuit plectro dulcius esse tuo.

Luce tibi sonuere tubæ : lyra nocte canebat,

Victorique Deo carmine gratus eras.

Et modò strata tuis, modò fletibus ara madebat :

Et modò te tardâ Musa levabat humo.

Sancte velis mihi te facilem præbere canenti,

Et vates vati dexter adesse tuo.

Si non me tecum fas est excedere terris,

Nec mea me supra sidera Musa levat :

At placare tuo fas sit mihi Numina cantu :

Hac, precor, hac liceat te mihi parte sequi.

Talia cantabant afflati numine vates,
Otia post pugnas cum sibi iusta dabant.
Et quisquam, sit dives opum, sit clarus avito
Sanguine, tanta neget nomina ponè sequi?
Et leve nescio quid, quod tantùm tempora fallat,
Esse putet, doctæ carmina mentis opus?
Ille ego sim, qui, dum Pindi sedet arduus arce,
URBANI sacris oscula dem pedibus.
Ille ego sim, qui CHISIADÆ juvenilia dicar
Otia parte aliquâ posse referre meis.
Nec mihi quis, si castra vocant, neget artibus illis
Esse aliquem lituos inter & arma locum.
Tunc erat, extremum Macedo cùm subderet orbem,
Et captis Ganges mollior iret aquis.
Tunc erat, Iliadem caperet cùm lectus & enssem,
Qui custos Musis esset, Homere, tuis.
Scipiade, tibi jugis erat comes Ennius: idem
Emeruit tumulo proximus esse tuo.
Cæsar in adversos cùm fulminis instar Iberos
Tenderet, ipse suum carmine lusit iter.
Aiace nobis invidit spongia: dextrâ
Occidit Augusti fixus, ut ipse suâ.
Sæcula (cur fileam?) vates quoque nostra tulerunt,
Imperio populos qui tenuere suo.
Cæsareæ studuit Phœbeamnectere laurum
Primus ab Austriacis Maxmilianus avis.
Summos summa juvant: res est quoque summa Poësis:
Et qui digna gerunt carmine, carmen amant.
Quo quisque ingenio pollet magis, altiùs ire
Nititur ad geminum, quâ via facta, jugum.
At rudis, invitis Musis & Apolline natus,
Laudis egens, animo deficiente jacet.

Hæc ego : tu nervis torque majoribus arcum ;
 Cui Phœbus pharetram credidit ipse suam.
 Surge : premat querulas rostrata ciconia ranas ;
 Figat Apollineus sibila monstra labor ,
 Surge : animam vocemque novo præclude Lycambi :
 Supplicium Momus , quod tulit ille , ferat.

A D G A L L I A M.
 D E M O R T E
 D I O N Y S I I P E T A V I I
 E S O C I E T A T E J E S U ,

*Cum Franciscus Barberinus S. R. E. Cardinalis
 illi à Poëtis parentari juberet.*

S I vacat , & nostras civilia bella Camœnas
 Audiri lituos inter & arma sinunt ,
 Accipe quæ vates cinerî sacramus amico
 Carmina , non uno Gallia pressa malo.
 Scilicet in longum veniunt tibi tristia morem ,
 Teque alia ex aliis fata vicesque gravant.
 Non fatis in luctus fuerat , tua pignora , cives
 In te discordes exacuisse manus.
 Et Parcæ fecere nefas , commune ; sed atrox ,
 Cui natura nihil quo medeatur habet.
 Sirmondus ; quo non alius Regum acta tuorum
 Certior , & regni jura referte , jacet.

C 2

Sum-

Jacobus Sirmondus è Societate Jesu , vir totius antiquitatis curiosus investigator.

Sumserunt etiam, dum Regum scrinia servas;
 In te lanificæ jus, Puteane, * Deæ.
 Communis, Puteane, dolor nunc vatibus, olim
 Grande decus Clarii præsidiumque chori.
 Nec fatis: extincti mors importuna Petavî
 Accedit tantis nunc nova causa malis.
 Ille filet, parvâque cinis compostus in urnâ est,
 Suada jacet riguis quam super uda genis.
 Qualis scissa comas, lacerataque pectus apertum
 Incubuit Pylio commoritura seni.
 Ereptum Ligeris plorat natalis alumnum,
 Turbataque suis fletibus auget aquas.
 Ipsa dolet miserum regina Lutetia casum
 Funereâ sparsas fronde revincta comas.
 Jure etiam libat lacrymas FRANCISCUS adempto,
 Romuleos inter gloria prima Patres.
 At benè quod cineri (quid enim non ille meretur?)
 Doctorum vatum carmine justa paret.
 Nam quid felices frustra dolor urgeat umbras?
 Justiùs in laudes ora resolvat amor.
 Desine, quisquis amas, magni pia busta Petavî
 Nil profecturis sollicitare modis.
 Quamvis indocilis leges mutare severas
 Vitalem Lachesis ruperit atra colum;
 Non omnis tamen ille perit: meliore superstes
 Parte sui, volitat docta per ora virûm.
 Quid metuat Lethen oblivia nigra trahentem
 Fluctibus? ignavos torqueat ille metus.
 Hic rerum memores fastos, memorandus & illis,
 Edidit, & Batavam contudit invidiam.

Bis

2 Petrus Puteanus, Regiz Bibliothecz Custos ac Fizes, literatorum erga
 literatos officiosissimus.

Bis senis docuit celeres cum mensibus annos
 Munitam certis legibus ire viam.
 Ætheriasque domos animo percurrit, & astra
 Divisit numeris temporibusque suis.
 Hunc adeò egressum nostræ contagia terræ
 Uranie famulâ duxit ad astra manu.
 Errantesque globos, mundique volubilis orbes
 Pandit, & in toto sidera fixa polo.
 Quæ super evectus, meriti nunc civis Olympi,
 Fertur in auctorem, non velut antè, suum.
 Nunc illo fruitur propior, totumque quod ipse est,
 Inque ipso quidquid condidit ipse, videt.
 Sive Palæstini regalia carmina vatis
 Concinit Argolicis reddita carminibus:
 Seu Divûm medius, Patrum monumenta revolvit,
 Ingenio Divos detinet ille suo.
 Non igitur tibi vana ferunt solatia Musæ:
 Tu modò te Superûm, Gallia, junge choris.

A D

JACOBUM VVALLIUM

de morte SIDRONII HOSSCHII.

E T si me, Walli, patriis excedere terris,
 Et procul Angariæ collibus ire meæ,
 Et maris insuetas ausum dare vela per undas,
 Ardentesque gravi sole secare vias,
 Lydius Hesperidum Tiberis regnator aquarum,
 Et septem geminis Urbs tenet alta jugis,
 Alpinæque nives, ac nubifer Apenninus,
 Et pia Tyrrenæ vota morantur aquæ:

C 3

Ut

Ut nequeam Tungros, & pulchrum visere Mosam,
 Et præsens mæsto solvere iusta rogo,
 Et terræ tumulo componere vatis amici
 Reliquias nostris irriguas lacrymis :
 Non tamen extinctum miseris urgere quærelis,
 Justaque, quâ fas est, reddere cessat amor.
 Nunc firmata subit studiis concordia nostris,
 Et desiderijs invida fata meis.
 Nunc mandata lego, quæ te mihi scribere jussit,
 Et moriens linguâ deficiente dabat.
 Quin etiam violis, & lauri frondibus urnam
 Halantem fictis ponimus exuvijs.
 His etiam flores, vitæ monumenta fugacijs,
 Addimus, albenti lilia mista rosâ.
 At circum Latii, doctissima turba, Poëtæ
 Aëniâ ferunt carmina mæsta lyrâ.
 Quos præit creptum lugens Elegeia vatem,
 Sæcula cui nullum nostra tulere parem,
 Postera vix sperent ; quo vindice desiit esse,
 Quod fuerat, Paphiæ lena comesque Dex.
 Illa igitur squallet, quo nos, confecta dolore,
 Et queritur nostris faucia vulneribus.
 Ipse etiam fletu tumulum dignatur inanem
 CHISIUS Ausoniæ gloria prima togæ.
 Et gemitu manes ciet, & Permesside lympa
 Spargit flebilibus marmora scripta notis.
 HOC MERUIT JUSTI MONUMENTUM BELGA DOLORIS,
 PROXIMUS INGENIO, CULTE TIBULLE, TUO.
 Interea curis liber mortalibus errat
 HOSSCHIUS, Elysium quâ facit umbra nemus ;
 Quâ Zephyri blandis immurmurat aura susurris,
 Et viret intonsis laurea silva comis ;

Quà saliunt vitrei per amœna rosaria fontes,
 Et præbet faciles florida ripa toros.
 Illic divinos inter considerare vates
 Gestit, & Heroum proximus ire choris,
 Et modò cantatos suspirat Numinis ignes,
 Virginis & grato carmine laudat opem.
 Et modò tot vitæ, quibus ut mare volvimur, æstus
 Gaudet inoffensâ se superasse viâ.
 Et modò commendat faciles miserescere Divos,
 Dum Petri lacrymis miscuit ipse suas.
 Denique quæ vovit Leopoldo plurima, votis
 Exorat meliùs prosequiturque suis.
 Illinc, si nostri tangit te cura, nec omnis
 Excidit oblito pectore suetus amor,
 Aspice perpetuis lacrymarum turgida rivis
 Lumina, & exequias, docte Poëta, tuas.
 Aspice ut immensum tua gloria lata per orbem
 Transvolet Eoas, Hesperiasque domos :
 Ut malè neglectas, monumenta perennia, Musas
 Wallius indignis vindicet à tenebris ;
 Wallius Aönidum post te non parva sororum
 Cura, tibi quondam, nunc mihi primus amor,
 Quàm pius ille manu fugientes clausit ocellos,
 Et summis animam legit anhelitibus !
 Quàm pius æternis mandat tua nomina chartis,
 Et damnat lacrymis impia fata suis !
 Scilicet ereptum sic tristis Naso Tibullum
 Luxit, & Orphæam Calliopeia necem,

ALEXANDRO VII.

PONT. OPT. MAX.

Villam Barberinam, Domitiani olim Cæsaris Albanum, ubi quotannis Quinquatria fiebant Minervæ, animi causâ invisenti anno
M. DC. LVII. Idib. Maii.

Hic ubi porticibus se Flavia villa superbis
Æquabat summis ardua sideribus,
Et nemus hinc, Scythicæ non mitia regna Dianæ,
Illinc Tyrrenas prospiciebat aquas,
Sollemnes olim ludos, & sacra Minervæ
Quinque fuit junctos mos celebrare dies.
Quare amat hos colles etiam nunc Diva, lacusque,
Plurima quos glaucâ vestit oliva comâ.
Atque adeò præfens Albæ cùm proxima nuper
Vidit ALEXANDRUM per juga ferre pedem:
Lætus ades, dixit, nostrosque invise recessus,
Terrarum custos maxime: lætus ades,
Hic positâ regni tantisper mole licebit
Otia prolatis dulcia rebus agas.
Quando dira lues, & frugum tristis egestas,
Auspice te, Latios pulsa reliquit agros.
Mox instaurato mens corpore firmior, altas
Imperii curas, & geret orbis onus.
Interea dignam servato cive coronam
CHISIACIS Dryades texite de foliis.
Alma Ceres, spicas; date laurea ferta merenti,
Aônides: partâ mox mea pace feret.

A D

JOANNEM ROTGERUM
TORCKIUM

Præpositum Mindensem, & Canonicum Paderbornensem ac Monasteriensem. De Æneæ statuâ, LAURENTII BERNINI opere, in hortis Burgheſiis extra portam Collinam.

TORCKI noster amor, doctarum prima Sororum
 Gloria, spes patriæ magna decusque tuæ,
 Aspice BERNINI docto spirantia cælo
 Marmora, Phidiacæ par opus ingenio.
 Aspice Trojugenam curvâ cervice ferentem
 Et patrem, & profugos, sacra paterna, Deos,
 Has pius Æneas parvo comitatus Iulo
 Subtrahit incensæ reliquias patriæ.
 Quis dolor è muto ducit suspiria saxo!
 Qualis in inflexo vertice regnat amor!
 Ut lapis ipse suæ præſagus fata Creüsæ
 Sentit, & impositum ferre laborat onus!
 Et trahit Ascanium flentem! comes ille paternæ
 Non potis est æquis passibus ire fugæ.
 Ut miserans captæ fumantia mœnia Troiæ
 Effigies tantis ingemit ægra malis!
 At ne BERNINUS vocem daret arte querelis,
 Obstitit infandus, qui premit ora, dolor.

C 5

ALEXAN-

Vox filet, ac lepidæ cessant convitia linguæ,
 Nulla quibus sese composuisset avis.
 Non Agrippinæ turdus, non sturnus amores
 Cæsaris, humanos doctus uterque sonos;
 Nec Corvus populi plausu gemituque Latini
 Nobilis, & ducti funeris exequiis.
 At rumpare licet Clotho, quæ fila volucrum,
 Mœonidæ si fas credere, dura secas,
 Carmine vivet adhuc, qualis Melioris alumnus
 Psittacus, & Teii fida columba fenis.
 Qualis & exusto celebrata Ciconia nido
 In Batavis pullos morte secuta suos.
 Ut meruit, vos ergò rosâ Permesside Musæ
 Compositum molli condite funus humo:
 Et notum tumulo carmen superaddite: SI QUEM
 NON HODIE, CRAS, CRAS AUFERET ATRA DIES.

A L E X A N D R O V I I .

P O N T . O P T . M A X .

*Tertium Pontificatus annum feliciter
auspicanti.*

L Æta dies rediit, qua te Rex ætheris alti,
 SANCTE PATER, magnum misit in imperium:
 Et terris dum pulsa lues, tibi tertius annus
 Illuxit faustis candidus auspiciis.
 Prima fames Latium, te principe, liquit, & Urbem
 Externis pavit frugibus alma Ceres.

Jam

Jam nunc Adriacis classis tua juncta carinis
 Hellepontiacæ claustra refringet aquæ,
 Interea sacras voti rea fundit ad aras
 Ingenuo tales pectore Roma preces:
 De nostris, PATER ALME, tibi Deus augeat annos,
 Si servata tuo munere vita mea est.

IN EJUSDEM EFFIGIEM

*Marmoream, opus Laurentii Bernini Equitis
 & sculptoris egregii.*

Spirat ALEXANDRI vivus de marmore vultus,
 Nullus adhuc potuit quem simulare color.
 Par animo siquidem facies pigmenta recusat,
 Et melius niveum marmor utrumque refert.

AD EUNDEM.

*De adibus Pontificiis ad Lacum Albanum tactis
 fulmine I.II. Id. Octob. M. DC. LVII.*

NEmirare manu Cyclopea tela rubenti.
 In tua, SANCTE PARENS, tecta vibrare Jovem.
 Indignatur enim Latio, te Principe, demum
 Aurea Saturni sæcla redisse senis.

DE BIBLIOTHECA URBINATE,

*ALEXANDRI VII. Pont. Max. liberali-
 tate, Vaticana donatâ.*

REGifico quondam sumtu, studioque parata
 Feltriadum celebris bibliotheca Ducum,

Vaticana tuas, huc longè iussa venire
 Munere ALEXANDRI Principis, auget opes.
 Nobilior poterat nec muneris auctor haberi,
 Nec munus poni nobiliore loco.

IN CAROLI I. *magna Britannia Regis,*
An. M. DC. XLVIII. V. Id. Febr. Lon-
dinicapite plexi, necem.

C Erne lupæ geminos pendentes ubere natos:
 Romulus hic Romæ est conditor, ille Remus.
 Inde Caledoniæ præbentem colla securi
 Indigno CAROLUM respice supplicio;
 Et genus acre lupos terræ dic deesse Britannæ:
 Sævior est ipsis terra Britanna lupis.

A D

FRANCISCUM BARBERINUM
 Card. & S. R. E. Vicecancellarium.

Ut Luca Holstenii, Hamburgensis, Vaticana Basilica
Canonici, & Bibliotheca Custodis primarii, 1 V.
Non. Febr. An. M. DC. LXI. defuncti scripta in
lucem proferat.

O Ccidit Holstenius, Graiæ Latæque Minervæ
 Artibus, Eois notus & Hesperiiis.
 Holstenius, quô non fuerat mihi carior alter,
 Nec posthac unquam carior alter erit.
 Heu! Vaticanæ mecum plorate Camœnæ
 Delicium vestri præsidiumque chori.

Illius

1. In Angliâ lupi nulli, assiduè venationibus stirpitibus excisi. *Polyd. lib. 1.*

Illius imprimis studio defenſa fideli
 Religio madidis lugeat orba genis.
 Grande decus, columeque ſacri, Franciſce, Senatûs
 Solari noſtras perge tuasque vices.
 Ede laboratas, quas celant ſcrinia, chartas,
 Quæis meliore ſui parte ſuperſtes hægât.
 Vivitur ingenio, nec in illud ferrea quidquam
 Inciſo Lachæſis ſtamine juris hæbet.
 Sic bene de Muſis, & religione merendo,
 Lauſ tua, & Holſtenii vita perennis erit.

ALEXANDRO VII. P. O. M.

*Uſitatâ SS. Patrum conciliis comprecatione; cujus
 ſEDEM ET ANNOS, de reſtituta valetu-
 dine gratulatur. An. M. DC. LXVI.*

Vivit Alexander, mendax quem fama negabat
 Longiùs extremum ducere poſſe diem.
 Vivit, & Albanos colles petit, Urbe relicta,
 Incolumis: Clariæ ſolvite vota Deæ.
 Veſtra ſalus agitur; quæ nunc hoc ſoſpitem florent;
 Incipient artes hoc moriente mori.
 Hoc igitur faciles adeamus carmine Divos,
 Carmine, quo ſancti nos præiſtiſtis avi:
 Cujus Alexander ſEDEM tenet, illius annos
 Expleat, utque tulit, ſic ferat Orbis onus.
 Tu, cujus primùm auſpiciis hæc inclyta Roma
 Cælitibus leges terrigeniſque dedit:
 Tu mea tam juſtam vota exorantia cauſam
 Excipe, dum partes Urbis & Orbis ago.

En ut porticibus, pro quo precor, alta coronat
 Limina supplicibus relligiosa tuis;
 Ut solium augustis decorat sublime columnis,
 Artis divinum se superantis opus.
 Quod populus posthac his te venerabitur aris
 Sæpius, hoc illi profit, opemque ferat.

E J U S D E M

*Summo Reipubl. Christianæ luctu, ac damno, XI.
 Calend. Jun. An. M. DC. LXVII. defun-
 cti Sacra Memoria.*

Q Uæ non flebilibus complevit regna querelis
 Mortis, Alexander, nuncia fama tuæ?
 Te Cæsar, te flevit Iber, infestaque nuper
 Gallia nunc lacrymas victa dolore dedit.
 Nec tulit irarum causas referentia stare
 Marmora Pipinis invidiosa suis.
 Orbis uterque suum fato cessisse parentem
 Credidit, & pietas omnibus una fuit.
 Omnibus ex æquo par sit data causa dolendi,
 Justior haud ulli, quàm mihi causa datur.
 Amisus, mecum ante alios mcestissimus, urnam
 Diciduis, in quas solvitur, implet aquis.
 Ne tamen assiduo cogar tabescere luctu,
 Virtuti cautum gratulor esse tuæ.
 Non tibi summa dies angusti terminus ævi est:
 Quamlibet invitâ morte superstes eris.
 Nec tibi, quæ multis, ponet fataliter ætas
 Tempora, nec famæ meta futura tuæ est.

Quà pelagus, quà terra patet, surguntque caduntque
Sidera, sunt meritis omnia plena tuis.

Adria te Thressas armis diffringere Lunas,

Teque tuas illi jungere vidit opes.

Adria Loiolidis, quo se tibi nomine debent,

Hospitio dextras junxit, ut ante, suas.

Quam debere tibi gaudet Germania[†] pacem,

Se debere diu non potuisse dolet.

Acrior hoc tangit Rhenum dolor, acrior Istrum,

Quò fuerat visi gratior oris honor.

Scit bene, quas habeat lugendi Vistula causas,

Ille tuâ posthac destituendus ope.

Scit bene, quas illi dederis in prælia vires,

Seu Geta, seu Moscus Marte petendus erat.

Quæ mihi præstiteris, si persequar, omnibus undis

Amisius numero sit minor ipse meo.

Talia cùm de te peragat præconia Virtus,

Te rapto lacrymis obruor, & fileo.

A D

CLEMENTEM IX. P. O. M.

Cum Episcopo & Principi Monasteriensi adjutor successorque lectus designatusque esset An. M. DC.

LXVIII. pridie Cal. Maias.

E U C H A R I S T I C O N.

Grandibus immensas tibi debeo, maxime Clemens,
Pro meritis grates muneribusque tuis:

Quòd

[†] Inter Imperatorem & Galliarum Regem conciliatam Monasterii Westphalorum.

Quòd tua me populis sacravit ⁊ dextra regendis
 Impositum, Padere quos rigat unda meæ :
 Quòd Mimigarda potens, æquo te iudice, nobis
 Detulit imperii proxima jura sui ;
 Tincta nec adversæ valido potuere veneno
 Invidiæ nostrum lædere tela caput.
 Sed tua quando meæ nequeunt æquare canendo
 Aönides parvis maxima dona modis ;
 Monte, precor, gratâ contentus, perge tueri
 Præsidio fretum me, Pater alme, tuo.
 Sic Tibi dent Superi quod aves, quod jure mereris ;
 Et pro Te Superos publica vota rogant.
 Sic Themidi ambigua faciat Clementia palmam ;
 Ornet an hæc mores, an magis illa tuos.

I M P. C Æ S.

L E O P O L D O A U G.

*Victoriam Hungaricam sine sanguine partam
 gratulatur. An. M. DC. LXX.*

E Dite Cæsaribus præavis, fortissime Cæsar,
 Orbis & Austriacæ spes, Leopolde, domûs :
 Marte tuos superes, precor, ut virtutibus hostes,
 Et jugis circum tempora laurus ear.
 Primus in arma ruens pœnas, Te vindice, Gotthus
 Infestus Cimbris Sauromatisque dedit.
 Pòst Thracem infractum non unâ clade tyrannum
 Sanguineis vidit decolor Ister aquis.
 Nunc Tibi perjuros debellat Sporchijs armis
 Pannonios, nostri gloria magna Padi,

D

Lætâ-

Lætáque Cæsareas circum Victoriâ turmas
 Serta gerens nullâ cæde cruenta volat.
 Magna quidem ferro populos domuisse rebelles
 Laus est, innumeri quam meruere duces;
 Sanguinis expertem sed deportare triumphum
 Præstat, & imperium laus decet illa tuum.

A D

JACOBUM BALDE,
 è Societate Jesu,

*Versiculos nostros, de corvo Bartoldi Nihusii,
 extincto, laudantem.*

Siccine, quem tristes olim flevêre Camœnæ,
 Est tibi visus olor, qui mihi corvus erat?
 Verterit has formas opifex amor: omnia vertit,
 Et pulcrum quod non invenit, esse facit.
 Quos tu nunc, specie multum delusus inani,
 Das corvo vultus, hos dedit ille Jovi.
 Dî faciant, cui dat corvus te iudice nomen,
 Ille suo dici carmine possit olor.
 Tunc me non humili vectum mirabere pennâ,
 Quô Calaber Latîæ se tulit arte lyræ.
 Tunc ego Dædalide ferar huc, ferar ocyor illuc,
 Nomina cæruleis nulla daturus aquis.
 Te visam ante alios, ac nostro carmine captus
 Destituere immemores arriget Ister aquas.
 Exceptum Tiberis ripâ me ¹ **SIDUS OLORUM**
 Respiciat tantum, sponte canorus ero.

A D

¹ Clementis IX. P. O. M. tellera hæc est, inter illas, quas Pontificibus singulis attribuit S. Malachias.

AD ACIDULAM
FONTIS MELLITI,

Juxta Smechtam, pagum Diæcesis

Paderbornensis.

Nympha decus silvæ, pulcherrima Nympha sorores
Inter Hamadryadas, Naiadasque deas.
Quis te præsentis sparsit medicamine? quis te
Melliti fontis nomen habere dedit?
An, magis ut saperent, acidas tibi dulciter undas
Ambrosiæ succis diluit ipsa Salus?
An, velut Hyblæis è floribus omnia libat
Fingendi studio sedula mellis apis;
Sic, dum nunc ferrî venâs, nunc æris oberras,
Vim trahit inde tuæ, quâ fluit, humor aquæ?
Quicquid id est: stomachi fastidia vincis inertis,
Nec finis accensum bile tumere jecur;
Et quæ præterea versu comprehendere non est,
Sæpius innumeris pota medere malis.
Salve Naturæ mulsam, gratissima morbis
Sospita, languentum nectar, inempta salus.
Quod mihi si bilem solitâ virtute coërces,
Quæ jecori, nimio dum furit igne, nocet;
Carminibus nostris decorataque marmore, nomen
Grande salutiferas inter habebis aquas.

MAIUA DOA DA

S. URSULAM VIRG. & MART.

de natali suo, .

Qui fuit XII. Kal. Novemb. A. M. DC. XXVI.

Virgineas acies quæ te lux ordine longo
 Ducentem superas vidit inire domos;
 Auspiciis hæc ipsa tuis, fortissima Virgo,
 Me vitæ limen vidit inire meæ.
 Hinc Tibi sacra fero, votivaque dona quotannis,
 Natalémque tuum rite meumque colo.
 Vela Caledonium si te rapuère per æquor,
 Excepitque tuas barbara terra rates;
 At fera te superis tempestas appulit oris,
 Optatæque tibi mortis aperta via est.
 Nos quoque jactat hiems, & cum superasse procellas
 Credimur, in portu naufraga turba sumus.
 Tu porrò secura maris precor, Ursula, portum
 Ut teneat, nostræ dirige navis iter.

A D

S. BARBARAM VIRG. & MART.

pro fausto vitæ exitu.

Barbara, supplicibus Virgo non aspera votis,
 Has, rogo, neglectas ne sine Virgo preces.
 Stamina cùm vitæ candente fluentia filo
 Præcidet Parcis de tribus una soror,

Et

Et Mors atra suos diducet, & Orcus hiatus,
 Coget & infernas in mea damna manus :
 Tunc succurre meo tam mitis, Diva, labori,
 Immitis genitor quàm fuit ipse Tibi.

A D

HORTENSIUM MAURUM

Veronensem,

GEORGIO VVILHELMO,

*Duci Brunowicensi & Luneburgensi, ab epistolis,
 acidulam fontis Melliti, juxta Smechtam,
 pagum Diœcesis Paderbornensis, hoc
 Epigrammate laudantem.*

A Urea dum primæ coluerunt sæcula gentes,
 Ambrosias populis mella dedere dapes ;
 Aëriæ quercus sudarunt roscida mella,
 Mel fuit in foliis, mel fuit inter aquas.
 Te quoque, qui reddis nobis ea tempora, Princeps
 Inclyte, non miror mellis amore capi.
 Cum Tu sis verè mirâ dulcedine morum,
 Melleus ingenio, melleus eloquio,
 Par est, ut fontes ipsi Tibi mella propinent,
 Ut Tibi mellitas terra ministret aquas.

Responsum Auctoris.

M Ellitos latices nuper dum libat Apollo
 Imbutos venæ nectare, Maure, tuæ :
 Non magis insignis mirâ virtute medendi,
 Carmine quàm Mauri nobilis unda mei.

Vatis, ait, tanti meritis & laude superbâ,
Castalii poteris vincere fontis aquas.

FONS PAMPHILIUS, INNOCENTII X.

*Pont. Opt. Max. opus admirabile, in circo
Agonali Roma.*

O Rbis quadrifidi simulacrum cernis in Urbe,
Flumina qui nostro fonte quaterna bibis.
Hîc Ganges, hîc qui dulces Argenteus amnis
In mare, perruptâ ¹ Doride, volvit aquas.
Hîc Ister pronâ recubat septemfluis urnâ,
Et totidem Nilus cornua fronte gerit.
Omnes Roma parens gentes complexa, ministrat
Omnibus ex uno fonte salutis aquam.

De S. Petri Apostolorum Principis Martyrio.

C Ur, capite inverso, plantas ad sidera tollit
Affixus dominâ Petrus in Urbe cruci?
Ut caput in terris summum, sub Principe Christo,
Seque piis certum monstret ad astra ducem.

D E

¹ *Amnis Argenteus*, qui Hispanis dictus *Rio de la Plata*, hoc est ab argento, leucarum quadraginta ostio in mare fertur adeo violentus, ut inde nautæ dulces hauriant lactes, priusquam tellurem ex alto conspiciant. *Massæus Hist. Indica lib. 2.*

D E

MARIA REGINA ANGLIÆ

*vindicata à calumniis Georgii Buchanani
Scoti lib. 2. Epigramm.*

SUM Marie, malè grata patri, malè grata marito,
Cælo invisa, meæ pestis atrox patriæ.
Nulla aberat labe: nisi quod fuit addita custos
Fida pudicitæ forma maligna meæ.

Antithesis.

SUM Marie, malè spreta Patri, bene cara marito,
Cælo accepta, meæ certa salus patriæ.
Nullæ aberant laudes: nisi quod natura negavit
Progeniem regni non fatis æqua meis.

In Rufum Poëtam malum.

N Olo, Rufe, tuos, ne dedignare, libellos
In cælum falsis tollere carminibus.
Carmina tu nunquam laudas aliena; quid ergo
Laudari quæris carmina, Rufe, tua?

In eundem.

N ON mea, quod velles, te laudant carmina, Rufe:
Nè tua me laudent carmina, nostra timent.

In Cantharum potatorem sapius agrotantem.

Post calices hauftos toties, potamque salutem,
Æger Apollineam, Canthare, quæris opem;
Pocula dein redeunt, redit & medicaminis usus:
Hoc est, nolle bene, & velle valere bene.

In Podagram.

Bacchus & alma Venus quam progenuere, Podagram
Miretur claudos ecquis habere pedes?
Ebria quando trahit vestigia Bacchus, & hæret
Tardipedi Cypris confociata viro.

Adulatoris & corvi similitudo secundum illud Græc.

*Epig. Ῥῶ καὶ λάμδα μόνον κέραιας
κέλακᾶς τε διισᾶ.*

Ecce κέλαξ κέραι, quàm concolore esse videtur;
Hic niger est plumis, moribus ille niger.
Hic fronti rapit, ille animo sua lumina; gaudet
Hic cruce; suffigi dignus & ille cruci est.

Amicitia fucata.

Quisquis amicitiam jungis, ne fronte serenâ
Tincta venenato pectora felle tegas:
Plus fallax oris species, velut abdita rupes
Plus ratibus, quàm quæ prominet alta, nocet.

JULIUS CÆSAR

Injuriarum immemor.

O Mnia conservat memori sub pectore Cæsar ;
Sola sed in ventros, quæ mala passus, eunt.

Mnemosynen alii laudent : me iudice, pluris

Sic oblivisci, quàm meminisse fuit.

A D

FRIDERICUM FURSTENBERGIUM,

Fratrem, dynastam Bilstenii & Waldenburgi, Dominum in Schnellenberg, Waterlapp, Fürstenberg & Herdringen, Serenissimi Electoris Colonienfis, & utriusque Bavaria Ducis, Satrapam Fredeburgensem, & consiliarium intimum, Advocatum hereditarium in Graffschafft, ejusque conjugem Annam Catharinam de Petra ex castro Leyen.

DE WILHELMO FURSTENBERGIO

Eorum filiolo, eâdem horâ nato, & denato.

An. M. DC. L.

F Urstenbergiaco Wilhelmus sanguine cretus
Hic jacet : huic vitam, quæ dedit, hora rapit ;

Vivat ut æternum, mcesti ne flete parentes,

Huic eadem vitam, quæ rapit, hora dedit.

D 5

A D

A D U I U I
FRIDERICUM HÖNINGUM

ARENSBERGENSEM,

Ord. Præmonstr. Canonicum, Cal. Januarii

An. M. DC. XLIX.

J Anus adest, sed munus abest, tamen urget amanti
 Debita ferre tibi munera gratus amor.
 Quid faciam Friderice? tibi si dona merenti
 Musa negat, nostrum cor tibi donat amor.

IN EFFIGIEM
CHRISTOPHORI BERNARDI

Episcopi & Principis Monasteriensis,

*Penicillo Theodori Caspari Lib. Baronis de Fur-
 stenberg, Canonici Moguntini & Spi-
 rensis, eleganter depictam.*

P Rincipis ora vides Bernardi, fortibus armis
 Victorem supplex quem Mimigarda colit:
 Thrax timuit: nec adhuc impune laceffit ullus:
 Scit Batavus. Martem frons generosa refert.
 Nec minor est pietas: imò pius arma tuendâ
 Pro patriâ, & verâ religione gerit.

IN

BERNARDUM FULGOSIUM,

Medicum & Poëtam malum.

Cum tua, Fulgosi, tellus errata medentis
 Celet, & aggestâ funera condât humo;
 Quæ nunc tanta animum cepit dementia, luci
 Ut mala committi carmina discupas?

FABII CHISII

*S. R. E. Cardinalis Auspiciatissimus natalis Hendecasyllabis
 jam olim celebratus, antequam Pontifex
 Maximus renunciaretur.*

Ingens gloria purpuræ Latinæ,
 Phœbi delictum, medulla Suadæ,
 Sacrorum Cynosura certa vatûm,
 Paullûm, magne FABII, graves labores
 Alti pectoris, arduæque Romæ
 Fultum consiliis remitte pondus,
 Et nostris solito favore Musis
 Aspira facilem secundus auram,
 Dum natalitias sacrare cantu
 Idus Hendecasyllabi laborant.
 Quos duros licet, ac parûm politos
 Lævi pumice, Dædalaque limâ,
 Ut blando tamen in sinu receptos
 Illâ fronte legas, precamur, illâ,
 Quâ Septem juga, purpuramque Romæ,

Et

Et curas Latii Patris serenas,
Et nostri rapis ingenI calorem.

Vestris nunc opus est choris, venite
Suaves Lætitiæ, venite Plausus,
Cantus, Gaudia, Gratia, Camœnæ.
Festivo Genium vocate ludo,
Et fertis, & odoribus Sabæis;
Et natalitiis adeste sacris
Fauftis ominibus, bonisque verbis.
Sollemnem Februarii reduxit
Quinquagesima sexta bruma lucem:
Natales **FABII** canamus Idus.

Idus tot maris Indici lapillis
Signandas, quot hiems creat pruinas,
Quot ver purpureum per arva flores;
Quot votis celebravit, & coronis
Natalem Venusina Musa lucem
Mœcenatis agens, Aprilis Idus;
Quot votis cumulavit, & coronis
Idus, Mercurii diem, vetustas
Maio fidere, nobilesque partu
Octobres coluit Maronis Idus.

Ergò cùm superas beatus infans
Natus Chisiades, futurus Heros,
Blando murmure personaret auras,
Vagitus tener, ac rudes querelæ
Commiffæ Zephyris, procul remotas
Parnassi geminis novem Camœnas
Excivere jugis, Claroque Phœbum,
Et Pandionis arcibus Minervam.
Illæ Pegaseos repentè fontes
Liquerunt, & Hyanthias cavernas,

Et Pindi virides tulere lauros ,
 Et molles violas, rosæque florem ,
 Parvis munera delicata cunis.
 Princeps Calliope labella primùm
 Permulsit tribus osculis puelli ,
 Et vatum simul entheos furores
 Afflavit, tenerosque fronde crines
 Cinxit Bacche tua, tuaque, Daphne ,
 Nostris Orpheæ gratulata terris
 Dono Cælituum novo renatùm.
 Hinc fati quoque conscia sorores
 Arrisere Deæ, lyramque Pæan
 Donavit puero; puer jocosus
 Arreptas digito fides procaci
 Prensavit, fidium daturus omen ,
 Ut quondam dedit Hercules tenellus
 Omen roboris anguibz peremtis.
 Tunc amplexa tenacibus lacertis
 Mellitum stupet undecumque Pallas
 Infantem , cerebrumque mollicollum
 Implet numinis, ac suas olivas
 Pacis præmia subligat corymbis.
 Adsunt , & comitum trahunt cætervas ,
 Linquentes Ciceronis æviterni
 Pictum veris honoribus sepulcrum ,
 (Quo fixere domum) diserta Pitho ,
 Facundus Lepor, aureumque nodum
 Segnes solvere Gratia sodales ,
 Jucundique Sales, & elegantes
 Doctarum facies Facietiarum.
 Quæ postquam niveam ligustra nubem
 Fuderunt beneolentibus canistris ,

Et felicibus irrigata succis,
 Sacri nectaris ora miscuerunt:
 Quales Cecropii Platonis olim,
 Quales gutture Pindari canoro,
 Quales Ambrosiis apes labellis;
 Matres ambrosiæ leves crearunt:
 Dilectis etiam redux ab astris
 Virtus remige venit usâ Cycno,
 Quæ faustos simul augurata soles,
 Et primo similes dies metallo
 Promisit puero, faces honesti
 Admovit, nivibusque concolorem
 Puris moribus indidit nitorem.
 Quin & fidereus Pudor modesta
 Vivo murice temperavit ora,
 Et castos Amor innocens ocellos
 Accendit radiis ab axe raptis,
 Et Clementia nubibus remotis
 Frontem finxit amabilem videri.
 At custos animum fidelis omnem
 Munit Relligio timore Divûm;
 Et contra mala, lividamque sortem
 Constans ægide Fortitudo pectus.
 Tali Chisiacas honore cûnas
 Dignatos Superûm choros frequentûm
 Actutûm variæ viæ reportant.
 Virtutes patrium petunt Olympum,
 Et quæ se tenues levant per auras,
 Auræ deciduis pluunt ligustris,
 Narcissisque, rosisque, liliisque.
 Cyrrham Pierides, Claron revisit
 Musarum pater, Atticas Athenas

Pallas, Suada suam diferta sedem.
 Gratantur redeuntibus Napææ,
 Occurrunt Dryades, levesque Fauni.
 Tellus luteolas benigna calthas
 Submittit, violasque, amaracosque.
 Mitescit positis furor procellis
 Tyrrheni maris: Africis fugatis;
 In regnum lepidæ Favoniorum.
 Succedunt animæ beatiorum,
 Et solæ dominantur axe toto.

Lætas interea virere ripas
 Vernis floribus, ac rosis caducis
 Spargi flumina, leniterque motas
 Admiratus aquas tepere blandis
 Aurarum Zephyritidum susurris,
 Umbro * populeâ caput coronâ
 Umbratum placidis levavit undis.
 Quando suppositâ reclinis urnâ,
 Muscosum latus hinc & inde Nymphis
 Circumstantibus, Orciaque, & Afsâ,
 Et Mersâ, & Soro, & Arbiâ, & Malenâ,
 Sordes abluir: ille mox jacentem
 Mento canitiem manu remulsit,
 Et sic fatidico locutus ore est:
 Ergò pollicitam benigna fata
 Invenere viam, sagax futuri
 Quæ Proteus mihi cæculus solebat
 Nostris pandere gratus hospes antris?
 Ergò jam genitus * beatus infans,

In-

1 Umbro nobile Heturiz flumen, de quo Rutilius in Itinerario, & Plinius lib. 3. cap. 5.

2 Idibus Feb. an. 1599. Senis in Heturriâ natus, parentibus Flavio Chisio & Laurâ Marfilii.

Infans Chisiades, recens **Hetruscæ** lib man abas? all
 Gentis delictum, decusque **Senæ** **audimur**
 Expectatus adest? adest **petitus?**
 Sic est: prodigio rigentis anni
 Venturæ manifesta signa **sp̄tis**
 Solvunt ambiguum timore **mētem**,
 O felix nimis! ô beata **tellus!**
 Nullis urbibus, & secunda **nullis**
 Tanto cive futura **Sena** terris!
 Felix Chisiadūm domus **parentum!**
 Summorum genitrix domus **virorum!**
 Quamvis imperio maris **potentes**
 Portus **Herculeos**, ³ **Cosæ** **ruinis**
 Vicinos Lepidi fugâ **notatæ;**
 Et quondam moderata ⁴ **Macereti**
 Arces turrigeras, genus **vetustum**
 Jactes nobilium **Ranutiorum.**
 Quamvis perpetuum decus **nepotum;**
 Illustres animas, piosque **Janos**
 Tusci nobile germen **Iliceti;**
 Augustos celebres amore **vatum;**
 Anselmos, Mariosque, **Flaviosque**
 Armis conspicuos, togâ **verēdos:**
 Jactes & columen **Jugis** avitis,
 Et **Stellis** jubar additum **coruscis**
 Quercum robore ⁵ **Julio** **superbam;**

Majo

³ Petrus Bembus in Epistolis nomine Leonis X. Pont. Max. scriptis, lib. 7. epist. 21.

⁴ Maceretum oppidum ditionis Senensis, ejus quatuor abhinc sæcula dominus Anselmus Chisius Frederico Cæsari militavit: nunc præter ruinas & balnea salutifera nihil de eo reliqui fecit vetustas.

⁵ Julius II. Pont. Max. Roborem gentis suæ insignibus Chisios donavit: ex quo tempore Quercum Montibus & Stellis adjecerunt.

Majorem tibi comparabit unus
 Famam Chisiades : & ille quondam
 Inter semideos erit Latinos.
 Postquam dulcibus expeditus ulnis
 Matris Marfiliae, solum paternum
 Signabit pede jam timente falli ;
 Ingressus duce semitam fideli,
 (Quam sudoribus improbis madentem
 Virtutis labor Herculi sequendam
 Monstravit teneris adhuc in annis)
 Tentabit subito vireta ⁶ Cyrrhae,
 Et rupes Heliconias, & umbras
 Doctæ Phocidos, Atticosque lucos,
 Et sacros Academiæ recessus.
 Cùm lustris adoleverit duobus,
 Ingens ingenii sagacis ardor
 Ætatem culicis Maroniani
 Ictu fulminis ocior trifulci,
 Undâ fluminis ocior citati,
 Prævertet, memorique digna cedro
 Vates carmina finget, & severæ
 Maturus sapientiæ satelles
 Discet ⁷ Socraticas puellus artes.
 Multum Philyridæ datus magistro
 Pelides, & Olympicæ quadrigæ
 Debent plaufibus, & citantis axem
 Aurigæ stimulis : at ille solo
 Nativi celer impetu calor
 Fontes sponte suâ petet beatos

E

Pulcra-

⁶ Domesticis usus præceptoribus in Poësi & politionibus literis.

⁷ Duodecim annos natus, intra privatos parietes Philosophicas theses defendit.

Pulcrarum cupidus scientiarum.
 At mox Palladias valere ²curas
 Longis excubiis, & ægra doctis
 Musarum studiis salus jubebit.
 Sic quæ divitis Indiæ potentes
 Thesauros rapit, ac latus sinistrum
 Præbet continuis sali procellis,
 Ventorumque minis, nec ulla vitat
 Audax navifragi pericla ponti,
 Tandem mergitur, aut fatiscit alnus
 Silvæ filia nobilis vetustæ;
 Securis nisi portubus potita
 Quassatum reparet quiete malum.
 Tum post otia lætiore cursu
 Ipsos ausa volare præter Euros
 Ad nostras peregrina dona ripas
 Sospes devehit ultimis ab oris.
 Quare viribus integer receptis,
 Sancto pectora concitatus æstro
 Viset limina ³consecrata verbo
 Clauso Virgineæ Parentis alvo,
 Picenis ubi collibus refedit
 Laureti domus, Adriæ per undas
 Illuc vecta, piis onus catervis
 Cœlestum subeuntibus Quiritum.
 Jam nunc impatiens latere, clausus
 Privato lare, publicas palæstras
 Stagiræ, ⁴ cathedrasque, porticusque,

Et

² Proximè sequentibus duobus annis vacare cogitur à studiis, stomachi imbecillitatē laborans: intercā recolit Philosophiæ humaniorumque literarum disciplinas.

³ Decimo sexto ætatis anno voti reus Lauretanum iter suscepit.

⁴ Viginti annos natus, & expleto studii quinquennio, senis publicas Philosophiæ theses proponit & defendit.

Et sacra maximi Platonis
 Sublimis vigor ingenI requiret.
 Hic quicquid polus ambitu sereno,
 Et tellus gremio, Thetis profundo,
 Et natura sinu fovet capaci,
 Argutæ rationis in staterâ
 Scrutatum penitus, magistra recti
 Augustis penetralibus clientem
 Admittet " Themis, imperIque formam
 Et decreta docebit æqua legum.
 Seu quæ Cecropiis Solon Athenis,
 Et Spartæ rigidus tulit Lycurgus,
 Seu justus Numa gentibus Latinis,
 Et bis sex tabulæ Decemvirorum:
 Seu quæ Romulæ verendus Urbis
 Antistes dedit, inclytusque Cæsar
 Immensi dominator altus orbis.
 Hinc desiderii ferente pennâ
 Alto certius Icari volatu
 Pernicem rapiet sub astra mentem
 Divinæ Sophiæ " sagax Aquinas,
 Et velata fides, & alma cæli
 Majestas superas recludet arces,
 Et sese dabit, ac Deum videndum,
 Et puram sine nube veritatem.
 Tandem " promeritos virente crines
 Serto triplicis impedire lauri
 Certabunt Themis, & severa Pallas,

Et

11 Unum & viginti annos natus, publicas de jure civili theses tuetur.

12 Septem & viginti annos natus, de universâ Theologiâ publice Senis disputat.

13 Anno 1623. 6. Septembris Philosophiæ; 14. Septembris eodem anno Jurisprudentiæ; 1626. 6. Septembris Theologiæ Doctor renunciatus fuit summâ omnium approbatione.

Et de Numine differens supremo
 Cælestis sapientiæ facultas.
 Sic donis ¹⁴ sibi debitis potitus
 Magnarum novus artium Senator
 Augustum patriæ reget Lyceum.
 Mox Senâ procul impiger relictâ,
 Qualis fulva Jovis Tonantis ales
 Nido migrat, & experitur astris
 Dignam testibus indolem parentis,
 Antiquæ cupiet theatra ¹⁵ Romæ,
 Et mundi dominos videre colles.
 O quæ gloria! quanta surget illi
 Claro Chisiadæ feges laborum!
 Nobis tanta nefas canendo famæ
 Incrementa sequi, vetante Proteo,
 Quæ cautus monuit tacenda vates.
 Et jam me soliti vocant labores,
 Et vos, Naiades citant liquores.

Hæc Nymphis pater elocutus Umbro,
 Tuscorum decus amnium, tumentis
 Sese spumeus alveo recondit.
 Tum lævo tonuit ter axe cæli
 Fatis addere visus auspicatis
 Dextram Juppiter approbationem.
 Quali murmure fiderum frementum
 Tuscus sæpe suam probavit artem
 Dilectus superis Tages aruspex.
 Nec præfagia posteris in annis
 Veri certa fides Deum se fellit.
 Dum nos grandibus æmulos poëtis

Musa-

¹⁴ Eodem anno 1626. trium facultatum Collegio adscribitur.

¹⁵ Anno 1626. 10. Decembris Romam venit.

Musarum Juvenilium labores
 Miramur, Lyricique vatis auram,
 Et dignum tragico pedem cothurno.
 Seu primo cecinisse doctus ævo
 Pompei lacrymabilem peremti
 Fortunam, Pharii scelus Canopi
 Damnavit pius, ac truces Achillæ
 Perjuri furias, misertus æquam
 Ingentis generi labare causam,
 Quæ sit victa licet, Catone magno
 Et se vindice non tuetur uno.
 Seu justis nimis impotens doloris
 Letum nobile, Martiamque dextram
 Luxit Marfilii gemente plectro,
 Dum fortis cadit hostium ruentum
 Inter funera, prodigumque vitæ
 Pulcro sanguine decolorat æquor.
 Seu notum Canis æstuantis astro
 Trituræ genus & modos Hetruscæ
 Cantavit, Cererisque ferta lauro
 Vates nexuit, & siticulosam
 Æstatem Clariis rigavit undis.
 Orus, ô nemus, ô beata Tempe!
 Villæ, jugera dulcis. ¹⁶ Ancarani,
 Jucundis loca Tusculi viretis,
 Udo Tybure, Formiis amœnis,
 Et blandis mage delicata Baiis,
 Vicinæ nimis invidenda Senæ!
 Vitavit quoties negotiosæ
 Urbis mœnia, carminumque fetus

E 3

Fron-

¹⁶ Ancaranum Chisiorum villa amœnitissima non procul ab urbe Sena-
 rum, opportunus Musarum secessus, ubi admodum adolescens Pompeium
 Tragediam scripsit.

Frondosus ibi Chisius sub umbris
Obstetricibus edidit Camœnis!

At quis sufficiat referre plausus
Famæ præmia, publicasque laudes,
Quas docti tulit ingenî? paterno
Deserto lare, cùm profectus omnem
Ignoto rapuit stupore Romam
Præfens Chisiades, & eloquente
Cantu plus vice simplici moratus
Oblitum Tiberim viæ prioris,
Alcides novus aureis catenis
Tuscorum simul Aufonumque Suadæ
Sacro murice nobilem Senatum,
Et subsellia traxit alta vatum,
Vocalis quibus Humor Hippocrenes
Largæ nomina fecit apta venæ.
Idem Sulpitios, & Ulpianos,
Et Paullos imitatus, & Catones,
Cùm responsa dedit, fori querelas
Expertus tetricas, gravesque causas
Oravit, Latîæ ¹⁷ datus sacerdos
Astrææ, veterum patere legum
Nodos difficiles, & involutos
Laudavit Themis; & Rigor severus,
Et Juris comites Fides, & Æquum,
Et Fas, judicis aut sui patroni
Stiparunt latus; integramque dextram
Fugerunt avidi Cupido lucris,
Turpes Infidiæ, malæque Lites,
Et Fraus, & faciles eni Favores.

Sic

¹⁷ Anno 1629. mense Januario, utriusque, quam vocant, Signaturæ factus est Referendarius.

Sic postquam teneris adulta virtus
 Annis Chisiadæ dedit futuris
 Omen laudibus, arduisque curis
 Prælusit gravium negotiorum
 Astrææ studiis, & arte Phœbi,
 Turritum caput altiùs levavit
 Septem collibus, & favente nutu
 Lætis plaudere visâ Roma fatis,
 Nec mœstas Cremeræ tumentis undas,
 Nec Veios meminit dolens, & uno
 Felices FABIO vocavit Idus
 Fatalem FABIIIS ¹⁸ diem trecentis.

JANICULUS

*De Villâ Hieronymi Farnesii, S. R. E. Cardinalis,
 sitâ ad portam Aureliam.*

Quamvis Janiculum vocent, nec inter
 Septem mi jûga dent locum Quirites,
 Clarus non ideo minùs sepulcro
 Et Jani patris & Numæ, propinquum
 Tollo nubibus arduis cacumen.
 Vel Farnesia villa (quam remoti
 Prospectus maris, & salubre cælum,
 Et felix situs, & loci vetustas,
 Et vultus domini beat, decusque
 Ingens Patribus additi Latinis)
 Tantos dat mihi spiritus, ut ipsa

E 4

Tali

¹⁸ Idib. Feb. sex & trecenti ex Fabiis Veienti prælio interemti. Ovid. l. 11.
 Fast.

Tali munere latus astra summo
 Tangam vertice, Romulosque colles
 Nostris despiciam jugis minores,
 Et rerum Dominam superbus Urbem.

DONUM NATALITIUM

ALEXANDRO VII. P. O. M.

Idibus Februariis, Anno M. DC. LXI. oblatum.

MOs inde à veteri receptus ævo,
 Ut natalitio die clientes
 Ultro muneribus colant Patronos.
 Proin, quando niveo notanda signo
 Natales tibi lux reducit Idus,
 Suctâ, MAGNE PARENS, benignitate
 Donum, oro, famuli tui pusillum,
 Chartas accipias; quibus levamen
 Quærat gravibus subinde curis.
 Hinc sacros releges pius libellos;
 Et res Ifacidûm Patrum, Ducumque,
 Et Regum memoranda facta, & arma
 Eductamque Deo sub astra molem:
 Illinc Auftriadûm videre vultus
 Spirantes Procerumque, Cæsarumque
 Heroasque juvabit intueri,
 Musarum column, decusque Martis,
 Sollers quæ manus, ingenique mira
 Virtus mollibus edidit figuris.
 At festam referente sole lucem,
 Latè porticus alta Vaticanam

Ample-

Amplectentibus aream columnis;
 Et navalia, templa, portæ & ædes,
 Et fontes salientibus rigantes
 Urbem, perpetuis viis patentem,
 Doctâ forsitân offerentur arte
 Æri incisa Tibi : sed illa quantò
 Mox expressa perenniùs canoris
 Vatum carminibus, per ora vulgi
 Laudes usque tuas ferent, ab ortu
 Primo solis ad ultimum cubile ?

A D

BERNARDUM ROTTENDORFF

*Archiatrum Monasteriensem, de insulssimis
 Conradi Biermanni versibus dono missis.*

N Uper quòd mihi pessimi poëtæ
 Scabros, illepidos, & invenustos
 Misti versiculos, amice, dignas
 Tali munere gratias habemus,
 Rottendorffe, tibi, novem Sororum
 Et Phœbi decus : hæc enim venena
 Gustanti stomachus repentè motus,
 Tussis quando levem minata febrim
 Quassabat latus, & caput gravedo
 Torquebat, simul expulit nocentes
 Morbi reliquias prioris omnes.
 Ast ut carmina pessimi poëtæ
 Sic mî reddere visa sint salutem,
 Tu posthac cave, ne modi remittas

E 5

Hujus

Hujus munera, pestilentiora
 Morbis omnibus, omnibus venenis.
 Contrà si facies, scias necesse est,
 Actutum piperi togam datura,
 Aut nidum tineis araneisque,
 Aut pœnam subitura, quam Catullo
 Pleni ruris & infacetiarum
 Annales Volusi dedêre vatis,

D E

MOPSO FIDISSIMO CANE

mortuo.

MOpfus hîc jaceo, canis venustus
 Longis auriculis, & ore pando,
 Custos assiduus domi forisque
 Nostri Principis, & comes fidelis :
 Equo seu fuit ire, sive curru,
 Seu tritâ pedibus viâ voluptas.
 Hinc me carior haud erat ; nec alter
 Posthac est aliis futurus annis
 Me carus magis, aut magis peritus
 Blandiri Domino ; & sagax natantes
 Venari medias aves per undas ;
 Gyros carpere , & exilire in altum ,
 Et gressus glomerare tam superbos,
 Quàm non ullus equum docet magister.
 Nunc fractum senio peremit ætas,
 Et grati pietas Heri peremptum
 Urnâ composuit. Sed atra tantum

Functo

Functo mors mihi non dolet, dolenti
 Quanto, quod domino, mei reliqui
 Heu! desiderium, mihi dolori est.

A D

J O A N N E M V V I S S E

Attendoriensem, è Societate Jesu,

In Academia Paderbornensi SS. Theologia Doctorem, Gallinam & duos serpentes eodem in nido ovis incubantes, prope villam Collinam in Diœcesi Paderbornensi An. M. DC. LXVIII. hoc extemporali epigrammate describentem.

J Uxta humilem gallina casam male provida, putri
 Urticas inter nidificarat humo.

En coluber geminus cæco prolapsus ab antro,

Ova super multo lubricus orbe cubat.

Nil trepidat gallina; duos super incubat angues,

Officii mater gnava tenaxque sui.

Nec cessat coluber; sub plumâ matris & unguë,

Quod neuter peperit, fatus uterque fovet,

Et facit ambiguam foto de semine litem,

Sit pullus colubri, sitne futurus, avis.

Femina decedit litem, non ore, nec ense,

At fude vipereum comminuendo caput.

Pythonem jaculis armatus stravit Apollo,

Occidit colubros Bructera Nympha duos.

Respon-

Responsum Auctoris.

EN pro verficulis tuis, amice,
 Unâ qui simul incubatione
 Invisâ priûs ova confoventes,
 Gallinam, & geminos canunt colubros,
 Iratæ fude villicæ peremptos;
 Insignes tibi mittimus rubenti
 Cancros tergore, brachiisque curvis,
 Villæ munera; nec minus precamur,
 Illorum dape lætus ut fruaris,
 Et, te iudice, delicatiori
 Sic omnes superent sapore pisces;
 Ut, me iudice, carminum tuorum
 Binus munere consecratus anguis
 Immortalibus usque & usque sæclis,
 Pythonem super, & laboriosi
 Alcidae celebrem levatus Hydram,
 Inter sidereos micabit ignes.

A D

CLEMENTEM X. P. O. M.

*Octogesimo ætatis anno, paucis ante Clementis IX.
 Pontif. mortem diebus, Cardinalem, ac proximis
 inde Comitibus Vaticanis summum Pontificem re-
 nunciatum. An. M. DC. LXX. III. Kal. Maii.*

CLemens, optime Romuli nepotum,
 Princeps & patriæ parens, & orbis,

Quan-

Quando muneribus tuis rependami
 Grates, quas ego debeo perennes
 In me tot mēitis tuis, meūque
 Mecum debet, & usque debiturum
 Frater se meritis tuis fatetur?
 Sed dignas prohibet referre grates
 Ingens copia munerum tuorum.
 Ergo quæ pietas amorque dictat,
 Et blando recipit benigna vultu
 Majestas tua, pro tuâ salute,
 Nec non imperio tuo precantes;
 Votis nectimus auspicata vota;
 Ut Te nemo diutiùs Quiritum,
 Doctrinâ, ingenioque, moribusque
 Dignis murice, debuit mereri
 Serum purpurei decus senatûs,
 Et nemo citiusque, digniusque est
 Summis orbis honoribus potitus;
 Sic Te nemo diutiùs Quiritum,
 Summis orbis honoribus fruatur.

AD MATHIAM NALDUM,

ALEXANDRI VII. PONT. OPT. MAX.

MEDICUM INTIMUM,

*Aphorismos Hippocratis notis illustratos Flavio
 Chisio S. R. E. Card. amplissimo
 dedicantem.*

P Hœbi sacrarum præsidis Camœnarum
 Artisq̃ue, morbos quæ domare cessantes

Potens

Potens medelis, & salubribus succis,
 Secanda profert sæpe fila Parcarum,
 Decus perenne, maximoque ALEXANDRO
 Dignus Machaon, quid moraris in dias
 Emittere auras luminis, senis Coi
 Divina, Nalde, scita? quæ dies longa,
 Et imperita turba plurimis mendis
 Opplerat, hætenusque poverant pauci:
 At mox, favente Delio, tuis curis
 Deterfa, doctrinæque luce perfusa
 Legentur, & quâ Sol renatus Eoo
 Surgit cubili, quaque conditur fluctu.
 Quare secundo munus inclytum plausu
 Volare docta per virum finas ora
 Latè, benigno, Nalde, FLAVIUTUM
 Favore, nuper arte qui tuâ, multâ
 Cum laude, rebus restitutus Urbanis,
 Regnique curis, publicæque terrarum
 Felicitati, PATRUVORE servatus
 Excipiet, usque muneris memor tanti,
 Tui sereno lumine ingenI fetum:
 Ejusque fidere actus invidus livor,
 Et Zoilorum turba cedit, ut nubes
 Fugit corusci pulsa Solis aspectu,
 Pontique sævientis atra tempestas,
 Simul refulsit alba stella Pollucis.

A D

JACOBUM PHILIPPUM
NINIUM,
ALEXANDRI VII.

PONT. OPT. MAX.

*Cubicularium intimum, & supplicibus libellis
propositum.*

NINI meorum lecte flos amicorum,
 Cui melle Hyblæo dulcius fluit puræ
 Orationis nectar ore facundo,
 Rerum potenti cùm refers ALEXANDRO
 Negotiosa supplicantium vora.
 Humanitatis sæpius tuæ fructum
 Expertus, oro, teque rursus obtestor,
 Ociùs amici supplices preces nostri
 Recites. Quiritum namque fata formidans,
 Acerba fata, sospes ad suos Boios
 Avet redire, carbasisque remisque.
 Fugæ secundos provocantibus ventos
 Per arva latè vectus alta Neptuni
 Adire litus hospitale Gallorum.
 At Vaticanæ dona nunc potestatis,
 Cui paret æther, inferique, tellusque,
 Tantùm requirit. Impios canis prægnans,
 Parræque cantus, montibusque decurrens
 Lupa Lanuvinis, imbriumque divina
 Avis imminentùm terreat : quid huic obstat,

Iterque

Iterque rumpat, si, quod unicè poscit,
Cursus precetur prosperos ALEXANDER.

AD NATALEM
RONDININUM.
JOCUS.

Q Uod utrique nostrum commodavit argentum
Ad vestiendum Græculum Favoritus,
Cur Rondinine debuisse me solum
Reglutinare judicas, minùs rectè
In me retorquens negligentiae culpam?
Debere nulli me libentiùs novit
Idem ille, semper qui mihi Favoritus
Facit benignè, mutuae voluntatis
Fideique certus usquequaque constantis.
Ne creditoris ergò debitor partes
Agas, amice, non rogatus obtestor;
Quin ipse cures, ut bonum sies nomen,
Fidemque semper æmulere Germanam.

IN AUCTOREM

*Inepti epigrammatis, in Augustinum Favoritum
scripti, quo ultimam syllabam & ALIPES,
de Pegaso loquens, corripuit.*

I Nsulse vates, quid (malum) Favorito,
Musarum oculo, quem volare Parnassi
Utroque tutum suspicit jugo Phœbus,
Casum ominaris, Icarique fortunam?
Potiùs timendum est pessimo Poëtarum

Tibi,

Tibi, per caputque pedesque ne ruas præceps,
 Ut Lampfacenus ille, monte Pimplæo;
 Pœnasque dignas ALIPES Medusæus
 Centum reposcat calcibus, quòd extremo
 Pede immerentem claudicare fecisti.

AUGUSTINI FAVORITI

Responsum.

QUòd usque ab Adriatico in Favoritum
 Adunca torvus cornua, ac truces armat
 Dentes Poëta pessimus poëtarum,
 In immerentem sæviens & ignotum,
 Ignotus ipse; vapulare, Fernande,
 Fortasse meruit: Pegasum quòd offendit,
 Haud jure vatem criminaris; in toto
 Nil ille fecit elegantius libro:
 Pes namque claudus Pegasi, ut tuâ fecit
 Tam dulce carmen profiliret è venâ.

ALEXANDRO VII.

PONT. OPT. MAX.

Calendis Januariis An. M. DC. LXVI. felicitatem precatur.

Cur Musa longo desides silentio,
 Aurata quondam docta fila tangerè
 Citharæ loquacis? quin Alexandro novis
 Jani Calendis dona depromis nova;
 Aut digna Majestate si tantâ nequis

Afferre, vota nuncupans sollemnia
 Fro re Latinâ, proque gente Chisiâ,
 Quot vere flores educat Favonius,
 Æstate aristas flava quot numerat Ceres,
 Autumnus & quot pingit uvas purpurâ,
 Frondes quot altis decutit silvis hiems,
 Felicitatis tot precare Maximo
 Donis refertos vehat Alexandro dies
 NUMERIS HIC ¹ANNUS ABSOLUTUS OMNIBUS.

A D

FABIUM CHISIUM

*Episcopum Neritonensem, Innocentii X. Pont. Opt. Max. cum
 potestate Legati de latere Nuntium, & Pacis inter Europæ
 Principes conciliandæ Mediatorem, Monasterii Westphalo-
 rum, cum auctor illic per astatem ageret. An. M. DC. XLVI.*

FABI, sinistro jam nimiùm diu
 Depræliantùm Numine Principum
 Delecte pacator, suumque
 Orbis in exitium ruentis
 Spes fida, nec non Palladis, ac novem
 Decus Sororum, perge tuis, precor,
 Suadere Musis, aureamque
 Exilio revocare Pacem.
 Gaudent amoris foedere mutui
 Pax & Camcænæ. Tuta placet quies
 Utrisque, nullo classicorum
 Rupta sono, tonitruque belli;

Et

¹. Omnes literæ numerales, quotquot sunt in Alphabeto Latino, ordi-
 ne in his M. DC. LXVI. exhibentur.

Et quæ sacrarum Cecropis arcium
Regina claris præsidet artibus,
Utrumque communes olivæ
Vendicat ingeniosa Pallas

Cum Pace ramos. Tam bene convenit
Cum Pace doctis Vatribus, & Tibi,
Quem prima fulgentis metalli
Sæcla jubet renovare Pacis

COLUMBA¹ miti germine Palladis;
Quem signa QUERCUS inclyta CHISIÆ
Ramis decussatim ligatis
Vincla monent reparare Pacis.

Quin ergo nostris finibus ad Getas
Martem repellis: nam Deus omnibus
In nos obarmavit nocendi
Artibus, insidiisque Martem,

Lethumque, & atris Esuriem genis,
Et ponè scissis Tisiphonen comis
Subire jussit, cladibusque
Innumeris cumulare clades.

Non ante Virtus oppida, non agros
Cornu revifet Copia divite,
Non ante Strages, & Malorum
Mille procul fugient catervæ.

Quis pace gaudet sanguine civium?
Quis pace luget militiæ gravis
Tributa? vicorumque mœstis
Funeribus, viduisque campis

F 2

Illa-

1. Insigne domus Pamphilæ, ex qua ortus Innocentius X.

Illacrymatur ? nec potius mero ,

Cantuque curas & fide Teïa

Sub hospitâli fallit umbrâ,

Quà vitreæ fuga ludit undæ,

Aut quà jocosis lenè Favoniis

Impulsa quercus garrula proximam

Quercum salutat, sub virenti

Tristitiam tumulat sepulcro ?

Tunc læta culmis arva feracibus

Stipata rumpunt horrea frugibus,

Nostrâque mercator Batavus

Messe suas onerat carinas.

Tunc uva certat plurima purpuræ,

Pomisque vinctus tempora mitibus

Autumnus ad plenum beatas

Fundit opes avidis colonis.

A D

AMICOS GERMANOS

in Italiam proficiscens An. M. DC. LII.

ineunte Aprili.

IMus in Aufoniam : pressis jam pugnat habenis,

Iterque læto poscit hinnitu fremens

Cyllarus, impatiensque moræ pede spargit arenam ,

Prætervolare gestit & cursu Notos.

Imus, & assueti Diræo sidera cygno,

Phœbique sacrum Pegaso vecti nemus

Visere, jam mediis insertas nubibus Alpes,

Quà fabulosam stravit Alcides viam,

Aut,

Aut, quâ Pœnorum ductor juga rupit aceto,
 Flammisquæ cautes torridas ferro scidit,
 Scandemus celeres; nec post discrimina terræ,
 Tumultuosos Adriæ fluctus maris
 Securi Venetâ metuemus frangere cymbâ,
 Delphine Arion si natat tutus suo.
 Nunc igitur dilecta domus, fratresque, sororesque,
 Et vos, Nepotes, dulcis ætatis rosa,
 Fürstenbergiacæ memores virtutis Iûli,
 Valet, nostri generis optatum jubar.
 Vivite cælestes animæ, meliore metallo
 Certam trahentes sæculi primi notam,
 Quas amor, & Musæ doctâ cum Pallade nobis
 Constante semper alligaverunt fide.
 1 Velde vale, primum quò nostra Thalia magistrô
 Libare fontes ausa Castalios fuit,
 Historiæ vatumque decus, Suadæque Latinæ;
 Et qui, Camœnis pariter ac carus mihi,
 Me juvenem teneris curâ complexus ab annis,
 2 Höninge fidâ, doctus ut Chiron, manu
 Duxisti, Patruî quò per vestigia Virtus
 Domûs avitæ gloriam sequi jubet.
 Te quoque 3 Veckenî, præclarum Scaldis alumnum,
 Nostroque lumen mutuum Rheno datum
 Doctrinæ, Sophiæque, facer quam tradit Aquinas:
 Et te 4 Masenî, magna Pindi gloria,
 Amplector; dextramque tuam 5 Crumbache, tuamque
 Longum, 6 Gelenî, stringo dicturus vale.

F 3

Sed

1 Joannes Velde S. J. 2 Fridericus Hönig Ordinis Præmonstratensis Cæ-
 nonicus, 3 Franciscus van der Vecken S. J. 4 Jacobus Masen S. J. 5 Hei-
 mannus Crumbach S. J. 6 Ægidius Gelenius.

Sed ⁷ Mallincrodios, & te suavissime ⁸ Torcki,
 Et utrâque Phœbi laude ⁹ Rottendorffios
 Præstantes, ævi clarissima lumina nostri,
 Amor salutis noster absentes colit
 Eminus obsequio. Nec te, ¹⁰ Bollandæ, disertum
 Antiquitatis sanctioris Livium
 Præterit, aut numeroſe tuas, ¹¹ Baldæ, Camœnas,
 Vatemque veris floridum ¹² Bisselium.
 Omnibus impertit, quæ basia debet; amicis
 Gaudere jussis & valere longius.
 Sed me tam caros linquentem Roma sodales
 Communis orbis univèrſi civitas
 Allicit, & Latix rapiunt miracula terræ;
 Seu quæ vetuſta, seu recens ætas tulit.
 Jam Paderæ Tybrim, jam septem præfero colles
 Angariorum montium cacumini.
 Jam mea ¹³ Bilſtenias fugio cunabula rupes,
 Et, qui propinquo mons Caballinus jugo
 Surgit, & accipitres pernicibus educat alis
 Certare doctos ardeis Britannicis.
 Præcipuè commendat iter mihi gratia præſens,
 Et purpurati CHISII recens honos;
 Qui moviſſe potens vel avitas carmine quercus
 Facundus Orphæus Nos in Auſoniam trahit.

⁷ Bernardus Mallincrodius Decanus Monasterienſis. ⁸ Joannes Rotgerus Torckius Canonicus Monaster. ⁹ Bernardus Rottendorffius archia-
 ter Monasterienſis. ¹⁰ Joannes Bollandus S. J. ¹¹ Jacobus Balde S. J.
¹² Joannes Bisselius S. J.

¹³ Bilſtenia arx Angarix munitiſſima, dynaſtiæ cognominis, in altiffima
 rupe ſita, in qua auctôr horum Poëmatum an. 1626. 21. Octob. natus
 fuit, propinquum habet montem Caballinum, vulgò Roſſenberg nuncu-
 patum.

A D

NICOLAUM HEINSIUM,

*& Lucam Langermannum, Româ Florentiam
discedentes, An. M DC. LII. 3. Kal. Julii.*

Nobile par juvenum, soboles præclara parentum,
Candida Theseï biga sodalitiï ;

Quàm lætus fuit ille dies, quàm risit amico

Lumine, vos primus quô mihi junxit amor !

Quô tres una domus cepit, facilesque Camœnæ

Jusserunt Charitum nectere lege manus.

Ille dies rerum dominam mihi cernere Romam ,

Et quicquid priscae rudera laudis habent ;

Ille Quirinales accedere Principis arces,

Chisiadæ Musis præsidioque frui ;

Ille dedit Latiae mirari flumina Suadæ,

Ille dedit vestrae carmina mentis opus.

Langermanne, tibi totas indulgit Athenas

Græcia, delicias & tibi Roma suas ;

Et quicquid Venerum formoso vertice Pindus

Possidet, ac sacris Cyrrha propinat aquis.

At te, quod patrii ditissime numinis heres,

Heinsiade, Batavi gloria magna soli,

Quid dicam numerosa tuas in carmina vires ?

Quid celebrem Clario pectora foeta Deo ?

Niliacus rugas jam toto corpore vates

Exuit, & calamo barbarâ menda tuo.

Jam quoque Pelignus tenerorum lusor amorum,

Ut niteat, similem sperat & optat opem.

Jam Suconum laudata favet Christina Poëtæ,
 Aönni columnen delictumque chori.
Se minor illa tibi septem diadema Trionum
 Inclinat, plectris & sua scepra tuis.
Maxima Gustavi si tanti filia Regis
 Te facit, ac citharæ vis rapit illa Deas;
Heinslade nostros mirari desine plausus,
 Et, mea quos dictat Calliopea, modos.
Te mihi notus amor Phœbi, te gratia fandi
 Conciliat, magni quod Patris instar habes;
Non ut amare tuæ non possim mentis acumen,
 Et cultum variis artibus ingenium.
Sed quid amo? fortuna diu vetat esse beatum;
 Et, quæ prima dedit gaudia, prima necat.
En prius optatò coalescere cœperat usu
 Noster amor, nostri Maius amoris erat;
Cùm fugitis, dilecta cohors, cùm verna voluptas
 Omnis, & in primo spes mihi flore perit.
Et tot delicias, & tot rapit una lepôres
 Hora nimis studiis insidiosa meis.
Ergo nec antiquo Tarpeia cacumine rupes
 Ardua, nec reliquis tot monumenta jugis,
Nec vos Roma recens, nec quæ nova surgit in altum
 Pyramis, & largas ejaculatur aquas;
Nec præceps Anio, nec amœni Tiburis horti,
 Tuscula blanditiis nec tenet aura suis?
Nec tot amicorum lacrymæ, Vatumque querelæ,
 Nec tot propositum vota morantur iter?
Ah fortunato nimiùm Florentia cælo
 Vos trahit, & Tuscis allicit Arnus aquis!
Scilicet illa viæ fastidia vincit & auræ;
 Et desiderio mitigat astra sui:

Nec patitur valuisse preces, nec amica dolentum

Signa, nec humentes pondus habere genas.

Ah precor, & superi saltem pia vota secudent !

Quando meas surdâ temnitis aure preces.

Auspiciis, precor, ite bonis, & numine dextro

Per juga, Flaminiâ per loca plana viâ :

Sic precor, & vobis volucer Cyllenius adsit,

Et melius virgâ, vel pedè signet iter.

Sic Apennini subfidant culmina montis;

Aut tollat vates Pegasis ala duos.

Sic precor : umbrosæ veniant ad tempora lauri,

Frondebis & calidos frangat oliva dies ;

Et Zephyrus blandis permulceat ora susurris,

Et levis intonas ventilex aura comas :

Et Satyri ludis, & euntibus obvia plaudat

Naiadum pulchris juncta Napæa choris :

Sic precor ; incolumes patriæ Florentia tandem

Reddat, & oblitos non velit esse mei.

A D

A L E X A N D R U M

P O L L I N U M.

I Ngens Aufoniæ lumen, & Atticæ

Suadæ flos, & amor Palladis, & decus

Nostræ dulce Camœnæ,

Nec non candidus arbiter,

Quid, P O L L I N E, latens jam nimium diu,

Cedro digna negas edere carmina,

Et durus pater abdis

Fetus divitis ingenI ?

F 5

Non,

Non, ut deliteas, te Deus aurcâ
Donavit citharâ Delphicus, & fui

Multâ parte Thalia

Versus nectaris imbuit.

Ingratus metuat lædere numina,

Qui, quæ dona sibi contulerint, premit.

Tu Parnasside lauro

Vinctus tempora, nobilem

Indulgens meritis sume superbiam,

Et te victor humo præpetibus leva

Pennis, & super alta

Certus tendere nubila,

Ales fideream carpe citus viam.

Paullùm desidiæ distat inutili

Quæ demersa profundis

Virtus in tenebris jacet.

Quis pugnata duci prælia Dardano,

Et Troiæ profugos in Latium Deos,

Quis surgentia nosset

Urbis mœnia Romulæ,

Morem si rigidis imperiis gerens

Flammis continuò Cæsar edacibus

Immortale Maronis

Commisisset opus sacri?

Verâ laude caret sæpe modestiæ

Virtus, & vitio proximus est pudor,

Qui vitare perennis

Audet lumina gloriæ.

Quòd si purpureum spontè vides diem,

Formosumque caput crinibus aureis

Altâ nocte sepultis

Terris reddere Delium,

Cur te perpetuæ noctis amor tenet,
 Frustrantem cupidas Romulidûm preces,
 Et spes ? plena secundis
 Tandem pande Favoniis
 Famæ vela tuæ, finibus Italis
 Qui porrecta domum Solis ad ultimam, &
 Septem regna trionum
 Latè nomina proferant.
 Mox te Pierio carmine nobilem
 Dignis posteritas tollet honoribus,
 Magnorumque beatis
 Vatum cœtus inseret.

A D

STEPHANUM GRADIUM ABBATEM.

Sic tibi sint faciles Musæ, sic dexter Apollo
 Sororibus cum Gratiis
 Adsit, & attentis bibat auribus, optime poscis
 Quæ supplici GRADI prece:
 Ut mihi flexanimo permotam carmine mentem
 Alti tenacem consili
 Expugnas. Juvat ire jugis, juvat usque relictum
 Lustrare Musarum nemus,
 Et virides hederâ rupes, & rupibus undas
 Haurire manantes sacris.
 Sentit enim Phœbi stimulos, & pectus anhelat
 Calore succensum tuo.

Non

Non tamen heroos aufim tentare cothurnos,
Magnique laudes CHISII
Deterere ingenii culpâ. Quis namque canendo
Æquare virtutes queat ?
Quis Melitæ curas, aut fortia facta Padusæ,
Quis alta Romæ munera ?
Nemo difficiles pacis, mihi crede, labores
Cantare digniùs potest
Ipso CHISIADÆ; seu ferrea Martis iniqui
Abominatus sæcula
Luget, & undantem Germano sanguine Rhenum
Et arma damnat impia :
Seu conjuratas Bellonæ justius iras
In terga verti barbara
Imperat, ac fido lacerari cornua ferro
Lunæ superba Thraciæ.
Sed quæ vefanas agitat discordia gentes ?
Quis mutuas cædes furor ?
Quæ rabies ? aut quæ dementia suadet amico
Emi cruore lauream ?
Quis pudor Odrysii regnum fulcire Tyranni
Labentis Europæ malo ;
Et, Venetas qui carpat opes, permittere Cretam
Scythæ premendam perfido ?
Parcite civili jam tandem parcite bello :
Satis ruinas urbium
Flevimus, & sparfos cognato sanguine campos :
Datum fatis discordiæ.
Parcite : vel si tantus amor vos Martis adurit,
Si tanta regnandi sitis,
Mutatis odiis Gallus conspiret Ibero.
Hic nota per vestigia

Regna petat Libyæ : Solymos magis ille triumphos
Virtutis antiquæ memor

Ambiat, & palmas latè frondentis Idumes
Victrice decerpit manu.

Ite alacres, ite ergò, mari date vela secundo
Devota pugnx nobili,

Ite pii Reges : conjunctas fœdere dextras
Communis armet ultio,

Aut metus, incumbat propiùs ne barbarus hostis
Clarâ potitus insulâ.

At nos, Germani proceres, jam pace receptâ
Ad arma cessantes nova

Ister ad arma vocat, dudum indignantibus undis,
Qui Bistonum pressus jugo

Servit, & excidium nobis ac damna minatur
Extrema fortunæ gravis.

Quin igitur pulcrâ pro libertate ruentes
Vicina Budæ mœnia

Rumpimus, & vastus quâ verberat ostia Pontus
Immugientem Bosporum

Addimus imperio, referentes signa superbis
Derepta ByzantI tholis?

Tunc me cognatas acies, & nobile bellum
Gravi sonantem barbitō

Miratus, nostras laudarit fortè Camœnas
Silente Rhenus alveo.

Tunc & Mœonio seu carmine nobilis arma,
Sive efferas pedestribus

Docte GRAD I historiis, ingentia facta meorum
Seros docebis posteros.

A D.

JOANNEM BAPTISTAM

Turricellium, Patavinum.

Ne popularibus rumoribus fidem habeat.

TU cui sollertem rerum prudentia mentem
 Formavit, & Phœbus pater
 Fatidicos lucos Heliconis, & antra reclusit,
 Amice, veri conscia,
 Quid bibulam dubiis dōnas rumoribus aurem?
 Quid vana Romæ sibila
 Sollicitant animum pendente marmure vulgi,
 Ut ore doctoris puer?
 Sive infanda sonat convitia, sive tumentes
 Buccas resolvit laudibus
 Immodicis, famæ, moneo, ne crede loquaci;
 Quam prævolant Calumniæ,
 Insidiæque sequuntur, & artes mille nocendi,
 Livorque lætis anxius,
 Nec non Blanditiæ, corruptaque Gloria fuco,
 Et emta vulgi Gratia.
 Sint portenta hominum nigro suffusa veneno,
 Et plena falsi pectora,
 Qui, dum vipereâ fingant mendacia linguâ,
 Sese poëtas æstimant.
 At satis exoriente die commenta patebunt
 Et virulenta somnia,
 Aut evanescet rumor, qui crevit eundo,
 Crescente temporis morâ,

Qua-

Qualis in Assyriam Gyndes exundat, & idem,
 Cyro jubente, naufragum
 Propter equum, latè centum diductus in amne
 Decrescit ipso se minor.
 Ergò si populi sermonibus exul amicus
 Narratur aulâ, ne favor
 Illum destituat, ne gratia vitrea frangi;
 Timere non erit tuum
 Ante fidem certam, primæ nisi credulus auræ
 Dolere bis velis miser.
 Sic etiam vulgo si cuiquam teste paratur
 Latina fortè Purpura,
 Seu Vaticanæ Sedis suprema potestas,
 Sperare non erit tuum.
 Ne frustrata gemat, ne votis usa secundis
 Mens gaudiorum præcoci
 Germine decerpto, maturos perdat honores;
 Et vana spem ludat seges
 Lætitiæ. Expectare licet: dilata voluptas,
 Ceu lenta veris gratia,
 Plus juvat, & densis placet eluctata tenebris,
 Micansquæ, cœu sol, Veritas.

A D

FRANCISCUM MACEDO

*Lusitanum, de morte Theodosii Lusitania
 Principis.*

Q Ualis in Hesperii, Franciscæ, cubilia Ponti
 Emenus astrorum vias

Præ-

Præcipitat Titan, mox fluctibus exit Eois,
Crinem repexus aureum,
Pulcrior, igniferoque diem vehit axe recentem,
Et noctis umbras dissipat:
Talis Theodosius, dominantium sanguis avorum
Utramque per solis domum,
Virtutumque paternarum non degener heres,
Et grande Lusiadum decus,
Occidit, & raptus primævæ flore juventæ
Unâ parentis arduas
Spes fecat, & mœstas damnat caligine gentes,
Et regna divitis Tagi.
Nec mora: convexi surgit novus incola mundi,
Pictosque stellarum globos
Calcat, & immensi tractus speculatur Olympi
Incertus, an sidus novum
Occupet Herculei radiantia terga Leonis?
Æquamne libram Virginis?
An fratres Helenæ geminos? an Orionis ignes
Accendat æmulâ face?
Sed titulos quæcunque tuos plaga lucida cæli,
Quæcunque nomen sidera
Accipient: certè patriis sublimis ab astris,
Auguste Princeps, despicias
Sub pedibus nunc fata tuis, sortemque tuorum,
Et sceptrâ curas regia,
Et, si certa fides, si veri doctus Apollo
Vatum secundat omina,
Jam mixtus Superis calidâ prece Numinis iras
Franges; & auri sæcula
Prima Tago referes (qui nunc malè decolor undas
Cruore cognato trahit)

Et confanguineos in mutua fœdera Reges,
 Amica pacis fœdera,
 Restitues, ac bella procul (quâ Bosporus audax
 Ignota committit freta)
 Vertet ab Hesperiae populis in cornua Lunæ
 Votis tuis motus Deus.
 Tunc repetet Solymas arces, & signa profanis
 Avulsa Thracum postibus
 Romuleas latè victrix suspendet ad aras
 Bellantis Europæ manus.
 Hæc tua nunc pietas, & adhuc dum vita manebat,
 Jurata promittit fides.

A D N A T A L E M

R O N D I N I N U M.

De Philantiâ fugiendâ.

Q U I sua cœcus amat, ceu natos cercopithecus
 Amore vesano fovet,
 Et necat amplexu, formam admiratus & ora
 Ridenda, visu & turpia;
 Audiat exemplum sacri miserabile vatis,
 Aurita qui Thracum potens
 Saxa movere sono, blandâ prece carminis ima
 Ditis refregit atria,
 Non exorato portas adamante rigentes
 Ingressus, ut raptam sibi
 Eurydicen superis Proserpina redderet auris,
 Lyrae sonantis præmium.

G

Red-

Reddita jam fuerat conjux, cùm ponè sequentem

Jurata contra fœdera

Respicit infelix Orpheus, & quam nimis ardet,

Amando perdit conjugem.

Tristia Narcissi quis funera nescit, & ignes ?

Quem fontis umbra lucidi,

Et sterilis decepit amor, dum prendere vultus

Imo percussos vado

Sollicitus, visæ tabescit imagine formæ

Amator imprudens sui.

Ergò cave, quisquis simili vesanus amore,

Apollinari laureâ

Carmina digna putas, nugis quæ plena canoris,

Sed cassa rebus parturis

Iratis Musis. Tantum sitis improba laudum

Suadere amat dementiæ.

Non eadem nobis es, RONDININE, monendus,

Ocelle gentis Italæ,

Noster amor, qui jura licet divina piorum

Perfusa doctrinâ Patrum,

Et Latii veteres, & Graiæ Palladis artes

Claudas capaci pectore ;

Non ideò temet vanus miraris, ut ales

Superba Junonis solet

Pandere laudatæ gemmata volumina caudæ

Ad discoloris Iridis

Invidiam. Quin ipse gravis tua carmina censor,

Linenda cedro carmina,

Exigis ad limam, non dedignatus amici

Sensum atque mentem exquirere

Ingenui : nec theta nigrum quandoque recusas,

Aut pollicis versi notam.

Sic Venusinarum sermonum candidus audit
 Judex Tibullus, & suos

Nasoni solitus recitare Propertius ignes
 Arbitrio illius stetit.

Sic & Apelleas Lyfippus sæpe tabellas
 Colore vivo perlitas,

Signaque Lyfippi spirantia doctus Apelles
 Curâ recognovit pari.

Nempe minùs peccat, præbere fidelibus aurem
 Quicumque præceptis amat.

Nec metuit Bavius, qui sese, iudice recto,
 Castigat erroris reum.

Ingenium quicumque suum pluris facit æquo,
 Non æstimandus posteris,

Aut tineis epulas, aut scombris debet amictum,
 Ridenda vulgi fabula.

A D G U I L I E L M U M FURSTENBERGIUM,

*Fratrem suum, Canonicum Trevirenssem, Paderbor-
 nensem & Monasteriensem, Româ per Galliam,
 ubi Marsiliae portu ob pestilentiae suspicionem pro-
 hibitus, Telone susceptus, & Lugduni gravi post-
 modum morbo tentatus fuit, in Germaniam ad
 suos proficiscentem An. M. DC. LVI. Non. Novemb.*

Ergone Tyrrhenum volitanti per mare puppi,
 Et impotentibus Notis.
 Credulus, ire paras?

Nec fœdas hyemes, nec monstra natantia ponto,
Nec faxa palles naufraga?
Quin etiam fidei
Immemor antè datæ, Romam fugis, atque sodales,
Et fratris, ô vitâ mihi
Frater amabilior,
Deseris amplexus votis tua vela sequentis,
Ne fœvus illis Africus
Ingruat, aut Boreas.
Verùm age, quando fugæ certam jam nulla morari
Mentem queunt suspiria,
Oceanicæ minæ,
I felix, longùmque vale, celeremque carinam
Regant benigna sidera
Fratribus unanimis
Tyndaridæ, pelagique potens Neptunus eunti
Irata componat freta,
Nereïdumque chorus
Adsit, & alma Thetis, dum ventis usque secundis
Sparfas per æquor Stoechadas,
Phocæicosque sinus
Attigeris. mora nulla: petas tunc sospite cursu
Optamus urbem, quam celer
Alluit hinc Rhodanus,
Illinc lentus Arar. Sed quid præfaga futuri
Sinistra fata mens timet?
Sit, precor, augurii
Vana fides, meritisque tuis votisque tuorum
Permota, spes Germaniæ
Numina respiciant.
Hinc infelici positas in rupe Gebennas
Prætervolabis, & iuga
Plurima sideribus

Proxima transgressus, descendes flumine Rheno

Beata demum patriæ

Arva videre tuæ,

Arva olim proavis regnata, & cæde Latinâ

Conspersa, quâ Varus gravi

Stratus ab hoste jacet.

Quos ego nunc plausus audire? quot oscula caris

Divisa amicis, intimæ

Quas videor lachrymas

Cernere lætitiæ testes? quæ gaudia fratrum

Terrâ marique devium

Fratris iter reducis,

Et res optantûm nostras, Italûmque labores,

Et facta ALEXANDRI inclyta

Noscere? quæ dubiis

Narrabis meliùs rumoribus, ipse fidelis

Spectator: ut pulsâ fame

Finibus Ausoniæ,

Illius auspiciis opulento Copia cornu

Beatit urbes, & redux

Frugibus arva Ceres:

Ut nunc consiliis præsentibus, impiger Hydræ

Qualis renascentis caput

Amphitryoniades,

Infestam Latio pestem premat inclytus Urbis.

Servator, hinc & patriæ

Audiat usque Pater:

Nec tamen has inter curas, terraque marique

Cretæ laborantis piam

Mittere rebus opem

Cesset, & Europæ convertere bella furentis
In regna latè barbara
Thracis, & exitium.

Hæc & plura tuis memorans, nec vota filebis
Romæ precantis jam diu
Egregio juveni

Virtutis patruæ vestigia sacra legenti,
Decus Latinæ Purpuræ,
Et meritos titulos.

Intacti siquidem mores, animusque benignus,
Ac vena dives ingenI,
Cultaque Pieriis

Artibus, & Themidos studiis, ac sub lare sancto
Nutrita mens, & indoles
Vivida CHISIADÆ

Spem faciunt, curas partito ac pondera mundi,
Longos ALEXANDRO fore
Et sine nube dies.

L E C T O R I.

CUm Poëmata Ferdinandi Fürstenbergii auctiora in lucem nunc iterum prodeant, benevole Lector, ipsa nos Monumenta Paderbornensia, ejusdem auctoris fetus perelegans, admonere quodammodo, & exigere videntur, ut quæ non ita pridem fuerunt seorsum edita, jam unà cum his Poëmatibus publice-
mus: Nam etsi horum Monumentorum inscriptiones ex historia Romana, Francica, & Saxonica, ut vides, sint contextæ, quia tamen earum argumentum versu convescitur, par esse duximus presenti Poëmatum libello illas annectere. Quodsi verò adjectæ inscriptionibus notæ, ob brevitatem fortè obscuræ, ac nimis jejuna tibi videantur, eruditissimum auctoris commentarium consulas velim, quò jam denuo separatim Amstelodami edito, Monumenta Paderbornensia illustravit, nec patriæ antiquitatis, quàm gloriæ suæ perennius exegit monumentum. Vale.

ALISO ROMANUS, MEMORIÆ. SACRUM

SQUIS. ¹ ALISONEM. VESTIGAS. FORTE. SICAMBRIS
IMPOSITUM. DRUSI. GRANDE. NERONIS. OPUS
QUO. STETERUNT. AQUILÆ. POPULIS. QUO. ROMA. SUBACTIS
JURA. DEDIT. SIGNIS. PERNICIOSA. SUIS
HUC. PROPERA. ² PAGO. VICINO. NOMEN. ET. AMNI
HÆRET. ADHUC. PRISCIS. NOBILE. TEMPORIBUS
LONGA. DIES. FOSSAS. LATE. COMPLEVIT. ET. HOSTIS
MOENIA. VICTRICI. DIRUIT. ALTA. MANU
FAMA. SUPERSTES. ERIT. SCRIPTORIBUS. AUCTA. LATINIS
DONEC. ALISONIS. LUPPIA. CRESCET. AQUIS

FERDINANDUS. DEI. ET. APOSTOLICÆ
SEDIS. GRATIA. EPISCOPUS PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG

ALISONEM. ROMANORUM. CASTELLUM. CONTRA SICAM-
BROS. A. NERONE. CLAUDIO. DRUSO. AD LUPPIÆ. ET. ALI-
SONIS. CONFLUENTES. POSITUM. RERUM. GESTARUM. GLO-
RIA. CELEBERRIMUM. DIOECESI. SUÆ. VINDICAVIT. ET. PA-
TRIA. ANTIQUITATIS. ILLUSTRANDÆ. STUDIO

M. H. P

¹ Velieius Paterculus. lib. 2. Tacitus lib. 2. Annal. Dio Cassius lib. 54. hist. Rom.

² ELSSEN pagus hodieum celebris, Paderbornæ vicinus, Dioni Cassio l. 54. *Ελισων* dictus. Philipp. Cluverius lib. 3. antiquæ Germ. cap. 9. Joan. Horrius Soc. Jesu in Panegyri. Paderborn. 1. 2. cap. 9. aliique.

F O N T E S L U P P I Æ.

M E M O R I Æ. S A C R U M

1 LUPPIA. ROMANIS. ANNALIBUS. INCLYTUS. AMNIS
 NEC. MINUS. IN. FRANCA. NOBILIS. HISTORIA
 HIC. ORITUR. NOMENQUE. DEDIT. FAMAMQUE. NERONUM
 QUO. SITA. MAJORIS. 2 CASTRA. FUERE. LOCO
 ET. QUEM. CONCILIO. PRO. RELIGIONE. VOCATO
 SAXONIÆ. CAROLUM. 3 TER. CELEBRASSE. FERUNT
 DEVENERARE. SACRUM. FLUVII. CAPUT. HOSPES. ET. ALTE
 CELATIS. NIL. PRÆFER. ORIGINIBUS
 QUI. LICET. INNUMERIS. TUMIDUS. PETAT. AMNIBUS. ÆQUOR
 FONTE. TAMEN. MAJUS. LUPPIA. NOMEN. HABET

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES PYRMONTANUS. ET. LIB. BARO
 DE. FURSTENBERG

AD. FONTES. LUPPIÆ. FLUMINIS. IN. DITIONE. PADERBOR-
 NENSIS. SURGENTIS. ROMANI. EXERCITUS. HIBERNIS. ET.
 CAROLI. M. CONCILIIS. CELEBRATOS

M. H. P

1 Mela lib. 3. cap. 3. Tacit. annal. l. 2. & hist. 5. Strabo. l. 7. Dio Cass. l. 54.

2 Velleius Paterculus l. 2. cap. 105. nunc LIPSERING vocatur.

3 An. 776. an. 780. & an. 782. Astronomus. Regino, aliique Francicæ hist. scriptores.

CLADES VARIANA, MEMORIÆ, SACRUM

EN. UBI. ROMANÆ. CLADIS. MONUMENTA. SUPERSUNT
 VARUS. ET. ARMINIO. STRATUS. AB. HOSTE. JACET
 ET. 1 CAMPO. IN. MEDIO. NOTUM. VICTORIA. NOMEN
 SERVAT. ADHUC. NOSTRIS. INCLYTA. TEMPORIBUS
 AUSPICIIIS. RAPUIT. PUBES. GERMANA. SECUNDIS
 IMPERII. 2 GEMINAS. NOBILE. PIGNUS. AVES
 DESINAT. EUPHRATES. PARTHOS. MEMORARE. TRIUMPHOS
 CLARIOR. EST. CÆSO. LUPPIA. QUINCTILIO
 RAPTA. JOVI. LATIO. 3 CRASSI. SPOLIA. ILLE. PEREMPTI
 REDDIDIT. HIC. AQUILAS. 4 OBTINET. USQUE. SUAS

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

VARIANÆ. CLADIS. PÆNE. EXITIABILIS. ROMANIS. CÆSARE
 AUGUSTO. AD. TEUTOBURGIENSEM. SALTUM. INTER. AMI-
 SII. ET. LUPPIÆ. FONTES. ARMINIO. DUCE. A. CHERUSCIS
 BRUCTERIS. MARSIS. ET. CONTERMINIS. GENTIBUS. ILLATÆ

M. H. P.

- 1 WINTFELD, campus victoriz. Justus Lipsius in notis ad Tacitum, alii que.
- 2 Cuspinianus in vit. Cæsar. in Octavio Augusto. Ulricus Huttenus de Germ. non degeneri.
- 3 Suetonius in Octavio Augusto cap. 21. alii que complures.
- 4 Florus lib. 4. cap. 12. *signa & aquilas duas adhuc barbari possident.*

SALTUS
TEUTOBURGIENSIS.
MEMORIÆ. SACRUM

1 TEUTOBURGENSIS. SALTUS. LOCA. VASTA. PERAGRANS
PAULISPER. COEPTUM. SISTE. VIATOR. ITER
HIC. RAPAS. AQUILAS. CLADIS. MONUMENTA. LATINÆ.
INVENIES. VARI. RELIQUIASQUE. DUCIS
EGIT. ET. HIC. CELEBREM. 2 THIETMALLO. TESTE. TRIUMPHUM
SAXONICAM, CAROLUS. DEPOPULATUS. HUMUM
UT. MERITO. DUBITES. ROMANA. CÆDE. CRUENTO
ARMINIO. MAJOR. NUM. SIT. HABENDUS. HONOS
SAXONIS. AN. CAROLO. VICTORI. SÆPIUS. HOSTEM
FREGIT. HIC. INDOMITUM. CONTUDIT. ILLE. SEMEL
FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG

SALTUM. LATINIS. TEUTOBURGIENSEM. OSNEGGUM. FRAN-
CIS. APPELLATUM. QUINCTILII. VARI. LEGIONUMQUE
TRIUM. TUMULO. ET. CAROLI. M. VICTORIA. DE. SAXONI-
BUS. PROPE. 3 THIETMALLI. AN. DCC. LXXXIII. REPORTATA
NOBILEM. POSITO. HOC. MONUMENTO. ILLUSTRAVIT

1 Tacitus lib. 1. A. nnal.

2 Eginhardus de vita & gestis Caroli Magni. Vita Caroli M. apud Pithzum.
alique complures. Cluverius l. 2. antiq. Germ. cap. 19.

3 D E T H M O L D Comitum Lippienfium fedes, beneficium Ecclefiz Pader-
bornenfis.

FONTES AMISII.

MEMORIÆ. SACRUM

ILLE. EGO. SUM. * AMISIUS. SURGENS. HIS. FONTIBUS. AMNIS
 OLIM. ROMANA. NOTUS. IN. HISTORIA
 QUI. CENTUM. DELABOR. AQUIS. COMITATUS. IN. ÆQUOR
 ANTE. PERERRATIS. URBIBUS. ET. POPULIS
 NUNC. CAPUT. OCCULTUM. RIMATUS. VALLE. SUB. IMA
 FERNANDUS. NIVEO. CONDECORAT. LAPIDE
 AT. TIBI. NESTOREI. MERITIS. PRO. TALIBUS. ANNI
 LÆTAQUE. PERPETUO. TEMPORA. VÈRE. FLUANT
 ET. NOMEN. FERNANDE. TUUM. SIC. CRESCAT. EUNDO
 AUCTA. VELUT. NOSTRÆ. GLORIA. CRESCIT. AQUÆ

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

AD. FONTES. AMISII. ROMANIS. NOTISSIMI. FLUMINIS. IN
 DITIONE. PADERBORNENSI. NASCENTIS

M. H. P

HOSPES. VIVE. TUÆ. SORTIS. MEMOR. EN. EGO. PARVIS
 NOBILIS. HIC. ORIOR. FONTIBUS. AMISIUS
 ET. POSTQUAM. FLUVIIS. INGENTIBUS. AUCTUS. IN. ALTUM
 VELA. TULI. VASTO. MERGOR. IN. OCEANO
 SIC. UBI. PRINCIPIIS. MORTALIA. TENUIBUS. ORTA
 CREVERUNT. MAGNIS. AUCTIBUS. INTEREUNT

* Mela lib. 3. cap. 3. Plin. l. 4. cap. 14. Tacit. l. 1. & 2. Annal. aliique.

DELBURGIA,

Ultima veterum Bructerorum sedes.

MEMORIÆ SACRUM

BRUCTERUS. HÆC. ¹ COLUIT. LOCA. FOETA. PALUSTRIBUS. UNDIS
 QUOD. NUNC. INDIGENIS. NOMEN. UT. ANTE. MANET
 HIC. VARUM. INFESTO. GERMANICUS. AGMINE. CÆSAR
² ULTUS. ET. HOSTILES. DEPOPULATUS. OPES
 VICINAM. DRUSO. GENITORI. CONDIDIT. ³ ARAM
 ET. TULIT. AUSONIIS. MANIBUS. INFERIAS
 POST. ⁴ UBIUS. FERRO. PARITER. GRASSATUS. ET. IGNI
 OBRUTUS. HIC. MAGNA. CLADE. REPENTE. FUIT
 VICTAQUE. TERGA. FUGÆ. DEDIT. ET. SUA. SIGNA. RELIQUIT
 INCLYTA. VIRTUTIS. BRUCTERE. SIGNA. TUÆ

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

DELBURGGIIS. VETERUM. BRUCTERORUM. ULTIMIS. QUOS.
 GERMANICUS. CÆSAR. VARIANÆ. CLADIS. ULTOR. BELLO
 PERSECUTUS. QUANTUM. AMISIAM. ET. LUPPIAM. AMNES
 INTER. HAUD. PROCUL. TEUTOBURGIENSI. SALTU. VASTA-
 VIT. COLONIENSES. VERO. CLIVIIQUE. PADERBORNENSIBUS
 INFESTI. ACCEPTA. INSIGNI. CLADE. AN. MCCCCX. XV. CAL. DE-
 CEMB. ILLUSTRARUNT. OB. FORTITUDINEM. EORUM. AC
 FIDEM. REIP. PRÆSTITAM

M. H. P

¹ Cluverius l. 3. antiq. Germ. c. 13. Joan. Horrion Panegy. Paderb. l. 2. c. 11.

² Tacit. Annal. lib. 1. cap. 60. 61. 62.

³ Tacit. Annal. lib. 2. cap. 7.

⁴ Gobelius Persona in Colindromio, stat. 6. cap. 91.

V I S U R G I S.

M E M O R I Æ . S A C R U M

EXERAT. AMISIUS. STÉRILES. CAPUT, INTER. ARENAS
 ET. PADERÆ. SOCIAS. LUPPIA. JACTET. AQUAS
 SOLUS. EGO. PATRIAS. CLARISSIMUS. AMNIS. AD. ORAS
 NAVIBUS. EXTERNAS. PORTO. VISURGIS. OPES
 NEG. ME. BELLA. MINUS. CELEBRANT. ADVERSA. * QUIRITUM
 QUAM. QUÆ. PER. † FRANCOS. GESTA. FUERE. DUCES
 SED. QUOTA. PARS. RERUM. SUPERARET. ROMA. TUARUM
 AUT. QUISNAM. ARMINII. NOSCERET. ARMA. MEI
 NI. MIHI. QUAM. ‡ TACITUS. SCRIPTOR. DEDIT. INCLYTUS. ILLI
 REDDITA. CORBEIÆ. MUNERE. VITA. FORET

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

IN. RIPA. VISURGIS. ROMANORUM. FRANCORUM. ET. SA-
 XONUM. BELLIS. NOBILISSIMI. AMNIS. DIOECESIN. PADER-
 BORNENSEM. INTERFLUENTIS. E. REGIONE. HERI-

STALLI. SAXONICI

M. H. P

1 Velleius Paterculus. Tacitus. Dio Cassius.

2 An. 555. per Clotharium Regem Francorum. *Gesta Francorum* epitoma-
 ta, cap. 27. Gregor. Turonensis lib. 4. cap. 10. Aimonius lib. 2. cap. 27.
 An. 630. per Dagobertum & Clotharium ejus patrem, Reges Francorum.
Gesta Francorum epitomat. cap. 41. Aimon. l. 4. cap. 18. Sigebertus in
 Chronico. An. 721. per Carolum Martellum. Ado Viennensis. annal.
 incerti auctoris apud Pithæum.

3 Nam quinque ejus primores *Annalium* libri inveni Cortecie, quod Monasterium ad
Visurgim est, atque illinc depromptum veri hunc thesaurum *Questor* quidam Pon-
 tificius ad magnum Leonem derulit, donatus ab eo aureis quingentis. Justus Lipsius
 ad lib. 2. *Annal. Taciti*. num. 73.

R E M A

AD CONFLUENTES WARNÆ & VISURGIS

Pagus Ravensbergici Comitatus.

M E M O R I Æ S A C R U M

INCLYTA. FRANCORUM. FASTIS. UBI. * WARNA. VISURGIS.
 AMNE. RECEPTA. SUÆ. NOMINA. PERDIT. AQUÆ
 SAXONE. * PIPINUM. FUSO. SPECTAVIT. OVANTEM
 † REMA. TRIUMPHALI. FERRE. TROPÆA. MANU
 ‡ HILDIGARIQUE. NECI. VICTRICIA. CASTRA. SECUTI
 FRANCIGENAS. MOESTIS. ILLACRYMARE. MODIS
 FORTIS. ET. EXEMPLO. § CAROLUM. ¶ GENITORIS. † AVIQUE
 SAXONICÆ. VALIDAS. FRANGERE. GENTIS. OPES
 TALIBUS. ILLUSTRIS. TITULIS. PLUS. REMA. SUPERBIT
 QUAM. QUOD. RHEMORUM. * NOBILE. NOMEN. HABET
 FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

REMÆ. AD. CONFLUENTES. WARNÆ. ET. VISURGIS. SITÆ
 PIPINI. EJUSQUE. FILII. CAROLI. M. FRANCORUM. REGUM
 SAXONICIS. EXPEDITIONIBUS. AN. DCCLIII. ET. AN. DCCLXXXIII.
 CELEBRIS. PAGI. MEMORIÆ

M. H. P

1 WARNA. Poët. Anonym. WAHARNA. Vita Caroli M. apud Pithzum.
 Adelmus. WAGARNA. Annal. Franc. apud Reuberum. WAHNA.
 Regino. nunc WERNE vocatur.

2 An. 753. Annal. incerti auctoris apud Pithzum, alii que.

3 REMEN nunc appellatur. olim RIMA. Vit. Caroli M. apud Pithzum.
 Regino. RIMI. Adelmus & Annal. Franc. apud Reuberum. RHIME.
 Ado Viennens.

4 Colonienfis Archiep. Annal. incerti auctoris apud Pithzum. Annal. Ful-
 denfes, Adelmus, Regino.

5 Annal. Francici apud Reuberum. Vita Caroli M. apud Pithzum.

6 Pipini. An. 745. 753. 758. Annal. incert. auct. apud Pithzum. Annal.
 Fuldenf. apud Ercherum. Annales Francici apud Reuberum.

7 Caroli Martelli. An. 721. 727. 740. Annal. incert. auctoris apud Pithzum.

8 Henricus de Hervordia. l. 2. cap. 69. citatus ab Henrico Meibomio in no-
 tis ad Irmainsulam Saxonicam.

ERESBURGUM AD DIMOLAM.

MEMORIÆ. SACRUM

HOSFES. ¹ ERESBURGI PRÆRUPTAM. CONSPICIS. URBEM
ANTIQUA. CELEBREM. RELIGIONE. LOCUM
² MARTIS. IBI. QUONDAM. SIMULACRO. NOBILE. FANUM
SAXONIÆ. COLUMEN. PRÆSIDIUMQUE. FUIT
QUOD. LEO. VASTATUM. CAROLI. VICTRICIBUS. ARMIS
³ SACRAVIT. VERO. RESTITUITQUE. DEO
MANSIT. ET. HOC. NOSTRÆ. GENTI. DUM. BARBARUS. HOSTIS
AUGUSTUM. ⁴ NOSTRO. TEMPORE. VERTIT. OPUS
NONNE. GIGANTEOS. MERUIT. RENOVARE. TRIUMPHOS
QUÆ. MANUS. IN. SUPEROS. HOC. FUIT. AUSA. NEFAS
FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG.

ERESBURGI. IN. DIOECESI. PADERBORNENSI. FIRMISSIMI
OLIM. SAXONUM. PROPUGNACULI. NEC. MAGIS. FRANCO-
RUM. ARMIS. ET. IRMINSULÆ. EXCIDIO. QUAM. EJUS. LOCO
A. CAROLO. M. EXSTRUCTI. A. LEONE. III. P. M. DEDICATI
BELLO. AUTEM. SUECICO. FUNDITUS. EVERSI. TEMPLI. RE-
LIGIONE. CELEBRIS. MEMORIÆ.

M. H. P

¹ Astron. apud Reuberum, Annal. Francici & vita Caroli M. apud Pithæum, alique Franc. hist. scriptores. Henricus Meibomius de Irminsula Saxonica, hodie STADT BERG.

² Widekindus Corbeiensis lib. 1.

³ Baronius. annal. Ecclesiast. tom. 9. ad annum Christi. 799.

⁴ An. 1646. 24. Septemb.

BRUNISBERGA

PROPE HUXARIAM.

MEMORIÆ SACRUM.

ARX. UBI. BRUNONIS. CIRCUMSPICIT. ALTA. LATINI
 MILITIS. INFECTAS. CAEDE. VISURGIS. AQUAS. SAXONES.
 HIC. AMNEM. CAROLUM. TRANSIRE. PARANTEM
 NEQUICQUAM. TELIS. IMPEDIERE. SUIS. SED. DARE. VERSA. FUGA. VICTORI. TERGA. COACTI.
 CESSERUNT. TOTUM. FLUMINIS. IMPERIUM. LITORE. NUNC. ILLO. REGNAS. CORBEIA. SACRUMQUE.
 HUXARIÆ. DICIT. JUS. PADIBORNA. TUÆ. QUÆ. SI. POSTERITAS. SERVASSET. FOEDERA. NUNQUAM
 RELIGIO. SCISSIS. PLANGERET. ORBA. COMIS.

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FÜRSTENBERG

BRUNISBERGÆ. NOBILI. IN. DIOECESI. PADERBORNENSI. ET
 DITIONE. CORBEIENSI. LOCO. UBI. CAROLUM. M. TRAJE-
 CTU. VISURGIS. PROHIBERE. FRUSTRA. CONATI. SAXONES
 AN. DCC. LXXV. FUSI. FUGATIQUE. FRANCIS. CESSERUNT.

M. H. F.

- 1 Velleius Patetcul. lib. 2. hist. *amnis mox nostra clade nobilis transitus Visurgis.*
- 2 Astron. Adelmus. Annal. Fuldenses. Regino. Poëta anonymus apud Rein-
 nerum Reineccium.
- 3 Libellus de translatione S. Viti, & institutione novæ Corbeiz. & Chyon.
 Corbeiense post notas ad Widikindum à Meibomio editum.

BOCA AD LUPPIAM. MEMORIAE. SACRUM

BOCA. IVETUS. CAROLO. MEMORABILIS. HOSPITE. PAGUS
LUPPIA. QUAM. RAPIDIS. PRÆTERIT. AMNIS. AQUIS
ANGARIOS. VIDIT. PACEM. VENIAMQUE. PRECANTES
SUPPLICITER. FRANCO. SUBDERE. COLLA. JUGO
OBSIDIBUSQUE. DATIS. JURANDO. JURE. PACISCI
OBSEQUII. STABILEM. TEMPUS. IN. OMNE. FIDEM
ANGARIAE. GENS. VICTA. SACRO. LÆTARE. TRIUMPHO
QUEM. CAROLUS. DE. TE. RELIGIOQUE. TULIT
SI. SUB. REGE. PIO. LIBERTAS. GRATIOR. EXSTAT
SERVITIO. MAGIS. ES. LIBERA. FACTA. TUO

FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG

BOCÆ. CELEBRI. OLIM. PAGÓ. UBI. CAROLUS. M. FRANCO-
RUM. REX. ANGARIOS. DATIS. OBSIDIBUS. ET. JUREJURAN-
DO. FIDEM. OBSEQUII. FIRMANTES. AN. DCC. LXXV. IN. DI-
TIONEM. ACCEPIT. ET. A. SANCTÆ. MEMORIÆ. BADURADO
PADERBORNENSI. EPISCOPO. RELIQUIÆ. B. LANDOLINI. CONF.
QUAS. E. CAMERACENSI. DIOECESI. ILLUC. TRANSTULERAT
COLLOCATÆ. FUERUNT

M. H. P

¹ Vita Caroli M. apud Pitharum. Astron. Adelfmus. Regino. aliiq. hist.
Franc. scriptores.

² Claudianus in 2. consul. Stiliconis lib. 2.

DESENBERGÆ
PROPE WARBURGUM.
MEMORIÆ SACRUM

DESENBERGA. GRAVES. QUÆ. FINIBUS. ARDUA. CATTOS
LÆTAQUE. WARBURGI. DESPICIT. ARVA. JUGO
PARUIT. IMPERIO. 1 CAROLI. CUM. FRANCUS. ADEGIT
SAXONA. DEGENERI. VERTERE. TERGA. FUGA
VICTA. DEHINC. CESSIT. 2 SUEVIS. HOSTILITER. ARMIS
HENRICUS. PATRIAS. CUM. LACERARET. OPES
NUNC. JACET. INDIGNA. LATE. COLLAPSA. RUINA
ARX. VETUS. ET. RERUM. GLORIA. SOLA. MANET
QUIS. NISI. MENTIS. INOPS. FACTIS. EXTENDERE. FAMAM
NEGLIGAT. IPSA. VIDET. SI. QUOQUE. SAXA. MORI

FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG

DESENBERGAM. ARCEM. IN. MONTE. COGNOMINE. OLIM
MUNITISSIMAM. QUAM. CAROLUS. M. PRÆSIDIO. FRANCO-
RUM. FIRMAVIT. SAXONES. AN. DCC. LXXVI. FRUSTRÀ. OPPU-
GNARUNT. HENRICUS. IV. CÆSAR. AN. M. LXX. OCCUPAVIT
HODIE. VERO. EPISCOPI. ET. PRINCIPIS. PADERBORNENSIS
BENEFICIO. NOBILIS. SPIGELIORUM. FAMILIA. POSSIDET
POSITO. HOC. MONUMENTO. EXORNAVIT

1 Regino. lib. 2. Chron. Fabricius lib. 2. origin. Saxonicarum.

2 Lambertus Schaffnaburg. Ægidius Gelenius in pretiosa hierotheca: p. 120

PADERÆ FONTES. MEMORIÆ. SACRUM

HIC. UBI. FONS. PADERÆ. MEDIA. SURGENTIS. IN. URBE

DUCO. VETUS. MAGNI. NOMEN. ¹ AB. AMNE. PADI
MARTE. DIU. ANCIPITI. CAROLUS. CERTARE. COACTUS

² DELEGIT. CASTRIS. CONCILIISQ. LOCUM

³ JUSSIT. ET. HIS. UNDIS. LUSTRATAM. SUBDERE. GENTEM
SAXONICAM. VERO. COLLA. SUPERBA. DEO

⁴ HIC. LEO. ROMANA. DEDUCTUS. AB. URBE. SACELLUM

⁵ SACRAVIT. PRIMUM. RELIGIONIS. OPUS

HIC. SEDES. LONGO. FUT. ORDINE. DEINDE. SECUTIS

TERRARUM. DOMINIS. INCLYTA. ⁶ CÆSARIBUS

⁷ VIRGINIS. HIC. CONJUX. VIRGO. CUNIGUNDA. MARITI

ACCEPIT. MERITIS. REGIA. SERTA. COMIS

VASTUM. ALIUS. SUBEAT. SEPTENA. PER. OSTIA. PONTUM

NOBILIUS. NULLUS. ME. CAPUT. AMNIS. HABET

FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG

AD. FONTES. PADERÆ. CASTRIS. COMITIIS. ET. FREQUENTI
IMPERATORUM. REGUMQUE. GERMANIÆ. ET. FRANCIÆ.

HOSPITIO. AC. REGIA. S. CUNIGUNDÆ. CORO-
NATIONE. CELEBRATOS

M. H. P

¹ Gobelinus Persona in cosmodromio. xtat. 6. cap. 38.

² An. 777. 783. 785. 786. 799. Eginardus in Vit. Caroli. M. Astron. Vit. Ludovici Pii apud Pithzum. aliiq.

³ Vit. Caroli M. apud Pithzum. Annal. Fuldenfes apud Freherum.

⁴ Annal. Fuldenf. Vita Caroli M. Astron. Regino. aliiq.

⁵ Vit. S. Liborii apud Bollandum cap. 11. Vit. B. Meinweri apud Browerum. Gob. Persona in Cosmod. xtat. 6. cap. 38.

⁶ Magnum eorum catalogum vid. in notis monumentorum Paderbornensium.

⁷ Adelboldus de rebus gestis S. Henrici apud Greiserum. Vitæ. S. Godehardi, S. Bernwardi, B. Meinweri apud Browerum.

D R I B U R G U M

Olim Iburgum appellatum.

M E M O R I Æ . S A C R U M

SEU. ME. DRIBURGUM. VETERI. SEU. NOMINE. DICAS.
 IBURGUM. MERITIS. LAUS. MANET. ÆQUA. MEIS
 SAXONIS. UT. PERHIBENT. MUNIMEN. GRANDE. VETUSTAS
 IMPOSUIT. NOSTRIS. MOENIA. CELSA. JUGIS
 PRÆSENTIS. CAROLUS. PRECIBUS. DONATA. LEONIS
 QUÆ. PADERÆ. SACRO. SUBDIDIT. IMPERIO
 VENA. ACIDÆ. TANTUM. ME. NUNC. UBERRIMA. LYMPHÆ
 NOBILITAT. VARIIS. SÆPE. MEDENDO. MALIS
 SI. MIHI. LONGA. DIES. PRIMOS. SUBDUXIT. HONORES
 SERVAT. ADHUC. NOSTRUM. QUÆ. FUGIT. UNDA. DECUS

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

DRIBURGI. OLIM. IBURGI. ANTIQUI. SAXONUM. MUNIMEN-
 TI. A. CAROLO. M. EXPUGNATI. S. HATHUMARO. EPISCOPO
 PADERBORNENSI. EJUSQUE. SUCCESSORIBUS. CUM. OMNI
 AGRO. ET. DITIONE. LEONIS. III. P. M. PRÆSENTIS. ROGATU
 DONATI. ET. SALUBRITATE. ACIDULÆ. HODIE.

NOBILIS. MEMORIÆ.

M. H. P

1 Gob. Persona cosmod. atat. 6. cap. 38. Crantzius lib. 1. Metrop. cap. 51.

2 Hermannus Hamelmannus de antiq. Westphalia ex Feucero.

3 An. 799. Gob. Perf. cosmod. 1. c. Crantzius l. c. Bruschius & Kerschenbrachius in catalog. Epif. Paderb.

LUDA AD AMBRAM. MEMORIÆ SACRUM

HIC. UBI. LUDA. VETUS. JUCUNDÆ. MARGINE. RIPÆ
URBS. SEDET. ET. CULTOS. 1 AMBRA. PERERRAT. AGROS
2 AMBRONES. HABITASSE. FERUNT. QUOS. CIMBRICUS. OLIM
MILITIÆ. SOCIOS. TRAXIT. IN. ARMA. FUROR
ILLIS. 3 ARMINII. SUCCEDENS. ARCE. PROPINQUA
GENS. TENUIT. VALIDA. SCEPTRA. CHERUSCA. MANU
4 ANNUA. DEINDE. PIO. CAROLUS. SACRA. MORE. FREQUENTANS
NASCENTEM. COLUIT. SUPPLICE. VOCE. DEUM
ET. 5 SCHIDROBURGUM. PROPIUS. DUM. SAXONÆ. BELLO
FULMINAT. HOC POSUIT. FRANCICA. CASTRA. LOCO
HÆC. OLIM. DECORI. FUERINT. NUNC. PROXIMA. LUDAM
CONCELEBRAT. NOTÆ. VENA. SALUBRIS. AQUÆ
FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO.
DE. FURSTENBERG

LUDÆ. AD. AMBRAM. PERANTIQUÆ. AMBRONUM. ET. CHERUSCORUM. SEDI. CAROLI. M. CASTRIS. IN. QUIBUS. AN. DCC
LXXXIV. CHRISTI. NATALEM. EGIT. ET. PYRMONTANÆ
ACIDULÆ. VICINITATE. CELEBRATÆ

M. H. P

1 Astron. Adelmus Vita Caroli M. apud Pithxum. Regino. Poëta anony-
mas aliique. nunc EMMER vocatur.

2 Reinerus Reineccius de origine Mysorum. Piderit. in Chron. Lippienfi
part. 1. cap. 6.

3 Winkelinannus in notit. ver. Westphaliæ. lib. 1. cap. 8.

4 Vit. Caroli M. apud Pithxum. Regino.

5 Adelmus. Astronomus. Poëta anonyinus. nunc SCHIDER, seu bre-
vius SCHIER appellatur, prædium Comitum Lippienfium.

TROPIÆ AT CAROLI
M. FRANCORUM REGIS,

In campo Sintfeld.

MEMORIÆ SACRUM

NUNG. UBI FERTILIBUS. LATE FLAVESCIT. ARISTIS
TAM. CERERI. GRATUS. QUAM. SPATIOSUS. AGER
OLIM. CAMPUS. ERAT. QUO. PRÆLIA. SAXO. MINATUS
FRANCORUM. SIGNIS. OBVIA. SIGNA. TULIT
SED. VICTUS. CESSIT. TITULO. VICTORIA. DONAT
MOENIA. VICINO. CONSPICIENDA. JUGO
SI. MARATHON. PERSIS. NOMEN. FATALE. PEREMPTIS
MILTIADE. JAGTAT. CLARA. TROPEA. DUCIS
GLORIA. MAJOR. ERIT. CAROLI. QUI. PARCERE. VICTIS
MALUIT. HOSTILI. QUAM. JUGULARE. MANU

FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FÜRSTENBERG

CAROLO. M. FRANCORUM. REGI. SAXONIBUS. IN. CAMPO
SINTFELT. AN. DCC. XCIV. SUBACTIS. ET. TERTIA. EORUM
PARTE. ALIO. TRADUCTA. DE. RELIGIONE. CHRISTIANA. ET
PUBLICA. TRANQUILLITATE. OPTIME. MERITO

M. H. P.

1 Astron. Adelmus. Annal. Fuldens. Annal. incerti auctoris apud Pithzum.
Regino. Poëta anonymus. alii que.

2 WUNNENBERG oppidum diœcesis Paderbornensis, ad agum SINT-
FELD pertinens, & in colle situm.

3 Cornelius Nepos in Miltiade. Justinus l. 2. c. 9.

HERISTALLIUM SAXONICUM

in ripa Visurgis.

MEMORIÆ SACRUM

SEU. TE. CÆRULEUS. PLACIDO. VEKIT. AMNE. VISURGIS
SIVE. FACIS. TERRA. CARE. VIATOR. ITER
PARVA. MORA. EST. FAMÆ. RELEGAS. MONUMENTA. VETUSTÆ
ET. PRECOR. HÆC. PAUCIS. CARMINA. SCRIPTA. NOTIS
MAGNUS. HERISTALLO. CAROLUS. DUM. SAXONAS. URGET
HIC. POSITIS. CASTRIS. NOMEN. HABERE. DEDIT
LEGATOS. HIEMANS. HIC. REGIA. DONA. FERENTES
AUDIT. ET. NATOS. JUSSIT. ADESSE. SUOS
HIC. COËPTAM. RETULIT. FATO. MELIORE. CATHEDRAM
AD. VITREAS. PADERÆ. LENÆ. FLUENTIS. AQUAS
NON. TAMEN. OMNIS. HONOS. ABIIT. QUIN. ÆMULA. FRANCO
CERTAT. HERISTALLI. GLORIA. SAXONICI

FERDINANDUS. DEI. ET. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG.

HERISTALLI. SUI. IN. RIPA. VISURGIS. CAROLI. M. HIBERNIS
PIPINI. ET. LUDOVICI. FILIORUM. EJUS. CONVENTU. HUNNO-
RUM. ET. ASTURIÆ. GALLECIÆQUE. REGUM. LEGATIONIBUS

AN. DCCXCVII. CELEBRATI. MEMORIÆ. POSUIT

- 1 Astron. apud Reuberum. Adelm. Vita Caroli M. apud Pithzum. Poëta anonym. nunc HERSTELL appellatur.
- 2 Annal. Francici apud Pithzum. Regino.
- 3 Astron. Vita. Caroli M. apud Pithzum. Adelmus. Regino.
- 4 Henricus de Hervordia. Chron. Mindense a Meibomio editum.

W E V E L S B U R G U M

Prope Bodocani Monasterium S. Menolphi.

M E M O R I Æ S A C R U M

ECCE WEVELSBURGI SAXO. FUNDATA. VETUSTO
 ARX. QUÆ. TURRITUM. TOLLIT. AD. ASTRA. CAPUT
 INDOMITIS. OLIM. PATRIAM. DEFENDIT. AB. HUNNIS
 DAMNA. DEDIT. PATRIÆ. NEC. SEMEL. ILLA. SUÆ
 QUANDO. FEROX. ARMIS. FRIDERICUS. SÆVIIT. HOSTIS
 NON. IMPUNE. TAMEN. QUÆ. TULIT. ARMA. NEPOS
 SIC. VARIAS. EXPERTA. VICES. DOMINOSQUE. FREQUENTES
 SUBDIDIT. IMPERIO. SE. THEODORE. TUO.
 FORTUNATA. NIMIS! SI. QUAS. NON. LÆSERAT. HUNNUS
 INTACTAS. SINERET. GOTTHICUS. IGNIS. OPES

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FÜRSTENBERG

WEVELSBURGUM. VETUSTISSIMUM. AB. HUNNORUM. GER-
 MANIAM. DEVASTANTIUM. MEMORIA. CASTELLUM. A. FRÉ-
 DERICO. ARNSBERGÆ. COMITE. INSTAURATUM. ET. MUNI-
 TUM. A. COMITIBUS. WALDECENSIBUS. AD. ECCLESIAM. PA-
 DERBORNENSEM. TRANSLATUM. A. BURANIS. DYNASTIS
 TUM. BENEFICII. TUM. PIGNORIS. LOCO. DIU. POSSESSUM. A
 THEODORO. EPISCOPO. ET. PRINCIPE. PADERBORNENSI. RE-
 CUPERATUM. ET. A. FUNDAMENTIS. EXSTRUCTUM. A SUE-
 CIS. INCENSUM. A. THEODORO. ADOLPHO. EPISCOPO. ET
 PRINCIPE. PADERBORNENSI. MAJORI. EX. PARTE. RESTITU-
 TUM. POSITO. HOC. MONUMENTO. EXORNÀVIT

1 Gob. Person. cosmodrom. stat. 6. c. 8. Crantzius Metrop. l. 6. cap. 9.

2 Gob. Person. l. c. Crantzius l. c. Ægidius Gelenius in S. Engelberto lib. 3 cap. 42.

3 Conradus Comes Arensbergensis à Bernardo 1. Epif. Paderb. pztlio victus occubuit. an 1143. Ægid. Gelenius. l. c. aliique.

4 An. 1589. 9. Aug.

5 An. 1646. mense Maio.

DESERTUM SENNÆ,

olim Sinedi appellatum: 9909

MEMORIÆ SACRUM

DESERTOS. * SINEDI. TRACTUS. HUMILESQUE. MYRICAS
 QUI. PERAGRAS. TUTUM. CARPE. VIATOR. ITER.
 NON. HIC. INSIDIAS. NON. MILITIS. ARMA. TIMEBIS.
 QUÆ. SECURA. QUIES. ARCET. ET. ALMA. THEMIS
 APTA. QUIDEM. PECORI. DEEST. ET. PASTORIBUS. UMBRA
 RARAQUE. POPULEAS. VENTILAT. AURA. COMAS
 ATTAMEN. HIC. APIBUS. DULCEM. GREGIBUSQUE. MINISTRAT
 UNDA. FREQUENS. POTUM. PABULA. GRATA. SOLUM
 ET. CAPUT. AMISIT. MEDIIS. HINC. EXIT. ARENIS
 ILLINC. UBERIBUS. LUPPIA. SURGIT. AQUIS
 NUNC. ETIAM. VIDEN? UT. CELEBRET. LOCA. VASTA. COLONUS
 SOLLICITARE. RUDEM. VOMERE. DOCTUS. HUMUM
 OMNIA. SIC. VINCIT. LABOR. IMPROBUS. OMNIA. CONTRA
 AGRICOLIS. PESSUM. SEGNIBUS. IRE. SOLENT

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

IN. DESERTUM. SENNÆ. OLIM. SINEDI. APPELLATUM. NOVIS
 COLONIS. CUM. PUBLICO. COMMODO. DEDUCTIS

M. H. F.

1 Hujus deserti meminerunt diplomata Caroli M. Osnabrugensibus an. 804. Ottonis III. an. 1001. S. Henrici an. 1002. & an. 1003. Paderbornensibus data. vid. notas ad monumenta Paderbornensia.

FONS RESONUS,

Vulgo Bullerborn, prope Becam veterem,
pagum diœcesis Paderbornensis.

MEMORIÆ SACRUM

TEUTOBURGENSIS. SILVÆ. RADICIBUS. ORTUM
QUÆ. TRAHIT. ET. RESONIS. NOMINA. DEBET. AQUIS
ARTE. SCATENS. * MIRA. PELAGI. NUNC. MORE. FREMENTIS
ÆSTUAT. ALTERNA. NUNC. SILET. UNDA. VICE
ET. PEDE. DECURRIT. LIQUIDO. DUM. PROXIMA. SENSIM
PER. CAVA. LABENTEM. SAXA. RESORBET. HUMUS
MOX. EADEM. VIRES. SUBTER. TELLURE. RECENTES
COLLIGIT. ET. LARGAS. AUCTA. REFUNDIT. AQUAS
NE. JACTES. ARETHUSA. TUI. MIRACULA. FONTIS
SOLA. ETIAM. NOSTRAS. FAMA. LOQUETUR. OPES

FERDINANDUS. DEI. BT. APOSTOLICÆ
SEDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG

AD. FONTEM. BULLERBORN. PROPE. BECAM. VETEREM. MIRA
NATURA. PRÆDITUM. ET. FREQUENTIBUS. PRINCIPUM. ET
NOBILIUM. VIRORUM. CONVIVIIS. EXCUBIIS. ET. EXPERI-
MENTIS. OLIM. CELEBRATUM

M. H. P

¹ Vid. Mollerum l. v. de Rheno. pag. 217. Leonardum Thurnefferum l. 1. c. 1. de aquis. Joan. Horrion l. 2. panegyrici Paderb. aliosque.

F O N S P A D U L U S,

Ante Neuhusium, consuetum Episcoporum
& Principum Paderbornensium
domicilium.

M E M O R I Æ. S A C R U M

FONS EGO. SUM. PADULUS. NITIDIS. ARGENTEUS. UNDIS
PURIOR. ELECTRO. FRIGIDIORQUE. GELU
OLIM. VIX. PECORI. NOTUS. NUNC. ARIDA. FEBRI
NOSTER. FERNANDI. PROLUIT. ORA. LIQUOR
UNDE. MEI. PRINCEPS. RECREATUS. MUNERE. CLAUSAS
MARMORIBUS. GRATO. CARMINE. SIGNAT. AQUAS
NE. MIHI. CASTALIOS. LATICES. OPPONE. NEC. UNDAM
BELLEROPHONTEI. CARE. VIATOR. EQUI
ILLA. ETENIM. DOCTIS. INSPIRAT. VATIBUS. ÆSTUM
HÆC. LEVAT. ET. MEDICAM. LYMPHA. MINISTRAT. OPEM

FERDINANDUS. DEI. ET. APOSTOLICÆ
SÆDIS. GRATIA. EPISCOPUS. PADERBORNENSIS
COADJUTOR. MONASTERIENSIS. S. R. I. PRIN-
CEPS. COMES. PYRMONTANUS. ET. LIB. BARO
DE. FURSTENBERG

AQUA. FONTIS. PADULI. IN. FEBRIS. ARDORIBUS.
RECREATUS. P. C. AN. M. DC. LXV

ACIDULA SMECHTANA.

MEMORIÆ SACRUM

NON. EGO. VICINIS. DUBITEM. CONTENDERE. NYMPHIS
 TANTA. LICET. NOSTRÆ. COPIA. DESIT. AQUÆ
 FRIGIDIOR. GLACIE. CERTE MEA. NECTAR. ACORE
 UNDA. REFERT. VITRO. SPLENDIDIORQUE. FLUIT
 UTILIS. ET. CALIDO. JECORI STOMACHOQUE. DOLENTI
 ET. PRÆSENS. ÆGRIS. RENIBUS. AUXILIUM
 PRINCIPIS. HINC. PATRUI. PRINCEPS. EXEMPLA. SECUTUS
 FERNANDUS. PATRIÆ. MAXIMA. CURA. MEÆ
 MARMOREO. POTAS. ORNAVIT. MARGINE. LYPHAS
 ADDIDIT. ET. GRATA. CARMINA. DUCTA. MANU
 TU. MERITI. CONTRA. MEMOR. ILLIUS. USQUE. LIQUORES
 ARENTI. SITIENS. QUI. TRAHIS. ORE. MEOS
 FOCULA. FERNANDI. FAC. LIBES. PRIMA. SALUTI
 INCOLUMIS. PADERÆ. QUAM. DABIT. ILLE. SUÆ

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

Ad. memoriam. accepti. beneficii P. C. An. M. DC. LXIX.

NAUSEAT. AUT. SIQUIS. CALET. HINC. BIBAT. ÆGER. OREXIN
 NOSTRA. FACIT. STOMACHO. PELLIT. ET. UNDA. SITIM
 NECTAR. ACORE. VITRUM. SPLENDORE. ET. FRIGORE. BRUMAM
 EXSUPERAT. MEDICÆ. NEC. CARET. ARTIS. OPE

1 Vid. Tabernæmontanum in suo aquarum thesauro. cap. 59. & notas ad monumenta Paderbornensia.

A C I D U L A
 DRIBURGENSIS:
 MEMORIÆ. SACRUM

HIC. EGO. VISCERIBUS. MAGNÆ. PRORUMPO. PARENTIS
 LARGA. SALUTIFERÆ. VENA. PERENNIS. AQUÆ
 DOCTA. GRAVI. MORBO. RENES. ET. FÆCE. LIENEM
 ET. TUMIDUM. FLAVA. BILE. LEVARE. JECUR
 ET. TORPENS. ACIDO. STIMULANTE. LIQUORE. PALATUM
 TÆDIA. VENTRICULO. PELLERE. FAUCB. SITIM
 QUI. BIBIT. ERGO. MEOS. LATICES. ET. CIVIS. ET. HOSPES
 INCOLUMIS. NOSTRIS. RITE. PRECETUR. AQUIS
 MAGNUS. UT. HAS. ARMIS. CAROLUS. VICTRICIBUS. UNDS
 SAXONICO. FERTUR. SUPPOSUISSE. PADO
 SIC. FERNANDE. TUO. DECORATÆ. MUNERE. LONGO
 TEMPORE. TE. SALVO. SUB. TUA. JURA. FLUANT

FERDINANDUS. DEI. ET. APOSTOLICÆ
 SEDIS. GRATIA: EPISCOPUS. PADERBORNENSIS
 COADJUTOR. MONASTERIENSIS. S. R. I, PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

AD. ACIDULAM. DRIBURGENSEM. SALUBRITATE. MEDENDIS-
 QUE. CORPORIBUS. NOBILEM. COMMODIUS. HAURIENDAM
 EDUCTA. HUMIDO. SOLO. ARBORIBUSQUE. CONSITA. AD. DE-
 AMBULANDUM. VIA. ET. FONTIS. CELEBRITATI. ET.

PUBLICÆ. UTILITATI. CONSULUIT

AN. M. DC. LXX.

OLDENBURGA

IN MONTE FURSTENBERG,

Prima Baronum de Furstenberg in Westphalia ad Ruram sedes.

MEMORIAE. SACRUM

FURSTENBERGIACÆ. TITULIS. ARX. INCLYTA. GENTIS
 OLDENBURGA. TUUM. QUÆ. MODO. NOMEN. HABET
 SIVE. LOCI. DECUS. ANTIQUM. SEU. NOMINE. PRIMOS
 INDICAT. HOC. ALTÆ. NOBILITATIS. AVOS
 HIC. STETIT. HOSTILI. BELLORUM. SÆPE. TUMULTU
 & DIRUTA. PRINCIPIBUS. SÆPE. & REFECTA. SUIS
 NUNC. DESERTA. JACET. PRÆCLARÆ. GLORIA. STIRPIS
 USQUE. RECENS. LONGA. POSTERITATE. VIGET
 SIC. MEA. DOCTRINÆ. PRECOR. ET. VIRTUTIS. AVITÆ
 LAUDE. VELUT. & GEMINA. STET. TRABE. FULTA. DOMUS

FERDINANDUS. DEI. ET. APOSTOLICÆ
 SEDIS. GRATIA. EPISCOPUS. PADERBORNENSIS
 COADJUTOR. MONASTERIENSIS. S. R. I. PRIN-
 CEPS. COMES. PYRMONTANUS. ET. LIB. BARO
 DE. FURSTENBERG

AD. ILLUSTRANDAM. HOC. ETIAM. IN. LOCO. MAJORUM
 SUORUM. MEMORIAM. ET. POSTEROS. AVITÆ. VIRTUTIS
 EXEMPLO. INCITANDOS

M. H. P.

1 An. 1180. à Philippo Archiepis. Col. 1254. à Simone Epif. Paderb. 1295.
 ab Eberhardo Com. Marcano. 1309. ab Henrico Archiep. Colonienfi. 1311.
 ab Engelberto Com. Marcano. 1345. à Godefrido Com. Arnsbergensi, &
 Adolpho Com. Marcano. vid. notās ad Monument. Paderborn.

2 An. 1219. à S. Engelberto Archiep. Colonienfi. 1276 à Sifrido Archiep.
 Col. 1307: ab Henrico Archiep. Col. 1312. ab Henrico Archiep. Col. &
 Ludovico Hassō Episcopo Monasteriensi. vid. not. ad Monum. Paderb.

3 Alluditur ad binas Oldenburgicas trabes in aurco scuto rubentes, à prima
 usque origine Baronibus Furstenbergiis usitata insignia.

А Я У И Е С О

IN MONTE LUPTANENSIS

As M. al. y todos los demás miembros de la familia

சுவிட்சர்லாந்து

М. В. О. Р. Я. В. А. С. Я. И. М.

ADOPTIVORVM
CARMINUM
LIBER PRIMUS,
QUI ALIORUM POEMATA,
FERDINANDO
EPISCOPO PADERBORNENSI,
COADJUTORI MONASTERIENSI,
S.R.IMP. PRINCIPI, COMITI
PYRMONTANO,
ET
LIB. BARONI DE FURSTENBERG
INSCRIPTA, COMPLECTITUR.

ADOPTIVUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ET ALIUM

ALEXANDER POLLINUS,
 FLORENTINUS.
 DE
 ALEXANDRO VII.
 PONTIFICE MAXIMO
 RENUNCIATO,
 AD FERDINANDUM
 FURSTENBERGIUM
 Sanctitatis suæ

Cubicularium intimum.



Ureus illuxit nostris, Feriande, vocatus
 Ominibus votisque dies. Jam lumine claro
 Contigimus, cæcas cupidâ quod mente per
 umbras

Vidimus, arcanos ausi prævertere fines
 Fatorum, dum quæ præclara & certa relinquit
 Signa olim ætheriâ veniens ab origine virtus,
 Insequimur, legimusque animæ vestigia magnæ.
 Nunc licet in summo regnantem culmine rerum
 Susplicere: & triplici nunc majestate verendum
 Demisso colimus vultu, genibusque minores
 Oscula adoratis properamus figere plantis.
 Regnat ALEXANDER. Subitò viden' imbris actis
 Purpureo ut ridet pacatum lumine cælum!
 Ut nitidi redeunt post tristia tempora soles,
 Et mites Zephyrorum animæ! circum aspice, tellus

Ut properè varios summisit læta colores !
Quàm dulci aëriæ volucres clangore per auras
Venturo indicunt hilares nova gaudia sæclo !
Aspice. compositis immotum ut fluctibus æquor
Post sædas nunc primùm hiemes, ventosque resedit !
Cerne Urbem effusam, plausuque insueta frementem,
Lætitiæque simul jactas ad sidera voces
Accipe, non falsos populi exultantis honores.
Nam memorant, cælo tandem ut miseratus ab alto,
Antiquâ humanos Genitor pietate labores,
Regnandum huic dederit magnis virtutibus orbem ;
Auxilium fessis præsentî numine rebus
Qui ferat, & duro Europam sub fasce gementem,
Bellorumque diu tot tempestatibus actam
Qui levet, ac profugæ revocet bonus otia Pacis.
Nec tamen ultrices generosi pectoris iras
Non coquere, & justos animo versare dolores,
Armaque sacrilegos meditari & fulmina in hostes.
Hujus in adventu jam nunc pallere superbum
Regnatorem Asiæ trepidum, atque extrema timentem,
Seque peti terrâ & pelago, ferroque virisque
Immensas Orientis opes, Solymamque reposci.
Parte aliâ populos longè trans ardua claustra
Italiæ, gelidum spectantia regna Booten,
Et Rheni egregias fluviique binominis urbes
Lætitiæ miros imo sub pectore sensus
Concipere, & veterem subitò consurgere flammam.
Hunc illum, auspiciis nuper cælestibus oras
Quem vidêre suas venientem; aurisque secundis,
Omniaque æternis obeuntem laudibus : illum,
Quem pietate & justitiâ, quem sanguine clarum,
Flexanimo linguæ eloquio, doctisque beatum

Artibus, & castâ facilem dulcique Camœnâ,
Attonitis inhians oculis, ceu præscia tanti
Suspexit mirata boni Germania: triste
Diffidium, tristesque iras, animosque rebelles
Exarsisse fatis: gentem jam tendere amicam
(Chaoniæ ad nidum veluti per inane columbæ)
Ad Tiberim, & magnæ properare ad mœnia Romæ:
Jam sacros orare pedes, veniamque precari,
Et pacem, certamque adeo exorare salutem.
At fremitu majore ferunt, quæ munera terram
Hesperiam, Latiumque, altam Mavortis & urbem
Quæ mancant; propius quanta indulgentia cæli
Adspiciat sacros orienti sidere colles.
Hac finxisse tenus vates Saturnia quondam
Regna per Ausoniam, & de fulvo sæcla metallo:
Aurea nunc verè tali sub numine condi
Tempora, jam reduci cum Virgine læta venire
Omnia, detersâ prisca rubigine ferri.
Jam decus antiquum, & solitos constare triumphos
Principe ALEXANDRO Romanis arcibus: & jam
Religionem Patrum, sanctæ & formidine dextræ
Victorem latè gentes ab utroque receptas
Litore, adoratæ imperio subungere sedis.
Hoc duce præclaras florescere protinus artes,
Et Latîa tellure novas jam surgere Athenas:
Permissi mutare undas jam Tybride Musas,
Desertoque Helicone, jugum celebrare Quirini.
Hæc bona non dubio monitu mortalibus, addunt,
Ex illo speranda, Heros quo tempore primum.
Attigit exorians venientis lumina vitæ:
Cum summo ætherii residens in vertice Olympi
Regius ardenti fulgeret Juppiter auro,

Et vaga composito circùm famulantia motu
Inter se adspicerent radiis felicibus astra :
Lydia materno cœlestia pignora tellus
Cum gremio exciperet, quâ sese urbs erigit alto
Clara jugo, secunda virum, decorumque creatrix,
Regales fulvâ pueros sub matre, superbum
Insigne attollens, nec sanguinis immemor alti
Cognatam ostentans notâ sub imagine Romam :
Cum domus egregios intra generosa penates,
(Nomen avis, atavisque ingens) longo ordine vivos
Monstraret puero vultus, & facta suorum
Mirari, inque sacris vestigia figere signis ;
Et patrio in teneris laudum consuescere amor.
Nec majora silent regni argumenta futuri,
Haud obscura, virum veniens ubi reddidit ætas,
Quæ dedit ille : Dei purâ super omnia plenum
Religione, metuque animum, niveosque pudici
Pectoris, invictosque, ullo sine vulnere, mores :
Tum largè nitidis haustas de fontibus undas
Cœlestis Sophiæ, Themidisque, & Palladis artes,
Queis populos regere imperio, quibus aspera doctus
Flectere corda hominum, positis olim effera bellis
Sæcula felici mitescere pace juberet.
Quid referam, ut lætos augustæ frontis honores
Ingeminant, celsosque animos, mentemque benignam,
Regificasque manus, facilemque ad præmia dextram ?
Quid studium, totque exhaustos terraque marique
Pro re Romanâ, pro religione labores ?
Tot benefacta viri ? quæ tu, Fernande, beatus
Spectasti primis mirari assuetus ab annis ;
Et patrias etiam Rheni meditatus ad undas
Tentasti Arctoas plectro leviorè per auras.

Nunc quæ mira vides , propiore beatior almæ
 Frontis ab aspectu, pronâ quæque accipis aure ,
 Quæque feret volvenda dies facta inclyta summi
 Principis , & nomen latè immortale , decusque,
 Majori celebrare sono , grandique memento
 Carmine , Mæoniisque modis attollere ad astra.
 Divino ingenio , & præsentî numine vates
 Quæ dabis, æternùm referens mirabitur orbis ,
 Et feri assiduè discent memorare nepotes.

E J U S D E M O D E

A D

F E R D I N A N D U M

FURSTENBERGIUM,

*De reditu in Germaniam cogitantem**An. CIO. IXC. LIV.*

C U i fausta læto sidera lumine
 Risere, molli quem placidæ sinu
 Fovêre nascentem Camœnæ , &
 Ambrosiis aluere succis :
 Cui ductus altè sanguis, & inclytæ
 Longo sequentes ordine imagines ,
 Chartæque signantes parentum
 Facta, domûs monumenta magnæ,
 Monstrant avito nobile iter gradu
 Virtutis, arces quâ datur igneas
 Inire, doctrinæque suadent
 Aërium superare culmen :

Laboriosâ nil opus âleâ

Mutare dulces exilio lares;

Et quærere incertum remotis

• Regna procul peregrina terris.

Sed te beati vividus ingenI

Adegit ardor limina linquere

Paterna, præclaros ut exul

Egregius fugeres penates

Primâ in juventâ. Nec sine numine ,

Fernande, Divûm, principe in urbium

Resistis, ingentemque lustras

Latè oculis animoque Romam.

Jacere moles nubibus aspicias

Olim propinquas , & decora imperI

Miratus, immani ruinâ, &

Marte doles cecidisse vestro.

Mox de superbo pulvere nomina

Majora cernis , regnaque surgere

Æterna, quæ victrix per orbem

Relligio, pietasque summis

Æquavit astris. Impiger ultimo

De fonte, rivos hîc sapientiæ

Hauris, & ad plenum benignâ

Longa sitis satiatur undâ.

Purum vetusti temporis aureas

Hîc pectus artes combibit, & sacrâ

De fronde jam nectis coronam

Crinibus, Ausonioque vates

Incedis inter carmine nobilis ,

Cui plaudit amnis regius assonans ,

Collesque septeni resultant,

• Quo Latix recreantur aures.

Natale fratres imperiis solum
 Bellisque foetum pectore Martio
 Colant tuentes, & sub Arcto
 Auspiciis volitent secundis.
 Ad pulcra pacis munia te vocat,
 Poscitque cælum mitius: huc tua
 Te sistit, & celsos honores
 Insequitur generosa virtus.
 Ut orba dulci conjugè, & unico
 Fecunda nato, mœsta tenet parens
 Amplexa cedentem, nec udo
 Fixa finit properare vultu:
 Sic Roma cari dum capitis fugam
 Rumore tristi nunc timet anxia,
 Supplex moratur, sic amici
 Te precibus retinent Quirites.

E J U S D E M J O C U S

A D

F E R D I N A N D U M
F U R S T E N B E R G I U M.

De Thynni capite dono missò.

M Isisti mihi, Ferdinande, munus
 Magnum, Juppiter! atque sumtuosum:
 Sed magnum quod amiculo immerenti
 Næ malum dedit, ac repentiè vivum, &
 Videntem, propè ad incitas redegit.
 Nam dum relligio mihi, quod abs te
 Tuisque è manibus venit, minuta

Ferro in frustra secare, nec puto fas
 Tam cari capitis perire formam,
 Et simul meditor frui beato
 Lætus munere, & unctiore cœnâ ;
 Ære mî fuerunt paranda grandi
 Arma, vasaque grandiora, molem
 Tantam quæ caperent, focoque & igni
 Admotam coquerent, tripus, ahenum,
 Lancesque, & patinæ, paropsidesque.
 Tum quæ silva lari advoluta ! quantus
 Incendit modicos rogos penates !
 Quanta, heu, diluvies profusi olivi
 Ferclum immane super ! lucerna tantum
 Nostra vix biberit decem per annos.
 Proin tu, cùm tibi monstra belluosus
 Mittet Oceanus, vagique fluctus
 Hæc ad litora verterint tremendum
 Balenæ spatium, memento turpe
 Destinare aliò caput, docendus
 Fortunam, & loculos breves amici
 Metiri pède veriore. non hæc
 Decent munera pauperem culinam.

A D E U N D E M,

Die ejus natali.

O Ctobres salvete Idus, lux sacra : Maronem
 Quæ fudisti auras prima sub ætherias.
 Tuque adeò mihi lux salve, quæ proxima surgis :
 Lux mihi natali sanctior usque meo :

Unde

Unde sibi reduces apponit & ordinat annos ;
 Et signat niveis tempora læta notis ,
 Æmula divino condit qui carmina Vati
 Fernandus , Musâ proximus ut genesi.

I D E M

F E R D I N A N D O
F U R S T E N B E R G I O.

N Obilibus Longæ deprenso in collibus Albæ ,
 Crura sacer mihi cùm lentè percurreret ignis ,
 Et miseros artus stimulis arthritidis acutis
 Ureret, ac toto tentarer corpore, demum
 Decubui fessus monitu imperioque medentûm.
 Accipe nunc , Fernande, tori quæ commoda nostri,
 Deliciæque, quibus cessantem frangere morbum
 Sperabam, victorque feros superare dolores,
 Moxque frui lætus jucundi gaudia ruris.
 Principio apparet lecti modus haud ita magnus :
 Tres in fronte pedes, paulò plus tentus in agrum,
 Dimidiamque pavimento vix altior ulnam ;
 Unde solum digitis pulsare micantibus imum ,
 Perque leves auras jactatis ludere talis,
 Mite laboranti solamen. Culcita duris
 Durior imposita asseribus, non illa minutis
 Aut plumis infarta, aut vellere pinguis Ibero.
 Cyniphiis tondent sed quale in vallibus hirci ,
 Horrentésve apri, Numidæve in montibus ursi ,
 Tomento oppletur Cilicum de stamine faccus.
 Involvit super hunc animosis sospes ab Euris ,

Et

Et decimo fluctu, fœdisque agitata procellis
Carbasus, assutis obtendens vulnera pannis.
Nauticus horrescit supremo tegmine cento,
Blattarum ac tinearum epulis subductus, & unde
Diripuerè dapes magno certamine mures.
Cetera (quod multo mireris non sine risu)
Regifico surgunt luxu, textuque renident
Attalico, & Babylonis acu, Phrygioque labore.
Quattuor ingentes Ephyræo ex ære columnæ,
Aurati fulgent quarum alto culmine coni,
Vela ferunt pretiosa, & nobile conopeum.
Sed neque ferventi citiùs de sanguine febris,
Nec dolor abscedit membris, nec pectore curæ,
Textilibus si in picturis aurum inter & ostrum
Jacteris, quàm si plebeiâ in veste cubaris.
Quod te per nomen jucundum, & fœdera dulcis
Testor amicitia, per sanctæ pignora dextræ,
Per mores, geniumque tuum, miseresce jacentis.
Dumque datur placidos in lucem carpere somnos,
Et tibi lauricommo veniunt insomnia Pindo,
Inspirantque quiescenti nova carmina Musæ,
Dulce aliquid mihi Castalio trans mitte liquore
Perfusum. Forsan vatum Deus, artis & idem
Inventor medicæ, sic me servavit Apollo.

AUGUSTINUS FAVORITUS

A D

FERDINANDUM FURSTENBERGIUM

In Albano rusticantem.

EX humeris pendebat ebur, lætusque parabam
 Dicere Sarmaticâ confossum cuspide Gotthum,
 Ossâque per campos immania, signâque templis
 Barbara quæ patriis affigit victor, & ipsum
 Ducentem proavos Casimirum in prælia Divos:
 Sed digiti torpent, & inertia reddere cantum
 Fila negant, nullisque calent præcordia flammis.
 Scilicet Aönides mihi quæ dictare solebant
 Carmen, Alexandrum, téque ô Fernande, secutæ
 Certatim, strepitu infano fumoque relicto
 Urbis, Aricinos gaudent habitare recessus.
 Lucus ubi sacer Hippolyto, quem rursus in auras
 Fabula Pæoniis revocatum credidit herbis.
 His tu Telegoni claras monstrantibus arces,
 Albanumque lacum lustras, qui sæpe sine ullis
 Imbribus exsuperans ripas, aut sanguine multo
 Decolor instantes clades & fata monebat
 Seu fortis bellator, avoque superbus Achille
 Arma recudisset recidiva in Pergama Pyrrhus;
 Seu Latio fatale malum perrumperet Alpes
 Hannibal, aut magno ruerent examine Galli.
 Roma quidem hos olim domuit, verùm ipsa pavet nunc
 Anxia, ne magni sibi conscia Principis Alba
 Excitet antiquam litem, gentique togatæ
 Auferat imperium in populos rediviva Latinos.

Nec

Nec minus Ægeriæ fontem, qui lege feroces
Composuit veterum mores, & corda Quiritum.
Quà steterit sus alba, ubi Troicus arserit ignis,
Et Scythicæ quæris monumentum immite Dianæ.
Hæc fuerant noscenda tibi, postquam ordine cunctas
Lustraras miserâ pendentes urbe ruinas,
Quas Hunni fecêre, Hunnisque immanior ætas.
Nunc illæ revocant animos, & ponere turpem
Post tot lustra situm incipiunt, tristemque senectam
Exuere, ut quondam serpens, quem frigidus annus
Ventique pluviæque diu tenuêre latebris,
Sole novo redeunte serox in gramine vivo
Emicat, & positis tollit sese arduus annis.
Nec tantum hæc oculis, verum quoque pignora nosti,
Quæ Latia tellure latent inclusa cavernis,
Reliquiæ, & veneranda virum monumenta piorum.
Effluet illa animo nunquam lux aurea nostro,
Quâ fido hærentem lateri, dextraque prehensum,
(Cui dignatus amicitia est me fœdere sancto
Jungere, qui nutu superis mortalia jungit)
Duxisti magnæ subter penetralia Matris.
Quos ibi Christicolæ luctus, quæ funera gentis
Vidimus! heu quot busta virum! qui sanguine leges,
Et Christi sanxere fidem, cum Numinis acti
Afflatu subiêre rogam, vel fortia læti
Colla sub immiti passim posuere securi.
Illa pati audaces quæ nec Mezentius author
Extuderat, nec qui furiis agitatus iniquis
Jusserat in Siculo mortem mugire juvenco.
Quæ ne monstra oculis hauriret Tybris, opacâ
Velavisse ferunt nebulâ caput. Ibat in ignes
Certa mori Heroum manus; indignante tyranno,

Quod

Quod paribus flammis una morientis obiret
 Læta viri in gremio conjux, & funus acerbum
 Natorum sicco spectarent lumine matres.
 Multi etiam poscente fero spectacula vulgo,
 Pavêre Armenias tigres, aut dente leonum
 Consumpti vitam in mediis fudêre theatris:
 Ferales ubi nunc gemitus sub nocte silenti
 Sæpe exaudiri fama est, ac dira nocentûm
 Supplicia, & portenta modis ululantia miris.
 Hic merita infandos exercet pœna tyrannos:
 Hic Antonini lugent, sævique Neronis
 Maternâ exululant agitati lampadè manes.
 Nec tamen ætherei spectant quod luminis auras,
 Mitescunt idèò pœnæ: nam Tartara secum
 Lugentesque trahunt campos. It Cerberus ultor
 Latratum ingeminans circum, Diræque relictis
 Titanum fibris, venientûm terga sequuntur.
 Ast illi magnis permixti Heroibus, inter
 Cælestes ignes, aurata sedilia complent,
 Respiciuntque suam felici sidere Romam.

EJUSDEM ODE

A D

FERDINANDUM,

FURSTENBERGIUM,

NEAPOLIM ITURUM.

ERgò agè felici discedas alite, quando
 Ire apparas Neapolim:

Dulcis

Dulcis ubi æternùm spirat clementia veris,
Lætumque crispantes mare
Floribus illudunt variis Zephyritides austræ,
Coluntque citrium nemus.
Multa quidem tibi Parthenope miranda sub ipso
Monstrabit urbis limine :
Eductas cælo moles , atque aurea tecta ,
Et signa Phidiacæ manūs.
Sed tibi , quo tegitur tumulo, sit cura videndi,
Maronis inclytus cinis :
Quem memorant (credi si digna est fama) furorem
Afflare sacrum vatibus :
Quare ibi posthabito castas Helicone sorores
Fixisse mansuram domum.
Illæ te excipient venientem, ac fronte benignâ
Sic alloquentes audies.
O nostris addicte sacris, generosa propago ,
Tuæque flos Germaniæ,
Lætus ades, nostrosque velis lustrare recessus ,
Vatum feraces grandium :
Seu Surrentinos amor est invisere colles
Dulci virentes pampino ;
Seu magis arridet pulcherrima Mergilline,
Dilecta Syncero domus ;
Seu juga Paufilypi pelago prætenta sereno ,
Quâ cærulæ Nereïdes
Sæpè leves ducunt choreas Tritona sequentes
Curvâ sonantem buccinâ ;
Seu juvat irati tonitrus audire Vesevi
Lateque nigrantes globos,
Sparsaque per campos ambusti viscera montis
Candente merfos sulphure.

Sed tibi scrutandi veniat ne dira cupido,
 Quæ causa venis abdita,
 Pabula inexhaustis tot jam per sæcula flammis
 Tellure ab imâ fuggerat.
 Te miseri subeat fatum crudele Secundi
 Undante fumo hîc obruti;
 Namque Deus, rerumque vices, venturaque fata
 Latere mortales jubet.

EJUSDEM ELEGIA

A D

F E R D I N A N D U M
 F U R S T E N B E R G I U M.

De nocturno bubonis cantu in Albano secessu.

Q UOD carmen feralè canit sub nocte silenti,
 Tristibus & bubo perstrepat auguriis:
 Ne nos sollicitos teneat, Fernandè, futuri.
 Hic timor infantes, & leve vulgus agat.
 Num quæ nec notis Babylon deprendit in astris;
 Nec potis aspicere est provida mens animi;
 Sed sibi seposuit mortalibus invia curis,
 Celat & obscurâ nocte premitque Deus,
 Semiruto residens volucrum scædissima tecto
 Efferet, attonitis fata canens populis?
 Quæ sit an hæc nosti, quibus orta parentibus ales?
 Accipe, & in risum verte jocumque metus.
 Nymp̃ha fuit Stygiis Orphne notissima pratis,
 (Namque suas Nymp̃has, prataque Avernus habet)

Furva quidem, torvoque inamabilis ore: sed atrox

Forma decet Stygias, & color ille Deas.

Ergò illi tædâ jungi cupiere jugali

Numina, quæ magni regia Ditis habet:

Elysi cupiere proci. Sed Numina Ditis

Sprevit, & Elysios Nympha superba procos.

Sæpe Linus, vatumque pater Musæus, & Orpheus

Aggressi duram flectere voce Deam.

Aggressi frustra Linus, & Musæus, & Orpheus

Molliri blandâ nescia corda prece.

Quippe ferox Hecatæ virgo sacraverat annos,

Infernas jaculo figere docta feras.

Fortè Acheron, incauta suæ dum margine ripæ

It gravidam multâ cæde gerens pharetram,

Dirarumque striges dirum genus Harpyiarum

Sternit, agens forti spicula certa manu,

Nempe Acheron securam animi, & nil tale timentem

Observans, cupidis nexibus implicuit.

Amplexu ex illo concepit Nympha, novemque

Mensibus exactis edidit. Ascalaphum.

Jamque annis puer addiderat duo lustra duobus,

Cùm petiit manes acta dolore Ceres:

Et, Mihi reddite, ait, raptam mihi, Tartara, natam,

Unica quæ matris spes, sobolesque suæ est.

Reddite maternis, Erebi pia numina, votis

Quæsitum toto pignus in orbe diu.

Munere terra meo fruges parit. Hæc mihi merces

Redditur, ut sterilis dicar, & orba parens?

Reddite: tuque redi. Quis te, Proserpina, casus,

Vel qui te nobis eripuerit doli?

Motuserat Stygius miserandâ voce tyrannus,

Et Cereris justis annuerat precibus.

Fata sed ad cælum reditus immota negabant ;
Gustasset Stygios si Jove nata cibos.
Punica nuper eam carpentem ex arbore pomi
Vidisse Ascalaphum, nec tacuisse ferunt.
Interdicta via est : sed testem Diva profanum
Supplicio culpæ dicitur ulta pari.
Ter caput invisum devovit carmine diro :
Corpus Avernali tēr madefecit aquā.
Illicet Ascalaphus, contractis carmine membris,
Vertitur in plumas, surripiturque sibi.
In rostrum nares, digiti sinuantur in unguēs,
Brachiaque in pennas versa abiere leves.
Turpe caput multū, multū cava lumina crescunt,
Vixque potest pigrum tollere corpus humo.
Ille hic est bubo, quem rerum ignara pavet gens ;
Tu ride mecum, qui sapias, omen avis ;
Westphaliæ flos, deliciæ, Fernandæ, Quiritum ;
Tempora cui lauro non percuntē virent ;
Et mecum cape plectra manu, junctisque canāmus
Carminibus silvas, silvicolasque Deos.
Neu Romæ desiderio moveare relicta.
Quidquid habet magni Romæ, dat Albā tibi.
Hic Pollinus, honos Græciæ Latæque Minervæ,
Holsteniusque Indis notus & Hesperiiis.
Hic Bandinellus Tyrrenæ gloria mūsæ,
Et Phœbi geminā Naldius arte valens.
Et carus Themidī, ac Musis Rasponus, & unā
Vizzanus Sophiā clarus, & ingenio.
Hic decus Italiæ, & Romani Sfortia vindex
Nominis, ac sidus Nerlius, Arne, tuum.
Rospiliosus & augusti pars magna Senatus,
Virtute egregius consilioque Pater.

Hic & ALEXANDER præses, tutelaque rerum,

Cui Deus ingenium par dedit imperio :

Et Patruï divina legens vestigia magni

Spes, & servatæ Flavius Urbis amor ;

Pro quo debet ALEXANDRO res publica, quantum

Propter ALEXANDRUM debuit illa Deo.

Ergo sub hac mecum platanø, Fernande, solutus

Carmina jam Latia dic socianda lyra.

Felix qui curis, & iniquo scœnore liber

Exercet bobus rura paterna suis,

Ordine nunc æquo gaudens disponere vites,

Nunc oleis sobolem substituisse novam.

Interdum juvat arboribus decerpere poma :

Interdum nemoris fingere falce comam :

Irriguosque jugo rivos inducere campis,

Cùm pluviam tellus poscit hiulca Jovem.

Non illum vigiles curæ, non somnia turbant ;

Pestis & humani pectoris ambitio.

Nec metuit fraudes, nisi quas caper improbus urvis,

Aut parat è nimbo grando inimica fatis.

Limina nec Regum trepidanti poplite calcat,

Irati metuens damna supercilii.

O mihi si rupes has inter vivere detur !

Sorderet rubri gaza colorque maris.

O ego dum possim tam leni vescier aurâ,

Et liquidos fontes, & nemora alta sequi !

Siqua mihi à Latjis speratur gloria Musis ,

Occidat, & venti nomen inane ferant.

Hæc ubi luserimus, nos curis reddat & Urbi

(Jam fatis arvorum est) præpete currus equo.

BERNARDUS ROTTENDORFFIUS

Medicus Cæsareus & Archiater Mona-
steriensis & Paderbornensis

Reverendissimo & Illustrissimo Domino

FERDINANDO FURSTENBERGIO

*Canonico Paderbornensi, Hildesiensi & Monaste-
riensi gratulatur honorem intimi cubicularii,*

quo ab ALEXANDRO VII P.O.M.

fuerat ornatus An. MDC LV.

Virtutum illicio, nitore morum,
Gratis obsequiis, simulque juncto
Musarum & Charitum tenace nexu,
Devinxisse sibi, probante Cælo,
Magnatum studia, & sacros favores;
Si pulcrum decus est, honorque grandis:
Hic Te quot titulis honor coronat,
FURSTENBERGI? Heliconii viret;
Germen nobile, Vatum ocelle dexter,
Dulcis Socraticæ medulla Sudaæ,
Nostri maxima pectoris cupido.
Tu primùm innocuæ nitore vitæ,
Virtutis quasi veste candidatus;
Tum fido obsequio, pioque cultu,
Cultarumque simul novem Sororum
Præclaris studiis, & universis
Doctrinæ illecebris amœnioris;
Sic illum FABIIUM Tibi obligasti,
Magnum illum FABIIUM Tuum Patronum:

Quem natalibus inclutis, & altâ
 Stirpis nobilitate, divitavit
 Illustrissima CHISIORUM origo.
 Illum inquam Tibi CHISIUM obligasti;
 Patronum simul & Tuum meumque,
 Ipso qui Charitum sinu educatus,
 Doctâ Pieridum manu expolitus,
 Per Virtutis iter gradusque ductus
 BONÆ MENTIS ad auream Palæstram:
 Ex qua Victor ovans brevi supremæ
 Scandit Gloriæ ad eminentis cacumen,
 Applaudente Polo, vovente Mundo.
 O sacrum caput, ô cor entheatum!

Hunc Tu dotibus hisce, FERDINANDE,
 Tui dotibus ingenI genIque
 Tibi demeritus, tenes favores
 Illos eximios, & invidendos;
 Queis Te, spesque Tuas fovet beatque,
 Magnus CHISIUS, æstimator ille
 Dotum Mentis & Artium peracer.
 Magnus CHISIUS! Unus inter omnes
 Illustrés animas, Poloque nâtas,
 Et Virtutis odore, Gratiisque,
 Flos tantò melior, suaviorque,
 Tantò nobilior, micantiorque;
 Quantum quæ foliis superba centum,
 Pæstano rosa purpurans in horto,
 Ardet luteolæ præire calthæ.

Is dum Teutonicas subisset oras,
 Summi Pontificis jubente nutu,
 Ut Mosæ pariter daretque Rheno
 Legatus sacra jura Vaticani;

Quam

Quam gratus fuit ac suavis Hospes!
 Quo passim in pretio! repentè tanti
 Ut cœpere viri æstimare dotes!
 Ut cœpere pio flagrare amore,
 Mox Summi Medioxumique & Imi!
 Sic odore suo trahebat omnes,
 Divino herculè odore! Non qui amicum
 Naribus redoleret aut amomum,
 Aut fragrantem Opobalsami liquorem:
 Sed qui Justitiam, integrosque mores,
 Et Zelum Pietatis, & perennis
 Laudem Sobrietatis, atque casti
 Cordis Lilia spiret, eruditâ
 Cum Prudentiâ & Æquitate juncta.

Hujus tam ambrosii enthelque odoris,
 Vis tam blanda magis magisque cœpit
 Se diffundere in Urbe Mimigroda,
 Quando istic Procerum, quibus potestas
 Gentis credita summa Christianæ est,
 Discordes animos, sagace primùm
 Suasu consilioque mollicbat:
 Dein litis velut Arbiter severus,
 Confopito odio, improbisque rixis;
 Bonis auspiciis, bonoque fato,
 Sic cunctorum animos studebat arcto
 Nexu jungere Amoris atque Pacis;
 Ut primis studiis caveret unum hoc,
 Ne quid Relligio, Fidesque avita,
 A Pace acciperet nocentè damni.

At postquam lacrimis petita tantis,
 Et tantis toties cupita votis,
 Pax tandem fuit icta Mimigrode.

Idem dius odor, fragransque CHISI
Cœpit latius usque & usque fundi,
Seque didere Christianum in Orbem.

Ut jam capta sui nitore floris,
Sui Roma flagrans amore CHISI,
Optaret patrio rubere Cælo.
Mox Tybris repetit; statimque cœpit,
Magni Pamphili inferente dextrâ,
Voto totius adprobante Mundi,
Flos hic more rosæ modoque odoræ,
Purpurascere Vaticano in horto.
Hic quam dulcè rubet! suavè spirat!
Est ostrum hoc, animi rubor modesti;
Est zeli color hic Deo fragrantis;
Est cœlestis odor, Deumque spirans.

Quo de purpureæ nitore scenæ
Perrexit magis usque & usque & usque
Se diffundere, CHRISTIANA Virtus;
Donec Pontificis thronum supremi,
Claves fidereas, Petrique sedem
Conspirante sacro Patrum Senatu,
ALEXANDER adit, futurus Orbi
Ter felix Hierarcha Christiano.

Est, cur nunc duplices tuos triumphos,
Est, cur ingemines subinde plausus,
Quaquà Munde pates, Deoque pares:
Et tu præ reliquis, tumultantis
Martis scena, feræque arena Enyûs,
Tot quassata malis, tot icta flagris,
Nunc Germania spes resume grandes,
Et in lætitiis reficta vultum,
Plusquam centuplici fer ore plausus,

Habes Pontificem, Tuique gnarum,
 Mœrorisque tui, tuique amantem :
 Habes Pontificem tuis potentem
 Volentemque simul malis mederi.

At Tu delictum domus paternæ,
 Et Princeps Juvenum eruditiorum,
 FURSTENBERG, amor herclè noster, omnes
 Secretas animi occupans latebras :
 Tu lætare magis, magisque plaude ;
 Quando lætitæ novæ, novique
 Te gaudii seges insolens coronat.
 En Tuus FABIVS, Tuus Patronus,
 Patronus simul & Tuus meusque,
 Cinctus tergemina caput Tiarâ,
 Sic jubente Polo, vovente Mundo,
 E Petri Cathedra gubernat Orbem,
 Magnus CHRISIVS, Unus inter omnes
 Flos lectissimus optimusque flores ;
 Nunc odore sua replevit Urbem,
 Nunc odore suo replevit Orbem ;
 Urbem odore suo beans & Orbem :
 Sic odore beans & Urbem & Orbem,
 Ut dum suscipit utriusque curas ;
 Mox sui memor usque FERDINANDI,
 Hunc afflare novi favoris aurâ,
 Dignum crediderit suis coronis ;
 Quando sponte suâ, stupente Româ,
 Aulæ adlegit in intimæ Ministrum.

O honorificum, bonumque factum !
 O factum ter & amplius decorum !
 O collatus honor, probante cælo !
 Et quod me genius Tuus meusque

Quod Virtus Tua me, Tuique mores
 Præfagire jubent, & ominari,
 Præludens honor auctiori honori!
 FERDINANDE, Honor hic erat canendus,
 Non his Hendecasyllabis Phaleucis
 Duris, illepidis, siticulosis,
 Jejunis nimis his meis Phaleucis.
 Verùm Pindarici pedis cothurno.
 At, ni me mea spes, amorque ludunt,
 Reddent astra diem magis beatum,
 Qui pompam & numeros celebriores,
 Andinæque tubæ requirat aurum:
 Illum dico diem, Tibi secundum,
 Felicemque Tuis, mihi que lætum,
 Qui majore Tuas honore Lauros,
 Et novi decoris coronet ostro.
 Nam ni me mea spes amorque ludunt,
 FERDINANDE, animi medulla nostri,
 Nondum summa tenes, quibus pararis;
 Pulcher restat adhuc apex, nec unus;
 Quò Virtus Tua Te, vocatque Numen;
 Quò flos ingenii vicens, Tuique
 Tam belli, nitidi, probique mores;
 Quò recti studium, sagaxque Pallas,
 Te certant niveis levare bigis.
 Tunc, si fata sinant, trucesque Parcæ;
 Non his versiculis levis monetæ,
 Sed celsi pedis insolente fastu;
 Plaudentùm innumerâ cohorte septus,
 Scandendas Tibi Gloriæ quadrigas,
 Ornatum veniam, sequarque plaudens.
 Nunc pennâ levioe prævolare,

Hos jussi celeres meos Phaleucos,
 Gratatum Tibi cordis è medulla,
 Et faustissima quæque comprecatum.
 In queis illepidis & inficetis
 Esto nil aliud probare possis;
 Sinceros animi fidelis ignes,
 Amoremque Tui potes probare.

Tandem figo pedem hîc, & eminentis
 Tibi gratulor auctorem honoris.
 Jejunis nimis his meis Phaleucis;
 Quos inter streptus frementis Aula
 Scriptos anterioribus diebus;
 Tuis pluribus optimis Phaleucis,
 Rotundis nimis & nimis venustis,
 Excultis itidem elegantibusque,
 Urbano pariter joco facetis
 Reddo. Tu illepidos meos Phaleucos,
 Tornatos minus & minus dolatos,
 Nugaces, miserabilesque versûs;
 Vultu suscipe, quo soles, sereno.

Ite ergò illepidi mei Phaleuci:
 Ite, Ite Hendecasyllabi, quot estis;
 Ite ultra gelidum Alpium cacumen;
 Ad Palatia Vaticana adite;
 Et quanto studio potestis, illic
 FURSTENBERGII honoribus litate:
 Ite, applaudite Principi Juventæ;
 Ite, applaudite corculo Minervæ;
 Suadæ delicio, atque vaturn ocello,
 Et nostri quoque pectoris medullæ.

E J U S D E M
C A R M E N V O T I V U M

*Ad Reverendissimum & Celsissimum Principem
FERDINANDUM Episcopum Paderbornen-
sem, S.R.I. Principem, Comitem Pyrmon-
tanum & Lib. Baronem de Fur-
stenberg An. M. DC. LXI.*

Sunt aliquid Vates : nec vanis luditur usque
Auguriis hominum cata mens, præfaga futuri.
Nam quâ nunc fulges, PRÆSUL FERNANDE, Tiarâ,
Præfensi dudum capiti haut procul abfore ; postquam
Es Vaticani factus novus incola montis.
Quem Tibi tum, memini, lætus gratabar honorem.
Nec tamen hoc avium, dextrâ lævâque volatus ;
Oscinis aut cantus, dubii pastusque volucrum ;
Nec Dodonææ, populorum oracula, quercus ;
Nec sacri tripodes ; nec qui rimatus arenæ
Delius est numerum, mihi prædixere : sed ingens
Excelsi Virtus animi, & Doctrina ; Tuique
Exsculpti mores è nobiliore metallo,
Augurium fecere mihi, non omine lævo.
Testis Alexander, rerum tutela, potentis
Arbiter OEnotriæ, quo nunc Rectore superbit
Roma caput mundi, vastique vicaria cæli.
Ille Tui postquam genii dulcedine captus ;
Virtutesque Tuas tacito dignatus amore est ;
Ingentem Tibi mox campum patefecit honoris ;
Quo Tua se Virtus Urbique Orbique probaret.

Nec

Nec frustra : Nam clara Tuæ præconia laudis
Fama loquax montes Alpinos detulit ultra :
Teutonicasque replens Urbes , prono agmine aquarum
Fluviorum Rex Danubius, Rhenusque bicornis
Quas lambunt , Mænusque vagans, rapidusque Visurgis,
Fontibus allapsa est Paderæ ; quos funere tristi
Turbarat Lachesis : Quando Theodorus Adolphus
Gloria Pastorum ; Paderanis qui hætenus agris
Paverat intrepidus commissum Pastor ovile,
Heu ! fato immitti ereptus vitalibus auris.
Nam licet æthereis illatus sedibus, almi
Numinis , & Superûm æterno fruiturus amore ,
Vivat inexhaustis poturus gaudia rivis :
Attamen & Patriam viduatam Patre, Pedumque
Præfule, & orbatum Pastore reliquit Ovile,
Non sine tabifico luctu , Populique dolore.
Hunc deterfuri Proceres, Clerique Senatus ;
(Quem penes est plebem desertam cura tuendi ;
Atque Dicecesin vacuam Rectore regendi)
Solliciti, cui communem concedere clavum
Imperii possent ; Votis concordibus unum
Convenère locum : sed & illuc appulit ingens
Fama Tui, FERNANDE, ferens & mîrmure grato
Auribus atque animis Romanæ judicium Urbis
Insinuans de Te, summi que oracula Patris ;
Queis visi nuper mores, inspectaque coram
Vita fidem postquam asseruit, famamque probavit.
Mox voto unanimi Procerum, Clerique favore,
Ecce salutaris supremus Rector agrorum,
Quos medius lambit colubrino syrmate Padra,
Inque locum extincti, cujus vestigia calcas,
Sufficeris ; viduum posthinc recturus ovile ;

Cujus Pastorem, mœstis heu sydera terris
Ereptum; æthereâ cæli regione locarunt!

Sic igitur non vana meæ præfagia mentis
Comprobat eventus: Tibi decessoris honores
Dum cessere, sacrâ superûm plaudente coronâ;
Et terrâ lætante simul; nec gaudia Româ
Dissimulante sua. Ecquis enim non gaudeat alto
Evectam folio Virtutem? & præmia dudum
Debita jam merito, data non lætetur honorum?
Sed mihi præ reliquis complerunt gaudia pectus;
Gaudia jejunis quæ non velut ante Phælicis,
Sed sacro herôi testarer carminis ausu,
Falcatasque tuas scandens, Andine, quadrigas,
Papinii aut quatiens spumantia fræna caballi;
FURSTENBERGIACÆ auderem decora incluta gentis
Accessu cumulata novo, vulgare per Orbem.

Sed dolor & luctus contracti ex funere Nati,
Indixere meis æterna silentia plectris:
Ille redux postquam ex studiis, præclara dedisset
Doctrinæ documenta suæ; canoque Parenti,
Et Patriæ sese medicâ satis arte probasset;
In Latium excurrrens Patavinam tendit ad Urbem;
Ut Meditrinæam penetraret Apollinis Arcem.
Hic ubi mox Lauri redimitus termite frontem;
Phœbæos inter cœpit clarescere Mystas.
Cumque salutiferâ morborum examina dextrâ,
Et Paduæ, & Senis, nec non domuisset in Urbe:
Eximia hinc meritis doctæ præconia famæ:
Roma ipsi rigidos morienti nuper ocellos
Clausit, & extincti gelida intulit ossa sepulcro;
Quasque suas potuit, miseram sacravit alumino
Inferias, mœstis ducens suspiria votis.

Ex illo heu ! quantus torfit mea viscera luctus !
Viscera non fando pænè externata dolore !
Et licet adsistant prompto mihi numine Musæ,
Atque senescentes animent in carmina vires,
Tota dolore tamen lacrumabilis obstupuit mens ;
Nec secus heu ! languet, quam flos succifus aratro ,
Radice evulsâ terris. Obducta cicatrix
Vulneris inflicti, non plenè occlusit hiatus ;
Illius ab nimio connivent labra dolore !
Hinc amor indomiti vult laxem angoris habenas ,
Totus ut in planctus miser ac suspiria solvar ,
Interiusque gemam tristissima funera Nati :
Quæ non permittunt, ut versibus otia fallam ,
Aut luctum Musis abigam, viresque dolore
Instaurem attritas. Curis minus apta Poësis !

Sed tamen haut modicùm dispelli sentio luctus,
Cum mea delatus Tibi Honos præcordia pulsât ;
Ac veluti claro cum Cynthius emicat ore ,
Nubila disparent, redit inque suum æthra serenum :
Sic allata Tuæ recreat me gloria famæ.
Propterea in præsens ne totus asymbolus adsim ;
Vile Poëmation tenui dispenso Cãmœnâ ;
Lætitiâ ut parvo Musarum hoc munere tester ,
Quantamcunque Tui mihi movit plausus Honoris :
Quem Tua Virtutum, passim & præconia laudum ,
Commerito peperêre Tibi, applaudentibus astris.
O Princeps Proavos factis qui ingentibus æquas ;
(Si non eximiis illos Virtutibus anteis !)
Quâ Te quæso lyrâ, quo Te, Mel amabile, plectro,
Quove precor digno jam nunc Te Carmine dicam ?
Cui Virtutis honos, & masculus indolis ardor ,
Doctrinæque vigor, locuplesque peritia rerum,

Et pernix animi prudentis acumen, & ipsa
 Eloqui facies strictâ gravitate serena;
 Illustre & nullo ruiturum nomen ab ævo;
 Celsius extollunt ad sacra palatia cæli.
 Dic precor has raras animi quo carmine dotes
 Eloquar, aut quonam condigno animabo colore?
 Rectius has igitur velis obduco Timantis;
 Nube sub obscurâ bene cernitur auricomus Sol.
 Quid, quod Honor præsens, vitæ index hæctenus actæ,
 Auguriis animum, & votis maioribus auget;
 Meque iterum vatem facit, hæcque oracula pandit;
 Nondum hîc sistet honos: sed adhuc Tibi missis in her-
 ba est

Uberior laudum, missura in secula nomen
 Sera Tuum; fastos quod nobilitabit Avorum,
 Majorumque novâ superabit imagine ceras
 Pluribus insigni titulis, laudumque trophæis.

Interim ad hosce libens titulos confurgo recentes
 Lætus, & ex animo præsentem grator honores;
 Et simul hoc unum superaddo ex pectore votum:
 Ut Tibi tergemina promptè ancillentur in omni
 Obsequio CHARITES, & prospera cuncta ministrent.
 IRENE imprimis strictim latus undique stipet;
 Aurea Pompilii producens secula Regis.
 Astes HYGIA Tibi sit, suppeditans Panaceam,
 Quæ potis est cunctos de corpore tollere nævos:
 Aurea divino fluitans de fonte SOPHIA,
 Consilium regat, & Tua cuncta negotia formet;
 Picturato oculos limbo velata pudicos,
 Justitiæ cultrix ASTRÆA, forensia tractet.
 Quin & AMALTHEE privam rem sedula curet;
 Ac locuplete penu Domini pulcrum instruat Aulam.

Quod

Quodque rei caput est; demum omnia ΕΡΩΤΙΚΗ adornet;
Actibus intersit cunctis, & cuncta gubernet;
Gemma Megistanum hæc, quâ non præstantior ulla,
De cælo ducens diæ primordia stirpis.
Magnum illud Numen quod si mea vota secundet,
Non erit, ô Princeps, Te fortunatior alter.

Vive diu Patriæ, FORTUNATISSIME PRINCEPS;
Vive diu, & stirpis flore generosa propago.
Salve Daphneæ decus indelebile lauri;
Et Clariæ constans salve tutela cohortis;
Cui sacra assurgit Myrtus, cui Delphica Laurus;
Cuique Heliconiades sua vectigalia solvunt.
Vive Tibi atque Tuis, EXOPTATISSIME PRINCEPS;
Et Titulis Virtutem innecte; atque inter honores
Emineat Doctrina Tuis asserta Camænis;
Cunctaque vesani despectet murmura vulgi.
Igneus ingenito effulget splendore pyropus;
Ast auro insertus, majori sole coruscat.
Sic generi, generosus apex, si junxerit armâ
Doctrinæ, lucis sibi plus acquirit ab illis.
Vive ergo & salve, cunctis CARISSIME PRINCEPS:
Tu Procerum columen; Patriæ Tu sidus amatum;
Tu Generis generosus apex, & fulgida stella;
Tu Charitum soboles; Phœbi Tu dexter ocellus:
Ingenuos Tibi Laurus obit Parnassia crines;
Enthea sublimi residet Tibi vertice Daphne:
Doctrinæ meritum, & morum Te sobria virtus;
Te benefuadus amor; membrorum & grata venustas;
Atque ingens oris species, & gratia fandi;
Splendidiore satû Te illustris sanguis avorum,
Vexit ad augustum meritorum culmen honorum.
Jamque vale salveque iterum, CELSISSIME PRINCEPS;
L Meque

Meque Tuos inter (quod si meruisse videmur,
 Efficitur precor hoc,) minimos admitte Clientes.
 Sic famæ & laudis Tibi major adorea crescat;
 Frigore nec gelido, nec quæ marcescat ab æstu;
 Ast viridis semper florescat frondis honore:
 Sic Tua producant in longum stamina Parcæ;
 Sic Tibi semper cant anni è meliore metallo;
 Sic BONA MENS nunquam Te deserat, & BONA FAMA.
 Claudite nunc pueri rivos, sat prata biberunt.

I D E M

In effigiem Reverendissimi & Celsissimi Principis

F E R D I N A N D I

*Episcopi ac Principis Paderbornensis Coadju-
 toris Monasteriensis.*

EN Fernandus hic est, Princeps qui jura benignus
 Dat Paderæ, populis & dabit Alpha tuis.
 Cui si fata pares tribuent virtutibus annos,
 Ceu dedit imperio par Deus ingenium;
 Non tamen æquabunt populorum vota precantum
 Ut superet Patruj tempora læta sui.

FRANCISCUS MACEDO LUSITANUS,

D E

ALEXANDRI VII. P. O. M.

Effigie, in Academia Romana, solemnî ritu
proposita ac consecrata.

A D

FERDINANDUM FURSTENBERGIUM

*Ejusdem Academiæ electum Principem & Sum-
mi Pontificis intimum cubicularium.*

HÆc facies mortalem ultra, & vicina Tonanti,
Cui lux viva oculos circum se fundit, & ardor
Igneus accendit: cui vis arcana vigorem
Sufficit æthereum: gravitas quâ mixta pudore
Certat, & ambiguos in fronte relinquit honores,
Utra virum deceat, Majestas publica, virtus
An privata magis? partim reverentia, partim
Quam commendat amor; Romani est illa Parentis,
Nomen ALEXANDRI qui reddit, & arma refutat
Pacificus. Viden' ut celsa suspensa tremiscunt
Astra supercilio? viden' ut cælestia nutu
Ostia torquentur! Tanti est ea Numinis umbra
Expressa in tabulâ; cujus tamen illa gemiscit
Limite in angusto. Dolet hoc inclusa teneri
Carcere, par mundo, vel picta affectat imago
Ire ultra Lunæque vias, Solisque labores,
Et terræ, & cæli spatium consumere. Montes

Magnus Alexander geminos satis esse putavit
Esse sibi statuam vasta ambitione petenti.
Major ALEXANDER: gemini cui non satis orbes
Pro virtute dabunt spatii: si postulet æquum
Ad simulacra locum: solusque huic maximus Atlas
In tabulam, æthereos si latè extenderet axes,
Materiam daret æqualem, dignamque nitore
Virtutum, quas viva oculis exponit imago,
Muta quidem; supplem vivi sed verba colores.
Stat facies index animi, proditque latentes
Divitias: mentis spirat subtilis acumen,
Atque acris vigor ingenii, vis provida, pondus
Judicii; rerumque sequax, prisci que facultas
Temporis, humani collecta scientia juris
Divinique patet: quin lex animata relucet
Fronte suis descripta notis, exempla que morum
Composito constant vultu: facundia lingue
Vel muto sedet ore loquax. Stant Palladis artes
Expressæ in facie reliquæ; nec munia Phœbi
Despicit, & vatum studiis indulget, Hetrusco
Mœcenas melior, qui præmia conficius artis
Distribuat, justosque merentibus addat honores.
Hæ sunt ingenii dotes, quas prodit imago.
Virtutes animi digna quis voce referre
Sufficiat, quas effigies insignis adumbrat?
Indolis hic altæ species: hic nobilis ardor
Promicat. It superas ignis generosus in auras,
Affectatque orbis contempto limite cælum.
Hoc pietas, hoc prisca fides, hoc insidet ore
Religio, pudor hic habitat, candorque refulget
Ingenuus: jus fasque notis se promit apertis,
Integra vis, fortisque animi constantia, rebus

Non fracta adversis, nec rursus elata secundis,
Eminet hic prudens solertia, & arbiter usus
Fortunæ, modus in rebus, ratioque gerendis,
Sobria lex, nec sola cibus imposita, sed ultra
Insinuans, motusque animi moderata rebelles;
Omnis in effigie spirat virtutis imago.
Quisquis amat documenta piæ describere vitæ
Discat ab hoc vultu: mutus color ille magistros
Vocales superat: faciet compendia, cernat
Qui tabulam. Hæc specimen doctrinæ, hæc regula mo-
rum est.

Hanc tu Palladii Princeps clarissime ludi,
Aönidum decus, & Germanæ gloriæ gentis,
Furstenberge tuis propone sodalibus, Humor
Quos juvat: hic sapiens humor, quem nata cerebro
Docta Minerva Jovis secum deduxit, & undis
Castaliis mixtum Parnassi è culmine montis
Volvit agens agmen, Chirias quo nectare Quercus
Imbuit, & triplicis resperfit sidera Montis.
Hanc expone palam, doctæque in luce videndam
Constitue, & cujus propius datur ora tueri
Faustâ forte tibi, procul hanc da cernere: nobis
Est satis hoc speculum, qui Te virtute minores
Fortunaque sumus: tabulâ descripta legemus
Signa animi, mentisque notas; spirabit imago
Numen Alexandri, superumque afflabit honores.
Hoc opus, hoc studium documenta expressa colore
Discere ab effigie, quod si non omnia muto
Ore docere queat, Tu Furstenberge docebis,
Et tua nos aliquid conspecta juvabit imago.

FRIDERICI HÖNINGI,

Arensbergensis, Canonici Præmon-
stratensis, Propempticon.

A. D.

FERDINANDUM FURSTENBERGIUM,

*Canonicum Paderbornensem & Hildesensem, Ro-
mam proficiscentem, AN. M. DC. LII.*

E Xue magnanimum curis, generose viator,
Pectus, & ad sanctam tutum proficiscere Romam
Lætus iter; quod mira vocant spectacula rerum,
Seu quæ prisca dedit, seu quæ nova parturit ætas;
Nec minus antiqui species augusta senatus
Allicit, & magni præsens facundia CHIST,
Qui vel ab Angariæ longinquis finibus unus
Sufficit, ut visisse velis; ubi fama perennat
Illius, & quasunque abiens peragravit Athenas,
CHISIA perpetuos virtus exhalat odores,
Atque tuos urget sua per vestigia gressus.

Ingratâ tardare morâ natalis euntem

Hinc metuit dulcedo soli, lacrymæque Tuorum.
Non illi jam limen habent, non colla fatigant,
Sed tantum faciles optant ad carbasa ventos.

Nam non è patriis mœstus regionibus exul,
Vel peregrinus abis ad inhospita litora Ponti;
Est notum, quâ tendis, iter; Roma, altera nobis
Patria, quæ firmis junxit sibi nexibus orbem,

Humanumque genus communi nomine Cives
Dixit, & his longè grenium venientibus offert;
Præcipuè si quem Germania mittit alumnum;
Imperii quoniam Romani servat honorem.

Illa domi neglecta bonis Urbs gaudia magnis
Pensabit, nec parvâ feres solatia fratrum.

Dum sincera pios probitas augebit amicos,
Atque imitatrices cognati sanguinis artes.

Quare nec timidum vano terrore repellant
Et varii casus, & tot discrimina rerum,

Queis Anchisiades terris jactatus & alto
Ausonii tandem superavit litora regni.

Digna per ingentes adverso tramite rupes
Et fluctus est Roma peti; sic itur ad Urbem,
Quâ nihil in terris complectitur altius æther.

Te verò melior fors Ferdinande manebit,
Qui Phrygium pietate ducem sanctissimus Heros

Vincis, & ut nullam meruisti Numinis iram,
Sic armis potiorque fide continget Acharces,

Et toto ætherei securos agmine passus
Præcurrent volueres, quorum vectricibus alis

Ire per immensos tractus terræque polique,
Et vasti spatia ampla maris, plus Herculis ultra

Hesperias metas, & jam non ultima Thules
Regna licet, duratque eadem constantia vultus

Impavidi, quamvis irato percitus Euro
Æstuet, & tumidos extollat ad æthera fluctus

Adria, vicinæ celsis aut nubibus Alpes
Involvant dubiâ trepidos vertigine sensus.

Si latus Aligeræ tantum custodia turmæ
Munit, Achilleo stat quivis tutior ære,

Et videt immoto, vanæ formidinis expers,

Lumine prærupta valles de caute profundas.

Frustra tum vasto laxat rex Æolus antro
Armatas hyemes, frustra mare turbine perflant
Tyrrenum irati fratres: fragor occidit omnis,
Irritaque in vanos abeunt conamina ventos.

Unde sed hic animus Geniis cœlestibus, unde
Par animo virtus, & qualis causa clientem,
Quis favor astrorum tantam sperare salutem
Nunc jubeat, frustra vatem prohibente Minerva,
Dicere me Charites urgent. Vos, ille remotum
Dum disponit iter, quibus est tutela per omnem
Parnassum, & puro torrentes flumine rivos,
Bellerophonteo mecum præcurrite campo
Cælicolæ, vestrosque bibant mea guttura fontes.

At Tu cui merito, quantum adjutoribus istis.
Ingenium, & totis utens industria nervis
Assœquitur, nondumquæ tamen respondet amor,
Aut minimas vario solvit pro munere grates,
Impensum Fernande fero, pars maxima nostri
Et decus eximium studii, concede labori
Vel veniam, dexter mihi vel tuus adsit Apollo,
A quo docta tuæ manant exordia laudis,
Et claram antiquis famam natalibus addunt.

Nam velut illustri Majorum sanguine constat
Integra Nobilitas, raroque exurgere virtus
Ad sublime solet generosi culmen honoris
Auspiciis evecta suis; ut equestribus hastis
Jura novum prohibent hominem decurrere ludi
Teutonici, nec sacra patent subsellia cœtus,
Ex quo deligitur sceptroque pedoque verendus
Antistes Princeps; idemque nec omnibus aulæ
Utilis officiis, quamvis sollertia summas

Intendat vires, si non respondet origo
 Ducta per Assaracos, & avos, atavosque, patresque,
 Et proavos, simili nupsit queis femina stirpe.

Si sic Phœbeâ nascuntur origine vates,
 Et frustra leges, præceptaque docta palæstra
 Pegaseæ erudiunt, quem non genuere Camœnæ,
 Entheaque à cunis cui non est insita virtus,
 Et mox Aönio caluerunt sanguine venæ:
 Lis tua præcipuos circum cunabula Montes
 Exercet, tanti maneat quem gloria partus!
 Vendicat inde suum nativo jure Nepotem
 Asscribitque solo mons Furstenbergius alto;
 Mons quem non renuat summis ex montibus unum
 Roma Palatinos juxta consistere colles,
 OLDENBURGIACO (Wedekindum agnoscit aviti
 Stemmatis auctorem) tanquam de sanguine cretum,
 Ut tantæ documenta probant certissima stirpis,
 In rubris eadem signata emblemata scutis,
 Et locus ANTIQUI dictus de nomine CASTRI,
 Augustosque lares ingenti limite monstrans,
 Quos Princeps non una manus communibus armis
 Quando ruit; subito fato meliøre resurgens
 Mons non indecori sedem de clade notavit,
 Et primum in censu nomen descripsit equestri;
 Nec Procerum quis se, niteat licet ære vetusto,
 Westphalæque antiquas ostendant atria ceras,
 Esse parem jactat: nam Mons subsellia Princeps
 Summa tenet; de jure licet certare secundo.
 Non tot Grajugenas Trojanus ad ardua natos
 Instar montis equus latebrosâ effudit ab alvo,
 Quot quantosque suæ Patriæ fecunda saluti
 Ex hoc Nobilitas Heroas monte creavit,

Et nondum fessa auspiciis felicibus edit:
 Nescit enim mutare vices, sed fixus in omnes
 Cognatos procedit honos, & pulchrius orta
 Posteritate viget semper, prolemque sequuntur
 Fata parem stabili servantia lege tenorem.

Non tamen hinc minus in partum sibi juris eundem
 Vindicat, & specimen deprendit in indole doctâ
 Musa sui generis, quam primo in limine vitæ
 Nutrix Cyrrha fovet, collisque biverticis alta
 Inter Apollineas pepererunt culmina lauros,
 Enthea non alios novit natura Penates,
 Et genium cum luce dedit; cognata Poësis
 Excepit viridi venerabile pignus in herba,
 Lustravitque sacros radiis felicibus ortus
 Phœbus, & in media posuit testudine cunas.
 Te nascente iugo rupes Heliconia toto
 Intremuit, motuque suæ nova gaudia sylvæ
 Aœnius testatus apex, nec largius unquam
 Sacra Caballino manarunt flumina fonte.

Omina quæ ne vana putes, certissima rerum
 Argumenta fidem faciunt: tam fervidus ardet
 Quisquis enim agnatas Musas, nec segnior artem
 Naturæ ingenuam junxit, supraque minores
 Multùm instans annos non inficianda Camœnæ
 Carmina Pindaricæ ingenii vi præcocis edit;
 Nec carum seponit opus, divortia quamvis
 Abripiunt studiorum aliò, curisque quietem
 Miscere, & lusus fortuna indulget inertes.
 Quisquis is, hunc Helicon germanum agnoscit alumnum.

Si decet, ut gentis titulos monstrare vetustos
 Mos jubet, ad cunas versusque accedere testes
 Pierii generis, quorum indubitabile stemma;

Florida post nati Phœbi cunabula, nulli
 Tam læto Afræi plauserunt murmure cœtus.
 Tota tibi ingresso Clarium, Fernande, theatrum
 Ardua primorum assurgunt subsellia vatum,
 Et certant præbere locum, frontique merenti
 Laureæ concordî decernunt præmia voto.

Talia ne nostræ temerent encomia laudum
 Aônides, juvat illa suis depromere verbis,
 Et lassæ interea vires concedere linguæ:
 Restat enim pars longa viæ, magnum æquor arandum
 Virtutum; vix Musa ratem de litore solvit,
 Si spirent tantæ cursuram lætius auræ.

Hinc tua cum Boïus legisset carmina Flaccus,
 Balde pater vatum, Suadæque medulla disertæ,
 Quis novus, exclamat, tenerorum lusor amorum
 Angarico, vel Sulmo tuo de fonte resurgit?
 Quicquid Callimachi, Galli, dulcisque Tibulli
 Manat adhuc, missi sunt pleni hoc ne stare versus;
 Et nisi jam tilix starem radice profunda
 Firmior, ad suavés earum sequar, Orpheæ cantus.

Heinsius inde tui Peligno à vate secundus
 Post elegos visos majori exarsit amore;
 Quodque prius non fis, lugens ait, agnitus usu;
 Ut meus es primus descriptus pectoris albo;
 Sic decuit noster fierent tui carmina partus
 Inter adoptivos princeps, Fernande, legendus.
 Si quid & Heinsiacæ poterant præstare Camœnæ,
 Te Java, te Brasili, Ganges loqueretur & Indus
 Dia Sophocleo tua carmina digna cothurno.:

Allabi potuit Bartholde optatio aures
 An vox ulla tuas? illum qui pectore nunquam
 Seponis, sed ubique pio fers ore manuque.

Te postquam vidēre novas auctore Camœnas
 Vossius, Ingelius, nec tantum nomen Amandus ;
 Accumulant plausus, & candida corda fatentur,
 Quod non ingenii decoret laus sola Batavos,
 Et ne præripiat metuunt Germania palmam,
 Si quondam plenis spes tanta adoleverit annis.

Illo Chisiades bellantis maximus orbis
 Tempore Westphalicâ degebat in urbe sequester,
 Ut pacem terris & redderet otia Musis.
 Hunc etiam decuit nostram componere litem ;
 Jam Furstenbergæ à claris Majoribus ortæ
 Noverat illustrem stirpem, dignamque putarat,
 Chisiaci cujus legerentur nomine versus.
 Illa tuo stimulos sub pectore gloria fratris
 Fixit, ut egressus montem, vicinaque cogens
 Montibus, auderes primis celebrare vetustæ
 Carminibus quercus frondosa cacumina, quali
 Insigni sublime refert gens Chisia robur,
 Aptum opus heroo plectro, magnique mereri
 Chisiadæ studium, & veteris suffragia laudis :
 Quod tanquam Princeps ducas bullata juventæ
 Agmina Teutonicæ, quâ convenit ire per artes,
 Et se nobilibus præstare parentibus æquum.

Ergo certa tuæ, tanto sub iudice, vatum
 Cui chorus assentit, Fernande, propaginis author
 Est tam Parnassis, quam Furstenbergia mater.
 Rectius agnoscis, sacrisque amplexibus ambas
 Stringis amans, geminasque, decus mirabile, cunas
 Defendis : nec enim res hæc contraria vero.
 Aöniis Helicon postquam migravit ab oris,
 Et montem Musæ, lauri, fontesque sequuti,
 Delegere novos in Principe monte Penates ;

Et quos immensum spatium diviserat ante,
 In montem arcanis coierunt nexibus unum,
 Qui nihil antiquo generis de culmine perdens
 Crevit, & imposito contingit vertice cælum.

Illa quidem Aligeris non averſanda Patronis
 Ornamenta, piâ quorum linguaque manuque
 Unum opus æterni laudes celebrare Tonantis.
 At ſi ſancta magis divinæ inſignia ſtirpis,
 Virgineique juvat propior cognatio vultus;
 Non minus in caſto fulgent decora iſta cliente:
 Nam trabe de geminâ, quâ conſtat gloria gentis,
 Altius in ſuperas virtus enititur auras.

Ipſe autem genus & proavos, quæque edidit alter,
 Vix ſe digna putat; ſua ſed non maxima laudum
 Sunt ſtudia, & quicquid claris Heroibus aptum
 Diſcere; Romulæ laurus Parnaffia palmæ,
 Et ſibi cæleſtis, dat palmam gratia Muſæ.

Hæc illum, Aligeri, veſtro generique choroque
 Inſeruit; veſtri ſimilis latet integer imo
 Pectore, nec dubiis erecti promicat oris
 Angelus indiſciis, votis concordibus omne
 Quicquid amatis amans, vobisque inviſa perofus:

Talibus ornari titulis Heroa decebat,
 Et propiore gradu virtutum attingere cælum
 Debuit, Argolicæ lectiſſima robora pubis
 Sanguine, virgineo Veſtam ſuperare pudore,
 Quamque fuit juris Naſica tenacior eſſe,
 Quem Procerum Paderæ, quibus eſt jus ſacra tuendi,
 Nobile concilium, cæleſti munere dignum
 Cenſuit, ut dominâ deponat in urbe Libori
 Præfulis oſſa pii, Phryxæo opulentiùs aurum
 Vellere, & antiquo regni durabilis omnen

Certius Ancili, Phrygioque potentius angue
Antidoton contra pestis lethale venenum:
Vidit id, & gratâ celebrat Mimigrodia voce,
Quæ quo servavit venerabile tempore corpus,
Libera ab assuetis morbis, intactaque bello
Virgo per Europam peperit celeberrima pacem;
Sed bello gravior pacem jactura secuta est,
Et dolet, amisso spolio seu divite Colchis;
Cum pia depositos artus Padiborna recepit;
Exilit hæc contrâ, & palmas ad sidera tollit
Palladio recreata suo, Martisque frementis
Infaustas oblita vices, meliore nitentes
Sperat sole dies, quales sub Principe nuper
Furstenbergiaco fulsisse recogitat annos,
Sæcula primævo fluerent cum fusa metallo.
Sic tutelaræ spondet præsentia Divi,
Et novus optato Theodorus nomine Præsul,
Sollicitus magni cultus augere Patroni,
Atque suis titulis Patriæ conjungere Patrem:

Tu quoque quæ tanto ditabere Roma monili,
Sunt tibi quantumvis plenissima templa beatis
Exuviis; nec habent numeri sacra lipsana finem,
Gaudebis tamen, & vincentem pondera gemmam
Exiguam æterno reverens dignabere cultu,
Cujus opem medicam cum crebro fenserat usu
Purpurei decus eximium Carassa senatus,
Quique illi meritis par est ostroque Latino
CHISIUS, & populus latè antiquissimus Umbri:
Non alibi illius magis est memorabile nomen,
Non alii cultum Proceres ardentius urgent.
Hic miranda cliens ne nesciat acta Patroni,
Jussit ut Advaticis expressa decentius orbem

Vita typis vastum, Bollando auctore, peragret :
 Ille autem æternâ grandem molitus in urbe
 Ex Pario saxo impensis regalibus aram,
 Ut cineres optat decorent sacraria veri.
 Quos, Fernandæ, ferens ex donatoribus unus,
 Atque tuum faciens donum commune ferendo,
 Non tibi pro tanto deerit par gratia facto,
 Collegisque tuis; & sanctum quisquis adorat
 Munus; erunt illi digni novâ præmia cultus,
 Plena relaxatâ noxâ indulgentia pœnæ.
 Atque adeò multum ad Diyi jungetur honores,
 Marmore cui primùm depicto altaria surgunt,
 Ardua mox simili sub nomine templa sequentur.
 In quibus assiduis Panchæi urentur odores
 Ignibus, & noctem vincent laquearibus auréis
 Pendentes lychni, vixque atria vasta tabellis
 Sufficient, voti quas compos Roma dicabit.

Sive igitur, sancti Aligeri, vos pignoris hujus
 Tangit honos; cari seu provida cura clientis,
 Tantos ille rogat non uno jure favores,
 Et meruit, quasunque sacer lustraverit oras
 Hospes, ut occurrat custodia fida locorum
 In varias divisa acies; pars prævolet una,
 Ostendens iter incertum, turma altera tergum
 Muniat aversum, numero præstantius agmen
 Cingat utrumque latus; procedentemque secundis
 Auspiciis ducat; donec qui præsidet arci
 Romulæ Michaël, det tutam figete sedem;
 Jamque satis Latiis imbutum moribus, oris
 Incolumem patriis simili sub lege remittat:
 Namque is fidereo plenissimus agmine trames.

Cum tamidæ Babylonis erat sanabile quondam

Vulnus, & Eoæ terræ promissa nepoti
Venturo veteres habitu tenuère parentes
Arva peregrino, nondumque immota maneret
Sedes, sed dubios mutarent vela penates
Per crebras mutata vices, coluistis eosdem,
Accèstisque viæ comites; per proxima Bethel
Rura, ubi laxatis patuerunt sidera valvis,
Scalaque subjectam descendens attigit imis
Tellurem pedibus, per quam longo ordine visi
Continuò vacuas placati ad Numinis aures
Ferre preces hominum, moxque illis dona referre:
Hîc vos excepit numerosi seminis auctor
Hospitio, & comes in tenebras abeuntibus ivit
Obscuræ noctis, metuens hîc fratris ob iram
Offensi sibi, vestra, quibus custodia Idumes
Tradita, conspexit denso castra obvia Jacob
Agmine, & ancipites dimisit pectore curas.

Improba sed postquam sanctis genitoribus ætas
Successit, Patrumque scelus vicere nepotes;
Et tot victa malis vesana à gente recessit
Alma Fides, Pietasque comes, migrastis & ipsi
Quæsistisque novas sedes, ubi temperat orbem
Urbs septemgeminos tollens ad sidera montes,
Omnibus imperium sacrum quam gentibus esse
Omnipotens genitor jam tum tenditque fovetque,
Exiguus regnum cum finibus orta tetendit
In geminos axes, parvaque à sede profecta
Disperfit claro Phœbi cum lumine fascēs.
Ut peterent illinc divina orâcla profanis
Legibus assucti, emisit quos Roma colonos,
Aut scripsit socios, aut victos durius urfit.
Hi dum sancta Petri tendunt ad limina gressum,

Non

Non illis summa custos de rupe vocatur
Pan ovium, ductorque viæ Cyllenius ales;
Sed magis æthereos aulae stellantis alumnos
Per pia vota rogant comites, qui certa dedistis
Signa per Ausoniam stabiles fixisse penates:
Nam non Aligeros inter tam maxime Princeps
Palmifero sparsum, Michael, Samaritida colle,
Aut quæ rura Thabor latè sublimis opacat,
Ardua quàm tibi conspicuus Gargana sacraſti.

Sic tua quantumvis, Gabriel, non vidimus ora,
Est tamen haud obscura fides defendere fines
Præſentem Italiæ, cingit quos Laureæ ſylva.
Te decet hic locus in toto ſanctiſſimus orbe;
Ad quem fidereas venit delata per alas
Illa domus, non ampla quidem, nec marmore ſplendens,
Sed quæ de fulvis conſtructa palatia tignis
Vincit, & immenſo poterit contendere cælo,
Si decus exiguis famamque dat incola tectis.
Hic nam Virgo parens intactâ Numen in alvo
Concepit, geſſitque pios ſine ſemine partus;
Cum nova Jeſſeæ tuleras mandata puellæ.
Inde tuæ fidei cuſtodia credita manſit
Si laris, & ſecreta patent penetralia caſtis,
Quos procul extremo venientes obvius orbe,
Excipis arcanis adytis, vix purior illo
Advena fidereum meruit contingere limen.

Non te certa tenet ſtatio primoribus unum
De ſeptem Aligeris, Raphaël, ſed permeat omne
Indeſſus iter cælique ſolique, nec ullum
Humani gentis obſequi ſubterfugit ardor.
Jam peregrinanti ſimilis perâque decorus
Te baculo inſtructum comitem poſcentibus addis,

Mox cæli convexa petis fulgentibus alis,
 Quò propiora vocant supremi tecta Tonantis,
 Atque amor, & liquidis flagrans alit ignibus aura.
 Quare ades, & sacros gressus in limine primo
 Excipe Fernandum è patria proferre parantem,
 Natalique novum columen devinctus Achatì
 Cinge aliud latus, & renoves miracula prisca.

Nam tantos cæli si quis sperare favores
 Ausus adhuc, si quem tulerunt hæc sæcla Tobiam,
 Alter hic est, primo similis sic moribus, albi
 Excludunt ovis velut ova simillima cygni.
 Certa Patris sancti soboles, quem nostra Catoni
 Opposuit similem vitiis grassantibus ætas,
 Et dedit illustre exemplum, rectissima claræ
 Quem debet servare modum Pædia juventæ.
 Illi juncta fuit thalamis par omnia conjux
 Nobilibus, meritò numeranda Heroidas inter;
 Cujus thesauros si quis spectare cupisset,
 Ostensura foret non gemmas illa, nec auri
 Pondera, sed sacrâ reduces è gymnade Gracchos;
 Qui melior gazas census supereminet omnes.
 Omnis in Ascaniis amborum cura parentum
 Stabat, ut imbuerent monitis, animosque timore
 Numinis armarent, teneram ne crimine mentem
 Fœdarent ullo, socios & labe notatos
 Effugerent, quoniam fallax latet anguis in herbâ.

Atque utinam meritis longævâ excedere vitâ
 Nestorei metas ævi, mortalia nondum
 Mors illis cæcâ clausisset lumina nocte!
 Quanta darent documenta viæ, quantisque ferirent
 Æthereos orbis precibus, præberet egenis
 Quantam dextra stipem duos miserata labores!

Digna

Digna foret pietas quæ per Te tectâ subire
 Aulæ fidereæ, folioque adstare Tonantis,
 Et cælo Aligerum comitem deducere proli,
 Quam velut ad solos nutus & iussa paratam
 Surgere, flagranti complectebantur amore.

Sed licet his placidâ compositum pace quiescat
 Corpus, vivit adhuc, & cæli vescitur aurâ
 Pars melior, sanctosque polum colit inter ephēbos
 Spiritus, unde videns manifesto lumine terram,
 Fataque natorum curans, præsentibus orat
 Haud precibus tantum ductorem ex æthere mitti;
 Sed simul exuviis carnis tardantibus expers
 Gaudet celsa piæ comitari ad mœnia Romæ,
 Quò non ire jubet rutilantis syngraphus auri,
 Vel mortalis Hymen, qualis cum causa Tobiam
 Impulit è patrio peregrinum abscedere vultu,
 Ille tamen tanti nactus moderamen Achatis,
 Qui duras mollire vias, caroque nocentem
 Ardorem capiti depellere visus, & imbres
 Nubibus urgentes gravidis suspendere, quamvis
 Obscurum pluviis cælum maduisset ab Austris,
 Qui iussit vasto minitantem gutture piscem
 Extrahere, & jecoris fibras servare potentes
 Vincere terrificis errantia spectra figuris,
 Felque tenebrosis lucem reparare nitentem
 Luminibus validum, ac amissos reddere soles:
 Rettulit ille idem Gabelo credita gazæ
 Pondera fulgentis, nec primâ nocte maritas
 Illum permisit tædas mutare cupresso.
 Tum ne longa magis lassaret vota parentum,
 Incolumem tandem mœstas deduxit ad ædes,
 Magnaque sollicitæ portavit gaudia matri.

Ille autem subito liquidas abscellit in auras;
Et rursus cæli stellantia templa petivit.
Inde tot hunc nostrum vicibus rediturus in orbem
Ire volet quoties referens virtute Tobiam.

Ergo tibi tantum comitem sperare licebit,
Cujus ab illustri cessit procul indole lucri
Fulvi sacra fames, nec toto explebilis Hermon
Argenti sitis, aut luxus, & inanis honoris
Ambitiosus amor; quærun't qui talia; fallax
His merito insidians natura instraverit æquor,
Quodque parant sit ventorum, nullæque senescant
His puppes, medio nec sit fiducia portu.
At meliora viæ sanctæ sint omnia, suasit
Quam pietas, justumque animi ditescere veris
Propositum gazis: non hæc nova causa Latinum
Urget iter, secum junctas virtutibus artes
Ex Capitolino in patriam deducere clivo,
Unde pii quondam intulerant hæc munera Patres
Angariæ: superest nam Saxea nomine prisco
Clarus in Urbe locus; non hoc prærupta dederunt
Saxa, sed à nostris venientes Saxones oris,
Quos frustra sperans sanctæ submittere legi
Par titulo magno Carolus, secreta Tafaræ
Quàm simulacra diu, & nigra formidine lucos,
Cæteraque aspicerent irritamenta vetusti
Erroris, veteres aliò migrare colonos
Jussit, ubi culti vestigia nulla manebant
Mavortis; tum magna pio ductoribus usa
Haud dubie Aligeris pars ivit tramite Romam,
Nec velut externis vixit regionibus hospes,
Nacta scholâ rectisque locum, & civilia jura.

Quam fuit his, patruisque tuis & fratribus æqua,

Tam

Tam via, tam longi facilem se meta laboris
 Roma tibi exhibeat, nihil illuc obstat eunti,
 Non mare, non tellus, celsoque minantia cælo
 Culmina, non tortæ sævi vertigine fluctus;
 Quæ vehit, in navem volucrem sit nulla potestas
 Imbriferis Austris, placidus sed militet æther,
 Et spiret tepidi clementior aura Favoni;
 Te metuant avidi, soboles Neptunia, pisces,
 Et rabidæ terrere feræ, in frondentibus alter
 Sis Orpheus sylvis, inter Delphinas Arion.

Non est à Stygiis ea pax speranda procellis;
 Hic tuus inprimis quare contrarius hosti
 Communi vigilet Mars, ales Magnæ, ligetque
 Semotum procul à terris, connubia turbet
 Ne Venus, aut turpi luxu comitata Voluptas,
 Hos fugit ingenui non una clade pudoris
 Infames scopulos; mellori posthabet illam
 Consilio, fecitque fidem servare per omnem
 Ætatem casti decus inviolabile floris.

Laus sua conjugio quondam, nec cognitus orbi
 Virginitatis honor, cum deforet incola vasto
 Terrarum spatîo, & legi mensura vetustæ
 Ultima, quam natus casta de Virgine Virgo
 Attulit, & studio complendi accensus Olympi
 Vefanos thalami decrescere jussit amores.

Inde sibi, melior quorum sententia sedit
 Mentibus, è cælo divinas querere Nymphas
 Illustres cœpère animæ, nec coeduit illas
 Desuper in castos animosque manusque venire,
 Candida felici genituras nomina partu,
 Queis neque dilectam prolem Sipyleia mater
 Præferat, aut duram moveat Latonia litem.

Ex his, quæ formâ pulcherrima, Theiosophiam
Immenfis dotatam opibus, nec stirpe minorem,
Connubio junget stabili, propriamque dicabit,
Castaque cælestis paranymphus in oscula mittet,
Omnes ut tecum felices exigat annos.

Fortunate nimis; non si Lavinia tædas
Clara tuas optet, generum Thetis omnibus undis
Aut emat, æthereis unquam mutabis amores.

Interea simul innumeris rebusque locisque
Sufficiens virtute citâ, dum perdius hæres
Aliger illustris lateri pernoxque clientis,
Si, quibus incolumem votis exposco Patronum
Servari, tua dent vires suffragia, nostris
Quæ precibus defunt, faciles & Numinis aures.
Qualis ut abscedit (votorum hæc summa meorum)
Urbibus Ausoniæ visis populisque revertat
Integer à vitis, animum virtutibus auctus,
Artibus ingenium, varioque exercitus usu;
Et postquam his studiis processit longius ætas,
Non ultra privata fluat, nec clausa teneri
Mens excelsa domo possit, sed publica quærat
Consiliis Patriæ ipsius requiescere moles:
Perque gradus summi teneat fastigia honoris;
Haud tamen illâ mens extinguant sidera magnâ
Lumine scintillas, lucis vix nomine dignas,
Qui licet ingenii sim dotibus omnibus impar,
At præstare fidem sinceraque corda paratus.
Sic ubi Teutonicis frondosa cacumina silvis
Explicuere comas, arbuscula tenuia quercus
Stant inter, cernique in iisdem montibus audent,

EJUSDEM

AD EUNDEM

Elegia.

FAs generose tuum fuerat, Fernandè, clientem
 Gaudia Pieriis significare modis,
 Qualia Romanam felix adventus in urbem
 Cæteraque adventu non leviora ferunt :
 Sed sensi tecum Angaricas abiisse Camœnas,
 Namque sequi Phœbum debuit ille chorus,
 Me verò Alpinis divisa absentia saxi
 Sollicito vacuum non finit esse metu.
 Ille meas rigidâ strinxit torpedine venas,
 Et fluere è sicco carmina fonte vetat.
 Si tua successu simili vestigia vertis,
 Quàm cupio hoc spatium temporis esse breve !
 Cumque suo Phœbo redeunt, quæ nobile cingunt
 Obsequio stabili Numina docta latus.
 Tunc aberunt omnes curæ, chartasque Patrono
 Carminibus plenas obvia Musa feret.

EJUSDEM

V. Q. T. A.

*Pro incolumitate FERDINANDI Episcopi &
 Principis Paderbornensis Kal. Januarii.
 An. M. DC. LXVII.*

OMnia tempus habent : rectè, Celsissime Princeps,
 Tempori agit quisquis convenienter, agit.

Quæ modò Memnonio procedit ab æquore, & annum

Prima novum faustis inchoat auspiciis ;

Hæc est illa dies, quâ munere, carmine, votis

Te decus ut venerer præsidiumque meum,

Non tantùm officiis lux debita talibus urget,

Non mos in toto qui vetus orbe viget :

Sunt quæ me propiùs tangunt ; sunt, inclyte Princeps,

Cuncta mea ingenti nixa favore tuo.

Sed facilè ignoscas Mæcenas unice, nullo

Tot tua quantumvis munere dona colam.

Munera nulla mihi, non aurum, aurique cupido,

Quam, vitæ & studiis quod satis est, satiat.

Te quoque, quod non est dubium felicius esse,

Sumere non æquè, quàm dare dona juvat.

Spes minor est veniæ, vix excusabile crimen,

Carmine me nomen non celebrare tuum.

Aut memorem saltem meritorum ostendere mentem,

Digna quibus reddi gratia nulla potest.

Carmina jure fero : quia cultu carmine facto

Vix est Principibus res magis apta viris,

Qui celsum magnis munus virtutibus ornant,

Et quia digna gerunt carmine, carmen amant.

Vel quos Pieriis, qualis rarissima phœnix,

Delectat studiis excolere ingenium,

Quâque regunt, quando permittit cura regendi,

Non dedignantur tangere plectra manu.

Non solum ut Princeps carmen, Fernande, mereris,

Non solâ illustis nobilitate domus ;

Non animi solis virtutibus, indole, factis,

Quois genus, & summos condecoras titulos.

Sunt Mæcenati, sunt debita carmina vati,

Carminis & vatum carmine dignus amor ;

Si mihi majores essent in carmina vires;
 Aut non tam parcè potæ Heliconis aquæ,
 Non alium quàm te celebrarem; pagina nostris
 In libris sine te nulla legenda foret:
 Sed premit audentem gravitas & copia rerum,
 Nec possum cœpti pondera ferre mei;
 Sola igitur quoniam bona verba & vota supersunt
 His sine nulla mihi prætereunda dies;
 Incolumi lætus, quò non est carior alter,
 Ut ter Alexandro septimus annus eat:
 Et redeat toties semper felicior; æquent
 Nestoreos donec prospera fati dies.
 Tum plenum meritis ætas sine fine beatum
 Septima, quæ cœlo transigitur, faciat.
 Hæc desiderii, votorum hæc summa meorum;
 Metaque, quæ dextris non caret ominibus.
 Nam cujus reparas, & splendida condis honori
 Tempa, Deus vacuas non sinet esse preces.

GUILIELMUS HESIUS

E SOCIETATE JESU

A D

FERDINANDUM FURSTENBERGIUM

ALEXANDRI VII. P. O. M. *cubicularium*
intimum; cum ab illo Sanctitatis sue effigiem
nummo expressam accepisset.

N Omen Alexandri, sanctosque in imagine vultus
 Nuncius æternâ missus ab Urbe tulit.

Hoc tulit ille mihi munus, nil tale merenti :

Testor me pavidas tunc habuisse manus.

Hoc munus, Fernande, tuum est; hunc solvis honorem

Vatibus, hæc illos præmia ferre jubes.

Quos inter cum me numeras, ultroque salutas,

Non puto te Musas consuluisse tuas.

Nec tuâ, quam veneror, me sic deludit amantem

Gratia, ut hoc munus me meruisse putem.

Non mereor. Sed habet mens hoc generosa, favore

Ut quos non dignos invenit, esse velit.

Esse velim certè. Testor violabile nunquam

Pignus amicitiae quod cupis esse tuæ.

Non ego, Lethæi biberem si fluminis undas,

Excidere hanc credam pectore posse meo.

Scilicet ipse mei memor illa merentis Amici

Deditus obsequiis semper amantis ero.

Quid loquor? Exiguum est quidquid promittere possum,

Promissis quivis dives ut esse queat.

Sed tacuisse nefas ; urgent data dona ; jubentque

Sanctus ALEXANDRI vultus, & ora loqui.

Quis decor est illis ! ut puro fusa metallo

Divinae speciem simplicitatis habent.

Argenti lucem lux altera vincit, & auget,

Quâ neque Luna suo plena decore micat.

Non ego nunc illam, sit quamquam argentea tota,

Abditus obscurâ nocte videre velim.

Plus lucis, dum nox operit caliginē terras,

Nummus, at è vultu quem gerit ipse, dabit.

Heu ! nox alta meos premit & longissima Belgas,

Quam belli nubes tetra, minansque facit :

Nec spectare diem datur, aut sperare propinquum :

Noctem hanc solari Cynthia nulla potest,

Ille pii Patris spondet solatia vultus,
 Illum oculo gratae lucis amante sequor.

Quæque darem pedibus, sed nūtimus non habet illos;
 Audeo sacratis oscula ferre genis,

Et, quantum patitur summæ reverentia frontis,
 Unum hoc, cum gemitu verba morante, loqui:

O Pater! si quid natorum vota tuorum,
 Et tua pro natis cura laborque potest;

Da Pacem: Tua sensa Tibi, tua verba remitto,
 Et quæ Tu superis, hæc Tibi vota sero:

Vota movent superos: Et Te tua vota movebunt:
 Cum superis eadem Tu quoque regna tenes.

Vota movent, scio, Te: quia magnum est pondus in illis.
 Pax Tibi, plus aliis, pro dolor! arma placent.

Arma placent aliis, nobis eadem arma minantur:
 Præsidium in tantis Tu potes esse malis.

Utque potes, sic esse voles: complecteris omnes:
 Communem Te scis omnibus esse Patrem.

Percipis, & nostros sentis, tua vulnera, casus;
 Plusque etiam quàm nos, quod patiaris, habes.

Scimus; & hic animus vultu se prodit in illo,
 Quò toties Paci templa dicata subis.

Invideo tibi Roma; tibi namque illa tueri
 Ora, decus mundi delictumque, datur:

Ora, tibi Pacem, Pacisque precantia mores,
 Cum pro te supplex vota, precesque facit.

Et frueris voti pretio. Nos sola, tot enses
 Inter, adorandæ frontis imago juvat.

Et quantum tamen illa juvat! Si, qui dedit illam,
 Spirantes vultus cerneré, & ora daret,

Et pia sacratis daret oscula figere plantis;
 Quale animo robur surgeret inde meo!

O cupiam, Fernande, licet bis sena propinquent
 Lustra mihi, ignotam solus inire viam,
 Solus & Alpinas ascensu vincere rupes,
 Solus & irato ducere vela mari.
 Quæ mare, quæ tellus, quæcunque pericula cælum
 Objiceret, finis vinceret illa via,
 Finis ALEXANDER, Quem per Te temere tantum
 Si liceat, majus nil dare Romapoteſt.

HENRICUS BONNINGHUSEN

Westphalus

E SOCIETATE JESU

DE VILLA COLLINA,

*Inquam animi causâ FERDINANDUS Episcopus
 & Princeps Paderbornensis secessit,
 mensibus æstivis An. 1668.*

O Sennæ decus, ô beata villa!
 Villa an diceris, an vocaris aula?
 Villa es rustica villico incolente:
 Dum Princeps habitat, vocaris Aula.
 Non tu marmoreis quidem columnis
 Celsam porrigis inter astra frontem:
 Ornatum domui dat inquilinus:
 Ex illo pretium, decusque ducis.
 At ne te pudeat velim, quod ipsa
 Tecto sis humili, nec eleganti,
 Dum Celsissimus hospes est; superbam
 Magni nominis æmularis arcem.

Non

Non alto aggere valla te coronant,
 Quæ lentis aqua fluctibus flagellet:
 Non fulgentibus hinc & hinc sarissis
 Stipat Martia militum catervæ:
 Tamen te foveis aquisque cinctam
 Pons versatilis undequaque munit.
 Es sedes Charitum, domus Voluptæ:
 Junctæ hic Naiadibus leves Napææ.
 Quam gratâ undique frondium coronâ
 Verrit sidera quercuum theatrum?
 Quali murmure mutuis vicissim
 Hic pinus sociam comis salutat?
 Hinc densum nemus, æquor inde Sennæ,
 Et sylvestria pinum vireta.
 Oblectant studio levis Dianæ.
 Hic Princeps procul aulico tumultu,
 A curis vacuum laboribusque
 Tranquillâ recreat quiete mentem.
 Non hic auribus obstreperunt clientes,
 Caesarumque forensium patroni;
 Non clangor litui, tubæque plausus.
 Non hic nobilitum, Ducumque cœtus,
 Non fulgens famulâ cohorte pompa,
 Raptos dissipat abstrahitque sensus.
 O villa inclyta! digna nominari
 Phœbi & Pieridum domus sororum!
 O felix nimis, ô beata villa!
 Felix Principis hospitantis aula!
 Curæ hic longius exulent, nec ullos
 Admittas, precor, Hospitis dolores.
 Illi dum placitam dabis quietem,
 Debemus Tibi Patriæ salutem.

HORTENSIUS MAURUS

VERONENSIS

A D

F E R D I N A N D U M

*Episcopum & Principem Paderbornensem de
acidula Smechtana, seu fonte Mel-
lito. An. M. DC. LXVIIII.*

A Urea dum primæ coluerunt sæcula gentes;
Ambrosias populis mella dedere dapes;

Aëriæ quercus fudarunt roscida mella,

Mel fuit in foliis, mel fuit inter aquas.

Te quoque, qui reddis nobis ea tempora, Princeps

Inclyte, non miror mellis amore capi.

Cum Tu sis verè mirā dulcedine morum,

Melleus ingenio, melleus eloquio,

Par est, ut fontes ipsi Tibi mella propinent,

Ut Tibi mellitas terra ministret aquas.

J A.

JACOBUS LIBENUS

E SOCIETATE JESU

AD FERDINANDUM

LIB. BARONEM DE FURSTENBERG,

ALEXANDRI VII.

PONT. OPT. MAX.

CUBICULARIUM INTIMUM, &c.

De morte Natalis Rondinini.

LUgete vates, tuque magnorum arbiter
 Facunde vatum, funebrem lessum præi,
 Positaque lauro, fronde ferali caput,
 Fernande, cinge : causa lugendi gravis.
 Heu ! Rondininus, ille Musarum sinu
 Exceptus olim, quando materno puer
 Gremio cadebat; mox secuturis chelyn
 Tactus annis ; inde cum major virum
 Formarit ætas, ore prompturus sacro
 Sublime carmen, quod poetarum chorus
 Miretur omnis, quodque Parnassi jugo
 Resonante feriat astra, Divosque exciat.
 Heu ! Rondininus, ille grandævæ labor
 Et summa matri cura, * nec minor tamen
 Matri voluptas : ille tot fratrum decus,

Amor

1. Felix Zachia Rondinini nostri mater, cui maritus Alexander motiens novem liberos reliquit.

Amor fororum, gaudium tantæ domus,
 Æquare² Paulum purpurâ, atque annis lavum
 Superare dignus: ille tantarum capax
 Gnarusque rerum, Juris, & Consi,³ & sacræ
 Plenum Sophiæ pectus, & Suadæ nitor,
 Medulla Charitum: quodque plus cunctis reor,
 Magno ille⁴ Fabio, magno Alexandro (aureis
 O nata sæclis nomina, & fausti ominis!)
 Cliens patrono traditus; fors hac manu
 Gradus per omnes, vita si staret super,
 Ducendus ipsum ad culmen Imperii sacrum:
 Heu! Rondininus ille nunc funus jacet,
 Ætatis ipso flore succisus, rosæ
 Vernantis instar, subita quam duro necat.
 Pruina morfu. Fata prò nimium invida!
 Spes ille quantas occidens secum trahit,
 Infertque tumulo! rapuit immitis virum
 Libitina, nil miserata; non celsam indolem
 Moresque castos; non & antiquum genus,
 Non & juventam; non Apollineam quoque
 Reverita laurum,⁶ Laura quam carò excipe
 Fratris cadentem vertice, in castum tui

Ser-

2. Paulus Æmilius Rondininus, S. R. E. Cardinalis, frater nostri, pius admodum & doctus.

3. Natalis Rondininus, nostri avus, centenarius fuit.

4. Noster Græcè & Latine doctus, Jurisprudentiæ & Theologiæ peritus.

5. Fabius Chisius, antea S. R. E. Cardinalis, nunc Alexander Papa VII. Rondininum nostrum in familiâ suâ habuit, & scribendis ad Principes epistolis adhibuit.

6. Laura Rondinina, nostri soror, doctrinâ & literis à Tarquinio Gallutio, & Alexandro Donato Societatis Jesu Patribus egregiè imbuta, cui Cardinalis Bentivolus suam de Bello Belgico historiam Latine vertendam tradidit, quod tamen ipsa modeste recusavit, abdicatis sæculi curis nunc in Conventu Virginum sanctæ Terefiæ sanctissime vivens.

Sertum pudoris, inque doctrinæ decus.
Nam & ipsa vates, scita Donatum loqui
Gallutiumque Virgo; solers & tuos,
Bentivole, Belgas voluere atque ipsos potens
Donare Latio, cura nî sacratior
Teresianis rapiat in cælum ignibus
Humana solido cuncta calcantem pede.
Quid fata culpo? cæca gens mortalium
Nescimus in quid rapiat, aut servet Deus:
Et sæpe servat, cùm rapit. ⁷ Non est Deo
Testante, non est semper in canis salus,
Nec vera in annis vita. Vixit is diu,
Qui validus ævi, qui puer diem benè
Clausit supremum. Non tuos hinc jam sequor
Manes querelis, forte nec mæstus tuâ
Te plango, Rondinine; sed luctum ardeo
Mutare plausu, quando pars melior tui
Se jam beatis cælitum admiscet choris
Lætum canens pæana. Non omnis jaces;
Et urna tineres quæ brevis claudit tuos,
Non claudit animam, sidera & cæli super
Globos euntem, & spatia mirantem poli
Immensa, quæ non ⁸ Archimedeo datur
Obire radio. Nec tamen nostris procul
Terris abisti: vivis & spiras adhuc
Te major ipso, & carior jam nunc tuis.
Suprema te non abstulit mundo dies,
Sed genuit: oris namque terrarum ultimis,
Per utramque solis cuncta lustrantis domum
Te, Rondinine, (non fat auditum exteris

N

Huc

7. Sap. 4. Raptus est.

8. Matheseos in primis peritus fuit.

Huc usque populis nomen) ex hoc jam die
 Perennibus te fama cantabit tubis.
 Non ergò, non hunc esse funestum tibi,
 Sed esse vitæ crede natalem novæ.
 Et tu querelis parce jam tandem, tuis
 Jam parce lacrymis Zachia, quæ nullâ magis
 Felix ⁹ virorum prole. Natalem juvet
 Genuisse vel sic. Ille germanos supra,
 Ipsumque Joseph (dulce ¹⁰ mihi nomen) cruor
 Quem ¹¹ jure decorat Ottomanorum, & suus,
 Lauro decorus ibit ; ut laurum super
 It lingua, doctæ ut arma concedunt togæ.
 Nec invidetis postumum hoc fratri decus,
 Caroque cineri facilis hanc palmam annues,
 Pietate præstans Paule, quem Patrum eminens
 Effert Senatus, quemque gestantem infulas
 Sibi gratulantur ¹² Assisinales patrem.
 Tuque illa rerum domina, terrarum dea,
 Quæ septicolli vertice attingis polum,
 Fecunda vatum Roma, Natalem ¹³ tuum
 Plorare cessa. Vivit : in suo integer
 Achate vivit, Musæ quem functo parem
 Et Rondininum est visa fecisse alterum.
 Habes in uno, Roma, ¹⁴ Furstenbergio,
 In Rondinino quidquid amissum gemis,
 Habes in uno, Roma, Furstenbergio,

Bel-

⁹ Felix Zachia multorum filiorum mater.

¹⁰ Alludit Poëta ad suas de Josepho tragædias.

¹¹ Josephus Rondininus, nostri frater, profigatis ad Candiam Turcis, majori tubo ictus occubuit.

¹² Rondininus Cardinalis Assisiorum Episcopus.

¹³ Rondininus noster Romæ natus.

¹⁴ Ferdinandus Furstenbergius Rondinino nostro amicissimus fuit; Poëta & ipse maximus.

Bellona quamvis ferrea hoc sæclum terat,
 Sæcli Poëtas aurei, quos & colat
 Augustus ingens, Walliumque & Hesium,
 Et qui sequuntur. Ire jam nobis quoque
 Post Rondinium vatibus ad umbras licet :
 Tu dum super sis grande Parnassi decus,
 Sacrique, Ferdinande, moderator chori,
 Dignum cothurno nomen, & plus quàm meo.
 Tuque ô sacrorum maxime Antistes, vicem
 Gerens Tonantis, proximum Christo caput,
 Cui fas olympum clavibus cælo datis
 Referare, fas & claudere : extinctum haud puta
 Quem lux avorum, ¹⁵ illustre Boldrini genus,
 Et orbis Atlas ille, Romanam fidem
 Pisis laban tem pace qui fulsit suâ,
 Tam clara proavûm nomina exstingui vetant :
 Quem pura sceleris vita, candorque ingenî,
 Linguae venustas, certa virtutis comes
 Scientiæque fama ; quem vates ¹⁶ tui
 Post fata canimus. sic mori votum est mihi.

¹⁵ Rondinius noster suos inter Majores numerabat Boldrinum, de quo Sfortiades; Nicolaum, de quo Marcus Guasius; Bartholomæum, de quo in Chronicis Prædicatorum, cujus ope & consilio Pisani Conciliabulum est dissolutum.

¹⁶ Alexander VII. Mæcenæ Poëtarum Optimus Maximus.

JACOBUS MASENIUS

E SOCIETATE JESU

A D

FERDINANDUM FURSTENBERGIUM,

*Paderbornensem & Hildesensem Canonicum,**Romam invisentem. An. M. DC. LII.*

D Eseris Angariam, Rhenique faventis amicos,
 Et Paderæ fontes, Bilsteniosque lares?
 Scilicet Aufoniæ cupidum spectacula terræ
 Et Latii rapiet culta palæstra viris.
 Ille trahet, nuper Tyrio vestitus ab ostro,
 Senensis Chisius nobilitatis honos.
 Et trahet argutis epigrammata stringere nodis
 Qui docet, Anconæ gloria digna suæ.
 Humorista¹ novos illic ab Apolline fontes,
 Pegaseasque haustâ NUB E propinat aquas.
 Visitur Etruscis vacuata CUCURBITA Musis,
 Pro sale quæ Vatum condit aperta sales.
 Hic quoque Triticco gaudet Florentia CRIBRO,
 Floribus eloquii pascere docta sui.
 Non ego Piceno NATAS BOVE tango VOLUCRES,
 Melligerûm docilis blanda alimenta scholæ.
 Forsan &, oblato poterit Ferraria PRÆLO,
 Ad Musas, dignâ laude vocare tuas.

Quod

¹ Symbola Academiis Italix usitata. Humoristæ Romæ nubem resolutam habent, cum lemmate, *redit agmine dulci*. Senenses intronati in Etruria vacuam cucurbitam illic sale repleri solitam, cum inscripti. *Meliora latent*. Florentini Furfurarii cribrum cum lemmate, *Florem tritici meliorem fecerunt*. Auivati in urbe Picena, Apes ex mortuo bove surgentes. lemma, *alieno funere vitam*. Ferrariæ Intrepida Academici prælum ferunt. lemma, *Premat dum imprimat*.

Quod te cunque igitur nostris procul abstrahit oris,
 Haud leve, FERNANDE, id ponderis instar habet,
 Palladium docili prenfus pede gnarus arenam,
 Et Vaticanæ tecta superba domûs.
 Suada rapit, Latæque rapit pietatis imago,
 Eximiâque orbis parvus in urbe rapit.
 I licet, & Vatum fortuna sequatur cuntem:
 Sit via præfenti Numine tuta tibi.
 Non * Phaëthontes cupiam servire quadrigas:
 Nec quas Oenomaus rector agebat equos;
 Nec Balium Zephyro genitum, Xanthumque jugalem,
 Æacidæ celeres doctum agitare rotas.
 3 Ardua sepositi tibi non tentatur honoris,
 In lapsus nimiùm semita prona novos.
 Non etiam Cyprii currus versantur amoris:
 Sæpius hi dominos destituere suos.
 Sed nec eques Martis cupies augere ruinas:
 • Mitius ingenium Pallas amica dedit.
 Pegasus invictum quâ Bellerophonta, Chimæram
 Dum necat, Alpinis hâc vehat arte jugis.
 Quas & Amycleus tenuit moderator habenas,
 Tu pro fratre novus Castor habere potes.
 Nec tibi, si formâ, si concertetur honore,
 Judice me, Vati gloria parva foret.
 4 His minor ut cedas, certè virtutibus ille
 Cedit, & ingenii palma futura tua est.
 5 Cyllare, sublatum pacato tergore Vatem
 Suscipe, commotum nec quatiare latus.
 Colla jubata, licet, sparsis jactentur ab Euris,
 Curventurque agili crura voluta gradu:

N 3

Sed

2 Equi veterum celebres.

3 Viriorum fugiens.

4 Votum pro equite profecturo. 5 Equus leniter pro vehens optatur.

Sed leni faciles humeros moderamine flectas ;
 Nec meus, incusâ calce, moretur eques.
 6 Quà vehitur molles aspirent leniter auræ ;
 Qualiter Hybleis exspatiantur agris.
 Tu modò ne madidis occurras Auster habenis.
 Mutato Zephyrus transfigat axe vices.
 Ne ruat irato furibundus turbine Caurus,
 Non decet ingenium mite furore peti.
 Invenies animæque nives, morumque nitorem :
 Ergo tuas cohibe, quas spuis Ursa, nives.
 Siqua procella cadat prægnantibus humida nimbis,
 Hæc procul averſis exoneretur aquis.
 Quasque coquit rigidas nox defectura pruinas,
 Eliquet has placido rore propinqua dies.
 Audiat hæc facili præcepta tenacius aure ,
 Qui regit Alpinos hispidus Eurus agros.
 Horrida saxofos inclinet Rhetia montes :
 Siquis adhuc saxi sensus inesse potest.
 7 Hos docet Amphion citharâ potuisse doceri,
 Dum cantu rigidi subsilire pedes.
 Sistimus hic juvenem qui priscum Amphiona vincat,
 Seu testudo tibi, seu lyra tacta placet.
 Siqua tuas unquam mollescere fabula rupes
 Fecerit, obsequio nunc potiore facit.
 Non venit immeritos flammis violare penates,
 Qualis ab infidis Punicus hostis agris :
 Attamen huic duri colles celsisse feruntur,
 Rupit acetosus pervia saxa liquor.
 Plus aliquid poterunt fontes Helicone cadentes,
 Plus quoque Pegaseos lympa creata pedes.

Quod

6 Aura immitior proſcribitur.

7 Alpium durum iter cantu mitigandum.

Quod nulli licuit, Vati licuisse videmus;
 Virtuti ac Musis invia nulla via est.
 Ibit inaccessas, cui mens diviniore, Alpes:
 Inveniet stratam nubibus ille viam.
 Non hic Dædaleæ metuit vestigia plantæ,
 Tutior ingenii dote futurus erit.
 I, sed Hyperboreæ nutritas cardine Musas,
 Ausonios tecum, fas sit adire lares.
 * Hic tecum pietas vernantes transigat annos,
 Quæ fuit à cunis semper amica comes.
 Sæpe peregrino, mihi crede, sub æthere virtus
 Destituit fessos præcipitata gradus,
 Blanditiæ subeunt, subit ignorata voluptas;
 Otia probrosi sunt alimenta mali.
 Musa trahit Charites, Charites sociantur Amori:
 Ille suos ignes, & sua tela gerit.
 At scio delusas in Te malè congeret artes:
 Armaque Virtutum, queis superetur, habes.
 Virgineis juvenis sanxisti foedera Musis.
 Verus eris, qualis fictus Apollo fuit.
 Ille per Europæ Chisius celeberrimus oras,
 Ille Salestiacæ lumen honorque scholæ,
 Addet honestatis flammæ, stimulosque pudori,
 Virtuti que faces, ingenioque decus.
 Pars vestrum quandoque adero (sed Numine plenus)
 Accipiamque datâ mutua verba vice,
 Tunc, ubi Teutonicas Chisius sermonibus oras
 Viset, & ad notam mente redibit humum.
 Accurram facilis, quod me meus auferet ardor.
 Juerit ex imâ tunc quoque sede loqui:

* Nulla tutior in terris peregrinis comes, quam virtus, sæpe illic amissa.

Et Mimigardiacas vestro sub climate pallas,
Fas erit apposito commemorasse joco.
Quin Latias illic Musas habitare penates
Agricolum, & visam Pallada aratra sequi.
Alpha suis etiam tunc fortè merebitur undis,
Et dici, siquis notus amicus erit :
Rhenicolasque suos, ac Belgica lumina tanget,
Vekenii juxta Nihusique memor.
Pars etiam merear fortasse Masenius esse ;
Ingenuâ causam simplicitate dabo.
Arridebo procul verbis, Chisiusque vicissim
Blandus erit, motus sentiet ille meos.
Est aliquid cultâ fundentem oracula voce
Cernere, conjuncti gratia magna viri est.
Gratulor : accedes, nec inhospita tecta videbis,
Et Meccenates posthuma Roma capit.
Plurima Romulæ vides miracula gentis,
Quæque dies præsens, quæque vetusta tulit.
Hic Tarpeia tibi pandet Capitolia rupes,
Perque triumphales ingrediêre vias.
Terminus hæc quondam lapis indivulsus habebat,
Cum Jove dejectus Terminus iste suo est.
Inde Palatini dum per convallia montem
Ductus adis, Dominæ sis memor ante tuæ.
Hic ubi Vestales posuêre cubilla quondam,
Castior his Virgo fixit Hebræa thronum.
Romulus hic etiam simulacra propinqua ferebat,
Sed melior sedem nunc Theodorus habet.
Ardua Cæsarei spectes vestigia pontis,
Qui mediâ montem junxit utrumque viâ.

Ora-

* Romanae urbis, tam veteris, quàm novæ rudis quædam descriptio.

Oraque Marforii mordacibus improba dictis,
Area Romani quâ patet ampla fori :
Hic quoque Septimii curvis anfractibus arcus
Martia, suspensâ mole, tropæa gerit.
Sed neque Saturni veteris sacraria spernes,
Quæ capiunt aras nunc Hadriane tuas.
Nulla viatorem reget hic inscripta columna :
Succubuit tritis fessa columna notis.
Rostra Palatino procumbunt subdita monti,
Quæque vetus tenuit Curia, fracta jacent.
Est lacus in medio, præceps quem Curtius olim
Funere non poterat contumulare suo.
Nec sua Tarquinii decrit nunc urbe cloaca,
Quæ juga libratîs molibus alta secat.
Cæsar & Augustus fora proxima nomine complent,
Porticus hic geminum pandit utrimque latus.
Antonina suos gerit, & Faustina triumphos,
Plurimus, in fido marmore, miles ovat.
Haud procul amphitheatra suis oppressa ruinis,
Quæque Camille struis Gallica busta cubant,
Aspice, quæ superant Solymææ insignia gentis,
Hæc tulit ex captâ Vespasianus humo.
Aurea vasa suis candelabrumque figuris
Sculpta nitent, raptis signa vetusta sacris.
Pergis Aventinos aperit quâ semita colles ?
Perge, tuis oculis hic nova scena patet.
Hic Numa bifrontis posuit spectacula Jani,
Pax cui ter geminas clausit amica fores.
Invenies etiam cultæ Pietatis honorem,
Nunc ubi Nicoleos plus pietatis habet.
Fors erit historicus memorem qui dicat in aurem,
Hic captæ Matris Filia mater erat.

Hæc longæ damnata fami tenebrisque jacebat,
Uberibus Matrem paverat illa suis.
Vesta suas ædes unâ testudine clausas .
Offeret ; hæc Stephano relligione vacat.
Herculeis etiam manet hic virtutibus ara,
Et fora de raptis nomina bobus habent.
Quæque procul muscis, procul evitata Molossis ,
Posteritas tribuit templa rotunda Deo.
Culta Pudicitæ quondam hic surrexerat ædes,
Limina cultori destituenda suo.
Tullus adhæc posuit Fortunæ templa secundæ,
Multus in his templis irrita thura dedit.
Bis geminis hic fulta dabas, Vertumne, columnis
Culmina, tot facies ædis, & ora tibi.
Quin sub Aventino templum sibi Murtia clivo
Legerat ; hoc noli sacrificare loco.
Forsthan invenies prisca vestigia Circi
Carceribus metas opposuisse suas :
Maximus hic, latusque rotis pandebat arenas,
Naumachiæque datas excipiebat aquas.
Hic obeliscus erat geminus, lapis unus uterque,
Qui prope transfret nubila uterque lapis.
Nunc Lateranensis complet miracula campi,
Et statuit magnæ parta tropæa Crucis.
Quid modò Septimii tibi septizonia dicam ?
Quanta fuit moles tertia zona docet.
Quid Constantini manibus victricibus arcum
Surgentem memorem ? quid simulacra viri ?
Appia Brundusii quâ se via fundit ad oras ,
Conspice, principium tramitis arcus erit.
Cælius hinc surgit, Stephanique extollit honores ,
Hic ubi, Faune, tuis sana rotunda sacris.

Hic quoque Cyprigenæ, sociique Cupidinis ædem
Occupat erectis Crux Solymea tholis.

Hinc ubi discedis, quæ Te rapit Appia, Virtus
Culta fuit, cultus ponè secutus Honos.

Atria Thermarum mediis surgentia silvis,
Deliciæque jacent nunc Caracalla tuæ.

Servat Aventinus memores ex mole columnas,
Hac, Albina, tuæ quæ patet ara domûs.

Surge licet, montis tenuit Diana cacumen,
Quod tenet everfis Diva Sabina focis.

Hinc Regina Deûm procul ablegata recessit,
Nec mansêre Bonæ sacra maligna Deæ.

Virgo parens subiit, simul & Regina Tonantis,
Quæque Bonæ partes implêat una Deæ.

Cessit & Alcides, successit Alexius, illo
Fortior; ille virûm victor, at iste fui.

Hic quoque Gemonias, horrenda piacula, scalas
Sacrilegos cernes exanimasse viros.

Pyramis hic restat Cestî complexa cadaver,
Niliacos quondam busta imitata rogos.

Nec procul Esquiliis Nero duxit ad astra Colossus,
Maximaque hic urbis pars fuit una domus.

Mecœnas etiam, Musarum rara voluptas,
Hybla, tuas hortis conciliavit apes.

Et placuit sedes habitanti culta Maroni,
A Domino sedes cultior ipsa suo.

Hinc clivus sequitur, nomen fecere Saburræ,
Et Tiburtini marmoris arcus opus.

Prænestina simul geminum via mole tropæum
Sustulit, hæc Marii fert monumenta Ducis.

Hic quoque bis centum pallatia nixa columnis,
Cæsareis quondam culta fuêre viris.

Quid

Quid memorem gelidos superat quos Martia fontes ?

Plurimus his potus, sed Nero lotus aquis.

Affurgit propior vicino Vimine collis,

Viminibus jussus nomen habere suis.

Hic veteris cernas Romæ miracula Thermas,

Rudera sunt Socii Maxmiliane tui.

Ulpia nil reliquum Tibi bibliotheca reliquit,

Affligit Clarias tanta ruina Deas.

Inde Quirinalis tanges fastigia montis,

Nec procul ingentes corpore, Martis equos.

Creditur hic coluisse suos Sallustius hortos,

Larga ubi nunc liquidis vena scaturit aquis.

Hic incesta dedit Scelerato nomine campo

Mutia, criminibus viva sepulta suis.

Mox ubi deflexis urbem lustrabis habenis,

Hispani Vatis præteragere lares.

Improba Flora sui dabit hic vestigia Circi ;

Improbitas illi nomen honorque fuit.

Hic Marcellini versatile pegma theatri,

Augusto dignum Cæsare pegma, stetit.

Quamque parens habuit Octavia, porticus ingens,

Jam prope ruderibus semisepulta suis.

Sunt quoque Flaminio Vulcania culmina Circo ,

Hic ubi sacrilegos non tulit ulla canis.

Hercule Musarum socio fuit inclyta sedes :

Inquiras, Genio digna sit illa Tuo.

Haud procul invidiosa suâ stant mole theatra,

Quæ Pompeius opum prodigus ante dedit.

Nec Te prætereant Divorum Panthea Matris,

Quæ modò vera Dei Panthea mater habet.

Illa suis olim memorant argentea tectis,

Invidus has raptor fert Orientis opes.

Hic

Hic testudo suis mirè laquearibus hærens
Panditur, ac haustum dividit orbe diem.
Restat Agonalis notus certamine Circus,
Quæque Neronis erant balnea rara, fluunt.
Dicitur, occultis gavisa Proserpina sacris,
Altâ cultores occuluisse specu.
Isidis infando quoque furta infamia cultu,
Et Cyprii lusus his celebrata locis.
Martius hic, priscis celeberrima nomina fastis,
Campus erat, cultâ nobilitate frequens.
Sed quoque septa suis panduntur ovilia metis,
Hinc suffragatrix plebs sua vota dabat.
Porticus & juxta sese Antonina recludit,
Quam regit undeno fulta columna pede.
Virgo salutaris hic defluit unda scatebris,
Juturnâ vetus à Virgine nomen habens.
Hic Auguste tuis obeliscus conditus umbris,
Explicuit certos, per data signa, dies.
Porticus hic claudens crebris viridaria lauris,
Naumachiaque patens Martia vallis erat.
Augusti taceo surgentia Mausolea,
Æmula vix æquo Memphis honore tulit.
Nec varios memoro Tiberino in flumine pontes,
Barbara quos Totilæ sustulit inde manus.
Tu tamen hac transi, quâ se via pandit ad arcem,
Et regio pateat Transiberina Tibi.
Hic juga quæ Jano quondam sacrata sepulto,
Ostendent StatI' juncta sepulcra tui.
Forſitan & Vates quæ Bilbilitanus amabat,
Invenies cultis lilia mixta roſis.
Hinc Vaticani rapient spectacula montis,
Scena tuis oculis quo satis apta patet.

Hic,

Hic, ubi vaticinans quondam præfedit Apollo,
 Fixit Apostolicus sidera bina Chorus.
 Proximaque astringero fulgent pallatia cœlo,
 Omnis in hoc unum confluit artis opus.
 Forſitan inde trahet, ſpectantem cetera, caſtrum
 Pontificum, dubio Marte, reperta ſalus.
 Angelus huic nomen, quadram faber arte figuram,
 Materiem, Pario marmore, terra dedit.
 Plurima prætereo non prætereunda videnti:
 Judicio melior dux eris ipſe tuo.
 Omnia cùm tandem Romæ ſpectaveris, uno
 Nil poterit Chiſio dulcius eſſe Tibi.

EJUSDEM ELEGIA
 DE ERECTIS
 ALEXANDRO VII. P. O. M.
 COLUMNIS.

A D

FERDINANDUM FURSTENBERGIUM,

ſua Sanctitatis intimum Cubicularium.

SI licet erectis, calamo ductore, columnis
 Inter Alexandri ſurgere honoris opes,
 Auſonium ſubeant Borealia munera cœlum,
 Sed manibus ſubeant excipienda tuis.
 Judicio, Fernande, tuo, vel ferre repulſam,
 Vel ſummi mereant ora ſubire Patris.

Diſpi-

Dispicias ingenio, quid tanto culmine dignum,
 Nec priscis fulges Vatibus arte minor.
 Virtuti conjuncta fides, & candor honestæ
 Mentis, summorum dignus amore virum.
 Quicquid Alexander divinâ mente probavit,
 Judice me, summam laudis habere potest.
 Gratulor hanc cœptis pandi felicibus aulam,
 Quâ licet ingenii pandere vela tui.
 Hic tibi virtutum summus vestigia Princeps
 Imprimet, obsequio ponè terenda pio.
 Hic pietatis opes cum nobilitatis honore
 Jungere, præscripti cura laboris erit.
 Hic quondam tradenda tuis præcepta capeßes
 Teutonibus, primo ducta magisterio.
 Perge, age, flos nostræ gentis, flos inclyte vatum,
 Per quod Alexander ducit honoris iter.
 Quà præit exemplo, tutò sectaberis. Una
 Est virtus, per quam gloria digna venit.

I D E M

A D

CELSISSIMUM PRINCIPEM

F E R D I N A N D U M

Episcopum Paderbornensem, Coadjutorem Mo-
nasteriensem. An. M. DC. LXVII.

G Ratulor illustri Paderanam in vertice mitram,
 Quodque tuo juncta est Urbs Mimigroda Peto.
 Nec

Nec minùs Aufonias, quibus aurea secula reddis,
In Musas Charites gratulor ire Tuas.
Principe digna geris, seu te civilis adoret
Curia, seu poscant jura sacrata Patrem.
Sed quod Apollineâ cingaris tempora lauru,
Hoc magno vates Principe major habes.
Carolus imperii decus ingens, nomine Magnus:
Saxonico quantus terror in orbe fuit!
Quæ tamen armatas vibrabat dextra farissas,
Norat & hæc blandis stringere verba modis.
Cumque suis hostem victor prostraverat oris,
Intulit & doctis Palladis arma scholis.
Qui Nasianzeno celebratur Episcopus ortu,
Ter lufit facili millia dena pede.
Una Pedum gessit, calamum simul altera duxit,
Carminis æterni non peritura manus.
Ni sua Jessides panxisset carmina Rector,
Viveret; at, spretâ viveret arte, minor.
Est aliquid sceptrum vibrasse, trucemque Gigantem
Obtruncasse; tamen grandior ad citharam est.
Ter memorasse juvat Goliathum in cæde madentem:
Si quater auscultes, nausea plena subit:
Ast ubi dulce melos vatis Polyhymnia ludit,
Quò magis hanc audis, hòc magis illa rapit.
Chisiadæ triplicem caput exornasse Tiamam
Novimus, & doctas laurea ferta comas.
Sed Mimigrodiacas facili dum carmine pallas
Exprimit, his cedit Pontificale pedum.
Rarus erit mitram lector qui curet, honore
Par illo est multis, hunc prope solus habet.
Cetera vanescunt. Victuris nulla Camænis
Imminet obscuro nox metuenda specu.

Quot regnatores populorum oblivio pressit,
 Lethæisque duces quot tumultantur aquis!
 Quos olim Assyrio mundus veneratus in ostro
 Cœlituum stupuit civibus ire pares;
 Nunc atris sepelit nox ignorata tenebris,
 Nullaque Pegasei militis ala vehit.
 Ast cui Bellerophon dociles concedit habenas,
 Et subit illustrem celsa per astra viam,
 Hunc feret æternis super ultima sæcula perennis:
 Immortale decus posteritatis erit.
 Est Tibi nobilitas Proavum dignissima, Princeps,
 Nec virtus tantâ nobilitate minor.
 Accessitque Tuis virtutibus infula duplex;
 Par tamen est multis gloria tanta viris:
 Ast ubi Phœbeis vectaris in astra quadrigis,
 Inque coronatis vatibus alta tenes,
 Suspiceris, rarusque pari contenderit ausu
 Ire per æthereum, Te comitatus, iter.
 In magnis hoc solus habes Heroibus. ornat
 Musa Mitram, Musam Mitra decora Tuam.

I D E M

A D

CELSISSIMUM PRINCIPEM

F E R D I N A N D U M

Episcopum Paderbornensem, Monumentorum Pa-
derbornensium auctorem. An. MDC. LXX.

E Uge vetustatis reparator, Maxime Princeps,
 Ausoniis veterum sæcula redde modis.

O

Longa

Longa quod annoso triverunt tempora cursu,
 Versibus hoc nosti restituisse Tuis.
 Fabula Thebanos substruxit carmine muros;
 Quod doctis renovas versibus, historia est.
 Erigitur priscis ROMANUS ALISO ruinis,
 Ad Fernandezæ plectra canora lyræ.
 ARMINIUS rursus vincit, stratoque triumphat
 QUINCTILIO, & quanquam Pallas inermis, ovat.
 AMISII niveo confurgunt marmore FONTES,
 LUPPIA Romuleis castra revisit aquis.
 Inclyta BRUCTERICIS fulget DELBRUCIA signis,
 Tollit ERESBURGO Mars simulacra solo.
 BRUNISBERGA iterum victricia fuscipit arma,
 Francorumque timet subdita BOCA jugum.
 Tollitur hinc priscis arx DESENBERGICA faxis:
 Hinc CUNIGUNDA TUO PADERA fonte bibit.
 Pergit adhuc medicas DRIBURGUM fundere lymphas,
 Et PYRMONTANIS LUGDA superbit aquis.
 SINTFELDOS fulgent CAROLINA TROPÆA per agros:
 Surgit HERISTALLI gloria prisca novi.
 Statque WEVELSBURGUM reparatâ sæpius arce:
 SENNAQUE florilegas cum grege nutrit apes.
 FONSRERONUS bibulos haurit, revomitque liquores,
 Electro PADULUS Principis ora rigat.
 At SMECHTANA suis contendit vincere lymphis,
 Æmula DRIBURGI plus tamen unda potest.
 Quid FURSTENBERGÆ memorem primordia GENTIS
 Quæ longis retrò condecoratur avis?
 Omnia splendescunt, instauranturque caduca,
 Squalorem ponunt inveterata suum.
 Amphion rapiat fontes, ac mœnia plectro:
 Plus facis: ad citharam stant rediviva tuam.

Id, quod erant, mortale fuit; quod carmine reddis,
Immortale ferunt hoc Monumenta decus.

JACOBUS VVALLIUS

E SOCIETATE JESU

A D

Illustrissimum & Reverendissimum

FERDINANDUM

Lib. Baronem de Furstenberg, Canonicum Paderbornensem & Hildesiensem.

In illud Ciceronis, quo poëtas omnes ait inter se dissimiles esse, sed ita tamen, ut neminem sui velis esse dissimilem; adeoque parem parè laudem in dissimili scribendi genere iis tribuendam esse. Lib. 3. de Orat.

S Ictua Romano celebretur Musa theatro,
Nec minus Arctoo nomen ab orbe ferat:
Ut tibi magnorum laudantur carmina vatum,
Quos vetus, & veteri Roma secunda tulit.
Non res, non numeri, non impetus omnibus idem:
Omnibus ex merito laus tamen æqua suo est.
Pasceris ingeniiis, & te non una moratur
Gratia: quisque suâ, quâ valet, arte placet.
Nos quoque, nos tecum non causâ tangimur unâ,
Cur aliquod dignum laude putemus opus.

Inter tot species quid non Natura decoris,
Cum variis terram floribus ornat, habet ?
Hic est auroræ, puri color æris illic :
Hic pallet : nitet hic : hic rubet : ille viret.
Dissimiles quamvis, nec sit decôr omnibus unus ;
At rapit hic oculos, & rapit ille meos.
Lilia me capitunt albo, vaccinia nigro :
Quo flos me capiat discolor alter habet.
Frondebis arrectis placet hic, placet ille repandis ;
Et forma, in dubio est, hæc sit, an illa prior.
Hic quia suavè rubet, gratumque expirat odorem,
Fragrantem digitis subsecuisse velim.
Quis violas gratâ pictas ferrugine damnet,
Gratior albentis sicubi forma rosæ est ?
At minor hortorum est, quam Pindi gloria nostri ,
Hic viget ingenio quisque poëta suo.
Ille leves elegos, levibus solatia curis,
Fortia Mæoniis hic canit arma modis
Musa dedit laudes aliis pugilumque, Deûmque,
Liberaque impulsâ vina referre lyrâ.
Scenam alii focco subeunt, altôve cothurno :
Et plausu resonant quæque theatra suo.
Nunc Troas, Thebæque placent, & barbara pellex ;
Nunc fallax fervus, difficilisque pater.
Sunt quos blanditiæ, sunt quos irata Lycambæ,
Tinctaque mordaci carmina selle juvant.
Nil non dissimile est : res est liberrima carmen.
Non aliter Musæ scribere quemque velint.
Quid prius est illo ? quid & hoc, quid cultius isto ?
Confer : erit longæ res dirimenda moræ.
Non, si Pelides æternum nomen Homero,
Simichidæ nullum Daphnis habere dedit.

Sedibus exactos cantu celebrare tyrannos
Non erat ingenii, Lesbi puella, tui.
Quid tamen Alcæo vates celeberrima debet ?
Num minus ardoris, num minus artis habet ?
Si fuit Archilochus pugnax & liber iambus,
Quid mirum ? justus ceperat arma dolor.
Dum celer in pugnas fertur, dum cornua sumit,
Deliciis potuit scilicet esse locus.
Deliciis locus aptus erat, cum Cypris Adonin
Flevit, & in questus ingeniosa fuit :
Aut inter calices citharam cum carmine movit
Vineta celebratis Teia Musa rosis.
Aptabat nervos, ut res & nomina regum
Diceret : at nervos attenuabat Amor.
Materies placuit fidibus levioribus apta,
Cumque suo Bacchus munere carmen erat.
Et modò parvus Amor, matri sua vulnera monstrans
Saucius illacrymat, seque perisse putat :
Et modò dicit apes parvæ genus esse lacertæ,
Quæ circum flores, & thyma summa volet,
Quæ petat incautos, quæ venis fixa relinquat
Spicula, quæ morfu virus habente necet :
Et modò materno monitu non mitius uri
Credit, quos arcu læserit ipse suo.
Quis tentes lusus, & læti pectoris ignes
Improbet ? à nobis sit procul iste furor.
Sculpserit Alciden alius, Lapithasque bimembres,
Aut, in Titanas cum movet arma, Jovem.
His magnos membrorum artus, his ossa, torosque ,
His dederit sævis lumina torva minis ;
Huic etiam fulmen, semiustaque fulmine monstra,
Impetere aggestis montibus ausa Deos.

Tu meliùs pueri molles, Polyclete, capillos,
Impubesque genas fingere doctus eras.
Ducebas meliùs tencros de marmore vultus,
Ascanii quales, aut Ganymedis erant.
Siquis, ut in vulgo, rudis & sine pectore iudex,
Siquis, qui de te plura requirat, erit,
Desipit, & nescit, victori debita quæ sint
Præmia, dum primas qualibet arte ferat.
Quis Zeuxin, nisi mentis inops, dum laudat Apellem,
Arguat, & similem non velit esse sui ?
Pinxerat, & pictis veras simulaverat uvas,
Uvaeque deceptas picta trahebat aves.
Naturæ simularat opus. Quid defuit arti ?
Quis gradus ulterior, quem sequeretur, erat ?
Ille ego sim, cujus frondes laudentur & umbræ,
In tenui quamvis hæreat ille labor.
Ille ego sim, cujus vano quæ picta rubescit
Uva mero, captas fallere possit aves.
Certè ego nil magnum cecini : non Musa cothurnos,
Non ausa est gravibus tangere bella modis ;
Non mores, Natura, tuos, & semina rerum,
Angusta est nostris area trita rotis ;
Et tamen in seros hæc Furstenbergius annos,
Quæ modò cumque damus, vivere posse putat,
Si plus, quam par est, tribuit mihi, viderit ipse :
Judicii culpam diluat ipse sui,

I D E M

F E R D I N A N D O

LIB. BARONI DE FURSTENBERG,

ALEXANDRI VII.

PONT. OPT. MAX.

CUBICULARIO INTIMO,

*Canonico Paderbornensi, Hildesiensi, Monasteriensi,
Hildesii Ecclesia S. Crucis Præposito.*

E Ffecisti, Illustrissime Furstenbergi, cùm Elegiam in Natalis Rondinini funere à te scriptam legi, ut aliquid eodem argumento scripturus, necesse duxerim mentem aliò convertere. Cùm enim amantis dolentisque partes omnes à te absolutissimè expletas esse animadverterem, vix videbam, quid à me præterea in hac causâ apud te proferri posset, qui mihi lacrymas omnes absumissee videbaris. Si è prisco funerum & collacrymationum ritu colligendæ essent tuæ, crystallo, auro, gemmis excipere eas oporteret, quibus non antiquariorum abaci, sed poetarum scrinia ornarentur. Habebat ille veterum luctus delicias etiam suas, cùm lacrymas unà cum succis odoratis & unguentis Assyriis confundebant: at tuo erga Rondininum studio, amore, pietate nihil potest esse suavius. Ut mihi quidem alabaſter nullus unguenti plenus cum lacrymis tuis suavissimè redolentibus conferri posse videatur. Γλυκύπικρον illud quod in amore, præsertim cùm

ab amante divellitur, inesse solet, luculentiùs prodi non potuit. Mihi igitur in luctu tecum communi scribere ad te quidpiam cogitanti doloris potiùs aberrationem, quàm ejusdem irritandì causas quærere consilium fuit. Occurrebant Philemonis Græci poëtæ versus, quem etsi Comicum, numeris tamen arctiùs vinctis Latinè loquentem feci. Non quòd ignorarem, quod ait Cicero, in tragœdia comicum vitiosum esse, & in comœdiâ turpe tragicum, sed quòd existimarem eum qui ad progressum in literis refert omnia, posse exercitationis gratiâ optimorum auctorum uti virtutibus atque sententiis; verba efferendi-que morem persequi catenus, quoad res, & locus, & scribentis animus tulerit.

Εἰ τὰ δάκρυ' ἡμῶν τῇ κακῶν ἰσφάριμανον,
 Αἰεὶ δ' ὁ κλαύσας ἔπνεῖν ἐπαύετο,
 Ἡλκασσάμεοδ' αὖν δάκρυα, δόντες χερυσίον.
 Νῦν δ' ἔ' προσέχῃ τὰ πράγματ', ἔδ' ἀποβλέπῃ.
 Εἰάν τε κλαίης, εἰάν τε μὴ, προσβίετω.
 Τί δὴ ποιεῖς; πλεόν ἔδένῃ ἢ λύπῃ δ' ἔχῃ,
 Ὡς περ τὸ δένδρον τῷ το καρπῶν, τὸ δάκρυον.

*Si flere nostris esset auxilium malis,
 Lacrymisque sese penitus egereret dolor,
 Mercarer auro lacrymas: nunc quid juvant?
 Fortuna curat scilicet, quo te premat
 Adversa fato: respicit flentis genas.
 Sint squalida humideque, sint tersa tibi,
 Nil te morata pergit, & cursum tenet.
 Tuus igitur ille quid dabit luctus? nihil.
 Sed arbor ut fert poma, sic lacrymas dolor.*

Prudentis igitur poëtæ usus consilio, teque à mœrore, quem importuna mors attulit, abstracturus, ad equestrem de-

decurſionem priſcoq; ritu in fortium virorum funeribus exhiberi ſolitam voco. Scis in quæ tempora inciderit Rondinorum virtus : qui pacis & otii turbines ac tempeſtates Italiam univerſam convellerint, cùm in Galliam tractâ Pontificum Romanorum ſede civiles diſcordiæ miſcerent omnia, & ut quiſque ad ſeditionem & vim opibus inſtructior ac paratior erat, ita liberiùs latiusque dominatum per urbes occuparet. Fidei animorumque pleni pro Pontificiâ cauſâ ſteterè tum Rondinini. Quorum militaris indoles ac fortitudo ad poſteros derivata Natali quoque noſtro hos indidit ſpiritus, ut, quamquam partem ipſe nullam bellici muneris attigerit, tamen de rebus quæ belli adminiſtrandi ſunt propriæ, diſſerere in tempore, & ſuadere, & manu etiam aliquid designare utiliter poſſet. Sit igitur, quando Muſis noſtris ſic incidit moleſtiam, & acerbitatem ex amiçi morte à te ſuſceptam mitigare; ſit, inquam,

NATALI RONDININO,

ALEXANDRO VII.

*Ab Epistoſis ad Principes, bellicam ſuorum gloriam,
qua licuit, æmulanti, ex antiquo funerum
more Trojana decurſio.*

Quid juvat exequias longis miſcere querelis,
Et tantùm lacrymas, munus inane, dare?
Non ego Natalem, quamvis mœſtiſſimus, illis
Proſequar : ignoſcat, non mihi flendus erit.

O 5

Cùm

Cùm subit illius tamquam morientis imago ,
Qui Pylios annos vivere dignus erat;
Cùm repeto primos ævi, quos gessit, honores,
Et Romæ quot spes abscidit una dies ;
Flere quidem natura jubet : sed, dicere pace
Naturæ liceat, quod jubet illa, gravat.
Non prodest certè : nec si quæ flevimus umquam
Funera, defletis reddita vita fuit.
Ergò ades, & mecum potiùs, Fernande, dolorem,
Quem penitùs nequeas tollere, falle tuum.
Ut se mens fallat, luctuque exsolvat amaro,
Multa movet : res est ingeniosa dolor.
Mitiùs ut Thebe ferret tua fata, Palæmon,
Addidit exequiis Isthmia sacra tuis.
Archemorum flevit Nemee : sed & illa peracto
Funere victores currere vidit equos.
Justa Meneætiadæ mœstus solvebat Achilles ,
Et pariter ludos, altera justa, dabat.
Sic quoque festa fuit, lætosque novavit honores,
Quæ fuit Æneæ semper acerba dies.
Affuit, & patris monitu puerilia duxit
Agmina Sidonio vectus Iulus equo.
Diductis nunc illa choris, nunc currere junctis :
Nunc lituus pugnæ, nunc dare signa fugæ.
Ipse puer pueris pietate præibat & armis ,
Spectari causâ dignus utrâque puer.
Forsan & addiderit : Sic Troiam Troia resurgens
Instruat, & nostro sæpe parentet avo.
Quis non hæc inter vultumque animumque remisit,
Et cavæ junxit plausibus ipse suos ?
Poscebant lacrymas, poscebant funera questus :
Questibus & lacrymis hæc posuere modum.

O quæ

O quæ tot magnos, ' gens Rondinia, censes
 Bellica quos cælo gloria vexit avos,
 Hunc tibi quis morem referat, carisque tuorum
 Manibus has pompas inferiasque paret!
 Quos litui, dum vita fuit, quos arma juvabant,
 Credibile est illo mortis honore capi.
 Hæc quoque Natalem caperent simulamina belli,
 Cui belli quondam munia ludus erant.
 Ludus erant pernecis equi nunc ora lupatis
 Flectere, nunc jussu figere tela loco:
 Nunc præducendos urbi describere vallos,
 Nunc formam castris aggeribusque dare:
 Interdum virgâ, virgam cum fortè teneret,
 • Ducere in exiguo pulvere Martis opus:
 Interdum, tamquam pugnae data signa vocarent,
 Ad pugnam fortes esse jubere viros.
 Si non Æacides, si non Telamonius armis,
 Consilii pleno pectore Nestor erat.
 Quis nescit? laus cuique sua est: bello alter & alter
 Utilis: hic animo rem gerit, ille manu.
 Fabula nota quidem, sed rebus idonea nostris,
 E gravido Pallas vertice nata Jovis.
 Non illi præfens aderat Lucina dolenti,
 Solveret ut partum molliùs ipse suum.
 Mulciber impacto juncturas verticis ictu
 Diffidit: eque illo vulnere nata Dea est.
 Et patrium mox illa genus morefque probavit
 Edita: quàm sapiens, tam bona miles erat.

Hinc

1 Non, ut Ovidius in Tuticani, ita ego in Rondinini nomine hinc ludam, ac
 delicias faciam. Ab hirundinibus quidem nomen & scuti tesseram sibi
 sumit illustrissima gens: verum si quis de secundæ syllabæ quantitate me-
 cum contendat, pro me stabit Centaurorum unus,

Qui clypeo, gladioque, Macedoniæque sarisâ
 Conspicuus. Ovid. Metamorph. 12. v. 466.

Hinc quæ consiliis, eadem Dea præsidet armis :

Nec minùs est laudi, quidquid inermis agit.

Palladis armatæ est acie concurrere, strages

Edere, confusâ vertere castra fugâ.

Qui juvet ingenio vires, qui temperet aptis

Omnia consiliis, illud inermis habet.

Pars hæc Natali placuit : sic arma gerebat :

Sic erat ipse suæ pars imitanda domus.

Fortunata domus, si te modò prisca tulisset

Græcia spectatrix roboris ipsa tui !

Tota tibi Nemeen complens bimarisque Corinthi

Litora, quadrijugis afforet acta rotis.

Nunc tua dum virtus ² Italis caput extulit oris,

Nil agat in laudes Itala terra tuas ?

Hei mihi, qualis erat, studiis dum scissa fuorum

Præda foret belli sanguinolenta sui !

Qualis erat, dum quot populos numerabat & urbes ,

Tot dominos esset pænè coacta pati !

Quæ poterat (jus arma dabant) sibi subdere quisque

Oppida, victoris præmia Martis erant.

Huic ³ Antenoridùm sedes, illi inclyta cessit

Mantua : Veronam diripuerunt Canes.

Sic lacer Actæon jacuit, cùm terga Melampus,

Pectora Theridamas scinderet, exta Lacon.

Aut, ubi Thebanæ laniarunt Penthea matres,

Hæc caput, hæc humeros abstulit, illa manus,

Quid referam, quos, Roma, tibi fecere timores

Sæva ⁴ tribunitius quæ tulit arma furor ,

Et

² Floruere Rondinini, cùm Romani Pontifices in Galliâ se haberent. Quam sedis mutationem gravissima hæc præ ceteris exceperunt mala :

³ Arsit intestino bello Italia, & Carrarii Patavium, Mantuam Passerini, Scaligeri Canes Veronam, alii alias urbes armis sibi assèruerunt :

⁴ Nicolaus Laurentii, scriba populi Romani, multitudo ad spem libertatis erectâ, in tribunitium nomen ac potestatem Imperatoriam invasit :

Et malè sacrilegâ gestatus fronte ⁵ tiaras,
 Et malè Cæsareâ ⁶ rapta corona manu ?
 Auxerunt portenta metus : mons Cœlius arsit,
 Flaviadæque labor ⁷ templa fuere rogos.
 Non aliàs ⁸ crinem cælo sparsere cometæ.
 Tristiùs, & medium condidit umbra diem.
 Non aliàs graviore lues incanduit æstu,
 Et tellus victum parcìus ægra dedit.
 Ah, cur Romanis umquam Pater Urbis abivit
 Sedibus ? abscessit non comitante Deo.
 Cur umquam Rhodanum Tusco malè prætulit amni ?
 Illa fuit tanti prima favilla mali.
 At quæcumque fuit, gens Rondinia, causam
 Unde tibi nomen crederet, illa dedit.
 Cùm fasti referent, quos ætas illa tyrannos
 Extulit : Hesperii qui status orbis erat :
 Qui bello exciti populi : quæ quisque secutus
 Signa : quis hostiles fregerit ultor opes :
 Quæ sint vindicibus pacatæ viribus urbes :
 Quæ sint victrici fœdera pacta manu :
 In tantâ rerum serie tua facta recurrent,
 Nec pars historiæ parva futura tua est.
 Testor, Roma, diem, quo non impunè ⁹ tyrannus
 Explicuit signis obvia signa tuis.
 Ibat : eum belli circum fœdissima nubes,
 Et furor, & cædes, & fertus horror erant.

Jam

⁵ Nicolaus V. præter legitimum morem Pontifex creatus est à Ludovico Bavaro, qui injussu Romani Pontificis Joannis XXI. pro Imperatore se gerebat :

⁶ Ab eodem Bavarus Romæ Imperii sumsit insignia :

⁷ Laterana Basilica in monte Cœlio deflagavit :

⁸ Cometæ, solis defectiones, pestes, annonæ penuria terrore & exitio fuerunt.

⁹ Nicolaum Piccininum, qui Bononiam, Ravennam, ceteramque Familiam Pontifici ademerat, Boldrinnus Rondinius bello cepit.

Jam dederat Tuscis leges : infesta sonabant
 Classica per muros pulsa, Ravenna, tuos.
 Jamque Quirinales aditum sperabat ad arces
 Sternere Flaminîa se sibi posse viâ.
 Restitit, & causâ fideus Boldrinus & armis
 Agmina fulmineo stantia fregit equo.
 Utque leo, si fortè gregem, quem spectat euntem,
 In nova bellator pascua taurus agat,
 Ille fremit, quassatque toros : armenta minora
 Præterit : in solum vertitur ira ducem.
 Nec mora : pugnatur : cruor adversusque suusque,
 Mutua dum repetunt vulnere, colla lavat.
 Horret ager : mussant pavidæ fugiuntque juvencæ,
 Et quæ sperabat præmia victor habet.
 Haud aliter medios ibat Boldrinus in hostes :
 Successum virtus ipsaque Roma dabant.
 Ductoremque procul tumulo speculatus ab alto :
 Huc feror : hæc, inquit, quam peto, præda mea est.
 Dixit, & uni odiis turmisque sequentibus instans
 Injunctâ tenuit perfida colla manu.
 Dî juvere manum : Dî monstrum ¹⁰ informe Latinis
 Avertère focis : Dî voluere capî.
 Vidit, & assertis Anemo pater excitus undis
 Ter plausum ripâ liber utrâque dedit.
 Et pariter Sapis, pariter popularia longè
 Flumina cæruleis exsiliere vadis.
 Velatique comas, nixique liquentibus urnis,
 Carminibus fluctus sustinere suos.
 Victor iö, Boldrine : tuis ego debita rebus
 Flaminîa statuam fixa tropæa viâ.
 Defigam tumulo quercum : tremet illa sub armis
 Quæ feret, & magni nominis arbor erit.

¹⁰ Piccininus à corporis brevitate nomen acceperat.

Horrescet uertex galeâ : rutilantia pectus
Æra tegent, ensis, parmaque fulva latus.
Adjiciam titulum : HÆC CAPTO DETRACTA TYRANNO
BOLDRINUS PATRIÆ DEDICAT ARMA SUÆ.
Talis erat, cùm propatriis Thrasymbulus Athenis
Staret, & Aëtæâ pelleret arce nefas.
Talis erat, cùm post actos in vincla tyrannos
Timoleon nîveis inveheretur equis.
Et cineri nondum quisquam sollemnia mittit ?
Flaminiâ nondum fervet arena viâ ?
Nec tuba commissos cecinit Mavortia ludos,
Victoresque domum palma reduxit equos ?
Fungere Boldrini soboles pia, fungere iusto
Munere : sic illum te juvet esse suam.
Viveret ô utinam, cui nuper ¹¹ Creta sepulcrum,
Et titulum virtus partaque fama dedit !
Ille animis impleret equos, plausuque juvaret,
Trojanumque suo duceret agmen avo ;
Duceret & fratri, cui nunc funebria mecum
Solveret, hic belli munera, carmen ego.
Hei mihi ! carmen ego, non hic, Fernande, dolores
Solatura tuos solvere iusta potest.
Invidit Mars illa tibi : fortissima sternit
Prima ferè : segnes eximit ipse timor.
Quid queror ? ecce tibi, quanta est, Romana juvenus
Ferre laboranti velle videtur opem,
Et tibi sollemnes, mortis solatia, pompas,
Et tibi Trojano ducere more choros.
Et tibi jam sedem ripâ Tiberinus amcenâ
Dispicit, acclivi quâ viret umbra iugo.

Huc

¹¹ Josephus Rondininus, Natalis nostri frater, in Cretâ cum Turcis pugna congressus, gloriose occubuit.

Huc venies, Fernande : tuo moderabere nutu

Omnia : tu cursus signa secunda dabis.

Tu præfens animos & vim certantibus addes :

Dum placeant, illis tu satis unus eris.

Munera dein capient à te sua : forsan & illos

A Musis cupies altera ferre meis.

I D E M

I N E F F I G I E M

F E R D I N A N D I

Episcopi & Principis Paderbornensis
& Coadjutoris Monasteriensis,

*Penicillo Theodori Caspari Lib. Baronis de Fursten-
berg, Canonici Moguntini & Spirensis, fratris,
affabre depictam, & in æs incisam.*

DUM, FERNANDE, Tibi nuper plausère Quirites,
Dictus Alexandri, dictus es Urbis amor.

Nunc etiam Imperii Paderæque mereris amorem,

Diceris & PATRIÆ, quam regis, esse PATER.

Et Cæsar Scythico cùm ferveret Austria bello,

Te vidit trepidis addere rebus opem.

At populis, qui Te nunquam vidère, videndus,

Et, quod quisque Tibi debet, amandus eras.

Cretà videre velit, quoties Tuà dona recenset,

Quo vultu, quâ sint illa profusa manu.

Repperit ars fraterna modum : Te pinxit, & orbis

Te fruitur. sic Te, quem videt, orbis amet.

JOANNES BAPTISTA

Turricellius Patavinus

FERDINANDO FURSTENBERGIO

*Canonico Paderbornensi & Hildesensi, S. D. Bononia M. DC. LIV.
 prid. Kal. Augusti.*

S Iqua mei te cura tenet, seu fortè requiris
 De reditu, & nostræ quæ nova causa moræ est:

Cænomanis reducem, placido quâ Minicus amne

Eridani lentè flumina vasta subit,

Felsina me excepit, studiis notissima pacis,

Dives opum, pingui Felsina nota solo.

Quid juvet at miserum? curæ cui mille recurfant,

Quem pariter vitæ tædeat, atque viæ?

Frangitur adversis animus, fata aspera semper

Scilicet expertus, difficilesque Deos.

Sic vitiata malis jam membra labantia febris

Occupat, & sævus concutit ossa rigor.

Jam subit exardens æstus, jam corpore toto

Sudor, ut apricâ liquitur Alpe gelu.

Sirius urebat terras, crebróque coruscans

Tractibus immensis igneus axis erat.

Me sitis, atque ipso gravius medicamina morbo

Angere, me falso nulla sopore quies.

Sæpe viis tristesque tubæ, perductaque lessò

Funera me fati commouere mei.

Vatibus & sacris num profit inania Phœbi

Munera, Pierias & coluisse Deas.

At nondum infensæ Parcæ mihi pulla trahebant

Pensa, nec instabat tristior illa dies;

Quâ precor hæc, saltem lacrimis excepta meorum

Ossa piis, patriæ restituantur humo.

Nunc verò incolumem rursus me ludere nugas
 Blanditiâ adduxit Calliopea suâ;
 Dum nimis immites æstus Marathonîa virgo
 Temperet: Etruscâ detque redire viam.
 Tu cœlo interea frueris, FERNANDÈ, Latino,
 Scilicet & nobis invidiosus agis;
 Non tibi quod radios Nemeæi mulceat astri,
 Quæ Laribus sacrum ventilat aura nemus:
 Nec quod Gaurano, vel Etrusco palmite missa
 Pocula, seu vario frigida odore bibas.
 Nec quod te rapiat molli testudine cātor,
 Orphea, quin blandas vincere doctus aves:
 Aut tibi Phidiaci referens miracula cœli
 Bernini occurrat vividus arte lapis.
 Alcæve ancipitis pugnæ, cum mixta virorum
 Agmina, & adversos Rosa colorat equos.
 Non his afficior: careat nam maxima Roma
 Omnibus, illa mihi suspicienda foret,
 Dum colat hanc Latîæ decus aulæ, Urbisque voluptas
 Chisius: hic alias unicus æquat opes.
 Cui siquando meum obsequium testabere: votis
 Tunc dabis & fato candidiore frui.

JOANNIS DE BUSSIERES

E SOCIETATE JESU

EMBLEMA.

Velum navis cum remo,

*Et lemmate Ferdinandi Episcopi & Principis Paderbornensis,
 Coadjutoris Monasteriensis.*

SUAVITER ET FORTITER.

FORTITER incumbens remo, vada cœrula navis
 Findit, & in mediis verbere regnat aquis.

SUA-

SUAVITER expassis vehitur super æquora velis;
Nauta vacat somno, dum volat acta ratis.

Præful utrumque imples, dum munia fortiter urges,
Commissumque gregem suaviter inde regis.

Sic Samaritanus mordaci vulnera Baccho
Abluit, & succo Palladis ægra fovet.

Sic bene pascis oves, dum virgâ ad pascua ducis;
Dum ductis nusquam lymphæ vel herba deest.

JOANNES ROTGERUS
TORCKIUS,

Præpositus Mindensis, & Canonicus Paderborn. & Monasteriensis,

AD FERDINANDUM
FURSTENBERGIUM,

De secessu Tiburtino.

O Jucunda quies! ô blanda pæpavera somni,
Et pia Lethæis frons medicata vadis!

Callida nocturnas oculis properare tenebras,
Dum mediis cælo sol calet altus equis.

Vidimus hanc tacito tua spargere tempora succo,
Et geminas unâ condere nocte faces.

Fusus eras, memini, vitreas Anienis ad undas,
Curva quibus gelidum vallis opacat iter.

Officiosa falix Phœbi summoerat ignes,
Pictaque nativum struxerat herba torum.

Densa soporifero nutabat silva susurro,
Miscebantque leves amnis & atra jocos.

Et volucrum liquido suctarum fluminis alveo
Mille dabant varios guttura mille sonos.

Talis in Actæis juvenis Theseius umbris
Concidit, hirsutos sternere fessus apros.

Talis & auctum sopor est complexus Iulum,
Didoni strueret cum Venus alma dolos;
Et bene cognatos simulante Cupidine vultus
Idalias premeret languidus ille rosas.
Ast ego nunc amnem, tua nunc vigil ora tuebar:
Nunc in Callimachi versibus omnis eram:
Nunc mihi fingebam maturas solibus uvas
Ad gelidos fontes prætereuntis aquæ,
Purpureosque avido ducebam gutture succos.
Sæpe mihi tales dent mea fata dies.
Quærat avarus opes, petat ambitiosus honores:
Sit procul à tanto nostra furore quies.
Quid, miser, auriferi medio tibi proderit Hermi
Gurgite Tantaleam semper hiare sitim?
Quid Siculas valles, montique propinqua Vesevo
Mille boum gemitu vertere rura juvat,
Horrea si crescens tibi rumpit & ilia messis,
Teque simulque tuas arca flagellat opes?
Aurea sollicito tibi spumant pocula Baccho,
Et vigiles noctes lectus eburnus habet.
Prisca quies tacitis nemorum se condidit umbris,
Et colit angustos vita beata lares.
His mea pauperies populo secreta latebris
Regales animo divite vincet opes.
Sed neque longævis nemoralis Aricia lucis,
Nec liquido cepit me vetus Alba lacu,
Incluta Romulidum quondam Præneste voluptas
Nunc fitit, & nudis horret ubique jugis.
Explicat urbanos opulentia Tuscula luxus,
Sed nimia adscitus displicet arte decor.
Tiburis Herculei nobis juga candida rident:
Stat mea iudicio, Flacce, Camœna tuo.

Hic veniunt segetes, veniunt feliciter uvæ :
Autumno hic gravidus divite gemmat ager.
Hic non falsa suis oleagina silva colonis
Palladios colles & juga summa tenet.
Ipsa quoque asperitas, & rupibus insitus horror
Temperat ingenium deliciasque soli.
Quid loquar, ut nitidas Anio pellucidus undas
Volvat, & electro purior arva riget !
Jamque vago cursu & lapidosâ exercitus irâ
Mollior Herculeos lambere gestit agros,
Et veluti flabris crispatum lenibus æquor
Compositæ repens otia ludit aquæ :
Cum subito lapsu barathrum ruit omnis in imum,
Condendum inferno jam Phlegethonte putes.
Rorantes canâ latrant aspergine cautes,
Et furit horribili spuma Aniena sono.
Mox vasto exesi sorbetur montis hiatu,
Præcipitatque trucem per cava saxa fugam.
Trunca jacent ripis sæcli monumenta vetusti,
Et premit informes alta rûina domos.
Hæc Mæcenatem spirant, hæc rudera Flaccum,
Rudera Pieriis deveneranda sacris.
Hic illa imperio Romani par lyra mundi
Subdidit Italico carmina Graia jugo.
Hac obscura specu stimulante Sibylla calefcens .
Numine fatidicum sæpe canebat epos.
Excitus hisce adytis venit in præcordia vatum
Fervor, & acceptis ignibus ossa calent.
Parte aliâ vastæ semesa cadavera molis
Sparsa per Argeos conspiciuntur agros :
Quâ tua magnanimâ labor improbus arte coëgit,
Fucine, per dociles ire fluentia vias :

Ausus & obstantis perumpere viscera montis,
 Roma peregrinis ut frueretur aquis.
 Hic utinam æstivos liceat mihi condere soles,
 Vefanus Latios cum leo torret agros!
 Icarique canis vapor atrox incubat Urbi,
 Et ducunt mœstæ funera crebra viæ.
 Hinc reducem, inverso signis pluvialibus anno,
 Excipiat modico Roma beata lare:
 Et procul à strepitu fumoque volubilis aulæ
 Claudantur tacito gaudia nostra sinu.
 Sic placidis annis, & amœno carperer ævo,
 Et fluerent niveâ stamina nostra colo.
 Sed quid agis? tibi vana miser quid somnia fingis?
 Quid rapido jactas irrita verba Noto?
 Te sua Hyperboreus revocat sub plaustra Bootes,
 Sæva Lyaonii te manet axis hiems.
 Sæpe dies solidos patriis pulsabere nimbis,
 Sæpe rigens glacie vel nive canus eris.
 Cocta Ceres Tiburtino succedet Iaccho,
 Spumosaque cadet sæce perempta fitis.
 Parva queror: fugimus Phœbumque novemque Sorores,
 Et mea Pegaseus deferet ora latex.
 Jam mihi Perrhebi nemora evanescere Pindi,
 Jam dubius condi nube videtur apex.
 Castaliis mihi triste Vale jam redditur antris,
 Mœstaque supremæ vocis imago redit.
 Nubiferas gradiar sine te, FERNANDE, per Alpes,
 Dimidiaque animæ parte carebo meæ.
 Quaque sacras vidi quercus, montesque moveri,
 Me linquet Clariæ vox tua mista lyræ.
 NATALIQUE tui cultissima Musa Latinas
 Quàm procul heu nostrâ tendet ab aure fides!

Docta FAVORITI nobis mutescet arundo,
 Tritaque bucolicis labra canora modis.
 Fata reluctantes rapiunt, ducuntque volentes :
 Non moror, austeram sponte vorabo viam.
 Vos remanete, quibus pronâ fors annuit aure
 Molliter in gremio posse cubare suo.
 Vivite felices, ævumque agitate serenum,
 Quæque vehit vestras, provehat aura rates.
 Divus ALEXANDER, Superûm justissima cura,
 Orbis amor, Romæ vita decusque suæ,
 Vincit ut eloquio, sic Nestora vincat & annis,
 Utque beat juvenes, vos beet ipse senes.
 Me mea fata trahant, casus retrahantque per omnes,
 Me ferus Arctoo demetat ense furor.
 Me petat ipsa suis glacialis rictibus Ursa :
 Lætus ALEXANDRO sospite cuncta feram.
 Cumque severa meos evolverit Atropos annos,
 Lætus ALEXANDRO sceptrâ tenente cadam.
 Sospite ALEXANDRO mea molliter ossa cubabunt,
 Atque favilla levi nostra premetur humo.

EJUSDEM ODE AD FERDINANDUM

Electum & confirmatum Episcopum &
Principem Paderbornensem.

Ne artem Poëticam fortuna ac dignitati suæ indecoram existimet.

Q Ualis in fulvo peregrinus auro,
 Splendor Eoi lapidis coruscat,
 Et reperiçsum tremulo laceffit

Lumine Phœbum ;

Talis

Talis augustò in folio renidet
 Fœdere insigni sociatus altis
 Barbitos sceptris, & Apollinari
 Insula lauro.

Gaudet argutæ fidibus Camœnæ
 Lata Majestas, gravidamque curis
 Explicat frontem, populosque blando
 Temperat ore.

Largus ingentes animare grandi
 Spiritu Heroas, Deus ipse Regum
 Corda facundos agitante vates
 Concitat æstu.

Testis insani domitrix profundi
 Principis magni lyra, fabulosi
 Thracis irridens remorata pronos
 Carmina rivos,

Quæ per undosum sine fraude Pontum,
 Calle siccato, solidos utrimque
 Vitreâ muros imitante lymphâ,
 Mille phalanges

Duxit, & rursus coëunte fluctu,
 Nereum sacrâ feriente virgâ,
 Obviis hostes temerè infecutos
 Obruit undis.

Sensit horrendo furiatus æstro
 Fila Jessæ cytharæ Tyrannus
 Sæpe pacato pepulisse sævum
 Pectore Ditem,

Fila regali modulata dextræ,
 Quâ Gigantæ data plaga fronti,
 Quâ Philistæo cecidere fusæ
 Pulvere turmæ.

Gentis ô nostræ Pater atque Princeps,
Sanguis Heroum, geniale summo
Perge ALEXANDRO, senibusque sæclis
Pangere carmen. ••

Invidi dentes canis, irritosque
Sperne latratus, velut obstrepentes
Attidum nidis resonans canoris
Sylva paludes.

Dum Quirinales tibi, Tusculæque
Annuant lauri, Paderæque flavus
Tybris, & præceps Anio, Thetisque
Omnibus undis

Plaudat, & Phœbus *juvenesque Musæ*,
Horridum bellis, & adhuc calentem
Sanguine Arctoo, atque iterum ruentem in
Prælia Martem

Dulcibus captum modulis amœnâ
Valle reclinent, ubi sæva blandus
Tela furetur sopor, ac inermes
Vinciat artus.

Sic Tibi puri sine nube soles,
Sic ALEXANDRO nova sæcla prisco
Rideant vultu, domitusque Romam
Mundus adoret.

E J U S D E M E L E G I A

A D

F E R D I N A N D U M

*Episcopum & Principem Padibornensem, Comitem
Pyrmontanum,*

D E

A C I D U L A P Y R M O N T A N A.

Colle sub umbroso patulis quæ profilit arvis
 Pyrmontana tui me tenet unda soli,
 Unda salutiferis irrorans haustibus artus,
 Et jecoris rabidam nata levare sitim,
 Fæcibus & lentis tumidum expurgare lienem,
 Esuriemque pigro reddere ventriculo,
 Corporibus morbos, animo depellere curas,
 Parcarumque breves sistere docta colos.
 Miramur rapidum generosi fluminis æstrum,
 Et murmur resonans, vimque furentis aquæ,
 Cui ferrugineus vapor incubat, ac velut æstu
 Ignis inardescens, frigida lympa micat.
 Crederet Ætnæos tibi, Nympha, subesse caminos
 Ignotum carpens forte viator iter.
 At mihi dulce gelu per viscera perque medullas
 Serpit, & incluso liberat igne jecur.
 Talis erat prisco sæclis fulgentibus auro
 Captata innocuâ lympa beata manu,
 Cum lucri furor, ac dominandi sæva libido
 E Stygiis nondum profiliisset aquis;
 Nativas cum sylva dapes, humus herbida somnos
 Præbuit, & faciles antra dedere lares.

Hic

Hic quoque nonnulla est ævi melioris imago,
Cultus & antiquis mos revirescit avis.
Est procul hinc luxus, fatuæque superbia vitæ,
Oblita est blandos aulica Suada dolos.
Obsidet hic nullus Magnatum limina fastus,
Sustinet exigua Dux habitare casa.
Aurea libertas pictis spatatur in arvis,
Et caput attollit semisepulta fides;
Rident prata, nemusque, serenus ridet & æther,
Candidus & læto ridet in ore jocus.
Dulcis, ave, Fernande, tuis à fontibus: hic Te
Promptior irriguo gutture Musa canet.
Hic Aganippæos videor mihi ducere succos:
Hunc tetigit campum Bellerophontis equus.
Fontibus Aönides gaudent vatesque canori,
Musa quoque in fontes ingeniosa tua est.
Quis caput Amisii, Paduli quis nosceret undas,
Si tua pro Nymphis muta Camœna foret?
Marmora docta tibi nascentia flumina debent,
Flumina carminibus nobilitata tuis.
Attamen imber edax abolebit, & atra vetustas
Marmora: posse mori carmen & unda negant.
Sit tibi carminibus, sit par tibi fontibus ætas,
Ut tibi vena fluit, sic tua vita fluat.
Vena fluit placido dulcique simillima rivo,
Currat inoffenso vita beata pede.
Vena potest vivo minùs exarescere fonte,
O utinam vitæ lex foret illa tuæ!
Sed quia lethiferi stant jura adamantina fati
Aurea Te serus vesper in astra vehat.

ADOPTIVORUM CARMINUM
DE EODEM
AD FONTEM MELLITUM
ACIDULÆ SMECHTANÆ

In Diœcesi Paderbornensi.

Fons in umbroso venerande luco,
Jam diu Phœbo sacer, ac Saluti,
Qui levas fessum jecur, & palato
Mella propinas
Atticis longè potiora succis,
Quos per Hyblæos studiosa colles
Turba formosi populata florem
Condidit anni.
Montis intonsi decus & voluptas,
Cujus extremo pede, bullienti
Profilis æstu gravis è metalli
Divite vena;
Principem ferva mihi FERDINANDUM,
Patriæ Patrem, tua concinentem
Nobili plectro, tua mella pleno
Ore bibentem.

JOANNES VVISSE

Attendoricnsis E SOCIET. JESU

AD

FERDINANDUM

*Episcopum & Principem Paderbornensem, die S. URSULÆ
Virgini & Martyri sacro, XXI. Octob. An. M. DC. XXVI.
feliciter natum.*

HAc Lucina die te gignit provida terris,
Quâ subit æthercos URSULA virgo polos:
Ut,

Ut, simul ac terris cœpisti vivere, vivat
 In cælo vitæ magna patrona tuæ,
 Componatque tuos meliùs diva URSULA mores,
 Quàm fingit catulos Sarmatis URSÆ suos.
 Quos licet integris lingat, fingatque diebus,
 Fingit ad exemplum bruta magistra suum,
 Deformes vultu, pede pigros, ungue rapaces,
 Et formidando rictu, oculoque truces.
 Ast tibi divino felicior URSULA fato
 Impendit nutrix blanda ministerium.
 Te docilem, gnavum, facilem, comem atque benignum,
 Musarum & Charitum finxit ad ingenium.
 Hinc neque tela tibi puero placuêre, nec enses,
 Nec venatricis cornua rauca DEÆ.
 Retia nec volucrum, neque nassa, nec ære recurvo
 Hamus piscosis prædo timendus aquis;
 Sed liber, atque labor, pax, & mens conscia recti,
 Et pudor, & castæ religionis amor.
 Hæc puero tibi ludus erant : his acta juventus :
 Horum aderit vigili cura suprema seni.
 URSÆ FEROX catulos gignit, fingitque FEROCES :
 DIVA SUI SIMILES URSULA VIRGO VIROS.

E J U S D E M

A D E U N D E M

Sirena Cal. Januarii An. M. DC. LIX.

P R Ô tibi quot sacris Jani, Fernande, calendis,
 Magnificis verbis muneribusque vovent,

Cur-

Currat ut auspicio tam læto haud degener annus,
 Multiplicentque tuos fata serena dies!
 Quid faciam? cui, læva suis fortuna negatis
 Deliciis, vacuum fecit hiare penum.
 Non ibi capta gemit volucris cum Phaside perdix,
 Nec caput Ætoli cum sue Certat apri:
 Massica nulla fluunt, triplici neque cæcuba clavi
 Servantur vetulis condita vina cadis.
 Omnia deficiunt, quæ si fortuna dedisset,
 Digna foret PATRIÆ pro PATRE strena mihi.
 Nunc vacuas palmas, & inanes porrigo chartas,
 Quas bona mens verbis fert comitata bonis.
 Hac pauper vacuæ supplebo munera dextræ,
 Et velut ex cornu divite fusa feram.
 Indus Erythræo mittat de littore gemmam:
 Nobilius gemmâ, Mens bona, munus erit.
 Quantum gemma luto distat, mens candida fucō;
 Tantum hæc una omnes strena præbit opes.
 Nam bona res non est, quam possidet, & dat, & aufert
 Qui malus est. hanc tu ne refer inter opes.
 Una est è multis, Bona mens, possessio: quam non,
 Qui malus est, aufert, solus habetque bonus.
 Hanc cape sis, Fernande: Tibi nam munere Divûmi
 Rara, bonam mentem quæ capit, Arca domi est.

E J U S D E M

A D E U N D E M,

De Morte ALEXANDRI VII. Pont. Opt. Max.

Vixit Alexander, charum caput Urbis & Orbis:
 Heu! FERNANDE, animæ portio magna tuæ!
 Vixit

Vixit Alexander, passis Elegia capillis,
 Ut Progne, querulis ora resolve modis :
 Per ripam Amisii, per rura vagare Visurgis,
 Mœstaque lugubri pectora plange manu.
 Fons Paderæ doleat, doleat lacrymosus Aliso :
 Deque suis fundant flumina luminibus.
 Funus Alexandri, & Fernandi, heu ! ducitur unum :
 Parti animæ nescit pars superesse suæ.
 Alter in alterius vivens hærebat amore :
 In morte amplexum strinxit uterque suum.
 Mors nequît gemini nexum dissolvere cordis :
 Major germano vis in amore fuit.
 Ergo in Alexandri est Fernandus corde sepultus :
 Urnâ non poterat nobiliore capi :
 Quam simul ac tetigit, tactâ hæc vox abstinit urnâ ;
 FERNANDUS MEUS HIC VIXIT, ET HIC SITUS EST.

E J U S D E M

A D E U N D E M

Varia antiquitatis monumenta per Diœcesin Paderbornensem erigentem.

Q Uot latè ad Paderam, vicinaque mœnia, & arces,
 Ad nemora, & fontes, templa, sepulcra, larès,
 Marmorei surgunt cippi, & Te authore loquaces
 Incisis referunt sæcula prisca notis :
 Tot monumenta Tibi magis ære perennia surgunt,
 Tempori, & irato prævalitura Jovi.
 Ingenium, nomenque tuum, FERNANDE, nec ipsi
 Manes, nec quæ sunt marmora muta, tacent.

J O A N N I S U N G S P E C K ,

Arensbergensis, Canonici Præmonstraten-
sis Propempticon

A D

F E R D I N A N D U M
FURSTENBERGIUM

Romam proficiscentem. An. M. DC. LII.

I Bis Romuleas jam cognitus hospes ad arces,
O generis antiqui decus!
Præclarisque atavis melior, Fernande, propago,
Quem docta nascentem sinu
Excipiens Pallas, nequicquam ignara futuri,
Toto rigavit flumine.
Nec te iter immensum, terræque pericula terrent,
Quæ plurima insuetus feres;
Nubibus insertas donec superaveris Alpes.
Tu verò propositi tenax
Ibis, easque precor, veteris miracula Romæ,
Et decora visurus novæ.
Tantum ex infami fugitivæ plebis asylo
Populis triumphatis caput,
Prævidit D E U S omnipotens : victricibus armis
Ut, quos subegerat priùs,
Extremos latè terrarum denique fines
Sacratiore Numinis

Imperio regeret, fascesque æquaret Olympo.

Hic multus inter arduos

Reginæ tumulos Urbis, doctissimus olim

Antiquitatis arbiter

Cominus intento lustrabis lumine muros,

Cruore conspersos Remi.

Fortius hic Brenno Capitolia celsa subibis,

Nil proditores anserum.

Jam metuens cantus: erit & quandoque voluptas

Priscis notatas arcibus

Effigies spectare ducum, fractosque Sicambros,

Pœnoscve, non fidum genus.

Quod si etiam Latiae torrentia flumina Suadæ,

Totóque regnantes foro

Marcos aspicias, sacra vel vestigia vises

Secessum amantis Virgili,

Tum quis enim trepidos quatiet calor entheus artus?

Quos tibiæ dabunt sonos?

Qualis Threiciæ cantu testudinis Orpheus

Aurita sistit flumina,

Emotasque rapit sylvas; aut tempore verno

Ramis sub arborum sedens

Expedit artificem Philomela ad carmina linguam,

Carumque deplorans Ityn

Occupat attonitas aures non simplice Suadâ:

Sic te Latini divites

Fundentem eloquii rivos, doctoque moventem

Fides amicas pollice,

Aspicient tacito mirantes ore Quirites.

Et immemor suetæ viæ

Hærebit numeris stupefacto flumine Tybris.

Seu Martios iterum tubâ

Concelebres L E C H O S ; fatalia nomina Thraci :
 Seu C H I S I A N A S Lesbio
 Extollas plectro Q U E R C U S , dignosque Tibullo
 (Non Te alter huic propinquior)
 Decantes Elegos , & cedro digna loquaris :
 Non fallet expectatio.
 Ipsæ etiam tali gaudebunt carmine dici
 Orbis potentes insulæ.
 Perge igitur Fernandæ , tuus quo te rapit ardor ,
 Per alta montium juga.
 Nil tibi inaccessum : terras superevolat omnes
 Tuus ille pernix Pegasus.
 Magna inter doctos jam de te fama Q u i r i t e s ;
 Ignotus haud certè advenis ,
 Si non visus adhuc. Sic te præcurrit euntem
 Felicis ingenii vigor.
 Perge bonis avibus , facilis bene spondet Olympus ,
 Et ille fortis Aliger ,
 Qui Tobiam quondam per mille pericla secutus ,
 Ubique dilecto comes
 Hærebit lateri , patriasque reducet ad oras
 Lauro revinctum debitâ.

E J U S D E M

A D E U N D E M.

D U m nobis docto transmittis munere Romam ,
 Noscitur è tumultis quantâ fuisse suis ,
 Quanta recens æquatvè suas , vincitvè ruinas ,
 Tot Divûm melius splendida culminibus.

Et Tiberim pavidum subiti formidine Martis
 Alloquii mulces nobilitate tui,
 Aut CHISIAM celebras non impare carmine Musam,
 Dum rursus notos involat illa sinus.
 Haud miror, plaudens stupeat quod talia Roma,
 Et rediisse sibi sæculâ prisca putet.
 Sat patet Aöniis hæc te dictasse viretis,
 Bellerophonteï quæ rigat Humor equi.

LUCAS HOLSTENIUS

Bibliothecæ Vaticanæ Custos primarius,

FERDINANDUM
 FURSTENBERGIUM,

ALEXANDRI VII. PONT. OPT. MAX. *Cubicu-
 larium intimum, Ratisbonam legatum, ut Eminen-
 tissimo Cardinali de Wartenberg, Episcopo & Prin-
 cipi Osnaabrugensi & Ratisbonensi purpureum pi-
 leum imponeret. An. M. DC. LX.*

Non mihi suppressos thesauros strangulat arca,

Nec censum reditu divite fœnus alit;

Sed nummis vacuum levis implet aranea saccum,

Nec latius occulto pondere zona gravat.

Ingenium mihi fundus, opes & sarcina libri,

Et temerè sparsis illita charta notis.

Quocirca, Fernande, boni nunc consule munus,

Pauca profecturo si folia ista damus.

Hoc utcunque ferant venti, vel diluat imber,
Sub nostro hærebit pectore fixus amor.

MARCUS ANTONIUS
MENICONIUS,

Perusinus, Eques Hierosolymitanus,

AD
FERDINANDUM
FURSTENBERGIUM

ALEXANDRI VII. PONT. OPT. MAX.
intimum Cubicularium.

QUale mihi nuper, juvenis clarissime, munus!
Munus Apollinæ quod peperere manus.
Quale decus Charitum! quæ donas plena lepore
Carmina, qui canitur, Principe digna suo:
Principe Alexandro, cui tantum sæcula debent,
Sæcula pacatis aurea temporibus;
Quantum olim Augusto debere est visa vetustas,
Cui plausus vatum mille dedere chori.

N A T A L I S
 R O N D I N I N U S ,
 A L E X A N D R O V I I .
 P . O . M .
 A B E P I S T O L I S A D P R I N C I P E S ,
 F E R D I N A N D O
 F U R S T E N B E R G I O ,

*Musas Philomathis juveniles auctiores cultioresque
 in lucem proferenti.*

T Andem revisunt aureum jubar solis
 Musæ Philomathis: gratulentur, & plaudant,
 Queis & labores, & pericla, quæ terris
 Marique subeunt, aut severa curarum
 Lyrâ subinde tibiâque solari
 Incessit ardor. Quem sequantur, hîc cernunt.
 Hæc ille, seu dum præliantibus fertur
 Per alta ventis, quâ fretum Cyclopeis
 Fervens cavernis astra verberat fluctu,
 Seseque mox resorbet & suas iras:
 Sive arduis dum nubibus caput cinctas
 Nivibusque numquam non jacentibus canas
 Volat per Alpes: fessa namque votorum
 Europa cursus urget, atque opem poscit:
 Hæc ille, dum Mars fas nefasque permiscet,
 Unâque pestes ceteræ diem invadunt,
 Et clade tumidus decolorque * Vistillus,

Q 3

Albis-

* Vistillus idem qui Vistula Plinio lib. 4. cap. 14.

Albisque, & uno haud nomine in mare irrumpens
 Miratur ire Rhenu's haud suos fluctus,
 Et spes in illo magna nititur pacis :
 Hæc ille, tanta mente dum sedet moles,
 Hæc ille cecinit, sicubi fatigatum
 Suis sub antris frigidaque lucorum
 Umbrâ virentium recreavit Euterpe,
 Seu Dorium quid, sive Barbarum mallet.

Sed ille, curas fallere, ac sibi tantum
 Intusque gaudens canere, nil petens ultra,
 Non puncta famæ, pollicesque laudantum,
 Feliciumque præmium libellorum,
 Imbuta cocco lora, regias chartas,
 Pictum umbilicum, luteamque membranam,
 Arancofo jusserrat sinitur turpes
 Latere, tenebris abditos inaccessis
 Tot elegantis ingenii sacros fœtus.
 Heu dura patris jussa ! tam legi digna,
 Tam læta cultu Musa, tot venustatum,
 Tot & jocorum non nocentium mater
 Sic delitescat involuta deformi
 Silentio, noctesque carpat æternas,
 Squalens, iners, ignota ? Non tua id sivit,
 FERNANDE, pietas, indolesque Phœbeas
 Attollere artes nata, cui, poëtarum
 Plaudente cœtu, literarios fasces
 Submittet olim Roma, quæque nunc profers
 Debebit ordo serus cruditorum.
 Tu namque patris atque Apollinis plenus
 Suis latebris erutæ sinum pandis,
 Fœdaque primùm temporum levas tabe,
 Dein & nitorem, & gratiam, & decus formæ

JUVENILE adauges, & frui jubes cælo.

At vos edaces, noxium genus, blattæ,
 Abigenda longè lævibus lues chartis,
 Alibi repostam quærite in cibum prædam;
 Seniumque turpe pascite, aut putres libros,
 Quos rugæ, & ætas, & situs fatifcentis
 Capsæ peredit, aut teredinum morsus.
 Perennitatem Phœbus his licet Musis,
 Triplicesque canum spondeant Deæ nomen,
 JUVENILE numquam concidet decus formæ.

NICOLAUS HEINSIUS

DAN. FIL.

F E R D I N A N D O

FURSTENBERGIO,

Dum hortos Tibure Estenses unà cum Heinsio perlustrat, aquarum hinc inde è terra per occultos turbos profilientium vi subitâ prater expectationem circumvento & consperso. An. M. DC. LII.

Lustrat Atestinos dum Furstenbergius hortos,

Quà natat irriguis fertile Tibur aquis;
 Ecce repens prorumpit humo, vatisque disertum.

Os petit, & Clarios lymphæ dolosa sinus;

Fallor? an exegit per hiantis viscera terræ

Non expectatas obvia Nais aquas?

Dum decus Aëniis hoc invidet illa Deabus,

Et premere amplexu gestit inepta suo.

Thiodamantæus non est puer, improba, non est;

Hos sibi Calliope vindicat alma sinus.

Supprime, Dædalei custos lasciva vireti,
 (Nil agis insidiis, perfida Næi, tuis)
 Supprime fallaces, Anieni filia, lymphas.
 Non nisi Castalius ille rigandus aquis.

EJUSDEM AD EUNDEM
 E L E G I A.

An. M. DC. LII.

SIC, fidibus quæcumque cano credenda Latinis,
 Fama velim facili combibat aure memor;
 Et fero Lethæa rogo post fata supersint;
 Muta meam mecum nec tegat urna chelyn;
 Quæque patet pronâ tibi Castalis obvia ripâ,
 Se quoque libandam præbeat unda mihi:
 Gaudia succurrunt ut nulla frequentius istis,
 Quæ de convictu sunt mihi nata tuo.
 Una domus, mens una duos sociabat amantes,
 Et chelys alternam non semel una manum.
 Quas grates, Tiberine, tibi, quas, Roma, pararim?
 Vos mihi tam cultum conciliaſtis ebur.
 Sæpe diem, quam longa fuit, sermone peractam
 Duximus æstivi sæva sub ora Canis.
 Sæpe supervênit properatâ nocte diurnus
 Lucifer, alloquiis invida stella meis.
 Ausa nec admissio succumbere lumina somno:
 Garrula vix solitas ora tulere dapes.
 Vocibus ô quoties Latonia conscia nostris
 Cum se proriperet, visa venire mihi est!
 Filius id Thetidis fuit Actoris ante nepoti:
 Id Phryx Euryalo Nisus & ante suo.

Mutua certabat concordia, mutuus ardor.
Hæc mihi lis tecum sola perennis erat.
Hæsit in ambiguo pulcræ pia palma palæstræ :
Neutraque pars vinci, vincere neutra tulit.
Perstet, & absentes par jungat nexus amicos ;
Vinculaque ætatem non labefacta ferant.
Pondera ne votis defint sua faxit Apollo ;
Auspice quo nobis hic adolevit amor.
Spumea nos Anienis aquam per saxa ruentem,
Plurimus illiso qua tonat amne fragor ,
Nos unà dominæ senium lustravimus urbis ;
Prisca suburbani nos monumenta soli.
Tybris amicitia fuit arbiter, ille duobus
Contiguo cultos alluit amne lares.
Proxime , dic, sociis, Tiberine, penatibus, cia ;
Pectora, dic, tetigit sanctior ecqua fides ?
Dic, si voce mei vox blandior ulla sodalis
Per vada stagnantes flava moretur aquas.
Hanc certè è patrio Tiberinides amne sequuntur,
Plaudit & argutis Naias uda sonis.
Ipsa etiam hanc pronis bibit auribus Ilia vocem,
Ilia quam Marti tam tibi grata parens,
At colle ex omni lætùm vaga succinit Echo ,
Nec gemere Ismarium jam memor ales Ityn.
Ah quanto tua me, Tiberine, beatior unda est !
Vatis Apollineo cui datur ore frui.
Tu modo fac sacrum serves, pater optime, Musis,
Quod tibi Teutonico venit ab orbe, decus.
Me nunc ad patrios promptum tenet ire penates
Gallia Romulæ nomen adepta togæ.
Hic ubi Medoacum Euganeis modo collibus ortum
Intuor ; aut Athesin, docte Catulle, tuum.

Tu quoque Virgilium quæ Phœbo lympa dedisti,
Fatidicæ Mantûs lympa beata, trahis.

Aut electrifero qui volvitur amne per agros,

Me Phaëthontêi detinet unda Padi.

Unde ego nubiferam perrumpere molior Alpem,

Et nive canentis scrupea terga jugi.

Interea decus ille meum, meus ille sodalis

Quidnam agit? herbofo num fovet umbra sinu?

Margine dum solitæ citharam moderatur in undæ,

Et canit æterni numine digna loci.

Mulcet an auratæ testudinis illice cantu

Chisia purpureos Musa decora sinus.

Ipsa fidem vicina neci cui cessit eburnam

Maxima Pontificis dextera, Phœbe, tui.

Urbanus nunc alter, agro nova gloria Tusco,

Piëriis claram civibus ornat humum.

Hunc meus ille sui veneratur Apollinis instar;

Huic terit, huic Clarias obsidet usque fores.

Quicquid aget, memori non excidit Heinsius ore.

Jam satis expertam novimus ante fidem.

Dum loquor, aëriæ salebrosâ cacumina rupis

Pænè in eos tangunt, mox superanda, pedes,

Care vale, Fernande viam meditamur: eundum est,

Me rigor Alpina jam premit, ecce, nivis.

S T E P H A N U S

G R A D I U S,

A B B A S

SS. COSMÆ ET DAMIANI,

PATRICIUS RAGUSINUS.

A D

F E R D I N A N D U M

F U R S T E N B E R G I U M,

*De Musarum dissidio cogitantem.**An. M. DC. LIV.*

S Umme Deûm, sævi domitor Pythonis, Apollo,
Fatidica quem Delos suum,
Quem Cyrrhæa vocant, Pataræaque culmina regem
Certâ timendum cuspide;
Quemque novem doctæ, Parnassia turba, Sorores,
Triplex & ambit Gratia.
Ad curas hominum precibus si flecteris ullis,
Vatem tuorum fontium,
Aöniæque decus telluris, ab usque remoto
Rheni petatum litore,
Ut Latium, utque ipsos linguæque togæque Quirites
Docto admoneret carmine,

Ne

Ne patiare tuis, Musarum ac dulcibus ulnis
 Divina mitis ingeni,
 Et studiorum aliò spectanda avertere dona.
 Sit proprius in castris tuis
 Miles, seque tuis æternùm exerceat armis,
 Omnemque lucem nomini
 Inde suo, laudemque petat, famamque decusque :
 Quamvis avitus inclytæ
 Non alium magis ornet honos, & gloria gentis,
 Nec plura quisquam imaginum
 Lumina Saxonicos numeret decorantia fastos.
 Ne desidere inglorium,
 Neu cessare velis juvenem, quin divite venâ,
 Tuo & benigno numine
 Utatur, seu facta gravi regumque ducumque
 Narrare tendat carmine,
 Threïciaque avidos testudine fallere morsus
 Oblivionis invidæ :
 Seu leve quid gracili modulari malit avenâ ,
 Seu dulciore barbitò
 Jam nunc vernantis florem oblectare juventæ ,
 Severiora differens.
 Quin age cunctanti (quod jam meditatur, & imò
 Dudum volutat pectore)
 Egregii ut laudes FABII præclaraque facta
 Ventura doceat sæcula ,
 Adde animos, sacrâque feri præcordia flammâ.
 Dicat serenæ in arduis
 Rebus mentis opes, curisque ingentibus æquum
 Stabilis vigorem consili ,
 Quo Latium, quo res Italæ, quo Maximus orbis
 Superbit INNOCENTIUS.

Dicat

Dicat inexhaustum ingenium, moresque benignos,

Nec purpuræ quicquam suæ

Debentem, & propriâ virtutem à luce coruscam.

Dicat profanæ impervium

Pectus avaritiæ, nullisque obnoxia corda

Cupiditatum fluctibus,

Atque animi intrepidas inter sublimia vires :

Nec litterarum & artium,

Nec cultæ sileat rarissima munera linguæ ;

Sive expedita vinculis,

Nataque ad humanos placeat facundia cœtus;

Seu debita Superûm auribus

Verba Medusæ manantia fontibus undæ.

An clariorem carminum

Uſquam alibi segetem possit laudumque parare,

Elatiore aut spiritu

Impulsas animare fides, famæque perenni

Servire gloriosius ?

Annue Phœbe, sacrique animis illabere vatis.

Sic semper æthera incolas :

Sic tibi nulla genas cœdet lanugo, nec umquam

Defit capillis laurea.

Dumque canis trifido cæsos Titanas ab igne,

Patris triumpho turgidus,

Cuncta tibi Superûm plaudent convivium, te que

Diu stupentes audiant,

Frustra jactatos referentem in sidera montes :

Nec hauriant libentiùs,

Quæ sibi nectareo Phrygius rorantia succo

Fundit minister pocula.

I D E M

De artocreate Britannico;

A D

F E R D I N A N D U M

FURSTENBERGIUM

ALEXANDRI VII. P. O. M.

Cubicularium intimum:

CUm Tibi de tetricæ studiis, Fernande, Minervæ
 Mollia languebunt olim præcordia: si non
 Aspernaris ab Oceano missa usque Britanno
 Romanum ad luxum pinguis præcepta culinæ;
 Accipe languenti quâ possis arte palato
 Consulere, & stomachi fastidia vincere inertis.
 De lactentis adhuc primum cape clunæ juvencæ,
 Hædique & leporis dorso, quæ in frustra minuta
 Concisa, & liquido diluta abdomine porcæ,
 Jure natent, grandis pullus quò ferbuit, & quod
 Bubula diffusis unxerunt ossa medullis.
 Accedant, turris tibi quas, corsque ima volucres
 Educat, atque alis; & pelle, & pectoris alba
 Carne dapem faturent; teneros ante omnia lactes
 Adde memor, seu sint agnis, seu mollibus hædis
 Avulsi, tereti nec te ficedula lumbo,
 Nec te flamenti coturnix uda faginâ
 Prætereat; terræ desint nec tubera, si quæ
 Provida non parcis strinxere tonitrua cœnis,
 Cum pipere, & Siculæ dulci cum pulvere cannæ.

Hæc

Hæc tu cuncta simul cautè, circumque, supraque
 Eductæ in cameram Cereris testudine claude,
 Ovis, ac tenui molitus crusta butyro,
 Et croco, & Eoæ fragrantî cortice sylvæ.
 Dein gravidam lento massam committe calori,
 Angustò validus quem fuscitet ignis in antro.
 Excoctamque diu, multoque ardore rubentem
 Extrahe, & in patinam compone, & sic properata
 Inter amicorum lætos ede fercula cœtus.

VITUS BERINGIUS

DANUS

Regiæ Majestatis Daniæ historiographus,

A D

FERDINANDUM

Episcopum & Principem Paderbornensem.

Reverendissime & Celsissime Princeps,
 Domine benignissime.

Non indignaberis, quod ignoti te alloquantur: Effecit virtus tua, & illa illustris supra sæculi genium evecta indoles, ut latere nusquam gentium possis: non latius provectâ sacri muneris tui, quam scientiæ & doctrinæ famâ. Ego jam olim Romæ adoravi nominis tui celebritatem; jamque è medio Septentrione ad has Pymontanas acidulas delatus, offerrem coràm cultum animi, ni valetudo corporis obstaret. Quod unum potero, venerabor è longinquo famam tuam, cujus magnitudine reversus in patriam

patriam, implebo Danos meos, publico etiam scripto professurus olim, quid Principi non tam Germaniæ quam doctrinæ omnis & humanitatis, Poëtarum natio debeamus. Fave interim, Celsissime Princeps, tam pio conatui, quodque ad magnitudinem tuam unicum jam superest, serò mortalitatem dedignare.

Furstenbergiade, priscæ qui nomina Romæ,
Et quicquid jactat Græcia culta, tenes :
Cui calami jus omne suum transcripsit Apollo,
Et Musæ positis obstupère lyris :
Quid tibi cum lituis, & sacræ sorte tiaræ est,
Et meritum cingit quæ tibi mithra caput ?
Nempe ut bis Princeps, Musas modereris & aras,
Hinc hominum augustus rector, & inde Deum.
Et tua perpetuis canescat gloria seclis,
Dum fuerit studii, dum pietatis amor.

ADOPTIVORVM

CARMINUM

LIBER SECUNDUS,

QUI

VIRI ILLUSTRIS

CASPARI FURSTENBERGII

Musas, & aliorum Poëmata Furstenbergiis inscripta, complectitur.

ADDITIONAL

TO THE

GENERAL

OF

THE

OF THE

OF THE

OF THE

OF THE

OF THE

OF THE

OF THE

OF THE

CASPARI FURSTENBERGII,

A V I,

*Archisatrapæ Westphaliæ & Angaria, præfecti
in Bilstein, Waldenburg, Fredeburg,
Fritzlar, & Navvenburg,*

Moguntini, Colonienfis, & Paderbornenfis Confiliarii intimi, Domini in Schnellenberg & Watterlapp. Advocati hereditarii in Graffschafft, &c.

Viri, plurimis ad Cafares, S. R. Imp. Principes, & Comitæ legationibus, magnâ prudentiâ, fidei, eloquentiâ, & doctrinâ laude obitis, hoc & proximo superiori feculo celeberrimi,

GENIUS AULICUS.

M Olliculæ procul este aures, nudi procul este
Ofores veri. Sincero ludere Phœbus
Noster amat verfu. Num celsa palatia pandam
Naribus, & Vatis Venusini digna lucernâ?
Sic juvat Aönides: sed quid non cognita vobis
Aggredior? vestro stat virtus ardua colle
Difficili per saxa viâ tentanda, neque illi
Fas est, aut vobis Regum sublimia tecta,
Auratasque subire fores. Heliconâ rigentem
Frigore, & hirsutas habitatis Apollinis arces.
Secula nostra novis, nova nostris moribus ætâs
Imperat alternis. laus est ad tempora mentem
Vertere, & ad Zephyros diducere vela secundos.
Ut solet adverso volucris Junonia Phœbo
Gemmea laudatæ jactare volumina caudæ.

In vetulos non sic ritus modò stringimur. absit.
Arbitrii tibi jura tui; metamque nefas est
Sciano monstrare Jovis Salmonea telo
Dejectum, currus ausum simulare tonantes.
Consiliumne foris? vereor ne Numine vatum
Destituar. Justas præpostera facta querelas,
Numina rara cient. Verùm si Persius atro
Carminе vefanos potuit ridere Quirites.
Anne ego? sic quamvis non humectata fluentis
Labra Caballinis madeant. Solum mihi splenem
Cogit in effusos bilis commota cachinnos.
Anne ego? si lævo bullatas lumine pompas
Obfero, dextrum fatear, vel carmine prodam?
Scilicet Heroum fulvâ Rex Lydus in aulâ
Degit: at in quantum magno clamore Solona
Fumantem ante roguм testatus, atrocia Cyri
Imperia exorat, sortem miserantis acerbam.
Albane? tanta duces deceant? post terga relictos
Vivere conveniat secum? depasta supellex
Aurea, detritæ chlamydes, & murice multo
Quæ rubuit toga pota priùs, nunc mille fenestris
Lucet, & incurvo debet ludibria naso.
Non genus antiquum Priami, nec nomina longa
Paupertatis onus tolerant, naturaque suadet
Consona Sisyphios Irum sensisse lacertos.
Quò vocat ergo manus dives mercator, eamus:
Dona coacta dabit vix institor hiscere contra
Raptores ausus dominorum exempla secutos.
Si neque sufficient angustis talia rebus,
Auxilio Cluennus erit, qui præfuit olim
Militiæ, tacitoque æraria bellica furto
Diminuit, cujus propè mortem causa laborat.

Illi reddet opes, illi dabit Alpha salutis,
Et Themis in trutinâ suspendet nostra favorem,
Servatis ungenda bonis. Sic vivimus aulæ
Turba, Syracosii jurati in verba Tyranni.
Post Catilina sumus. turpem manet anxia culpam
Poena, sed in tanto discrimine cornea fibra est.

An fileam? sine fine dapes petit aula calentes
Sole peregrino, & Baccho devota parenti
Assiduis festiva scyphis Dionysia vivit.
Cum jam tecta recens pingit Tithonia, lèx est
Non priùs, æthereum quàm transiit alta lacunar
Cynthia, & extenso glutiti pondere clunis
Ventriculus veniam poscit, secedere: pulchros
Dant ea sana jocos, vario clamore modoque
Ebria dispositum mensæ gyrantur in orbem
Pocula, gustatas quæ reddunt frontibus uvas,
Et Centaureo turgentia cornua fastu.
Tantane, sic agimus, nobis pater otia fecit?
Sint procul à nobis Curii, qui talia damnant
Orgia, potantem nec amant examen ad unguem.
Quàm pulchrum est digito monstrari & dicier? Hic est,
Qui meruit primam Bacchi certamine palmam
Gemmatum cratera, scyphisque capacibus omnes
Vicit, & epoto donatur Saxonis auro.
Victor at illè jacet vino somnoque sepultus,
Multa canat quamvis tubicen, mediamque per urbem
Spectandum lectica vehat. cras uritur intus,
Et dolet obscurâ malè caligantia nocte
Lumina fuscari, totosque labascere sensus.
Tendis ad exitium. mictâ speculatur in undâ
Hippocrates, crasso quæ internos augurat æstus
Aspectu, & longos consuevit prodere morbos.

Hic tibi Phœbe datur sanie confectus inertī
Pulmonem, & lentā vitiatus tabe medullas.
Nunc Epicureo spectemus de grege porcum,
A summā qui venit harā. jam proximus Orco
Extremam trahit ille animam. num crastina vitæ
Tempora dant tristes admoto pollice Divæ ?
Sic vixisse juvat, ne nos vixisse propinquā
Pœniteat metā, sapimus jam funeris horā
Vicinā, laniantque ream sua crimina mentem.
Hoc Mausolæo tegitur, qui Principis aulæ
Præfuit arcanis, & juris in arte peritus
Mystra refingendi, prudens, facundus, & alta
Nobilitate fatus, rerumque politus ab usu,
Consiliis magnos inter confedit Achivos.
Nulla fit hîc fidei, sanctæ pietatis, & æqui
Mentio, quæ dudum fugere palatia Regum,
Inque locum rediere nefas, simulatio, technæ,
Ambitus, impietas, livor, gula, crapula, fastus.
Cernis ut ingenti felix programme nigræ
Scribitur in tumultu ? nullā qui parte beatus
Noverat hîc turbæ securos ducere soles.
Parciùs ista viros tangunt. Tu summa potestas
Turpis in exemplum ne fabula Sardanapali
Prospice devenias. facti prudentia sera
Gaudia rara feret. Sed quàm ferale minatur
Aspera frons rugis ? perit uno gratia verbo
Vitrea, & æternas pro munere commodat iras.
Dum mea felices implebant carbasæ venti,
Sceptra potente manu torquebam, & Principis Atlas
Alter eram, si forte graves dabat altera curas
Cura parens, nostras nutu spectabat herili
Clitellas, tacitum vectans sine pondere pondus.

Quid non sustinui secreto Principis usus
 Pectore? perque nives gelidas & cruda vagatus
 Frigora, Sarmaticas potui calcare pruinas,
 Ire per exustam Libyen latrantibus astris,
 Æquoraque infano ridere tumentia fluctu.
 Nunc miser, ut gravius ruerem, sublatus in altum
 Icarus, ob verum mediâ sublimis ab arcę
 Turbor, & in nostros quæ concessere favores
 Fortunæ subitâ recidunt commota ruinâ.
 Regia quæ magno patuit, nunc cardine moto
 Ivit in amplexus unitis janua furis.
 Non ego credideram, siquando odiosa Lycæ
 Murmura, barbatos inter diffusa magistros,
 Ingenuis aulas vetuere: at credere fas est
 Experto, sit vita tibi nisi dulcis amator
 Ah ruit irato metuendum fulmen ab axe,
 Post densæ veniunt altis ex montibus umbræ.
 Dixit &, ecce minor nostras qui nuper habenas
 Audiit, imperii nunc fascibus assidet. Eheu
 Quis superi! dolor est; & quæ dementia nostro
 Sic aliis sapuisse malo. Num audire gementem
 Plura libet? dicam ejectâ tibi vera salivâ.
 Pro voto tibi cuncta fluunt. fortuna petitam
 Invidiam legat. Miser est, cui nomina desunt
 Obvia livori, titulisque impleta superbis
 Charta capax. viden? ut vicinam figulus ollam
 Carpat, & extractâ pungatur pauper aristâ?

Quando Giganteo surgunt tibi vertice cristæ
 Altiùs, exuviisque Tyri, pictusque superbo
 Murice, ventoso titulorum folle tumescis,
 Fervidus Herculeas ultra contendere Gades.
 Insidiis odioque peris, & ponè secutus

Livor, iners vitium, vestigia prensat euntis
Tramite præcipiti, velut umbra pedissequa solis
Flammivomos sectatur equos, profugumque colonum
Niliaco Crocodilus agro. tunc ergo dolosâ
Fronte fidem simulat, pectusque ostendit amicum,
Sed coquit exitium. mediâ latet anguis in herbâ;
Mente nigrâ, vapidoque sinu vulpecula gannit.
Virtutis quoque præco tuæ speciosus, honorum
Ludit in ampullis, & sesquipedalia verba
Eliquat. interea occulto mala vipera morfu
Te necat absentem, moresque arrodit iniquè.
Tunc ait, ô quanto discrimine, Maxime Princeps,
Consortem regni pateris, qui despicit omnes,
Omnibus imperitat, tibi majestate secundus
Anne volet regnare diu? nec sceptrâ laceffet,
Aut sibi quæret ebur soli? metuenda potestas
In tantas quæ crevit opes. exempla loquuntur
Publica, nec geminos patiuntur sidera soles,
Cur habeat regalis apex? cum cornua fratri
Æmula complevit Latonia, rursus adempto
Lumine decrescit; quæ vertice pulsat Olympum
Malus, ubi gravidis commisit pondera ramis,
Quâ surrexit humo, rursus curvata propinquat,
Autumno portando impar. his concita flabris
Suspicio tacitos sub pectore ventilat ignes.
Nec mora conceptis animatâ incendia flammis
Exundant, ruit immisso violentia fræno,
Ut Themis oblitus trutinantem è cortice nigro
Calculus exiliat. facilis suadela paratur
Credenti. Vana est furdo defensio sensu.
Desine corda Ducum flecti sperare precando.
Hoc tamen ulterius digno præcordia motu

Miscet, & infidâ vultum detorquet ab aulâ.
Spicula sæpe novo trabeatos sanguinis ostro
Fœdatura Duces, & sæva exempla tyranni
Suadet in innocuos, ac mille Calumnia clados
Virtuti demens, hostiliaque arma minatur.
Scilicet æquales merito penduntur honores,
Horrida cum mœsto ponuntur fercula talo,
Carcere clauduntur nati, tu carcere nati
Clauderis, & seruo trahis ænea vincula collo.

Ergo age sis, si non exemplo cautior uno
Redderis, an gemino volupe est condiscere factò
Carnificem Regem, victriciaque arma secutum
Graiorum? prò rupta fides & fœdera Teucris!
Infandis Polydore modis, ob fulva metalli
Pondera depositi scelerato in littore funus
Obtruncate jaces. nunc temet consule, quonam
Consenuisse loco malis. minor anne voluptas
Privatas habitare casas, quàm marmore sultam
Invito Jovis igne domum: tibi vivere toti
Quàm pingues lauto digitos fuxisse catino,
Dum caput appensum vereatur desuper ensen?

Si te ducit adhuc aulæ tamen ulla cupido,
Simius esse velis, scænamque paratus in omnem:
Si gemit ille gemas, ride si ridet, & esto
Principe cum claudo Scazon, & Vespasiano
Stabis stante, licet doleas pede claudus utroque.
Hæc doctus parasita, cave cane pejùs & angue
Principis imperio, cupidisque obsistere votis;
Concilio nedum medio vestigia veri
Sectaris, rectique vias, post funera Clytum
Te querar, aut Senecam. quoties heu! nantibus aulæ
Æquore in ambiguo, fuit una Malæa, tenaci

Obloquio turbasse Duces, meditata tueri
 Est quibus ingenium, & stat pro ratione voluntas,
 Et summum est tolerare sales, nec velle videri,
 Quos si dissimulas animi est sententia prudens.
 O si quid doctæ servas penetralibus artis
 Unguibus arrosis dignum, vigileque lucernas,
 Et Demostheneci redolens palloris olivum.
 Si te delectat numeris divina Poësis,
 Quæ beat, & vulgo secernit, & ornat amantem,
 Non vilis quondam, cum carmine digna gerebant.
 Tutius occulto poteris gaudere cachinno.
 Illa feres donec prorepseris altius, & post
 Quidquid agis, prudenter ages, licet advena pecces.
 Si quid ego statuam, quæris, cum vate paratos
 Isacio capiamne cibos? magis illa saginant
 Fercula, præcelsâ quàm quæ mittuntur ab Ollâ.

E J U S D E M

PRÆCEPTA VITÆ AULICÆ.

A Ulai ter & amplius beatam
 Audi quæ faciant, amice, vitam.
 Primum mente pia Deum timere
 Par est, postea Principem vereri:
 Jussus consule justa, veritati
 Prudens simplicitas comes nec absit,
 Sic non Achitophel notam mereris.
 Et mandata tuere diligenter.
 Si præsens tibi fors favet, futurum
 Hunc ne perpetuum puta favorem.
 Constat Principibus parum voluntas.

Rarum

Rarum fac Jonathan mali levamen
 Fidum consiliis adesse testem.
 Clyti, & Tantalei memor laboris,
 Fauces innocuo doma lupato.
 Nescit dicere, qui tacere nescit.
 Non noscenda tibi, nec illa noscas.
 Sic Actæoniis vacas periclis.
 Hosti nubilus, invido serenus,
 Fidus fac Pylades fies Orestæ,
 Adversis animosus, & secundis,
 Æquâ tempora dividens staterâ.
 Aulam non secus ac focum frequenta,
 Vicinus satis, & satis remotus.
 Addas his epigramma Martialis,
 Quod sis esse velis, nihilque malis.

EJUSDEM MONITUM

Ad amicū.

F Ide Deo, tua cautus agas, aliena relinquo,
 Dissimules, & sunt siqua ferenda, feras.
 Tela venenatæ non cures invida linguæ,
 Tuque tuam rege, dic pauca, tacenda tace.
 Sic placidos curret facilis tibi vita per annos,
 Et dabit oranti fata benigna Deus.

ARCUS TRIUMPHALIS ECTYPON

Reverendissimo & Illustrissimo Principi ac Domino

D. T H E O D O R O

Paderbornensis Ecclesiæ Episcopo S. R. Imper-
rii Principi.

*In vestibulo Academiae THEODORIANÆ ere-
cti, cum Poëtica Lemmatum & Emblematum
exegeſi. Auctore Friderico Rörigh
è Societate Jeſu.*

D E D I C A T I O.

Furſtenbergiadûm genus alto à ſanguine Princeps,
Qui magni D O N U M diceris eſque D E I.
Si vel juſſa novos hominum ſibi ſumere vultus
Parerent ſcalpro marmora dura meo :
Signa vel è noſtris naſcantur ahenea formis :
Vel noſtro raſum pollice vivat ebur :
Jam pridem Auſoniis non impar arcubus arcus
Alta triumpuali fornice ſaxa premat,
Quem ſuper emineat rutilanti diſcolor auro
Inter purpureas crux veneranda Trabes,
Cæteraque in numerum vario ſpectanda colore
Furſtenbergiacæ ſtemmata priſca domus.
Cum quibus arguto certans emblemate ſculptor
Cælaret Phariis myſtica ſenſa notis ;

In

In quīs virtutesque tuas, atque inclyta facta
Postera venturo tempore sæcla legant,
Quæ nunc immensum vulgavit fama per orbem,
Quà rubet exorients emorientsque dies.
Sed neque dura meo mansuescunt marmora scalpro,
Nec spirant nostris ænea signa focis:
Et mea tam magnis fortuna paratibus impar
Me prohibet studio morigerare meo.
Nec tamen idcirco metuo, mitissime Princeps,
Ne tuus hæc spernat quāliacunque favor.
Nempe ubi destituunt conantem grandia vires,
Conatus merito non caret ipse suo.
Nam si dura meo non parent marmora scalpro;
At parent calamo mollia verba meo.
Non possum lapides, sed possum sculpere versus;
Æraque si nequeo, fundere metra queo.
Ergo sed incultis malè structum versibus arcum
Sacrauit famæ nostra Thalia tuæ.
Perlege, si tanti est, PATRIÆ PATER, optime Princeps,
Quâ mea jam pridem carmina fronte soles.
Materies tua gesta mihi, tua gratia merces,
Et virtus color, & gloria lumen erit.

PRINCIPI THEODORO

A Deo electo Antistiti Paderbornensi,
 Pio, Sapienti, Vigili PP.

Quod conditâ

PAULI V. PONT. MAX.

ET

MATTHIÆ I. CÆSARIS

Auctoritate

THEODORIANA *Academia, religionem & bonas artes in
 Westphalia adversus Errores, & Barbariam ater-
 nis sepserit armis.*

COLLEGIUM ACADEMICUM

Ejus Celsitudini devotum

L. M. P.

Ad Insignia Reverendissimi & Illustrissimi Principis Theodori.
 S. Hieronymus ad Celant.

*Summa apud Deum nobilitas est clarum esse
 virtutibus.*

Illibata nobilitas.

Q Uod genus illustri Heroum de sanguine ducis
 Et fulges priscis clarus imaginibus;

Illa quidem certè laus est non infima, verùm

Est ea laus ATAVIS debita tota TUIS.

Quod multos opibus, multos quod honoribus anteis:

Esse hæc fortunæ munera vulgus ait.

Quod

Quod tibi mens longâ viget illibata senectâ
 Cum referant puras tempora cana nives,
 Blandaue facundo Majestas ridet in ore :
 Scis à Natura talia dona dari :
 Sed quod te nec opes, nec honores, nec genus inflant,
 Quod potius generis Tu genus ipse tui es,
 Et potes ipse tuis præferre Minoribus illam,
 Quam tibi Majores antetulere facem,
 Hæc tua laus tota, hæc laus est Tibi propria Princeps,
 Laus cum supremo non moritura die.

E M B L E M A. I.

Vera fides.

Sol unicus orbem universum irradians.

Ad Ephesios iv. vers. v.

Unus Dominus, una fides, unum Baptisma.

TE pollere fide, Princeps fidissime, certum est:
 Quando tuæ Fidei res facit ipsa Fidem.
 Nam si facta Fidem Fidei concordia produnt,
 Ni tua vera Fides, sit mihi nulla Fides.
 Ergo tuæ Fidei Fidei bene credita cura est,
 Quæ Fidei fidam præstitit usque Fidem.
 Mille Fides hodie, Fidei discrimina mille :
 Totque Fides inter vix tamen ulla Fides.
 Plus Fidei à Domino poscebat Apostolus olim.
 Ah Fidei in nostro si foret orbe minus !
 Ut, velut in toto lucet Sol unicus orbe,
 Unica sic toto luceat orbe Fides.

E M-

E M B L E M A. I I.

*Doctrina salutaris.**Cælum sideribus variegatum.*

Daniëlis XII.

*Qui ad Iustitiam erudiunt multos, fulgebunt quasi
stella in perpetuas æternitates.*

Qualia nocturno palantia sidera cœlo
Ducunt noctivagas per freta cæca rates :
Sic THEODORE tuis, ad cœli lucida templa
Aut verbis monstras, aut teris ipse viam.
Tu sacras aperisque scholas, aperisque profanas,
Inscia tu nostrâ pectora voce doces.
Cum tenet astantem Cathedralis concio turbam,
Ipse tuam nostrâ suppleo voce vicem.
Tu teneris animis pietatis semina mandas,
Et veræ fidei non finis esse rudes.
Alloquio mœstos, operâ solaris egentes,
Auxilio miseros consilioque juvas.
Tu cunctabundos stimulis non mollibus urges :
Tu pigros lento non finis ire gradu.
Tu malè discordes concordi fœdere jungis,
Per te compositâ iurgia pace silent.
Quæ licet & nostro fatear patrata labore,
Sunt tamen auspiciis cuncta patrata tuis.
Nam quodcumque facis studiove operave Tuorum ;
Hoc verè, quamvis non facis ipse, facis.
Jure Tuis igitur sidus lætabile fulges,
Sive gerenda doces, sive docenda geris.

Jure inter reliquas, cælestia lumina, stellas
Æterno rutilans tempore fidus eris.

E M B L E M A III.

Modestia animi de se
submissè sentientis.

*Olea baccarum ubertate curvæscens: ariste gravido
culmine terram spectantes.*

S. Bernardus Sermone XIII. sup. Cantici

*Magna & rara virtus profectò est, ut magna licet operantem;
magnum te nescias, & manifestam omnibus, tuam te solum
latere (virtutem), mirabilem te apparere, & contemptibilem
reputare; hoc ego ipsis virtutibus mirabilius judico.*

M Agnum est si magnus magnum se nesciat esse,
Et se vix minimis judicet esse parem:

Si de se fileat, totus quem prædicat orbis,

Quemque nisi ingratus, nemo filere potest.

Si, quæ magna geris, soli tibi parva videntur,

Extenuës verbis si tua facta tuis.

Si laudem fugiens præstes dignissima laude,

Si veniam, grates cum mereare, roges.

Cumque omnes vincas, vel certè æquaveris omnes,

Judicio cunctis sis minor ipse tuo.

Improba si stolidi spernas arbitria vulgi,

Contentus soli gesta probare Deo.

Nulla, nisi in cælis, meritorum præmia speres,

Et populi spectes commoda sola tui.

Hoc magnum est, inquam, pulchrum, mirabile, rarum;

Et tamen hoc magnum Tu, THEODORE, facis.

E M B L E M A IV.

Misericordia in pauperes..

Agricola sementem faciens cum inscriptione,
 PERDENDO RESERVO.

Matthæi vj. cap.

*Thesaurizate vobis thesauros in calo, ubi neque arugo, neque
 tineæ demolitur, & ubi fures non effodiunt.*

Condita nocturni spoliant æraria fures,
 Absorbet gravidas mercibus unda rates.
 Improbis abjurat totam cum scœnore sortem,
 Remque simul perdit debitor atque fidem.
 Vineæ sperantis frustratur vota coloni,
 Credita vix mendax semina reddit ager.
 Quæ modò finitimas tangunt pallatia nubes,
 Bellicus in cineres vertere turbo potest.
 Stipatam tineæ populant in scrinia vestem,
 Textaque Mæonia nobilitata manu.
 Urit congestas Vulcanus in horrea messes,
 Tam multis possunt parta perire modis.
 Hoc solum in tuto est, quicquid donatur egenis.
 Quas istis dederis semper habebis opes.

S. Augustinus lib. 50. Hom. 29.

*Non percunt quæ Christo dantur, alia vero quæ non dederis, &
 abundant tibi, aut cum vivis amittis, aut
 cum moreris, dimittis.*

EMBLEMA V.

Liberalis parsimonia.

*Labrum perennis aquæ fonti suo ad libellam
respondens cum lemmate,*

PARSIMONIA MAGNUM VECTIGAL.

Theodoricus Gothorum Rex apud Cassiod. Variar. 7. Epist. 17.

*Munificentiam nostram nulli volumus extare damnosam, ne
quod alteri tribuitur, alterius dispendiis applicetur.*

Non à Memnoniis aurum tibi navigat Indis,
Non ab Erythræis eruta bacca vadis :
Nec pia frugiparæ rimatus viscera matris
Decolor effossas congerit Astur opes.
Non te Pactolus, rutilus non fluctibus Hermus,
Fulva nec auriferi ditat arena Tagi.
Non tua longinquas adeunt commercia gentes,
Non gravidæ fulcant æquora vasta rates:
Non tua privatis crescunt æraria damnis,
Non prædas sub te Principe Fiscus agit.
Non tibi vexati, rurestris turba, coloni
Contribuunt lachrymis æra rigata suis.
Non tibi subsidii specioso nomine tectam
Congerit, ut mos est, patria iussa stipem.
Hæc quoque, quam placidâ Princeps dititione gubernas,
Haud sanè immodicis finibus ora patet :
Et tamen in tantos Tua res tibi sufficit usus,
Et re non magnâ, maxima quæque geris :
Ædificas, renovas, emis, auges, instruis, ornas,
Templa, aras, arces, prædia, rura, domos.

Nomina dissolvis, fundas Collegia, sacris

Debitus ære tuo conciliatur honor :

Impensis erecta tuis Academia surgit,

Surgit honoratæ fabrica celsa scholæ :

Altare è Phario constructum marmore candet,

Candent artificii signa polita manu.

Quid memorem veterum scripta immortalia Patrum

Nostra quibus floret Bibliotheca libros ?

Quæque piis avidas mulcent concentibus aures,

Per tot inæquales organa structa tubos ?

Quæ quoties sonuere, tuas, THEODORE, Deique

Flexanimo laudes dulciter ore canunt.

Nemo tibi donat, nemo non accipit à Te :

Tu nulli, & debet patria tota Tibi :

Quis rogo Te, Princeps, Fortunæ rivus inaurat ?

Quæ Tibi inexhaustas gaza perennat opes ?

Magnum est vectigal parvo frugaliter uti,

Sumptibus & justum præstituisse modum.

Nec modico pennas majores tendere nido,

Nec proprii modulum dememinisse pedis.

Hoc virtutis opus sit ; multis sic dare multa ;

Ut multa à multis poscere non sit opus.

Observat prudens hanc Munificentia legem :

Ne quod dat meritis, auferat immeritis.

Cicero 2. de offic. Cum enim dando egere cœperint, alieni
lonis manum inferre coguntur : nec tanta studia assequuntur eo-
rum, quibus dederunt, quanta odia eorum, quibus ademerint.

E M B L E M A VI.

Clementia in victos.

Leo homini prostrato parcens cum elogio,

H O M O H O M I N I D E U S.

Cicero pro Q. Ligario.

*Homines ad Deos nulla re propius accedunt, quàm
salutem hominibus dando.*

Roma quod innumeris peperit sibi Martia bellis,
Sive ea gesta solo, sive ea gesta salo :

PARCERE SUBJECTIS, ET DEBELLARE SUPERBOS,
Symbolon asciscas hoc Tibi jure licet.

Supplicibus parcis, frangit tua dextra superbos,
Quàm pia dextra bonis, tam metuenda malis.

Extorsit justum, non justa rebellio, bellum ;
Justa sed invitâ corripis arma manu.

Utque salutiferis fidens Podalirius herbis,
Facta recens blandâ vulnera mulcet ope :

Ast ubi vicinos cœpit gangræna per artus
Spargere lethiferi semina cæca mali,

Sævitiâ miti, clementi percitus irâ
Utiliter ferro sævit, & igne furit.

Lanea sic lento librans vestigia passu
Non nisi post longas surgis in arma minas ;

Tum quoque (sed frustra) testans hominesque Deumque
Ad veniam patulas fontibus esse fores.

Nec cunctata diu dubiis Victoria pennis
Ancipiti traxit prælia lenta morâ.

Nimirum stolidos solitus contundere fastus
Pugnâvit causâ pro meliore D E U S.

Hic tua victricem clementia temperat iram,
Extus in victos arma odiumque simul.
Prima dies bellum, belli dedit altera finem :
Nec tua quàm bellum longior ira fuit.
O quantum est rapidi successu Martis ovantem
Vindictæ cupidas abstinuisse manus !
Quàm grave anhelantes animi compescere motus,
Quem dolor admotâ torret utrimque face !
Vertit enim in sævum patientia læsa furorem,
Et quæ tarda venit, fortius ira premit.
Tu quasi non hosti sed bellum indixeris iræ,
Sic illum victor protegis, hancque premis.
JUSTITIA eduxit gladium, PRUDENTIA rexit,
Condidit actutum spicula pacis amor.
Stringere, Magnanimi ; Clementis, ponere ferrum ;
Civibus afflictis parcere, Patris erat.
Ergo armis victusque tuis virtutibus hostis
Te simul est Dominum fassus, & esse Patrem.
Quò quisque est major, magis exorabilis ira est,
Et fovet offensas mens generosa breves.
Corpora transiliunt animosi strata leones,
Pugnaque dejecto protinus hoste jacet.
Ast imbelles genus crabronum ignava propago,
Et læsæ furiis immoriuntur apes.
Res rara est, justum bellum & victoria clemens :
Res est rara quidem, sed, THEODORE, tua est,
Nam tua vel victo victoria profuit hosti,
Et nocuit soli (si tamen) ista tibi,
Sed, puto, non nocuit ; quæ te frænare rebelles,
Atque animum docuit posse domare tuum.
Tam gravis exiguo compressa est sanguine flamma,
Huic quoque parfurus, si licuisset, eras.

Sed tam crudele est cunctis, quàm parcere nulli,
 Et sæva est pietas, quæ miserendo nocet.
 Jure igitur duplex circum tua tempora frondet
 Bellica pacatæ junctæ corona Mitræ.
 Hostibus hæc domitis, servatis civibus illa,
 Pulchrius illa viret, blandius ista nitet.
 Illam Astræa tibi, Clementia texuit istam,
 Phœbeis illa è frondibus, ista Jovis.
 Ista Sacerdotem decet, & decet illa Dynastam,
 Civibus hæc AMOR est, hostibus illa TIMOR.
 Crede mihi magnos superant hæc gesta triumphos,
 Laudibus hæc quondam postera sæcla ferent.
 Scilicet una homines æquat Clementia Divis,
 Hinc Deus esse homini dicitur alter homo,

E M B L E M A VII.

*Sol in horologio scioterico duodecimam lineam
 tangens, cum lemmate,*

ALTIOR, INVIDIAQUE MAJOR.

Plutarch. in Moralib.

*Uti sol si immineat hominis vertici, aut prorsum tollit umbram,
 aut minimam reddit: sic ingens gloria extinguit invidiam.*

N Ulla dies unquam tam læto sole refulsit,
 Quin fuerit clari luminis umbra comes,
 Nullaque tam magno surrexit gloria plausu,
 Invidiæ ut sævo libera dente foret.
 Sol tamen ut minimas altissimus efficit umbras;
 Sic minùs invidiæ gloria summa patet.

E M B L E M A VIII.

Ignis undique fumo obsessus cum scito Reverendissimi & Illustrissimi Principis,

JUDICIUM MELIUS POSTERITATIS ERIT.

Plutarch. in Moralib.

Flammam primum enicantem nultus comitatur fumus, qui quidem evanescit jam convalescente & explicante se flammâ; sic res egregias aggredientem initio multa premit invidia; donec aucta gloria invidia fumum discutiat: nam fumus gloriæ, invidia est.

A Spice ut obsessus densis ramalibus ignis,
Dum sensim vires colligit ipse suas,

Obscuros nigrâ subtexat nube penates,
Altaque fumosos volvat ad astra globos.

Expecta: mox discussâ caligine, victrix
Crispabit tremulas flammâ corusca comas.

Sic nam nascentis solet incunabula Famæ
Livor iners nebulis obtenebrare suis.

At tuâ jam geminos virtus penetravit ad axes,
Et clarum toto sparsit in orbe jubar.

Quamvis Cimmeria livor tegat omnia nocte;
Luminibus tamen haud obstruet illâ Tuis.

Si tamen Invidiæ præsentia tempora sordent:

JUDICIUM MELIUS POSTERITATIS ERIT.

EJUSDEM ELEGIA,

QUA

Reverendissimo, & Illustrissimo Principi,

T H E O D O R O,

Præfuli vigilantissimo, Domino Clementissimo,
Vindici fortissimo, Instauratori munificent.

Pio, Felici, Pacifico,

P A T R I P A T R I Æ,

*Diæcesis Paderbornensis per annos triginta & quod
excurrit sapientissimè gubernata, bonisque
omnibus cumulata.*

L. B. M. GRATIAS AGIT,

CARE PATER PATRIÆ (sit enim fas nomine vero
Sive tuum studium sive vocare meum),

Jam dudum Oceano meritorum merfa tuorum,

Et tam multimodis facta beata bonis,

Gestio conceptis testari gaudia verbis,

Quæ memori pridem condita mente gero,

Utque pio meritas promam Tibi pectore grates,

Ingenii totos explicuisse sinus:

Postera ne sæclis olim labentibus ætas

Arguat ingrati criminis esse ream,

Sed simul ac dictura oculos attollere cæpi,

Casta verecundus purpurat ora rubor,

Mens hebet, ars hæret, refugit vox, ora gelantur,

Vincta repentino frigore lingua stupet.

Qualis in angustis luctans siphonibus humor

Festinando suum sæpe moratur iter,

S 5

Fervet

Fervet in obstructis lymphæ vis incita venis,

Egressumque sibi, dum petit, ipsa negat.

Perque arctas magno nitens molimine fauces,

Unda sibi ipsa moram, non patiendo, facit.

Sic mihi densa seges, sic torrens undique laudum

Angustum vocis copia claudit iter.

Nam quæ prima sequar tantarum exordia rerum?

Quod mihi principium, quis mihi finis erit?

¹ Anne quod errorum spissis crepta tenebris

RELIGIO victrix tollit ad astra caput?

Religio liquidis quæ cœli è fontibus hausta,

Sidera non dubiâ ducit ad alta viâ.

Lingua mihi intonuit MAGNI quam ferrea KARLI,

Dum pia pro CHRISTI numine bella gerit.

Indomitosque sacris compellit Saxonas armis

Barbara cœlesti subdere colla iugo.

Quam mihi inhumanâ profugus feritate Quiritum

Tertius, cingui tradidit ore, LEO.

Hæresis at dudum Stygiis prorupta cavernis

Impia in adversum sumpserat arma DEUM.

² Monstrum horrendum, informe, cui IGNORANTIA
mater,

Et FASTUS pater est, SEDITIOQUE soror,

LIBERTAS nutrix, RIXÆ comitantur euntem.

JURGIAQUE evulsis sanguinolenta comis:

Illius armigeri FRAUDES, MENDACIA, TECHNÆ,

Et sacris inhians fœda RAPINA bonis.

His illa auxiliis, illâ succincta phalange

Ausa erat æterno bella movere DEO,

Hinc

¹ Orthodoxa Religio in integrum restituta.

² Misera rerum facies cum ad gubernacula Princeps vocaretur.

Hinc fera barbaries, ruptisque licentia frenis
 Fas omne in vitâ miscueratque nefas.
 Plebs miseranda sui Pastoris prodita fraude,
 Errabat sævis obvia præda lupis.
 Nec soliti templis indicebantur honores,
 Festaque defierant ritè vetusta coli,
 Calcabat sanctas victrix audacia leges,
 Jura dabat cæcus pro ratione furor.
 Verùm ubi TE votis hominum expugnata piorum
 Admorunt sacra fata benigna MITRÆ,
 Cana FIDES rediit, rediit PIETASQUE, PUDORQUE,
 Et malè neglectis debita cura sacris,
 Ornatus templis, dignatio reddita Mystis,
 Moribus integritas, Legibus obsequium.
 Ad sua palantes revocatæ signa KALENDÆ,
 Certior ut sacrum curreret annus iter.
 Impia Libertas rigidis compressa lupatis,
 Præmia fas, dirum est pœna secuta nefas.
 Ferrea inaufescens studiis melioribus ætas
 Falcigeri retulit tempora prisca senis.
 Atque, ut ubi rosei tenerum jubar exserit oris,
 Et sola lucifluo terrea fonte rigat,
 Humida decedunt venienti nubila Phœbo,
 Complicat & furvos nox inamœna sinus,
 3 Monstraque per tæcas impune vagata tenebras
 Cogit in assuetos lux rediviva specus:
 Haud aliter simul ac Tu Religionis avitæ
 Ætheream celsâ promissis ab arce facem,
 Concita diffugiunt bipedum portenta luporum
 Sive tuo gladio territa, sive pedo.
 Hic se præcipiti deturbat ab aggere saltu,
 Et pavidus, nullo terga premente, fugit.

3 Pravorum dogmatum satores jussi facessere.

Ille parùm pedibus tanto in discrimine fidens
 Lassa per obstantes brachia jactat aquas.
 Thesea magnanimum plenis veneratur acerris
 Attica probroso libera terra jugo,
 Qui Labyrinthæos ausus penetrare recessus
 Semivirum forti perculit ense bovem.
 Ast ego, funestis, Te Vindice, libera monstris,
 Ægiden veneror TE, THEODORE, meum,
 TE primùm rabiem caulis arcente lupinam
 Desiit innocui carnificina gregis.
 Tu sparfos artus laceri conquiris ovilis,
 Tu per tesqua vagas devia cogis oves.
 Pascua Tu monstras riguis lætissima lymphis,
 Hic ubi perpetuo gramine vernat humus.
 Tu rapidos æstus viridi defendis in umbrâ,
 Torrida siderei dum furit ira canis.
 Tu mala Pœoniis cohibes contagia succis,
 Saucia Tu medicâ corpora mergis aquâ.
 Nec pudor est ægram manibus tractasse bidentem,
 Nec collum fessæ supposuisse pudor.
 Nempe ille ante oculos Pastor TIBI semper oberrat,
 Qui propriâ caras carne saginat oves.
 Illa TIBI vacuam crebrò vox personat aurem,
 Et nunquam oblito labitur ex animo :
 Siquis amor nostri memori tibi pectorè flagrat,
 Hunc pascendo meos exere, Petre, greges.
 Ergo dum stabili fundata Ecclesia rupe
 Ridebit Stygias non labefacta minas.
 Dum CHRISTI assertus Numen venerabitur Orbis,
 Dum quis erit veræ religionis honos.
 Hæreseon hostem, Fidei, THEODORE, Patronum
 Te canet æternâ posthuma fama tubâ.

Hæc tua inocciduâ florebit gloria laude
 Clara futura solo, clara futura polo.
 * Longævamne canam per terna decennia PACEM
 Copia quam cornu divite larga beat?
 Haud procul hinc ferro Mavors bacchatur & igni:
 Nulla mihi somnos classica pulsa fugant.
 Squalent finitimi fœdis populatibus agri:
 Me tamen in dulci Pax fovet alma sinu.
 Flava Ceres fortes cogens ad signa colonos
 Militiâ ferrum distinet omne suâ.
 Densa per incanas cædes grassatur aristas,
 Prataque gramineâ florida strage natant.
 Casside in emeritâ molitur aranea casses,
 Frugiferam placidus vulnerat ensis humum.
 Splendent attriti glebâ stridente ligones,
 Martiaque in tenebris exedit arma situs.
 Neve quies ullo violetur publica motu
 † JUSTITIA exerto pervigil ense cavet.
 Latrones procul hinc, procul hinc vos tollite fures,
 Et quisquis rapto vivere dulce putat.
 Nil vobis, moneo, THEODORO Principe, tuti est:
 In vos mansuetas non habet ille manus.
 Ille mei ad clypeum qui Principis excubat ensis,
 Sontibus exitio est, præsidioque probis.
 Nec vos vel precibus, pretio vel fidite, culpam
 Strenua non tardo mox pede pœna premet.
 Hoc vetera, hoc vobis monumenta recentia narrant,
 Quæ passim medio plurima rure patent.
 Pendula ab arboribus, radiisque implexa rotarum,
 Debita carnivoris corpora vulturibus.

At

* Pax & publica tranquillitas omni ope conservata.

† Justitia pacis publicæ inexorabilis Vindex,

- 6 At si quis tardas monitis adverterit aures,
 Sentiet illa suo vera fuisse malo.
 Testis BECA NOVA est, tuus est BENHUSIA testis
 Nunc quoque prædonum sanguine pinguis ager.
 Cùm grassatorum florentes ære catervas
 Lux improvisæ dedit una neci.
 7 Ipse adco è cœlo sumptis Vincentius armis
 Tam pia præsentì prælia juvit ope.
 Ille & lymphatos egit terroribus hostes :
 Et rexit nostrâ spicula missa manu,
 Mutant fata vices, & amico Numine, præda,
 Qui prædaturus venerat, ipse fuit.
 Plurima victrici sternuntur corpora ferro,
 Plurima Justitiæ victima cæsa litat.
 Impia pullati duxerunt funera corvi,
 Et saturi lessum concinuere canes.
 Nunc quoque transversim Cerealibus obvia sulcis
 Sæpius agricolas ossa morantur equos.
 Inde tibi, PRINCEPS, plaudunt Urbesque, Viæque,
 Ruraque, quod sævo cuncta timore vacent.
 TE canit intrepidâ nocturnus voce Viator,
 Obscurum tuto cùm pede carpit iter.
 TE recinens patulâ pastor resupinus in umbrâ
 Securas longo carmine mulcet oves.
 TE canit in molli projectus gramine messor
 Ad vitreas Paderæ lenesfluentis aquas.
 Ergo iterum pacis PAX aurea suscitât artes,
 Et redit ad solitos musica turba choros.
 8 Ergo iterum, Phœbo restim ducente, Camœnæ
 Ad numerum saliant, ad numerumque canunt.

West-

6 Poenæ de turbatoribus publicæ tranquillitatis sumptæ.

7 Anno 1601. ipso S. Vincentii Prædonum copix cæta ad vicum Benhusin.

8 Bonarum artium studia excitata.

Westphala Pierias pubes operatur ad aras
 Et litat, Aonio vota probante DEO.
 Quæ modò singultim parco lacrymaverat imbri,
 Nunc fremit immenso Castalis unda lacu.
 Tu, PRINCEPS, Cyrrhæ longæva silentia rumpis,
 Ne feriant tacito squalida plectra situ.
 Invia Tu nobis Heliconis tesqua recludis,
 Culmina tu facilem sternis ad alta gradum.
 Tu pridem exulibus, Meccænas optime, Musis
 Principe magnificam condis in urbe domum.
 Tu primùm ⁹ SOPHICO palmam proponis AGONI,
 Cingat ut emeritum laurea ferta caput.
¹⁰ Per te, quo stimulet Virtutis amantia corda,
 Nobilis ingenuum gloria calcar habet.
 Tu vastum ingeniis aperis felicibus æquor,
 Tota ubi dent placidis vela ferenda Notis.
 Per TE Naturæ cæcos tentare recessus,
 Et licet ignaras lucis inire vias.
¹¹ Quænam cœlestes æternæ regula cursus,
 An supera assiduè templa canore sonent.
 An vaga nocturnis discurrant astra choreis,
 An sistant motu sidera fixa polo,
 Quàm variæ cœli cingant præcordia zonæ,
 Et sua quo ventos ubere mater alat.
 Anne Cyteinis pudefiat Cynthia rhombis,
 Queisve sui maculis inquinet orbis ebur.
 Cur falsos pelagus fluctus, cur flumina dulces,
 Perpetuas fontes ejaculentur aquas.
 Aut quis, ne infestis terras superobruat undis,
 Temperet undosi cærula fræna maris.

Cur

⁹ Gymnasium exædificatum.¹⁰ Gradus & honores Academici.¹¹ Philosophicæ Mathematicæque disciplinæ, ad humaniores artes adjunctæ.

Cur gravis excussis immugiat ignibus æther,
 Mistave cum liquido sanguine faxa pluat.
 Aut quæ perpetuent Ætnæas pabula flammæ,
 Quidve flagrans rutilo crine cometa vehat.
¹² Quid quod & arcanæ penetralia Theologiæ
 Auspiciis, Princeps, sunt referata tuis?
 Quid quod Westphalicas duce Te remeavit in oras
 Sancta Palæstino cognita lingua Syro?
 Et sacra divinis intexta oracula libris
 Dulcius ex ipso promere fonte licet?
¹³ Quid memorem celsis spectandas turribus ARCES;
 Et tantum Domino tecta minora suo?
 Ornamenta olim pacis, munimina belli,
 Sumptibus ad cælum surgere iussa tuis,
 Hinc NOVA deterso veteris squalore senectæ
 Jamque suo demum nomine digna DOMUS;
 Regalem tectis immanibus explicat aulam
 Laxaque formosis atria porticibus.
 Quas circum, virides ventis crispantibus undas;
 Plaudit lascivis squamea turba choris.
 Flora favet, favet attiguis Pomona viretis,
 Certatimque suas utraque promit opes.
 Utraque certatim vernantes divitat hortos,
 Floribus illa suis, fructibus ista suis.
¹⁴ Inde W E V E L S B U R G I solido domus ardua saxo
 Nubila sublimi culmine celsa ferit.
 Hæc olim à priscis (famæ si credimus) Hunnis
 Post varios Dominum TE sibi legit heros,
 Nunc te digna domus, sed erant magalia nuper
 Penè ruinoso semisepulta situ.

Cir-

¹² Theologia, & Lingua Hebræa.

¹³ Diocæsis sumptuosus ædificiis & operibus communita & ornata. Newhans
 Arx ædificata, horti non amœni minus quam frugiferi concinnati.

¹⁴ Wewelsburg Arx magnificè constructa.

Circum Chaoniæ texunt umbracula quercus,
 Sylvaque vicinas occulit alta feras.
 Quasque sub hospitii celat frondentibus arbos,
 Plurima lascivo guttore vernat avis.
 Nam quid Collegi sacras venerabilis ædes¹⁵
 Templaque sublimi conspicienda tholo?
 Quæque statas numeris edis vocalibus horas
 Niliacas TURRIS vincere digna Pharos?
 Tecta quid augusti memorem visenda Lycæi¹⁶
 Et PATRIÆ, & verò tecta dicata DEO?
 Hanc divina sibi legit Sapientia sedem,
 Incolit hos virtus Religioque lares,
 Hic Sophici crebrâ celebrantur gymnade ludi,
 Doctaque quæ nullo bella cruore madent.
 Hic agiles poliunt ad bella forensia linguas,
 Hic salit à volucris fons pede factus equi.
 Illic facundi splendent Demosthenis arma,
 Suadaque germano Cecropis ore sonat,
 Hic Juvenum ingenuas animi formantur ad artes,
 Hic facilis discit prima elementa puer,
 Quamque olim Patriæ præstantibus approbet actis,
 Virtutem à teneris combibit unguiculis.
 Hic TUA Palladii superastans limina Templi
 A Polycletæa spirat imago manu.
 Principe digna sacri majestas eminet oris,
 Ambit honoratas aurea mitra comas,
 Flexile Sarranum marmor rugatur in ostrum,
 Et trabea ex humero pendula utroque fluit.

T

Quæ-

15 Collegium Societatis JESU à fundamentis excitatum, Templum in-
 stauratum & visendis operibus ornatum.

16 Edificium Academicum in suas exedras aptè descriptum.

17 Statua Principis in Scholarum vestibulo ejus in bonas litteras voluntatis
 monumentum.

Quæque tibi vivo est, eadem quoque marmore sculptum
Pascendi sequitur sedula cura gregis.

Nam manus una pedum præfert, manus altera librum,
Ut regat illa pedo, quos docet ista libro:

Illam post multos aliquis venerabitur annos,

Verbaque non ficcis proferet ista genis:

Fürstenbergiacâ, THEODORUS, origine Princeps,
(Namque illum memini cernere) talis erat,

Talis erat, neque multum à vivo abludit imago,

Eheu quod fas sit dicere, talis erat!

Mente sagax, ¹⁸ vultu facilis, cultuque modestus,

Manabat comi multus ab ore lepos

Tum quoque, cum feris natura fatisceret annis,

Temporis antiqui gesta referre memor.

Pacis amans, rectique tenax, nec prodigus æris,

Et tamen in Patriæ commoda largus erat.

Oderat immodicos fastus, sed & oderat astus;

Non affectatæ simplicitatis amans.

Moribus antiquis, cultor Pietatis avitæ,

Certus in antiquâ religione mori.

Non fuit impositis populo gravis ille tributis,

Aula sed infletas sobria parsit opes.

Non sibi, sed Patriæ genitum se credidit esse,

Communemque suis civibus esse Patrem.

Nunc cælum colis, ô cælo dignissime Princeps

Aspectu frueris nunc propiore DEI.

Cunctaque Lunæ varium subjecta sub axem

Despectas oculis inferiora tuis.

Virtuti imperium si par tibi fata dedissent,

Tot meritis Orbis vix satis unus erat.

Virtuti si par ævum tibi fata dedissent,

Sæcula tot meritis vix satis ulla forent,

Sed nos indigni qui te frueremur eramus,
 O semper magnis Livor inique viris!
 Sic, nisi quæ ferò nobis erepta dolemus,
 Nos bona, fatali nostra stupore, latent.
 At tua nunc pennis peragrat victricibus orbem
 Gloria non ullo præmoritura die.
 Et si quem vivo Livor subtraxit iniquus,
 Post obitum duplici scenore crescit honos.
 Donec sidereis gemmascet floribus æther,
 Et peragent solitas noxque diesque vices,
 Dum mare consuetis repetent anfractibus amnes,
 Et dubio venti prælia Marte gerent.
 PASTORIS THEODORE BONI, PATRIÆQUE PARENTIS,
 A grata titulum posteritate feres.
 Hæc & plura tuæ spectator imaginis olim
 Non tacito, Princeps, verba dolore dabit.
 Quò feror? unde abii? quæ me via? quove reducet?
 Quò ruis in vasto cymba minuta salo?
 Ante pererrato lucis pater aureus orbe
 Frena fatigatis ignea demet equis,
 Singula quàm memori liceat destringere versu
 Condita vel sumptu, vel reparata tuo.
 Tu me marmoream quondam THEODORE relinques,
 Testea quæ mihi cum præficereris eram.
 Aurea Tu magni revehis mihi tempora ¹⁹ Karli,
 Cæsaris Henrici tu benefacta refers.
 In te Meinwercki pietas operosa revixit,
 Tu verum Imadi Præfulis instar habes!
 Ergo quod Henrico, Meinwerco, Karolo, Imado,
 Debeo promentis hoc THEODORE tuis.

T. 2.

STRE-

¹⁹ Karol. Mag. fund. S. Henricus benef. primarius. Meinwerckus &
 Imadus laudatissimi Præfules Ecclesiæ Paderb.

S T R E N A
K A L E N D I S J A N U A R I I S
A N N I M . D C . X V I .

Reverendissimo & Illustrissimo Principi, THEODORO
Episcopo & Principi Paderbornensi, Clementissimo
Domino ac Fundatori, & Collegio Theodoriano
Soc. J E S U demississime oblata.

G R A T U L A T I O
De tribus
A N N O R U M D E C A D I B U S

*In Principatu feliciter exactis, & quarta
hoc Anno M. DC. XVI incunte.*

P R I M A D E C A S

Ab Anno M. D. LXXXV. ad XCV.

P A T R I A R E S P I R A T .

O Quicquid superas ævi dignissime Princeps,
Et semper Janos promeriture novos!

Ingre-

Ingreditur Divis novus ecce faventibus annus,
Et secum patriæ spemque decusque vehit.
Annorum jam quarta decas Te Principe nata,
Integrat imperii septima lustra Tui.
Quotquot præteriti pepererunt gaudia soles,
Exortu cumulat lux hodierna suo.
Nam quis erat populi plausus, quod ubique secundum
Murmur, & ominibus vota referta Tuis!
Infula cùm primùm meritos amplexa capillos,
Virtuti statuit præmia digna Tuæ?
Integra tunc primis vernabat floribus ætas,
Nullaque canities tinxerat alba comas:
Cana tamen vegeto fervebat pectore virtus,
Ultra quæ canos vivere digna foret.
Quocirca votum populis erat omnibus unum,
Ut Tibi lustra Deus vivere multa daret.
Annuit Omnipotens, &, quæ florentibus annis
Nactus eras, jussit scēpra tenere senem.
Nos, præter canos nē quid vehat ægra senectus,
Sollicito Superis fundimus ore preces;
Ut semper viridi reparent Tibi corpore vires,
Et semper remigret sanguis in ossa recens.
Sic ætas gravior juvenili fulta vigore,
Addat ad elapsos tempora longa dies.

A L T E R A D E C A S

Ab Anno M. D. XCV. ad M. DC. V.

P A T R I A L I B E R A T A.

Patria jam mœstos per prima decennia vultus
Exuerat, veteri pænè soluta malo.

Aggrederis Princeps vestigia tollere labis,
Neù super ulla mali sint monumenta, caves.

Agmina vicinis volitantia noxia campis,
Audebant fines carpere Marte Tuos :

Cùm tamen interea multus Tibi creditor aurem
Velleret, atque Tuas sollicitaret opes.

Nec mora : dissolvis, cunctis plaudentibus, æra,
Et non facta Tuis nomina temporibus.

Quis non plaussisset sic commoda publica quæri,
Nullaque privatas lædere damna domos ?

Non etenim miseris violentia sæva colonis,
Nec fallax auri Tè locupletat amor ;

Sed fastus ignara domus, parvoque beata,
Et parasitorum mensa perosa greges.

Quid referam patriis depulsos finibus hostes,
Et data prædonum corpora vulturibus ?

Quid prope perculsam turbis civilibus urbem,
Sub Tua, damnatâ peste, redisse iuga ?

Errorúmne canam detractas mentibus hydras,
Clausaque doctrinæ templa profana novæ ?

An positas Patribus sedes, & aperta Lycæa,
Crescat ubi studiis culta juventa bonis ?

His agis, ut pacem, vel turbatura salutem,
Ne serus metuat monstra videre nepos.

O felix, quemcunque Tibi Deus annuit annum,
 Et qui te salvo gaudia Janus agit!
 Quisquis enim patriæ Theodorum reddidit annus,
 Quis neget hunc donum Numinis esse Novum?

T E R T I A D E C A S

Ab Anno M. DC. V. ad XV.

P A T R I A O R N A T A.

CUM jam bis decies messis fudisset aristas,
 Et Te bis decies Principe bruma nives;
 Patria multiplici rerum defuncta periclo,
 Tot contenta notis dulcis amoris erat.
 Cernebat geminas visendis turribus arces,
 Ipsi quæ decori præsidioque forent.
 Undique Relligio censu dotata perenni,
 Ibat in antiquum jam rediviva decus:
 Præcipue Matrem pietas complexa Tonantis,
 Quæque colit panis Numen in effigie:
 Muneribus quæ compta tuis florentior ibat,
 Cùm referunt pompas annua sacra pias.
 Tunc omnis dulci Theodori nomine vicus
 Personat, & faustas jactat ad astra preces.
 Hæc olim perfecta dabas. quis plura requirat?
 Est tamen, ille Tuus quod superaddat amor.
 Gymnasium pridem cœtus formabat I E S U:
 Sed deerat sobolem posceret unde novam.
 His, veluti teneras possint ubi pangere stirpes,
 Uberis assignas pingua culta soli.
 Quid post hæc agitas? nimirum, tota quod olim
 Saxonix tellus prædicet Hesperix.

Omnis enim regio, quam Rhēni hinc alluit amnis,
 Quam liquidis, alia parte, Visurgis aquis,
 Nullas, quæ Sophiam colerent, numerabat Athenas.
 Vænibant alio sub Jove mentis opes.
 Annuit Aufonio Præsul de culmine Paulus,
 Et dat Musei condere jura novi.
 O Te ter felix Academia nata parente!
 Nata diu vivat, vive diuque Parens.

Q U A R T A D E C A S

Ab Anno M. DC. XVI.

P A T R I A F E L I C I T A T E M S P E R A N S.

J Am sol ridenti solitò formosior ore
 Pandit purpureas ad nova secla fores.
 Egreditur nova lux, nova spes, nova Principis ætas,
 Aureus ex alto temporis ordo redit.
 Sic tua promeruit virtus, sic inclyta facta,
 Semper in illustri vivere digna die.
 Et quoniam teneræ studiis servire Juventæ,
 Tot tibi præ curis, maxima cura fuit,
 Optamus, Deus ut de nostris detrahat annis,
 Producat vitæ stamen ut inde Tuæ,

PIA JUSTA

*Reverendissimo atque Illustrissimo Principi
ac Domino;*

D. THEODORO

SACRI ROMANI IMPERII PRINCIPI,

EPISCOPO PADERBORN.

PATRI PATRIÆ,

Collegii Societatis J E S U, ac Domus probationis, nec non
Academiæ Paderbornensis

FUNDATORI & PARENTI,

*In ante diem Iduum Decembr. Anni cIdo Id cxIIx. publico
bonorum omnium luctu elato,*

SOLUTA

A Collegio Academico Societatis J E S U Paderbornensi.

Indictio Funeris.

I P R Æ C O, I F A M A,
 FUNUS INDICTIVUM EST
 REVEREND. ET ILLUSTR. PRIN-
 CIP I A C D O M I N O

D. T H E O D O R O

E NOBILI ANTEIQUA FURSTENBERGIORUM FAMI-
 LIA SACRI ROMANI IMPERI PRINCIPIS PACIFICO,
 B. ECCLESIAE PADERBORNEN. PONTIFICI RELI-
 GIOSO, PATRI PATRIAE, CIVIUM PARENTI, POPU-
 LO IN DELICIIIS, COLLEGII SOCIETATIS, DOMUS
 PROBATION. ACADEM. PADERB. AUTORI FUNDA-
 TORI MUNIFICENTISS. LIBERALISSIMO, IMMORTA-
 LIS MEMORIAE PRÆSULI,

Q U I P O S T Q U A M

VIXIT ANNOS LXXI. MENSEIS III. PIE CASTE
 REXIT ANNOS XXXIII. MENSEIS VI. DIES XXII. FELICITER

L E T H O D A T U S E S T

PRIDIE NONAS XBREIS, ANNO GRATIAE clc Idc XIII,
 QUIBUS EST COMMODUM IRE, JAM TEMPUS EST;

NUNC EX ARCE ECFERTUR.

T U M U L I

Piis Præfulis Manibus, caris Principis ex-
uviis erecti.

Patria beneficiorum acceptorum memor Patri suo P.P.

M A U S O L E U M.

Nobile Mausolo struxit Regina sepulcrum,
Laude quod immodica Cares in astra ferunt :
Utque vel absumpto carie, seniove pereso
Mnemofyno, posset conjugis esse memor,
Semicremata rogo mirantibus extulit umbris,
Expositoque oculis condidit ossa vitro ;
Quin vitro effusas avido bibit ore favillas,
Posset amati aliquam partem ut habere viri.
Hæc Regi Regina suo : quod amabò parenti
Mnemofynon statuet Patria grata suo ?
Se **T I B I** destituit : **T u a** Filia, Mausoleum
Post obitum **P R I N C E P S** est **T H E O D O R E** Tuum.
Non hoc Illa Tibi, sed **T u** Tibi furrigis ipsi,
Tu Mausolei conditor ipse Tui es.
At quodnam adlambet bustum ? quos hauriet artus
Ignibus ereptos ? quem cinerem illa bibet ?
Non licet illatos adytis penetralibus artus,
Non licet egestâ tollere corpus humo :
Quin tumulo adspersos cineres legere ore veretur,
Et Maneis metuit sollicitare pios.
Ne tamen uxori **T u a** cedat Filia Regis,
Ista viri cineres vult bibere, illa Patris.

Dum

Dum Tua postgenitis transcribit facta loquenda,
 Eripit ex avidâ PRINCIPIS ossa pyrâ:
 Dum memori virtutem animo, moresque reponit,
 Cernit in opposito PRINCIPIS ossa vitro:
 Dum grato benefacta sibi data pectore condit,
 Haurit in aurato PRINCIPIS ossa scypho.
 Mausoleum ingens, omnique perennius ære,
 Quod tanto statuit Filia tanta Patri!
 Hic Tibi communis functo benè munere Patris,
 Patri, dum vivet Patria, vivet Amor:
 Hic Tibi supremi functo bene munere Mystæ,
 Mystæ, dum vivet Patria, vivet Honor.

P R Æ S U L I

Optimè de se, de universo Clero merito, admodum
 Reverendum & prænobile Cathedralis
 Ecclesiæ Capitulum.

E P I T A P H I U M.

Sanguine quo fueris, qua stirpis origine cretus
 Trabs docet, & geminæ penna jugata Trabi.
 Munere quo fueris, quo pridem functus honore,
 Crux docet, & geminæ Mitra jugata Cruci.
 Quæ pietas, loquitur Cidaris; quæ vita, Tiaras;
 Quàm facili Clerum rexeris arte, Pedum.
 Solum internam opus est mentis proponere formam,
 Ne virtutum instar nobile fata premant.
 Hanc utinam ad vivum posset rupi inderè sculptor!
 Pulcrius hâc nullum marmor in orbe foret.
 Facta fidem superant, virtus encomia vincit,
 Nulli illam fas est ore vel ære loqui.

Hoc tantum, si quod Templisque, Arisque dedisti
 Jam repetas, & si creditor esse velis,
 Nil par impensis, meritis nil grandibus æquum,
 Tota Diœcesis quod dare possit, habet.
 Nos autem Tua cura olim, dum vescimur aurâ:
 Dum ferient oculos marmora mœsta pios;
 Æternùm innocuas SALVERE jubebimus umbras,
 Et requieta levi membra VALERE solo.
 Et ne venturis hæc quisquam nesciat annis,
 Postgenitis volumus marmora muta loqui.

Collegium & Domus probationis Societatis
 JESU Paderborn.

FUNDATORI PARENTI

Optimo & liberalissimo.

F. F. M. M. L. P. P.

CENOTAPHIUM.

Non tibi sarcophagum, aut plenam componimus ur-
 nam,

Exoptatum alibi Tumba cadaver habet.

Hic solùm lacrymis Tumulum humectamus inanem,

Et quia nil Tui adest, nil nisi flere juvat.

Tu vivus Templumque, Domumque, Scholamque dedisti,

Quod nostrum est, donum est, ô THEODORE, Tuum.

Ista dabis vivens, obitâ quid morte relinques?

Mortane munificam claudet avara manum?

Quæ

Quæ Tibi dilecti servabunt pignora Nati,
Patris ut hæc, dicant, sunt monumenta mei?
Cui dabis exanimēs artus? cui dulce relinques
Exuvium? cineres quæ teget urna Tuos?
Omniæne adscriptis transdes heredibus ossa?
Nil Nati poterunt Patris habere sui?
Non digitum antiquo fas est incidere ritu,
Pallidave in molli colligere ossa sinu?
Cor nobis utinam tantum licuisset humare!
Succensum nostri Cor quod amore fuit,
Fecit id Henricus Franci inclyta gloria Regni,
Delphon ut erigeret Pindarus iste novam,
O quoties aliquis sacras aditurus ad aras
Dixisset lacrymans: Cor bene molle cuba.
Aut in Pyramidis cono felice locasset,
Ut Cor sublimis grande referret apex:
Aut etiam ipse suo gestisset condere corde,
Usque memòr Cordis posset ut esse Tui:
Et caret invidiâ pietas quod suadet: amoris
Ambivisse fuit, sed caruisse dolor!
Verum habeant alii, Cor cetera membra sequatur,
Ne pia dividiuâ membra tegantur humo,
Tu cape Cor nostrum, Princeps, hoc conde sepulcro,
Ut sit ibi nostrum Cor, ubi noster Amor.

ACADEMIA PADERBORN.

Magnificentissimo & Clementissimo suo

AUTORI AC MOECENATI.

Ex Populo, Olea & Myrto

SEPULCRUM PYTHAGORICUM.

POpulus invicti fuit olim roboris index,
 Almæ hieroglyphicum Pacis Oliva fuit.
 Panthoidæ æternum Myrtus signavit amorem,
 Unde Tria inferias Manibus ista dabat.
 Quid Tibi Athenæum facret, Illustrissime PRINCEPS,
 Officii statuat quæ monimenta pii?
 Quam fundata Tibi Sapientia dedicit urnam?
 Quæ ponat meritis Mnemosyna æqua Tuis?
 More Tibi Samio ternas Academia frondeis
 Adstituit, mentis symbola grata suæ:
 Populus Herculei cingat Te roboris index,
 Est illa invicto digna corona viro.
 Te neque Lerneo perterritus Excetra rictu,
 Nec septemcipiti vertice vicit Hydra;
 Improba Saxonico proruperat illa Cucullo,
 Nixa minace Tuum dente ferire gregem,
 Jamque vomens igneis, jam sibila colla retorquens,
 Ibat ovans Princeps implicitura caput.
 Cum Tu obluquantem frustra complexus hyæriam
 Forti elisisti guttura panda manu.
 Phineas etiam monstra infestantia mensas,
 (Qualia inesa fame terra Batava fovet:)

Zetus

Zetus abegisti, & Stymphalia monstra trucidans
Eripuisti avidæ semivorata gulæ.

Ambiat ergo Tuam fortissima populus Urnam,
Evireat Manes populus ante Tuos.

Ponè illam adserimus rimum pacalis Olivæ.

Nam dum vitam ageres frons ea grata Tibi,
Commisfos altâ Civeis in pace regebas,

Cum Toga visa Tibi est gratior esse sago.

Servasti æterno semel ictam foedere pacem,

Quàm neque lis, neque vis, nec mala solvit Erys.

Sæpe intentatum repulisti Pallade Martem,

Ut regeres hostes Marte, sed arte Tuos.

Cum sedanda Tibi belli civilis Enyo

Iusta que plebeius posceret arma furor.

Vis illata ensẽm strinxit, Moderatio rexit;

Posse sed eductum condere, Pacis erat.

Hæc Tibi palma duplex, uno hæc ex stipite nata est

Arbor, in hac una est junctus Apollo Jovi,

Et quod servaris Civeis, & viceris hosteis,

Præfulis illud erat, Principis istud opus.

Floreat ego Tuo pacalis oliva sepulcro,

Ad cineres vireat pinguis oliva Tuos.

Restat adhuc Myrtus, veri nota Myrtus amoris,

Supremus de Te jure triumphat Amor.

Ille calens duplici moribundo in Principe flamma

Ferbuit, ille hominis, Numinis ille fuit.

Vos ego, quos duris urgens in rebus egestas,

Quos vago Anancitis preffit iniqua lare:

Vos ego inexhausti testes affabor amoris,

Dicite, (scitis enim) Principis ecquis amor?

Quo me Myrte rapis, Cælo gratissima Myrte?

Arbor Erotis eras, PRINCIPIS arbor eris.

In nos illa Tuum, Nostrum in Te illa excit amorem,
 Una illa æternùm subdit utrosque jugo.
 Floreat ergo Tux Myrtus pulcherrima Tumbæ,
 Ad tumulum vireat Myrtus amica Tuum.

V E T U S C A M O E N A,

Qua Illustrissimo Principi

T H E O D O R O

Primam olim Padibornæ Mitram gratulatus, nunc ean-
 dem libentem volentem iterato plectro salutat ve-
 teranus idem Musarum Sacerdos,

*R. P. Martinus Becanus è Soc. J E S U, tempore electi
 Principis Professor Paderbornæ.*

E Cce tibi, Princeps, toties è deside prælo
 Musa verecundum iussa subire diem.
 Triginta pluteo latuit prope clausa D E C E M B R E S,
 Ex quo prima Tuo luserat illa P E D O.
 Nunc pænè exanimem revocas in luminis auras?
 Quis Meccænatem T E M A R O non redamet?
 Si desit plausus; sat erit tibi carmine nondum,
 Quo juveni placuit, displicuisse seni.
 Sed tersæ fors est aliquantò antiquius auri:
 Quid mirum? veterem tangit arundo chelyn.

DEO, PRINCIPI, PATRIÆ.

An. M. D. LXXXV.

Inclyta cum sacro gaude PADIBORNA Senatu,
 Et præfens toto læta sit orbe dies,
 Nobilis antiquâ serie THEODORUS avorum
 Præfulis officium Pontificale tenet.
 Cernitis armorum chartâ spectabilis istâ
 Quæ novitas, sceptri quæ sit imago novi ?
 Mitra decens habitum fibris distincta duabus
 Quid, nisi quod cleri sit caput ille, docet.
 Jungitur effigies rubræ crucis. ecquid in illâ
 Præses odoriferi signa cruoris habet ?
 Scilicet ut vigili Pastor tuearis amore,
 Quas Christus lacerâ carne redemit oves.
 Si lupus accedat prædæ præsentis avarus,
 Ecce PEDUM manibus pontificale tenes.
 Percute, quid metuis ? trabibus suffulta duabus
 Vistua : quid trabibus firmitus esse potest ?
 In trabibus Christus sævo tulit hoste triumphum,
 Jungæ trabes (Christi crux erit illa) duas.
 Quid tibi, Meccenas, de talibus eloquar armis,
 Unde novos titulos, nomen & illud habes ?
 Singula qui latum partitur regna per orbem,
 Ille tibi partem Præsul in orbe dedit.
 Roma subest SIXTO quinto ; de montibus altis
 Legitimum Dominum te Padiborna vocat.
 Qui fueras igitur, jam non eris amplius ident,
 Mortales animos excute, numen habes.

Ac velut in celsâ Deus omnia sede gubernat,
 Sic tuus in celsâ sit quoque sede thronus.
 Altiùs à populo superis speculatus in astris
 Ut videas oculis subdita, fige pedem.
 Aut juga præcipitis scandas sublimia montis,
 Conveniens rectè sic tibi nomen erit.
 Sic poteris meritò Princeps à Monte vocari,
 Nobile FURSTENBERG, qui modo nomen habes.
 Omnia per montem fieri jam posse videntur,
 Quæ nostris oculis utiliora forent.
 An non Pontificem, qui nunc est SIXTUS, ab alto
 Monte etiam nomen constat habere suum?
 Sunt tibi cum SIXTO communia nomen & omen,
 Montis uterque sacri pastor uterque sacer.
 Adde quod electi quoque tempore sitis eodè,
 Vix absunt menses inter utrumque duo.
 Te Pádiborna vocat, Sixtum sibi Roma petivit:
 Ecce quod augurium Præsul id esse putas?
 Quæ novitas isthæc? si facti causa petatur,
 Conjunctis animis vos Deus esse cupit.
 Junctaque pro populi committere bella salute;
 Et pro Romanâ religione mori.
 Vivite felices, & ab alto monte vocati,
 Jam sacri memores nominis este, precor.

A D I N S I G N I A

Ejusdem Reverendissimi & Illustrissimi Principis.

CRux rubra cur rubeis trabibus conjuncta duabus?
 An quia crux duplici conficienda trabe?

Vel quia crux, roseo quam sanguine tinxit IESUS,
 Sanguineis trabibus restituenda fuit!
 Sanguineam, THEODORE, crucem tibi donat IESUS,
 Ut trabe sanguineâ fulta sit ipsa tua:
 Hostis ut, in Christi dirus qui sævit ovile,
 Hac cruce conspectâ te duce linquat oves.

GODEFRIDUS GROPPERUS

Susatensis Præpositus,

CASPARO FURSTENBERGIO

Viro nobilissimo, & fortissimo fidei Catholica in Westphalia propugnatori, contra Truchsesium religionis Catholicae desertorem.

HEros nobilissimum illustri fate sanguine, fortes
 Inter habende viros, vir præstantissime salve.
 Haud secus atque rigor ferri lentescere flammâ
 Assolet, usque tui magno tabescere amore
 Sentio cor, animumque meum accensasque medullas.
 Scribis ut attrito jaceant hostilia fastu
 Pectora, nec valeant quicquam tentare; lubenter
 Audio, & hæc nostram recreant nova nuncia mentem.
 Scilicet id vero prædixit carmine vates,
 Magna cadunt, inflata crepant, tumefacta premuntur.
 Purior utque refers dispulsis nubibus aër
 Induit antiquos, vultu ridente, colores;
 Spes animo jubet esse bono, Catilina fugatus
 Respicit incassum veterum vestigia honorum.
 Westphalia sed pulso requiescit terra tumultu.

En quàm magna tēnet superas clementia sedes,
 Et quàm Numinibus tardæ cælestibus iræ;
 Non etenim ancipiti pressos discrimine linquit
 Arbiter ætherius, sed mœsta in prospera vertit.
 Quænam pro meritis referetur gratia tantis?
 FURSTENBERGIACO quid nunc de stemmate dicam?
 En tibi tot se dona, tot explicuere merenti
 Divitiæ, superùm pleno tibi gratia fonte
 Influit, ipse tuis ne desis partibus unquam
 Invigila, patitur multum dilecta Tonantis
 Sponsa, lupos cernis rabiem evomisse, scelestis
 Ausibus intermixtam; age nunc bene consule rebus.
 Westphalicis, sacræ bene religionis honorem
 Amplifica, memorande Heros sic itur ad astra:
 Sic decus immortale tibi nomenque manebit,
 Cætera præcipiti labantur ut omnia cursu
 Conspicis, at parvos pro religione labores
 Laus manet, æternis non interitura diebus:
 Non alios laus ulla manet, qui nocte, dieque
 Infestant armis licet omnia more ferarum,

E J U S D E M

Ad Nobilissimum virum

CASPARUM FURSTENBERGIUM

in exilium à Truchsesio pulsum.

Elegia consolatrix, An. M. D. LXXXIII. 27. Junii.

QUæ modo Westphalias vastant mala bellica terras
 Condoleo tectis incubuisse tuis.

Illa eadem nostris in finibus omnia perdunt ,
Atque Ubios latè depopulantur agros.
Nec tamen est animus, vel erit desistere cœpto
Proposito, & fixum velle referre gradum.
Ut quoque sic facias, tua te constantia, virtus,
Atque tui generis stemmata clara monent.
Degener est animus, quem ostensa pericula sternunt,
Et trepidum dubia decipit arte metus :
Post tenebras spero lucem, post nubila Phœbum,
Et reditura bonis sæcula prima bona :
Temporis & qui præda sumus nunc ; tempore, nobis
Quod prædæ cedit pars inimica loco.
Vidi ego permultos ; amissis undique rebus
Plura equidem nactus, quam tenuere prius.
Si confidamus superis, & ad instar Iobi
Omnia in ætheream conjiciamus opem :
Ex inimicorum spoliis bona plura feremus,
Quàm fors heu ! nobis nunc violenta rapit,
Ergo inter strepitus belli stet firma voluntas
Sperans quæ mala sunt mox meliora fore,

C A R M I N A

B E R N A R D I L Ö P E R

Paderbornensis

E SOCIETATE JESU,

In funere

ANNÆ MARIÆ DE KERPEN

Conjugis

FRIDERICI DE FURSTENBERG,

*Domini in Bilstein & Westphalia Archisatrapa,**An. M. DC. LXVI. XV. Martii defuncta, &**9. Aprilis sepulta in parochia Veschede.*

Hoc agendum sæpe, quod agendum bene.

Viator audi, & siste, paucis te volo;
Ut multa discas hoc loco.

Anna hic quiescit: inclytum jubar domus
Decusque Furstenbergicæ.

Prudens, pudica, nobilisque femina:

Quæ vixit in negotiis

Velut otiosa; ut viveret melius Deo,

Et hinc abiret lætius.

Quid egit? hoc quod agere mortalem decet;

Ut ageret animam quam optimè.

Audis viator, quid velim; ut discas, volo,

Sæpe agere, quod agendum est benè.

Post brevem vitam longior.

QUinquaginta annis vixisti, ô Anna, tibi que est
 Vita tot annorum visa fuisse brevis.
 Longiùs ut vivas, moreris. Verè Anna sapisti,
 Quæ procul, ut possis vivere semper, abis.

Pace Pacis amans fruitur.

QUæ pacem coluit, dum viveret, inter amicos,
 Domesticos, ac subditos,
 Noluit, ut moritur, cum dirâ fœdera morte,
 Ut pacem in æternum colat.

Virtus post fata superstes.

TE bona sedulitas, te pulchra modestia vitæ,
 Nobile te mentis robur, egentis amor,
 Te pudor & pietas, te virtus arbitra morum,
 Te facit æternum vivere viva fides.

Dum nascimur morimur, dum morimur vivimus.

CESSIT hyems, potuitque thorum mors improba vernis
 Pertransire horis, Anna Maria, tuum.
 Hæret & enumerat luces quas Martius adfert:
 Quid facit? ut deinceps lux tibi nulla micet.
 Anna cadis. Martis mors sæva triumphat in horis,
 Omnia cum incipiunt vivere, tu moreris.
 Fallimur, haud moreris: cœpisti vivere primum,
 Omnia cum incipiunt te moriente mori.

EPIGRAMMA.

Fata Maria tibi voluerunt tollere vitam.
 Errarunt. vitam fata dedere tibi.
 Immortalis abis, nec obis, virtute superstes :
 Ad cognata præis astra, nec Anna peris.

I N

GENTILITIAS TRABES & PETRAM

Illustrium Sponsorum

FRIDERICI FURSTENBERGII,

Dynasta in Bilstein & Waldenburg, Consilarii Colo-
niensis, & lectissima Heroidis Anna Catha-
rina von der Leyen, An. M. D. C. XLV.

OMEN POETICUM.

Joannis Velde Dulmonienfis, è Societ. J E S U.

Furstenbergiacæ quamquam domus inclyta gentis
 Consistat trabibus sat bene nixa suis ;
 Nunc tamen adversum casus securior omnes
 Stabit, & in cæli proferet astra caput :
 Cum trabibus, Friderice, tuis tua subdit avitam
 Sponsa petram, firmum quo magè firmet opus.
 Nixa trabes petrâ nescit timuisse ruinam ;
 Pulvere siqua levi nititur, illa cadet.

BERNARDI LÖPER
E SOCIETATE JESU

CARMEN EXTEMPORALE
CUM

Voto nuptiali oblatum iisdem no-
vis conjugibus.

Omen conjunctio firmum est.

PETRA tibi juncta est MONS PRINCIPIS: ecce
quid obstat,
E petrâ Princeps quo minus exiliat ?

Mores imitabor avitos.

AD Paderam fulsit mitrâ Theodorus: eâdem
Joannes Trevirum clarus in urbe fuit.
Petra dedit Treviris, Paderæ Mons Principem. ab una hac
Petrâ Ioannes & Theodorus erunt.

Vis unita fortior.

SI duo divisi dederunt duo lumina; quidni
Jam duo conjuncti lumina bina dabunt.
Sic voveo, mecumque voveant, quos fovit uterque
Præful apud Treviros, & Paderam socios:
Quod facimus votum, faciat Deus esse secundum.
Ex ANNA ut Princeps sit FRIDERICE tibi.

Vita illustris ac generosi Domini

FRIDERICI FURSTENBERGH

*Dynasta in Bilstein & Waldenburg, Archisatrapa
Westphalia & Angaria, Consiliarii Moguntini
& Colonienfis, carmine descripta.*

AUCTORE

BERNARDO LÖPER

Paderbornensi è Soc. JESU.

Nobilis ortus.

UT primùm, Friderice, lucis auram
Hauifisti teneris nitens labellis
Ortus nobilium domo parentum;
Lux terrena tibi fuisse visa est
Nox, & luminis umbra sempiterni.

Docta & pia Pueritia.

UT cæcam fugias umbram noctisque tenebras,
Ad blanda pergis castra Musarum puer.
Te puerum ducit Pietas: tibi lucet eunti
Doctrina facibus ingenI lustrans vias:
Miratur parvo præcelsam in corpore mentem,
Figitque sedem, ut vividam exornet domum.

Philosophica adolescentia.

DOctrina & pietas te Sapientiæ
 Florentem ingenio sistit ad oscula;
 Illustri residens illa throno manum
 Sceptro deposito porrigit auream,
 Teque ad summa jubet tendere culmina,
 Et spectare sui tecta Palatii.
 Arrident placidis vultibus optimæ
 Virtutum comites, Ars, Ratio, Φύσις,
 Et quæcumque Φύσιν vincere posteros
 Stagirita docet; nil leve cogitas
 Rerum, quas peragas, natus ad ardua.

Prudens Juventus.

POstquam Socratico pulvere nobiles
 Ad palmas toties te Sapia
 Victorem revehens curriculo modum
 Finemque imposuit: Jus sibi vendicat
 Prudentem Juvenem. Præscia gaudiis
 Exultat merito jure Themis: Virum
 Nam te Justitiæ nomine nobilem
 Turbis posse suis se dare prævidet.

Felix conjugium.

DIctum est vetustum, quæ proba est, pulchra, inno-
 cens,
 Dives, pudica moribus,
 Ducenda conjux. conjuges tales suis
 Theophrastus optat civibus.

Veteri Sophorum more Fridericus sapit ;
 Refertque mores pristinos ,
 Ducit modestam , divitem, pulchram, probam
 Virtute, genere nobilem.
 Hymenæus Annam faustus & felix tuæ
 Friderice jungit dexteræ :
 Jungit Mariam nobili Kerpensium
 E stirpe, Furstenbergico.
 Fecunda vivit uxor, insignes ferens
 Propagines & palmites.
 In honore, amore, pace vivunt conjuges
 Pulchró, fideli, maxima.
 Uterque vivit (ut decet) sibi, suis ,
 Patriæ, quid amplius ? DEO.

Filii Insignes.

E St vetus à magno dictatus Apolline versus;
 Naturæ sequitur semina quisque suæ.
 Semina majorum sequitur generosa propago ,
 Anna Maria tibi quam, Friderice, dedit.
 Ut solet unda suo similis decurrere fonti,
 Sic tua progenies te, Friderice, refert.
 Tu primùm Theodore adsis, seu dicier optas
 Caspar : splendorem nomen utrumque tulit,
 Et feret inde tibi: satis est meminisse; quod audis,
 Sæpius in summo nomen honore fuit
 Ad Paderam, unde venis Theodori voce notatus,
 Nec minus insignis nomine Caspar avi es.
 Tu Friderice patrem sequeris, re, nomine, pulchris
 Moribus, eximii dotibus ingenii :

Prole

Prole quoque egregiâ, qualem Catharina decebat
 Ut daret. Heu ! quod avo non venit illa suo.
 Luderet in gremio crebrò senis illa Parentis,
 Et versâ ad patrem diceret ; Ecce avus est.
 Te qualem Guilhelme putem ? quantumque futurum ?
 Quem Treviris gaudens & Mimigardis habet.
 Ferdinande gravi vultu tibi prospera dixit
 Fortuna, egregiis moribus esto gravis :
 Et studiis contende tuis, doctoque labore :
 Ad Paderæ quondam flumina magnus eris.
 Sors eadem læto Franciscum pectore finxit,
 Is gaudebit equis, atque Eques, inquit, erit.
 Ultima, Joannes superest, spes gentis, Adolphus,
 Patris amor, matris gaudium, amoris honor.
 Nobilis hæc, Friderice, tuo de sanguine natâ
 Illustrat totam Westphaliâ soboles.
 Te vivo Rhenum, Paderamque, Alphamque, Mosellamq;
 Insigni hæc proles nomine nobilitat.
 Quid faciet post fata Patris Matrisque superstes ?
 Stabit in excelsa splendida & alta gradu.

Filia Lectissima.

ET vos feminei gloria nominis,
 Quis gaudere solet pignoribus pater ;
 Mater delitiis, læta sororibus
 Fratrum turba ; oculos pandite nobiles ;
 Spectentur veteris lumina stemmatis.
 Tu Maria præi, primaque nobili
 Huc incede gradu : casta Georgius
 Cernens Christophorus pectora, Boicos
 Accedet thalamos illa, ait, & meis

Vivet Virgo diu grata Penatibus.
Furstenbergiacis protinus arcibus
Educta ad Bavarum Virgo venit solum,
Haflangique subit splendida limina.
Ut mater redeat prolibus auctior,
Legatique viri munere gaudeat,
Contingit quoties cernere conjugem
Mundi inter Proceres, quos Mimigardia
Ad Pacem solitos pergere conspicit.
Mariam sequitur Barbara, quæ piè
Vitam Seraphico degit in ordine,
Et mundi illecebras temnit, & arduo
Conatu, atque viis asperioribus
Pergit Coelituum quærere gloriam.
Et tu virgineis gressibus Ursula
Vultu composito, moribus integris,
Sinceroque veni corpore, nec sinat
Te velare pudor virgineas genas.
Tu solamen ades, tu comes in viâ,
Stuecorum rabiem cum Pater effugit.
Partes auspiciis tu melioribus
Sumpstisti nivei pectoris optimas.
Uni sponfa DEO cernis inambulans
Virtutum comites, Herisiæ decus,
Votis Cælituum numina de die
Et denocte frequens poscere pro tuis
Externisque soles: sola beatius
Vivo, inquis: repetis sola beatius
Vivo præ reliquis virgo sororibus.
Felix virgineo è pectore prodiit
Vox hæc; quæ numero te sapientium
Adjunxit comitum, scilicet his, quibus

Ardent perpetuis lampades ignibus.
 Ad cælum properas virgineo gradu.
 Duc tecum Othiliam, quam sibi fœdere
 Plettenbergiacus non violabili
 Elegit sociam perpetuam sui
 Bernardus thalami: moribus optima
 Et prompta ingenio femina, cælitum
 Et virtutis amans, omnia fortiter
 Prudenterque gerit munera, quæ decent
 Tali in conjugio femineum genus.
 Spectavit Pater hæc pignora sapius
 Felix lætitiis non mediocribus.
 Spectarent utinam pignora nunc Patrem.

Vita Domestica.

V Itam quæ faciunt beatiorem
 Sunt tranquilla domus, quieta conjux,
 Virtutes pietasque liberorum,
 Ad nutum Domini parata turba,
 Et suave imperium, probique mores;
 Cultus cælitum, reique sacræ
 Indefessus amor, Deique honores,
 Vespertina precatio, diurni
 Ad cælum gemitus, Eöa vota,
 Hæc fecere domi beatiore
 Ut vitâ Fridericus imperaret.

Vita Publica.

P Ublica nunc adsint, Friderice, negotia, magno
 Quæ tractasti animo Heroum versatus in aulis.

Principibus placuisse viris non ultima laus est ;
Principibus placuisti ; ingens tibi gratia rerum
Quas ageres concessa fuit : tibi gloria rebus
Non minima accrevit faustè ac feliciter actis.
Postquam inter magnos cœpit fulgerè Swicardus
Pontifices, Moganiùm illustrans virtutibus urbem :
Te Friderice virum legit, præque omnibus unum
Ad triplicis mittit regalia mœnia Pragæ.
Rudolphum summo spectantem è culmine gentes
Accedens, hinc grata refers Regalia lætis
Auspiciis, fausta hæc magnarum exordia rerum
Nobilitas, rursus ad Rudolphum missus eundem ;
Imperii Proceres rapidus cum cerneret Ister.
Dein ubi Germanis Rudolphum dura tulerunt
Fata, Moguntino Swicardus jure vocavit
Ad Mœnum, quos ampla solet Germania septem
Appellare viros. tum te Friderice Swicardus
Lugubri Rhenum jussit descendere pinu
Cæsaris ut mortem referas ; & Ferdinandum
Ad nova vota cites ; queis rerum summa capessens
Matthias summos justo libramine franos
Imperii moderetur : Ubi sed vixit, adesse
Te sibi consilii rursus Swicardus asyllum
Francfurti voluit, dum magni culmen honoris
Ad Mœnum Austriaco latè fulgore coruscans
Ferdinandus adit. Quis non exclamet Apollo
Principibus placuisse viris non ultima laus est.
Quid Mulhausiacos memorem longo ordine cœtus ?
Bellonæque Duces ? quoties tua Tillius ora,
Tillius heu tristes superùm revocandus adoras,
Ora tua, & vocem quoties fuit ille secutus,
Cum Danum adverso pugnante Marte fugaret ?

Ecquid Anhaltinus ? quid Papenheimius ? ille
Suecorum terror, quid si frueretur eâdem
Quâ tua progenies aurâ, quid diceret ? Hic vir
Hic est, sæpe suis nostro qui profuit ævo
Consiliis, dubiisque tulit fausta omnia rebus.
Ipse quid Augustos inhians Gustavus honores
Cum te spectaret legati in munere ? nonne
Regi grata fuit canæ prudentia mentis ?
Nec minor Hispanos tenuit miratio, quando
A Nortlinganæ reducem certamine pugnæ
Victorem Hesperii regis cum milite fratrem,
Brabantisque suum properantem reddere solem
Excipis, & sacræ vim Majestatis adorans
Grataris victos armis concordibus hostes.
Quid Ferdinandus, cui nunc Germania fasces
Credidit, hic quanto te dignabatur honore,
Cum tibi Dalmatico donavit fusa metallo
Vincla catenarum, & primævos stirpis honores
Obtulit invito : fuit hoc à Cæsare munus.
Tanti te Cæsar. quid frater Cæsaris ? annon
Undique Cæsareis totam populantibus armis
Westphalias ? nunquid tua dicta stupentibus hausit
Auribus ? ecquid enim verbis sapientius istis ?
Gratus ades, si ades ut prosis : sin omnia vastas
Gratus abis. risit Leopoldus, & horrida Martis
Extulit è patriis examina protinus oris,
Pauperiemque, famemque, & lethi semina morbos.
Austriacis placuisse viris non ultima laus est,
Et Bavaris placuisse viris laus magna : placebat
Maxmiliane Tibi Friderici vultus, & altâ
De sobole gratantis honos; cum nomine fratris
Gratulor aiebat Phœben luxisse serenam

Bojugenamque novâ (quod non sine numine Divûm est)
 Progenie clârâsse domum. quid cætera narrem
 Longiùs ? hoc memiorem quod sufficit omnibus unum.
 Supremo placuisse Deo vel maxima laus est,
 Huic Friderice places, cui sol & sidera parent.

Dispositio ad mortem.

R Emitte Musa turgidum metri genus,
 Humilesque foccos indue :
 Nam derelictis Principum palatiis
 Fridericus ima cogitat,
 Ut astra subeat. Igitur ut, cum solus est,
 Hominem esse se se cogitet,
 Valere jussit ardua : atque annis suis
 Posuit Sigenæ calculos,
 Animo revolvens pristinum vitæ statum,
 Purgansque mentis ardua.

Mors præclara.

E T vitæ jam finis adest : mors ultima rerum
 Linea fata vocat.
 Parcæ adsunt, animamque jubent migrare, paratæ
 Mens Friderice tibi est.
 Fortiter expectas extremæ tempora luctæ :
 Victor adis superos,
 Constanti in vitas ad te bis pectore Christum :
 Bis tibi Christus adest.
 Teque juvat, superans ut atrocem viribus hostem
 Cælica regna petas.

Vicisti, placidoque exis è corpore vultu,
 Mors tibi non nocuit,
 Non hostes nocuere truces. videt inclyta Bonna
 Te superasse necem.

In tumulto corpus, in calo animus.

AN sim hic viator, quæris? haud sum. Tu amplius:
 Ubi ergo fuerim? in scenicis. quid egerim?
 Ludum peregi. quid jam agam? sompnum traho:
 Ubi? in sepulchro: quam diu? donec polo
 Descendat alto Christus, & nos judicet
 Me, teque mortalesque cunctos. quid sciam?
 Nihil. Unde venerim? è loco prænobili,
 Ex arce Furstenbergicâ. cur venerim?
 Hic ut quiescam ætate grandis; prosperè
 Scenâ peractâ. animus ubi sit? hospes tacet:
 Nam curiosus quæris arcanum. tamen
 Quoniam benignus est Deus; cælo scias
 Animum teneri, corpus hic quiescere.
 Scis, quæ volebas. Scire nunc ego te volo,
 Quæ non rogare solitus; hoc igitur scias;
 Quod scire utroque in orbe mortales velim;
 Esse hic quietos, & spei plenos bonæ:
 Qui noverint sese, dum agunt vitam, & sciant
 Se pulverem esse, bullam, arundinem, nihil.

EPIGRAMMA

JACOBI MASEN

Societatis JESU,

IN OBITU M

FRIDERICI FURSTENBERGII

*Archisatrapæ Westphaliae & Angariae, dynastæ in
Bilstein, defuncti An. M. DC. XLVI.**9. Augusti, Bonnæ.*

Quanta igitur vis est, quanta est tua, Parca, potestas?
 Uno quæ violas sacra profana modo:
 Nempe tuo imperio Friderici corpus ademptum
 Furstenbergiacos conditur inter avos.
 At virtus manet, & gestarum gloria rerum,
 Junctaque cum pulchro Pacis amore Fides.
 Nulla igitur vis est, nulla est tua, Parca, potestas:
 Quæ meliora finis stare, caduca rapis.

EJUSDEM

LESSUS FUNEBRIS,

*Quo plorantes suspirantesque filii, optimi sui aman-
tissimique Parentis funus prosequébantur.*

LESSUS I.

ITe oculi in lachrymas: animus suspiria fundat,
 Et plangent geminæ pectora mœsta manus.

Ah cecidit, cecidit vitæ pars optima nostræ,
 Billsteniæ cecidit culmen honorque domûs.
 Furstenbergiacæ stirpis decus atque columna
 Clauditur angusti fornice sarcophagi.
 In cineres cecidit nostræ spes inclyta gentis:
 Quem natura dedit, mors tulit atra patrem :
 Mors tulit, & Lachesis nimis intractabilis ungue
 Inviso vitæ stamina dissecuit.
 Crudelis nimum quæ vulnere perculit uno
 Tot consanguineos progeniemque viri.
 Quid nobis vitam, Pater ô moriture, dedisti :
 Tam subito natis si rapiendus eras ?
 Ah omnes unâ fatum nos clauderet urnâ,
 Junctæque cum patriis ossibus ossa forent :
 Pro lachrymis funus, mortem pro planctibus optem;
 Elysiis comes in vallibus unus ero.

LESSUS II.

A H dolor ! ah lacrymæ ! tandem permittite vocem,
 Et maneat vinclis lingua soluta suis.
 Te, Friderice, querar. primum post numina cœptæ
 Auctorem vitæ subsidiumque meæ.
 Siccine abis, medioque tuos sub Marte relictos
 Deseris hostili spesque salusque plagâ ?
 Ecce ruunt sævo circum nos cuncta tumultu,
 Mille metus lethi, mille salutis erunt :
 Hic cladem meditatur opum, meditatur honoris,
 Nec genti desunt mille pericla tuæ.
 Respice de cælo (sedem hanc tenuisse putaris
 Cum procul à nostro velleris orbe Pater)
 Respice, nec differ pronas ad munera dextras,
 Quamque vides sobolem perge fovere tuam.

Ecce

Ecce damus lacrymas, lacrymis scio posse moveri,
 Et faciles nobis te dare posse manus.
 Te, puto, non spernet Numen post fata supremum,
 Spernere quod nunquam tu mihi visus eras.

O D E

J O A N N I S V E L D E

Dulmoniensis, è Societate J E S U,

In mortem nobilissimi viri,

FRIDERICI FURSTENBERGII

*Westphaliae & Angariae Producis, Domini
 in Bilstein.*

S Ic est: citantem nemo, potentiâ
 Quamvis curuli fulgeat, aut manu
 Sceptrum coruscet, lite victor
 Ad Puteal Lachesis recuset
 Sequi. ambulandum est omnibus in forum,
 Quà Prætor amplam commovet Æacus.
 Urnam, salutareque scribit,
 Triste reis nocuamque ceram.
 Namque ulla plenas si chalybis Deæ
 Mollire leges, scitaque ahenea
 Immitis ornamenta possent,
 Intrepido Fridericus ore
 Adhuc superstes luminis aurei
 Captaret auras, atque petentibus.
 Adhuc Erygri Lenneique
 Jura daret moderans Achivis.

Non sanguis illum ductus ab ultimo
 Clarus Wichindo, non propior fatus
 Agente Burgi quæ Vetusti
 Nomen habet, dominoque nutu
 Latè Visurgis littora temperat,
 Non clara virtus solvere legibus
 Quivit severis, non repostus
 Ipse animo interiore Phœbus.

JACOBI MASENII

è Societate JESU

E L E G I A,

In mortem perillustis ac generosi Domini

D. F R I D E R I C I

BARON. A FURSTENBERG,

*Serenissimi Elect. Colon. consiliarii intimi, satrapæ in
 Bilslein, Waldenburg & Frèdeburg, Domini in
 Schnellenberg, Watterlap & Herdringen, &c.*

N Ox erat, & densis solem tumulaverat umbris
 Pallida Cimmeriis Cynthia vecta rotis.
 Jamque quietifero secunda papavera succo
 Sparferat humenti lapsus ab axe sopor.
 Morpheus à tergo, cœcâ in caligine pictor,
 Funestis animum luscis imaginibus.
 Mons sublimis erat, quod mè dux Phœbus agebat,
 Qualis Apollineo Cyrrha habitata choro:
 Aut qui Pieriis sudat mons Theſſalus undis,
 Collibus affinis maxime Pînde tuis.

Sed tamen ad Rheni latices; umbrosaquæ Tëmpe,
Angaricis ubi se frondibus ornat humus.

Quà Furstenbergam filvis famulantibus arcem
Prospicit, & fuso diluit amne latus.

Huc genio ductore sequor, qui gentis avitæ
Tutor, ad obsequium posteritatis erat.

Nobilis ingenuâ species in fronte micabat;
Majus & humano fulsit ab ore decus.

Nepthaliden qualis juvenem Raguëlis ad aulam
Incolumem duxit, restituitque Patri.

Nil moror: enixus teneo fastigia Montis;
Molliter acclivi, quà patuère, viâ.

Hic se planities lauro, myrtoquæ virehti
Cincta, coronato pandere visa jugo.

Fons erat in medio vitreis crystallinus undis,
Quem fecunda parens parturiebat humus;

Hoc de rore suos potabant Naïdes agros;
Sæpius hoc biberat sobria fonte Dryas.

Hinc suus arboribus succus; fomentaquæ plantis,
Floribus inde vigor, frondibus inde viror.

Silva caput fontis raris lectissima plantis
Cinxerat, & viridi sparserat orbe comas.

Grandius Arboribus senis decus: inclyta quales
Natura in prætis finxerat Hesperidum.

Jam procera suis quævis adoleverat annis;
Frondis & umbrarum luxuriante toga.

Altior una tamen reliquas superaverat omnes:
Sit licet annorum conditione minor.

Mirabar, Zephyros inter, plaudentibus âlis,
Penè locuturo murmure quamque rapi.

Huc volucrum prolapsa cohors habitacula fixit;
Altera nidificans, alterâ carmen ovans.

Et Philomela suas hic pangere noverat odas,
Et Fringilla suum conduplicare melos.
Blanda serenatos afflaverat aura tepores :
Ridebat, placido sole favente, solum.
Hæc ego dum fixis oculis spectator oberro,
Et mens deliciis ebria consequitur.
Dux meus artifice plantarum corpora scalpro
Rasit, & arboribus nomina culta dedit.
Quæ prior eminuit FERNANDI in cortice nomen
Prætulit, augustis irradiata notis :
Altera CASPARUM, FRIDERICUM tertia duxit :
Nec WILHELME tuum præteriisse putes :
Tu FRANCISCÆ bonâ signatus in arbore fulges :
Ultima vox plantam pingit ADOLPHE tuam.
Ergo novis sensi mysteria crescere signis,
Cum vocale loqui cœperit arte nemus.
Nec modò cessabam superos ad vota ciere,
Usque favens silvæ Numen adesse velint.
Crescite, dicebam, longis plantaria sæclis :
Crescite per seras posteritatis opes.
Gaudeat his præsens, his posthûma gaudeat ætas :
Nec minor hinc surgat, stirpe favente, nepos.
Seu lætari umbris hubeat, seu carpere fructus :
Flos pariat fructus, frondibus umbra cadat.
Affluat è cælo maturis roribus imber,
Et vernis animet blandior aura flabris.
Sed mihi, quis dirus votis illabitur horror,
Et modò conceptas eripit ore preces ?
Sol trepidos mundo radios subducit, & atram
Cogitur ad nubem rapta subire dies :
Pro Zephyro furit immitis sub frondibus Euris,
Et rapit infestos ad sua signa Notos.

Stricta coruscanti vibrantur fulgura cælo,
Et tremulum involvit torva procella polum :
Garrula conticuit modulatrix turba volucrum,
Hæsit in attonitis & Philomela modis.
O nimis incertis, dixi, variabilis auris
Cælorum facies, nec sine fraude fides !
Cur prius arridens tempestas cæca serenum
Invidet, ac tenebris gaudia pressa rapit ?
Vix ea. Cum subito cælumque solumque fragore
Concussum Stygiis panditur hospitibus.
Ossea mors, monstrum horrendum mortalibus, orco
Profilit, & dextram falce tremente quatit :
Terrifico ruit incessu, funestaque vultu,
Excidium viridi triste minatur humo.
Pestifer attritos gressus latè inficit agros :
Quà graditur, pratis flosque vigorque perit.
Ast ubi fatalem cœpit quassare securim,
Quælibet horrescens corpore planta tremit.
Illa minax perstat, dubiosque assurgit in ictus,
Et Procerum truncis sica timenda furit.
Te precor, exclamo, funestam verte bipennem :
Stirps annosa magis falce resecta cadat.
Illustres Fratrum plantæ, melioribus annis
Serventur ; fructus dentque ferantque suos.
Sed frustra : precibus duras obstruxerat aures,
Et ferit in planta Te FRIDERICÉ Tuâ.
Plena suos dederat fructus tam nobilis Arbor,
Subjectum latè nata fovere solum.
Hæc alimenta suis quondam præbebat alumni,
Hujus in umbroso plurima turba sinu.
Hic pecori dilecta salus, hic advena tutus,
Hic quoque Principibus non inamœna quies.

Ergo

Ergo suos ictus lento Mors improba ferro
Dum repetit, tandem planta resecta cadit.
Diffugiunt volucres, & inhospita tecta relinquunt,
Illa ruens lato cuncta fragore replet.
Intremuere comis, moestumque horrescere visæ,
Vicinum plantæ quæ tenuere nemus:
Ut tamen est submotâ solo, patuere minores
Plantarum quinæ, quæ tenuere solum.
His ubi Mors eadem visa est intendere sicam,
Dux meus objectâ disjicit æra manu.
Tolle, inquit, funesta meo spectacula monte,
Hostia, quæ cecidit, sit satis una tibi:
Una tibi cessit sublata hinc nobilis arbor,
Unius plures fas reparare vicem.
Non perit, quæcunque perit cum scœnore planta:
Germinè dum posito multiplicata redit.
Quin etiam decus æternum præfecta tenebit,
Arbor regali constituenda domo.
Surget inauratas inter miscenda columnas,
Et simul accipiens conferet illa decus:
Interea fratrum reliquas ex ordine plantas
Fecundo vernans imbre fovebit ager.
Et polus affuso recreabit leniter æstu,
Nec non ventorum mollior aura reget:
Ut neque deciduo flos evanescat honorè,
Frondeat aut solâ luxuriante comâ;
Sed passim det planta suos uberrima fructus,
Quos præsens ætas, posteritasque legat.
Dixerat, & mediò victor jam Phœbus Olympo,
Blanda reproductis exerit ora júbis.
Visa suas retro tempestas vertere nubes,
Et placidum totâ reddere fronte polum.

Ventorum cessere minæ, mors pallida flexit
Terga, suis rursus floribus arva nitent :
Et mihi discusso rediit mens integra somno ,
Cumque suis tenebris fugit imago diem.
Non tamen hæc vanis luserunt somnia signis,
Delituit ficto schemate, triste nefas.
Heu dolor ! hæc nostræ simulacra fugacia vitæ,
Lugendæque necis, quâ Friderice jaces.
Tu spes magna domûs, Tibi posteritatis honorem
Crediderat : primo spem modò flore rapis.
Te pietas & avita fides erroribus hostem
Fecerat, & sanctâ religione patrem.
Principibus fecit prudens sapientia carum,
Et bona fors fratrem Principem habere dedit.
Et peperit tales illustri ex ordine Fratres ,
Unica quos virtus nobilitare queat.
Hunc subitò abruptis Tibi Mors durissima cursum,
Nec tantâ patitur livida sorte frui.
Tu tamen invidiam superas, Mortisque sagittas
Transiliens vitâ jam meliore sapis.
I, fruire, & nostras quando memor adspicis oras,
Imbue supremi pectus amore Dei.

E J U S D E M

Epigraphæ genealogicæ Stemmatæ FURSTENBERGICI,
honoris observantiæque gratia oblata,

Celsissimo ac Reverendissimo Principi ac Domino

F E R D I N A N D O

Dei gratia Episcopo Paderborn. Coadjutori Monaster. S. R. I.
Principi, Com. Pyrmontano & lib. Bar. de Furstenberg,

E T

Reverendissimis atque Illustrissimis sue Celsitudinis Fratribus,

FRIDERICO Consiliario intimo Coloniensi & Paderbornensi, Sattapæ
in Fredeburg, Bilslein & Waldenburg, Dynastæ in Oberenkir-
chen, Advocato hereditario in Graffschafft, &c.

THEODORO CASPARO Moguntino & Spirensi Canonico,
ac Consiliario, Regis Catholici olim Chiliarcho legionis equestris;

A C

WILHELMO Alexandri VII & postea Clementis IX summorum Pon-
tificum Cubiculario intimo, Præposito Monasteriensi, Chorepisco-
po Trevirensi, Canonico Salisburgensi & Paderbornensi, &c.

FRANCISCO WILHELMO. Ordinis Teutonici archicom-
mendatori per Westphaliam, commendatori in Mulheim &
S. Georgii Monasterii, Consiliario intimo Paderbornensi.

E T

JOANNI ADOLPHO Hildesiensi, Monasteriensi ac Paderbornensi
Canonico ac Camerario, Præposito S. Crucis in Hildesheim, Sa-
trapæ in Bilslein, Waldenburg & Fredeburg, &c.

Lib. Baronibus in Furstenberg, Schnellenberg, Watterlapp & Herdringen,
Dynastis in Oberenkirchen, Advocatis hereditariis in Graffschafft, &c.

*Diversi ex Furstenbergicâ stirpe Majores, nullo nobilitatis vitio degeneres,
suis singuli virtutibus eximii proponuntur, suis breviter elegiis
ad exemplum posteritatis continua serie exhibiti.*

Non leve præclaris pondus virtutibus addunt
Illustres priscae nobilitatis avi.

Calcar honoris honor, stimulis exempla laceſſunt :

Quâ fixêre pedem, nos iuvat ire viâ.

Degeneres Aquilæ nunquam peperêre columbas.

Quod cedri pariunt germina, cedrus erit.

Deficiens patrias oleaster rarus olivas

Cenſet, & antiquum vite labruſca genus.

Conſtant magna ſibi, vos clarâ ex ſtirpe Nepotes

Statis adhuc dignæ poſteritatis honos.

Ite, licet, per pulchra retrò veſtigia Patrum,

Sit quoque virtutum majus eundo decus.

Æmula patorum ſperatur gloria. famam

Reddere, cum famæ ſanore, laudis erit.

Pellæi genitor Macedûm fortiſſimus heros,

Vincendus nato, vicerat ipſe patrem :

Viſus Alexander patrem ſuperare Philippum ;

Gloria, quâ vicit, gloria ſola fuit.

Pars veſtrûm devota Deo ; pars eſſe propago

Seminis, & patriæ ſpes meruêre domûs.

Creſcite utrimque precor ; vos religione parentum ;

Vos ſerâ digni poſteritate patres.

Plurimus in vobis ſurgat Theodorus, avorum

Et decus, & mitræ gloria rara ſuæ.

His quoque Fridrici creſcant venientibus annis,

Nec partu jaceat deficiente domus.

Sic ſuperi jubeant, ſic quos memoramus avitâ

Stirpe Patres, cælo non renuente, velint.

FRIDERICVS I. *Animoſus.*

Symbolum. Quavis fortuna ferenda eſt.

N Aſcimus adverſis lætiſque: utrumque ferendum eſt.
Pergis inoffenſâ, Dux animoſe, viâ.

Saxo-

Saxonici¹ Ubius quondam dum stringitur armis,
 Furstenberga luit, diruta clade domus;
 Inde tuis opibus mox Watterlappia surgit.
 Arx animi, quâvis fortior arce, fuit.

¹ Henrici Leonis Saxoniz Ducis partibus cum adhæssisset adversus Philip-
 pum Arch. Col. arx diruta fuit Anno 1180.

HERMANNUS I. *Æquus.*

Symbolum. *Pergam quâ tutius itur.*

TU NE CEDE MALIS, SED CONTRA AUDENTIOR ITO:
 Justa Engelberto causa Deusque favet:
 Adfuit, ² & tuitus stantem est, tuitusque jacentem,
 Furstenberga domus, quo revocante, stetit.
 Præmia mortales reliquorum digna laborum
 Reddiderint. cælo hinc præmia iusta feres.

² S. Engelberto Col. Arch. arcis instauratori, indignè demum occiso, & vivo
 & mortuo adfuit, cædem cum Henrico Arch. Colon. Successore ultus
 An. 1225.

FRIDERICUS II. *Acer.*

Symbolum. *Adversis adversus.*

Q UOD belli Friderice acer, pacisque magister
 Clarus oves; testis sit Paderanus ager.
 Martia vibrantem te sensit Episcopus ³ arma,
 Dum galeam fertur præposuisse mitræ.
 Indoluit Simon ita destituisse tiamam;
 Quæ Furstenbergam visâ adamare domum.

³ Simonem Episcopum Paderbornen. cum aliis Dynastis bello vicit cepitque
 An. 1254.

FRIDERICUS III. *Infraclus.*Symbolum. *Dum cedo, non frangor.*

Alea quem vario jactat Mavortia casu;
 Infracta hic quâvis pectora sorte gerit.
 Furstenberga domus quater occubuisse, quaterque
 Surgere de proprio funere visa fuit. ⁴
 Debet Arensbergis Marcanisque illa ruinam:
 Hi cecidêre tamen; stat generosa domus.

⁴ Contra Marcanos & Arensbergicos Comites in bello pro Henrico Archep.
 Colon. aliisque stetit ab An. 1295. ad 1345.

WENEMARUS I. *Prudens.*Symbolum. *Nemo sibi nascitur uni.*

Fulta tuis quondam viguit Respublica curis,
 Perque tuas clades libera clade fuit.
 Hoc raræ virtutis erat, communia gentis
 Commoda privatis posthabuisse bonis. ⁵
 Sic rebus minus ipse tuis dum consulis heros,
 Non poteras famæ consuluisse magis.

⁵ Friderici Colon. Arch. Consiliarius & primus Sarrapa Arensbergenfis, co-
 piis ejus adversus Engelbertum Marcannum comitem præfectus, dum alie-
 na tuetur, in propriis cladem sustinet. Moritur An. 1356.

FRIDERICUS IV. *Fortis.*Symbolum. *Agendum & patiendum.*

Rara simultates peperit fortuna malorum,
 Quos malè consultus vertit ad arma furor.
 Unus erat pectus varios armatus in hostes,
 Et quot erant patriæ, Principis ⁶ & quot erant,
 Augeat alter opes patriæ, ferat alter honorem;
 Omnia dat, vitam qui dedit ipse suam.

Y

HER-

⁶ Friderico Arch. Colon. variis in belli casibus, etiam adversus Paderbor-
 nensem adhæsit An. 1390. & seq.

HERMANNUS II. *Pius.*Symbolum. *Plusquam præsentia cures.*

ARma tulit miles, ⁷ positis sed mitior armis,
 Munera servandis Manibus ampla tulit.
 Dura secuturæ movêre piacula vitæ,
 Ad bene flectendos hæc pietate rogos.
 Functorum quicunque memor, sic funera mollit,
 Æternum in vivis nomen habere meret.

⁷ Theodorico Arch. Colon. in bello Susatensi adfuit, sed demum pietati & fundandis sacrificiis pro defunctis intentus moritur An. 1471.

WENEMARUS II. *Gravis.*Symbolum. *Virum facit virtus.*

IN paucis te rara virum sapientia cælo
 Extulit; ⁸ uxoris nec minor illa tuæ.
 Scilicet exemplum pietatis femina magnum;
 Tu simul exemplum religionis eras.
 Nec fuerat laudum pars hæc postrema tuarum;
 Vir gravis, at nulli creditus esse gravis.

⁸ Ipse sibi Deoque vivens, uxorem Cordulam de Galen raræ sanctimoniz feminam habuit, Ille moritur An. 1434. 23. April. hæc 1516. 4. Decemb.

FRIDERICUS V. *Pacatus.*Symbolum. *Cedant arma togæ.*

NON te per cædes rapuit Mavortius ardor,
 Ingenio placuit mitis oliva tuo.
 Sic pietas, sic pacis amor super æthera vexit,
 Terricolis gratum cælicolisque virum.
 Sidera compositis dum scanderet Icarus alis,
 Quàm cuperet pennas tunc habuisse tuas!

JOAN.

⁹ Consiliarius Hermannii Archiep. Colon. & Satrapa Westphalis. moritur An. 1543. 3. April.

JOANNES ABBAS Sibergensis. frater. *Religiosus.*

Symbolum. Bene qui latuit, bene vixit.

CLara Sibergensi quamvis fuit abdita clauistro,
In latebris virtus fulserat illa tamen.

Ordinibus multum sacris debere videris:

Sed tamen & sanctus debitor ordo tibi est.

Tu lucem virtute tuâ, lucem ille refundit,

Evehis illius nomen, & ille tuum.

10. Alter ejus loci fundator mortuus An. 1549. 7. Decemb.

FRIDERICUS VI. Satrapa in Bilslein, &c. *Integer.*

Symbolum. Plus ultra.

TE magni Proceres, te Regum curia vidit,

Officio gravium munus obire Ducum.

Seu belli seu pacis habes legatus honorem,

Integra mens semper consiliumque tibi est.

Multarum integritas, post dura pericula, rerum

Integritas vitæ creditur esse tuæ.

11. Quatuor Elector. Colon. Adolphi & seq. consiliarius. Cui præfectura
Bilslein, &c. ære tradita. Comitibus Augustæ An. 1559. interfuit. Varias
obiit legationes. Moritur 1567. 21. Martii.

CASPARUS Archisatrapa Westphaliæ

& Angariæ, &c. *Fidelis.*

Symbolum. Presum ut prosum.

Quid tibi religio, quid patria debeat uni,

Quàm bene præfueris profuerisque tuis: "

Y 2

12. Hic quinque Elect. Colon. ac trinum Mogunt. & Paderbornensis Princi-
pis Consiliarius, Truchsesio cum plerisque nobilium deficientibus, inter
paucos stetit, ejectus ac spoliatus omnibus, sed sub Ernesto restitutus, pa-
triam reduxit. obiit 1618. 7. Martii.

Integra collapsis memorant nova tempora sacris,
 Cum Rhēni dubio fluctuat amne fides.
 Hæresis illa tuum scopulis illidere gestit;
 Sed proprium infregit perniciosa caput.

THEODORUS Episcopus & Princeps
 Paderbornensis. frater.

Pater patriæ, & Societatis JESU fundator.

Symbolum. Judicium melius posteritatis erit.

TE meritis impleſſe tuis cælumque ſolumque,
 Terrorem ſclerum, juſtitia긑que decus,

Teſtantur monumenta tuæ clariffima vitæ,
 Seu Muſas foveas, ſeu pietatis opes;

Hinc licet improlis natorum millia cenſes:

Teque unum memorat patria tota patrem.

13 Dnas arces præter Colleg. Soc. Jeſu excitavit. Hæreticos & Paderbornam rebellem compeſcuit, religionem pro viribus tuitus, moritur laude ac meritis plenus An. 1618. 4. Decemb. æt. 71.

FRIDERICUS VII. Archiſatrapa Weſtphaliæ
 & Angariæ, Dynaſta in Biſtein. *Sapiens.*

Symbolum. Hic nullum metuit, qui metuit Deum.

QUod tibi diſpliceant hamatæ munera dextræ,
 Quod niſi conſultâ nil operere manu,

Quod vitiiſ hoſtis, quod ſi virtutis amicus,
 Infractumque malis pectore robur alas.

Quod tibi conditi ſapiant pietate labores;

Cætera deſpiciant, hoc ſapientis habes. ¹⁴

FRIDERICUS VII. Archiſatrapa Weſtphaliæ & Angariæ, Dynaſta in Biſtein.

14 Moguntini ac Colon. Eleſt. Conſiliarius intimus, variis ab hoc & illo diſtinctionibus præfeſtus. Biſteinum, &c. in ſeudum nocepit. ad varia comitia legatus, ubique prudens & integer. Ab Haſlis captus, a Succis demum pulſus, moritur Bonnæ 1646. 9. Aug.

FRIDERICUS VIII.

Dynasta in Billstein, &c. *Consulens.*Symbolum. *Consilio & amore.*

C Onsilio prudenter agis; sed amore potenter:

Utraque vis animi nobilioris inest,

Hoc tibi subjectos junxisti, illoque regentes,

His tibi devinctus nexibus orbis erat.

Magnus Agrippinæ Præsul, Trevirum Mogonumque

Obsequium laudant; sed magis astra probant.

15 Archiep. Colon. & Paderborn. Episcopi Consiliarius intimus, Patriæ imprimis amans & amatus moritur An. 1662. 7. Julii.

FERDINANDUS Episcopus & Princeps Paderbornensis, Coadjutor Monaster. frater. *Felix.*Symbolum. *Suaviter ac fortiter.*

16 Æ Gida Palladiæ jungis sapienter olive,

Quodque armata nequit Pallas, inermis agit.

Suaviter hinc fortis, suavisque hinc fortiter urges,

Seu tibi res gladio, seu sit agenda pedito.

Vive diu Princeps, qui tam pugnantia jungis,

Et mundo poteris conciliare polum.

18 Natus Billstemi An. 1626. 12. Octob. electus Episcopus Paderb. dum in aula Alexand. VII. Pontif. Cubicularius intimus versatur Anno 1661.

20 April. Inauguratus 4. Octob. In Coadjutorem Monasteriensem assumptus An. 1667. 19. Julii. confirmatus An. 1668. 30. Aprilis.

In aliud ejusdem Principis lemma pro arce Oldenburgensi usurpatum.

Virtute & Doctrinâ.

I 18 Q Uem comes hinc Virtus, comes hinc Doctrina coronat,

Judicio felix Urbis & Orbis erit.

Hæc geminas de stirpe trabes insignia vincunt :

Hinc caput exornat mitra, pedumque manus.

His patriam fundare domum perge, inclyte Princeps,
Haud melius fulcrum posteritatis habes.

WILHELMUS Præpositus Monasteriensis.
frater. *Causus.*

Symbolum Catæ & cauti.

OMnia cum virtus possit, Prudentia regnum
Obtinet, & reliquis lux bona, duxque præit.

Hinc catus & cautus Procerum celebraris in aulis,

¹⁷ Pontificumque tibi clavis amica patet.

Quin etiam variis Ecclesia credita regnis :

His cæli clavem junge, beatus eris.

- ¹⁷ Alex. VII. & Clement. IX. Pont. Cubicularius intimus, legationibus diversis clarus. Trevisis Chorepiscopus, Monasterii Præpositus. Salisburgi. Paderb. Canonici, Præpositus in Rostorf & Melchede. Prior S. Mariæ de Campeio in Alpibus Tridentinis. Monasteriensis & Paderbornensis Consiliarius intimus.

Ad reliquos tres Reverendissimos & Illustrissimos

DD. Fratres Celsissimi Principis Ferdinandi.

EUge trias fratrum magnis natalibus orta,
Quos magè virtutum tollit ad astra decus.

Non humilem vos ire viam sacra nomina monstrant,
Singula divinis nobilitata notis.

Nam sua de cælo THEODORUS ¹⁸ dona recenset

Magnorum socius, deliciæque virum.

Raraque FRANCISCUM ¹⁹ decorant insignia gentis,

Teutonicâ dignum munus adire togâ.

Gra-

¹⁸ Theodorus Casparus Moguntiz & Spiræ Canonicus, Chiliarchus quondam Regis Catholici, &c.

¹⁹ Franciscus Wilhelmus Archicomendator ordinis Teutonici per Westphaliâ, Consiliarius Paderborn. &c.

Gratia JOANNIS 20 decus est. Divisit honorem,

Et fratres mansit gratia quæque suos.

20 Joannes Adolphus Canonicus Paderb. Hildesf. & Monaster. Præpositus
S. Crucis in Hildesheim, Satrapa in Bilstein, Waldenburg & Fredeburg.

WILHELMUS Magnus Teutonici ordinis
Magister in Livonia. gentilis. *Patiens.*

Symbolum. Ut potiar patiar.

Seu tua belligeræ tractaret Palladis artes,
Seu tua mansuetæ dextera : magnus eras.

Digna magisterio virtus est visa fuisse, 21

Seu premeres hostes, seu premerere tuus.

Denique cum victus sævum paterere Tyrannum,

Victorem Virtus sustulit una suum.

21 Wilhelmus Furstenbergius, primo Coadjutor Henrici de Galen Ordinis
Teutonici in Livonia Magistri, Wilhelmum Brandenburgium bello victum
cepit, eaque de causa Polonorum armis obtutus cessit necessitati, & Wil-
helmum Brandenburgium Archiepiscopum Rigensem restituit; deinde
mortuo Henrico factus Magnus Magister Livoniz, variam fortunam ex-
pertus Coadjutorem ac successorem suum designavit Gothardum de Ket-
teler, hodiernæ Ducum Curlandiz stirpis progenitorem. Demum captus
à Moschis Vellinum arcem munitissimam obsidentibus Anno 1560. circa
festum S. Jacobi, in Moschoviam abducitur; ubi nequicquam adhibitis
Ferdinandi I. Imp. commendationibus, & frustra à Wolsfango Magni
Magisterii in Borussia administratore, & Ordinis Teutonici per Germa-
niam atque Italiam Magistro, de eo in libertatem vindicando, An. 1564.
missis in Moschoviam splendidis Legationibus repetitus, in carcere
ærumnis & senio confectus decessit.

F I N I S.

E R R A T A

*Qua typotheta culpâ, absentis horum Poëmatum editoris characterem
non ubique affecuti, irrepserunt, Eruditus Lector,
pro suâ humanitate corriget.*

P Aginâ 20. lineâ 22. lege, Naladum. l. 28. & 30. leg. Martia. p. 23. l. 22.
leg. etia. p. 26. l. 10. leg. Phœbeâque. p. 31. l. 23. leg. cineri. p. 47. l. 22.
leg. Deciduis. p. 69. l. ult. leg. Tragœdiam. p. 87. l. 20. leg. quid. p. 89. l. 16.
leg. Nasadum. p. 95. l. 3. leg. in amnes. p. 111. num. 7. leg. 737. & dele 740.
p. 122. l. 1. & 23. leg. Senda. p. 152. l. 27. leg. tumultuantis. p. 167. l. 21. leg.
volucres. p. 181. l. 16. leg. unâ. p. 185. l. ult. leg. Nuntius. p. 198. l. ult. leg.
Pegaseolympa creata pede. p. 201. l. 20. leg. cubant. p. 203. l. penult. leg. co-
lumnis. p. 223. l. 6. leg. sfaret. p. 224. l. 19. leg. Et Castra, Scythico. p. 225.
l. 8. leg. Mincius. p. 238. l. 6. leg. certat. & l. 7. leg. Cœcuba, p. 241. l. 16. leg.
Virgill. p. 252. l. 25. leg. Sacula. p. 259. l. 8. leg. hereditarii. p. 263. l. 12.
leg. Lycæi. p. 290. l. 12. leg. lepor p. 308. l. 20. leg. nuntia.











*⁸, **⁹, A - X⁸, Y⁴

89.
✓ 1888.

Litt. l. Caten.

Poetee

Germani.

